

М. И. Л. О. М. О. В. А.
У. Д. Е. Л. О. В. А.

2011. 01. 02. 10. 30. 2011.
10. 01. 02. 10. 30. 2011.

10. 01. 02. 10. 30. 2011.

DE
REGIMINE
MAGNORUM
AUXILIORUM

In Curationibus Morborum

DISSERTATIONES QUATUOR.

DE OFFENSIONIBUS
MEDICI OPEROSI

DISSERTATIO SINGULARIS,

AUCTORE

HOMOBONO PISONE
CREMONENSI

In Academia Patavina Medicinæ Practicæ
Professore.




PATAVII, MDCCXXV.

Typis Joannis Baptistæ Conzatti.

SUPERIORUM PERMISSU.

303695



JOANNI PETRO
PASCHALICO

MICHAELI MAUROCENO

EQUITI

LAURENTIO THEUPULO

EQUITI, ET D. MARCI PROCURATORI

REI LITTERARIÆ PRÆSIDIBUS,

CETERISQUE EJUSDEM ORDINIS
VIRIS SPECTATISSIMIS

HOMOBONUS PISO
F.



*Vandoquidem, Amplissimi
SENATORES, ex Pa-
triae instituto, Vestraque In-
dolis excellentia studiosam*

*Juventutem optimis artibus instrui summa ope ni-
timini, mihi dubitandum non fuit, quin ha-
sce meas lucubrationes Tironum profectui Vobis
opta-*

optatissimo elaboratas equali benignitate excepturi
essetis, Vestroque faustissimo Patrocinio aucturi.
Medicam praxim artis universæ scopum favorabi-
li Vestro jussu annos triginta septem in Gymnasio
excolui, eamque diuturnæ consuetudine, fructus
ubertate, & majore cum vero similitudine mihi ca-
riorem typis etiam excolendam suscepi, instillan-
damque Juventuti. Alteram hujus generalem par-
tem ante paucos annos publici juris feci, alteram
in præsens facio, complexam grandium auxilio-
rum rectam administrationem in morbis: unde la-
tior, fertiliorque patet scribendi campus, quam
ex conquisitis illecebris novarum opinionum, nihil
opportunis ad artis adjutricis incrementum. Quem-
admodum enim navis rector, sive veteri rudique
indutus veste, sive nova eleganterque concinnata
ad gubernaculum movendum accedat, peritius
non movet; item Medicus beneficentior non adsi-
stit ægroto, sive veteris Physicæ, & Medicinæ in-
structione, sive novitatibus sparsæ morbum medi-
tetur. Itaque non gloriæ inventoris, & novato-
ris sitiens, sed utilitatis ægotantium, erudiendæ-
que juventæ, animum appuli ad eam Medicinæ
partem, quæ neque rerum vetustarum caviem, ne-
que novarum instabilitatem, vicesque patietur, &
tota erogatur in excutienda remedia sensuum ju-
dicio exposita, usuque quotidiano celebrata. Ex-

tant

*tant quidem de eodem argumento antiqua & nu-
pera monumenta, sed illorum prolixitas, & distra-
ctio in varias Galeni interpretationes Tironibus
negotium facessunt; aliorum doctrina non admo-
dum conducibilis est, contracta quidem & libera
litigiis verborum, sed fere minus exacta ad leges
sectæ Rationalis proximiorque Empiricæ. Quocir-
ca ex utrisque facta utiliorum collectione, demptis
impedimentis, additisque, quæ desiderari judicavi,
diffusus minime sum, exiturum opus esse, & Ti-
ronibus fructuosum paratumque, nec alteris nau-
seam crambes recoctæ paritutum: quo nomine
contendi, omnia clare, distribute, simplici in-
compositoque sermone explanare, qualem optat
Seneca^(a) in oratione dante operam veritati. Illud
quoque ad communem utilitatem permagni inter-
esse existimavi, si verissimam Valesii sententiam,
Calamitosius esse agrotis, incidere in Medicum
nescium quiescendi, quam agendi, in uberiore
lumine collocarem; idque consecuturus post exposi-
tum regimen magnorum auxiliorum in morbis cu-
randis, obtendi gravem multiplicitem occasionum
errandi in Medicina, & fallaciam remediorum,
præclaram rationem, cur Nostri acrius pensitent a-
gendi momenta, evadantque parciores incertorum.*

Habetis, Sapientissimi TRIUMVIRI, quo
men-

(a) Epist. 4.

mentem meam intenderim in hoc opere emittendo,
rara quidem & singulari supellectile vacuo, non
autem sedulitate, & sollertia, quam potui, ma-
jore; qua mihi demandatum munus tradenda pra-
xeos executus sum, & conatus Vestris beneficiis
quadantenus respondere, gnarus me plane & in
totum non posse. Eadem in praesens mihi mens est,
idemque in senectutis meae imbecillitate contendo;
nec unquam contentionem sponte remittam, Ve-
stra beneficentia excitatus fretusque; qua meam
praeeritam aetatem large fovistis, & futuram egen-
torem fovendam spero. Plusquam dimidium vitae
spatium exegi Patavii sub hoc caelo naturae favo-
re, & afflatu clementiae Vestrae saluberrimo; nec
unquam mihi vita in votis fuit, nisi quo tempore
incaepi hunc spiritum ducere, vestra jura capes-
sere, & Serenissimo Imperio subditus esse, imo
quodammodo ad partem Imperii admissus. Vera
siquidem libertas est, & quoddam genus Imperii
iis legibus obtemperare, quibus dominus & sub-
ditus obtemperant, ut par sit utriusque conditio,
imo subditi melior; qui vacuus pondere, curisque
regiminis eadem tranquillitate, & libertate dona-
tur; nec aliud onus sibi impositum sentit, nisi quod
ipse sibi imponeret, si dominus esset ad tuendam
publicam societatem, ad quam natura inducti su-
mus, institutique. Amore erga nos, quo nasci-
mur,

mur, & cupiditate nostræ conservationis, animadversione Tullii^(a), ferimur omnes ad societatem & communicationem utilitatum, sine qua, neque ingenitum amorem alere possumus, neque conservationis desiderium explere. Ergo liber est, parque propemodum imperanti, qui parendo suæ naturæ jura servat, eandemque subit parendi necessitatem, quam imperans ipse; præterea eximitur omni oneri a communis conjunctionis custodia non postulato. Quanta vero lenitate, & convenientia cum humana natura ad libertatem nata ipsa imperandi ratio temperetur, ingens ubique Venetæ regionis populi numerus, amor, obsequium, alacritas, & felicitas præclare testantur. Si enim, uti visum est Tullio, qui bene imperat, aliquando paruerit necessum est, an non jucundissimum rectissimumque erit imperium ea duntaxat jubentium, quibus pariter ipsi obediant? Hanc optatissimam conditionem cum universis Venetæ Ditionis communem cumulat omnibus numeris expleta benignitas, & liberalitas, qua ex publico consensu Litterarum Cultores Patavino Lyceo adscitos, Providentissimi ejusdem Moderatores, complectimini, efficitisque, ut cum magna vitæ honestate parem jucunditatem conjungant. O munificentiam optime collocatam, veræque gloriæ feracem! Habemus ex Tullio^(b), principa-

b

(a) Lib. 5. de fin.

(b) Lib. 2. de fin.

principale honestorum, & laudabilium in scientiis positum esse; ideoque Principi in amore litterarum flagrantissimo, iisque excolendis, promovendisque liberalissime dedito nihil ad summam honestatem, laudemque deesse posse. Cum autem ab honestate nunquam utilitas separatur, uti Socrates apud Tullium definit^(a), illa hercle uberrima manat in principatum ab excultis, provectisque scientiis, Sapientiae altricibus, in quarum usu maximum praesidium ad regna beanda Plato collocavit. Hac rectissima mente, intentaque scientiarum, & sapientiae cultui, nulla temporum iniquitate, nulla rerum mutatione interrupto intermissoque Publicus vester Dominatus fulcitur, & iccirco ceteris aetate major, aequalisque futurus, sic animo praesentiente, totius orbis aetati. Nutant imperia, atque internis, vel externis ictibus concussa tandem diruuntur; quorum fulcimentum totum est in metu populorum, non amore, in severitate legum, non equitate, in vi, astuque Moderantium, non probitate, & lenitate, in robore, & licentia militari, onerandisque vectigalibus, non in animorum ornatu, augendisque singulorum fortunis. An non igitur de vestra Reipublica perpetuitate jure sperandum erit? in qua nihil violentum est, nihil improvida festinatione deliberatum, nihil contra equitatem, hu-

(a) Lib. 3. de off. cap. 3.

humanitatem, fidem, & constantiam, sed omnia comparata ad Suos fortunandos, Externos alligandos, pacemque tuendam: quam non sine divino afflatu Majores vestri pro votorum, & curarum summa sibi designarunt. Urbem itaque vestram opere plus quam humano conditam, imperiumque sub faustissimis auspiciis Pacis tamdiu Superi conservabunt, quamdiu pacis erunt immutabiles amatores protectoresque. Hoc intentissimo pacis studio in Vobis ceterisque Patriciis fovetur aequalis amor, & cura optimarum artium, ut externa paci pax animorum ex cognito vero proficiscens adjungeretur, hisque copulatis nihil superesset optandum ad cumulum tranquillitatis humanae. Quam sapienter igitur Augustus Senatus adeo prolixus est in Patavina Academia, florentissima omnium scientiarum sede, conservanda, amplificandaque, Vosque, Viri Summi, moderanda praeficit! nempe qui aut supremis legationibus, aut gravissimis magistratibus obitis, magnificentia, vigilantia, consilii, equitatis, probitatisque singulari facto periculo longe plurimum eminentis. Vobis de Patria optime meritis, id regimen ceterorum princeps decernit, Vosque non rerum caducarum & fortuitarum, sed immortalium Patronos constituit, exhibetque luculentissimum testimonium, quam ample magnificeque de Vobis sentiat. Valde sapien-

tis est documento Tullii^(a), judicare de Sapiente; ideoque videtis, quanto in pretio Patrum prudentia vestras perspectas virtutes habeat, quibus de re litteraria, Sapientiae robur, ut ait Tullius^(b), fovente, judicium, & tutelam committit. Hæc dum commemoro, vestramque consultissimam rationem regenda Academiae mihi tot annos comper- tam mente revolvo, gravem acciperem dolorem, mihi vires defuisse ad Publicae Majestati pro di- gnitate respondendum, nisi vestra beneficentia in me pluries effusa me confirmaret, meamque se- nectutem solaretur. Ad hanc igitur perductus hoc tenui studiorum meorum monumento, quibus ope vestra vacare potui, Vobis reverentissime oblato, extrema prævenio, animique contentione, quam possum maxima, precor a Deo Optimo Maximo af- fluentiam omnium prosperitatum, Patriæque Vestrae beatissimam perennitatem, Vobis omni privata fe- licitate potio- rem, cario- remque.

(a) Lib. 2. de Nat. Deor. (b) In Part. Orat.

I N D E X C A P I T U M

DISSERTATIONIS PRIMÆ.

- Cap. I. **D**E venæ sectionis effectibus primariis, & secundariis. Pag. 1
- Cap. II. Sola quantitas superflua, & infesta indicans est venæ sectionis, ut evacuantis. 14
- Cap. III. An liceat venam in cacochymia evacuationis gratia resignare. 24
- Cap. IV. De Indicante Phlebotomiæ ut revellentis, & derivantis. 35
- Cap. V. Expenditur celebre præceptum Hippocratis de venâ præcidenda. 41
- Cap. VI. De impedimentis venæ sectionis acceptis a rebus naturalibus, & primo a viribus. 45 De impedimentis venæ sectionis acceptis ab aliis rebus naturalibus. 51
- Cap. VII. De impedimentis venæ sectionis acceptis ex rebus non naturalibus. 62
- Cap. VIII. De impedimentis venæ sectionis acceptis ex humorum vitio. 77
- Cap. IX. De impedimentis venæ sectionis acceptis a morbis. 96
- Cap. X. De impedimentis venæ sectionis acceptis ab symptomatis. 110

DISSERTATIONIS SECUNDÆ.

- Cap. I. **D**E Purgatione, & Medicamento purgante. 119
- Cap. II. De indicante purgationis inferioris. 131
- Cap. III. De comparatione purgationis cum venæ sectione. 133
- Cap.

- Cap. IV. *De impedimentis inferioris purgationis acceptis a rebus naturalibus.* 139
- Cap. V. *De impedimentis purgationis inferioris acceptis a rebus non naturalibus.* 147
- Cap. VI. *De impedimentis purgationis inferioris acceptis a rebus præter naturam, & primum ab ipso humore purgando.* 151
- Cap. VII. *De humoribus non coctilibus, aut coctione non indigentibus.* 162
- Cap. VIII. *De humoribus motis ad ambitum corporis, & in eo subsistentibus.* 166
- Cap. IX. *De impedimentis infernæ purgationis acceptis a morbis, & symptomatis.* 173
- Cap. X. *De Vomitu, ejusque indicante.* 185
- Cap. XI. *Utrum vomitio, an dejectio sit præstantior evacuatio.* 192
- Cap. XII. *De impedimentis vomitionis.* 197

DISSERTATIONIS TERTIÆ.

- Cap. I. **D**E Sudore, ejusque causis, & viis. 208
- Cap. II. **D**E instrumentis eliciendi sudoris. 214
- Cap. III. *De Indicantibus Sudoris.* 219
- Cap. IV. *De Impedimentis provocandi Sudoris acceptis ab rebus naturalibus, & non naturalibus.* 225
- Cap. V. *De impedimentis Sudoris ab affectionibus præter naturam acceptis.* 231
- Cap. VI. *An evacuanda per sudorem coqui debeant.* 242

DISSERTATIONIS QUARTÆ.

- Cap. I. **D**E usu Hydrargyri ad excitandam salivam. 247
- Cap. II. **D**E An peculiare humores per os Hydrargyrum evacuet. 258
- Cap. III. *Ostenditur, Hydrargyrum ad salivandum remedium esse*

	<i>esse consentaneum Dogmaticæ Medicinæ.</i>	264
Cap. IV.	<i>De Indicantē Salivationis per Hydrargyrum.</i>	271
Cap. V.	<i>De impedimentis provocandæ salivæ per Hydrargyrum acceptis a rebus naturalibus, & non naturalibus.</i>	280
Cap. VI.	<i>De impedimentis ducendæ salivæ per Hydrargyrum acceptis a rebus præter naturam.</i>	290
Cap. VII.	<i>De præparatione corporis Hydrargyro perducendi ad salivationem.</i>	301
Cap. VIII.	<i>De indicationibus generalibus occurrendi Hydrargyri noxis.</i>	305
Cap. IX.	<i>Utrum præstet præbere Hydrargyrum ad provocandam salivam, an alvum mistura purgantium.</i>	318

INDEX CAPITUM DISSERTATIONIS

De Offensionibus Medici Operosi.

Cap. I.	D <i>E internis occasionibus errandi in Medicina.</i>	331
Cap. II.	D <i>Expenduntur signa dominantis in corpore humoris morbidi tradita ab Sanctorio tamquam demonstrativa.</i>	349
Cap. III.	<i>De causis externis errandi in Medicina.</i>	376
Cap. IV.	<i>Ostenditur, quam in lubrico versetur frequentator venæ sectionis in febris.</i>	385
Cap. V.	<i>Expenduntur argumenta venæ secandæ in febris proposita ab Joanne Freind tamquam evidentia.</i>	413
Cap. VI.	<i>Expenditur frequentia venæ sectionis in inflammationibus internis.</i>	423
Cap. VII.	<i>Ostenditur, quam in lubrico versetur purgationis frequentator in febris.</i>	441
Cap. VIII.	<i>Expenditur frequentatio expurgationis in morbis longis.</i>	460

NOI RIFORMATORI DELLO STUDIO DI PADOVA.

A Vendo veduto per la Fede di Revisione , ed Approbazione del P. F. Tomaso Maria Gennari Inquisitore nel Libro intitolato *De Moderamine Magnorum Auxiliorum lib. 8 , De Offensionibus Medici actuosi lib. 3. Autore Homobono Pisone Cremonensi &c.* non vi esser cosa alcuna contro la Santa Fede Cattolica ; e parimente per Attestato del Segretario Nostro , niente contro Principi , e buoni costumi , concedemo Licenza a Gio: Battista Conzatti Stampatore in Padova , che possi esser stampato , osservando gli Ordini in materia di Stampe , e presentando le solite Copie alle Pubbliche Librerie di Venezia , e di Padova .

Dat. 10 Febraro 1732.

(Gio: Francesco Morosini K. Rif.

(Pietro Grimani K. Proc. Rif.

Agostino Gadaldini Segret.

D E
R E G I M I N E
MAGNORUM AUXILIORUM
In Curationibus Morborum.

DISSERTATIO PRIMA.

CAPUT PRIMUM.

*De venæ sectionis effectibus primariis , &
secundariis .*



Demonitus a Seneca , quæcunque salutaria sunt , sæpe agitari debere , sæpe versari ; ut non tantum nota sint nobis , sed etiam parata , deterritus minime sum ab scribendo vetera , & pluries tractata , sed saluberrima ;

quamvis in præsens antiquæ doctrinæ satietas plurimorum animos occupet , sola vellicet alliciatque novitatum prurigo , longe retroque relictis Priscorum vestigiis magna cum utilitate tandiu pressis . Illud etiam me confirmavit adversus Novatorum Genium , & Antiquitatis fastidium , quod nulli post mille sæcula nato , ut ait idem Seneca , ^(a) præcluditur occasio aliquid adhuc adjiciendi , actaque a Majoribus peragendi , nec ab aliis inventorum deest nova scientia , & dispositio , æquiore , & brevior via ad eorundem notitiam perducens , qualem hisce lucubrationibus certabo

A. enitar-

(a) *Epist.* 64.

enitarque munire. Ipsa porro inventorum retractatio, diligensque agitatio ita notitiam extendit, totque novas animadversiones elicit, ut ex sententia Tullii ^(a) rerum cognitio infinita evadat. Quod si in aliis facultatibus accidit, id multo magis in Medicina, quæ cum omnium artium Plinii ^(b) animadversione inconstantissima semperque novis opinionibus jactata sit, novam scribendi materiam ex facili suppeditare potest, partim vetustorum squalorem situmque detergendo, partim recentia, quorum copia, & varietate obruimur, rejiciendo, partim ad meliorem frugem redigendo. Ratio quoque scribendi a multis medicis scriptoribus neglecta, qui sua jejune, aspere, inconditeque evulgarunt Priscorum documentis retractatis gratam novitatem & sine tædio lectorem moraturam aspergere potest. Adeo displicuit Tullio ^(c) negligentia scribendi, uti licet in amore Philosophiæ flagrantissimus foret, nunquam ad eos philosophos accesserit, in quibus desideraretur apte disposita, nitida, urbanaque scribendi ratio, sine qua nulla potest esse ex lectione delectatio abs Tullio quæsitæ. Si quis autem eo se animo ad Medicinam conferret, quo Tullius ad Philosophiam, expeteretque voluptatem aliquam ex descriptionis modo, eam profecto ex paucis auctoribus percipere posset: siquidem bene multi ita negligenter suas cogitationes litteris mandarunt, ut lectorem non omnino impositum alienent, non alliciant, molestia, non delectatione afficiant. Philosophica quidem, itemque medica laboriose accersitum ornamentum respuunt, accuratumque nimis sermonem, reprobantque Seneca ^(d) scribens philosophiam moralem ut putidum; commendat tamen cultum, & eloquentiam obviam, & paratam, aut parvo constan-

(a) *Lib. 3. de Orat.* (b) *Lib. 29. Nat. Hist.*

(c) *Lib. 2. Tuscul. Questio.* (d) *Epist. 75.*

tem, quæque non sollicito contingere potest; qualem Tibi Superi concessere, Joannes Ferneli, qui magnam Medicæ doctrinæ gravitatem cum parili eloquentia, & naturaliter colorata conjungens Æmulus facundissimi Romanorum prædicaris. Æger quidem medicum sanantem quærit, non disertum, sicuti navigaturus peritum nautam, non formosum; cum utrumque peritia tueatur, non istum forma, non illum sermonis concinnitas. Tamen qui Medicinæ dat operam, animumque induxit, dum in umbra, & otio sedet, vacare suis meditationibus posterorum utilitati, & litteris convenienter uti, magnopere cavere debet in scribendo incuriam, in idque incumbere, ut Medicinam tanquam nobilissimam Philosophiæ partem verset, ab liberalibus etiam ingeniis excolendam, non tantummodo ut artem quæstuosam a plebeiis. Itaque in publicum iterum proditurus sine novis, rarisque repertis, animum, mentemque conjeci in materiam tanto utiliore, quanto vulgatiorem, ante paucos annos editæ conjunctam, eamque distribute, lucide, pure, presseque, quantum per me licet, exponendam. Quo confecto, ut loquar cum Horatio, publica materies privati juris erit; & fructuosa quærenti gratius faciam, quam novitatum apparatu; speroque tamen de tritis rebus novas considerationes non defuturas. Ita porro barbariem, & dictionis inconcinnitatem evitare studebo, ut nunquam oculos ab recta ratiocinatione dejiciam, quæ mihi semper potissima cura fuit, eritque nil commoto a laxiore studiorum ratione hodie medicis adprobata. Nihil certe ad dialecticam attentius exigendum est, quam magnorum auxiliorum usurpatio, in qua apex Medicinæ, honor medentium, & salus ægrotantium posita sunt. Suaferunt ut hanc materiam potissimum versandam eligerem, munus meum tradendæ praxeos in Academia tan-

diu obitum, gravitas, necessitasque doctrinae, demum mea natura, ætasque senilis ad solidiora utilioraque propensa. Passim in contemplatione rei medicæ obscuræ, & dubia offendimus, sed plura, magisque ambigua in his, quæ potius physica sunt, quam medica, longeque distant a praxi, fere plena imaginationibus, & arbitriis, frondibusque affluentia, sed vacua maturo fructu, qualem optat quæritque Senectus. Quocirca hisce relictis totus addictus sum dirigendo officio Medici, scilicet occupationi ad senectutem aptiori, quæ per longam rerum agitationem opinionum vanitate comperta, dubentius ea confectatur, quæ proxime cum opere copulata sensum suum quoque fide comprobantur, neque tot erroribus patient, quot vagæ imaginationis opera. Unde plures Philosophi, qui in juventute, & vigente ætate physicorum commentationi operam impenderunt, in senectute animum appulerunt ad moralem Philosophiam, quæ proxime opus attingit, uti pars Medicinæ, quam alias agitavi, & nunc agitare pergo. In utraque disciplina eadem est ratio studii, idemque scopus, regimen actionum, in altera earum, quæ pertinent ad valetudinem animi, in altera corporis.

esordio Bellij^{mo}

Paucis ante annis scribens de methodo medendi, tantummodo complexus sum spectantia ad generalem ejusdem constitutionem, atque ad inventionem indicantium speciem remediorum; nulla ex professo particularia remedia expendi, de quibus scriptores Methodi post traditam universalem rationem tractare solent. Sic doctissimus Fernellius præmissis summis medendi legibus, agit de venæ sectione, purgatione, deinde investigat medicamentorum varias facultates, universamque eorum materiam diversis corporis partibus, earumque morbis accommodatam persequi-

sequitur : quam latissimam provinciam obeundam non suscipio , sed duntaxat tractandum de magnis , & usitatioribus remediis , quorum efficacia diligentiore operam administratoris requirit , propter notabiles effectus salubres , vel insalubres , secuturos diversitatem administrationis . Hoc additamentum emisso operi satis esto , eorum auxiliorum examine relicto , quorum utendi ratio minus exhibet negotii , infrequentiorque usus est . Paucioribus intentus , neque in plura distractus , fortius eisdem adlaborabo ; mihiq; breve percurrentum spatium præfinivi , quo pari passu a carcere ad calcem incederem , nec longitudine viæ vires infirmarem . Itaque agam de venæ sectione , purgatione , sudoris excretionem , itemque saliva per hydrargyrum provocanda , inquiramque quemadmodum singulæ vacuationes utiliter celebrandæ sint : quas omnes in numerum magnorum auxiliorum conjicio . Venæ sectionem , & purgationem esse magna remedia , tritum est in schola Priscorum ; nec indubium vocatur , usum hydrargyri ad eliciendam copiose salivam , uti fit in morbo celtico , aliorum excedere magnitudinem . Solum dubitari potest de excretionem sudoris copiosi , quod infra commodius excutiam , de eadem speciatim agendo . Ergo tractationis initium erit , examen venæ sectionis , de cujus impedimentis Sanctacrux utiliter ad Tirones scripsit : sed utilius , & absolutius fuisset opus , si prius illius indicantia exposuisset , subjecisset impedimenta , ut exequi decrevi .

Venæ sectioni antiquissimo remedio , quod Verna omnium principem appellat , a Podalirio , ut aliqui narrant , invento plures contradixere , & primo Chrysippus cneidius , cujus vexilla secuti sunt Medius , Aristogenes , Erasistratus , aliiq; non pauci etiam ex Recentioribus , quorum

rum opinationi refellendæ hoc loco non imminor; tantum obfistam, ubi contrariæ rationes obviam opportune venient, sed breviter, congruenterque ad meam studiorum rationem: siquidem hanc defensionem contra Helmontium toto conatu suscepit Verna, supraque indigentiam persecutus est, omnia excutiens ab irato adversario inconsiderate effutita. Videntur tamen in totum non reprobandi venæ incisionis oppugnatores, attento tanti remedii usu pravo; quo vel negligentia, vel ignorantia, vel intemperantia Medentium sæpius in damnum ægrotantis convertitur; teneoque pro certo, me non longe a veritate aberraturum esse, si dixerò, ex centum venæ sectionibus de more imperatis tertiam partem cum vera ratione vix fieri, & bene vertere. Detrahit scalpellum animæ proxima instrumenta spiritus, vitæque altorem sanguinem deprædatur; quem per sanitatem non solum e nobis aliquanto largius effluere inviti patimur, sed etiam ex aliis: imo constat aliquos exanimatos esse ad intuitum sanguinis ex vulneribus a se inflictis erumpentis; adeo natura avida ejusdem est, nosque ab effundendo deterret. Quo commonemur, quam caute & considerate sit effundendus; & quantum naturæ anticipationem negligant, qui levi quacunque de causâ vitæ conceptacula inscindunt, adimuntque fulcimentum. Lubricum est etiam circumspectis viris, venam tempestive aperire, propter varia, & fortuita inde consequentia, & propter obscuras, ambigualque notas veræ opportunitatis; sed multo periculosius est scalpellum ab aliis districtum, soli consuetudini servientibus, omniaque ex lucro metientibus. Quis non videat, si paulum advertit, eorum ictus frequentius esse noxios, quam salutares, & esse vulnerantium, non sanantium? Ut igitur rei tanti momenti, & usui quotidiana-

diano expositæ pertractandæ viam præsternam, antequam indicantia, impedimenta que venæ incisionis propono, inquiram, quid illa apta nataque sit efficere suis, aut fortuitis acquisitisque viribus. Habet enim sanguinis detractio vires ingenitas, habet fortuitas, & aliunde adscitas ob varium sanguinis ipsius statum, aliarumque accidentium concursum: ex quo varia præstare fortuito potest, videlicet calefacere, exsiccare, humectare, incrassare, attenuare, aliaque diversa, neque expectata, & provisa efficere. Calefactio videtur contraria sanguinis effusioni, nec inde posse oriri; quatenus sanguis fomes est caloris, ejusque detractio fomitis partem adimit, & caloris. Tamen evenire potest, ut per venæ sectionem mutato partium contactu, laxataque compage, particulæ calidiores, tenuioresque solutæ ab crassioribus coeant, & fortius agitentur, intensioremque calorem accendant. Cum autem intensior calor, si perseveret, plus humidi absumat, hoc etiam respectu phlebotomia erit idonea exsiccare. Ea quoque ratione sanguis per venæ apertionem magis incallescere poterit, si plus justo inanita vasa hauriant humorem biliosum, vel alios exoticos succos in cavitatibus contentos, aptosque ad augendam sanguinis fermentationem, vel alium motum concitandum; qua forsitan de causa interdum incidit, ut incisa vena in simplici tertiana duplicem reddat, postea continuam. Efficax etiam venæ punctio creditur ad promovendam perspirationem, non minuendam; & hinc a Methodicis Medicis abs Themisone profectis inter præcipua remedia ad reserandos clausos meatus collocata fuit: unde forsitan manavit tritum effatum Galeni, saluberrimum esse in putridis sanguinem emittere, quas a prohibita ventilatione corporis accendi autumabat. Perpetuum tamen non est, a venæ incisione

v. 5
calefacere
et exsiccare
in solutio
ultrij ca

ab
6:

fione adjuvari insensilem perspiratum reclusis clausis meatibus, requiriturque certa sanguinis mistio, quantitas, viriumque robur par sustinendæ futuræ detractiōni. Absque dubio vegetus cordis pulsus, arteriarumque oppido conducit ad faciliorem insensibilium excretionem: ideoque eodem debilitato illam posse retardari, minuique quis ambigat? Observatum fuit ab Sanctorio (de Ponderatione) viribus jacturam patientibus, copiam solitam insensilis effluviū decrescere, atque accisis viribus æquari. Hinc admonemur, non adeo fidendum esse remediis, ut vulgus solet, quasi unum eundemque semper effectum parituris, si possunt etiam contrarium. Alter effectus adventitius, & fortuitus venæ sectionis est humectatio corporis, consequens ad refrigerationem inductam a calidi vacuatione, nec ablatam ab ullis ex dictis causis calefacientibus. Manifestum est refrigerato sanguine, & perdurante refrigeratione minus humoris dissipari, sicque copiam majorem superesse; & humidius corpus reddi. Porro ex sanguinis impendio non solum primæ qualitates immutantur, calor, frigus, humiditas, siccitas, sed etiam secundæ, & has inter habitus ejusdem, sive, uti vocatur, consistentia. In sanguinis detractiōne reliquus commovetur, & commotione attenuatur, & præsertim ex detractiōne facta tempore calido, atque in calidis temperaturis. Unde Veteres phlebotomiam æstivo tempore declinabant veritine per id tempus sanguis extrahi ad naturam bilis perduceretur, magis attenuatus, & percalefactus. Pari-ter variant effectus ejusdem auxilii, ut major, vel minor est copia sanguinis, quo tempore vena inciditur; quæ nempe incisa, corpore sanguine non redundante, affligit vires, in redundantia opprimente, recreat. At Helmontius in oppositum intentissime pugnat, persuasus, non posse san-

sanguinem nimietate peccare, & viribus obesse, imo una cum sanguine vires augeri, & hæc duo ita inter se se nexa esse, ut ex robustis viribus sanguis gliscat, & vicissim ex aucto sanguine vires, docentibus sacris litteris, animam, hoc est robur vitale in sanguine consistere. Generatim Helmontius pronuntiavit, quod restrictius, & verius Fernelius, dum inquit (de signis plenitudinis) vires plerumque, ut in habitu athletico, cum sanguine, & carnis mole æquabiliter crescere. Verum hæc cogitanti, opponentique Helmontio ipsa natura in Hyppopotamo alvei niliaci pisce occurrit, qui longa satietate obesus turgens exit in littus, & speculatus inter cæsuras cannarum acutissimum stipitem impresso pede venam sibi vulnerat, detractoque sanguine in flumen alacrior redit. Quid mirum igitur juvenem robustum, & optima sanitate fruente, omnibus curis solutum, diuque usum opipara mensa sanguinis copiam congerere, cum molestia distendentem vasa, & alacritatem facultatum minuentem? Constat ex Statica Sanctorii imminuta, & retardata perspiratione corpus gravius fieri, minusque ad sua munera expeditum; eamque retardari, minuique ex copia distendente non solum doctrina Galenica docet, sed ipsa rerum natura. Turgentibus omnibus vasis sanguine, capillaria quoque circum undique in corporis habitu distenduntur, comprimuntque glandulas subcutaneas, vasque transpirabilium excretioni fervientia, & compressa minus excerni permittunt. Si sanguinem hac occasione demas, nonne vides inde ablatum iri distensionis molestiam, corpus levatum, viresque copia pressas erectum? Quis porro probaverit, sanguinem ita exuberare non posse, ut vasa nunquam incommode distendat, saltem accessione variarum causarum nos alterantium, & magnam

partem inevitabilium? Habes responsum ad Helmontianum argumentum, ut medico necessarium est. Si cupis hac de re philologas amplificationes, Vernam adeas totum in commendanda phlebotomia. Dominicus Lascale faciens cum Avempoluca arabico medico habet pro fabuloso, quod narrat Plinius de Hippopotamo, eventumque ita interpretatur, quasi fortuito sanguis ex Hippopotamo manaret, non ex impresso pedi acuto stipite harundinis, uti Plinius narrat. Mihi vero consideranti, quam mira efficiant animalia suo commodo, suorumque foetuum, improbable non videtur ita esse institutum, & comparatum equum fluviatilem, ut molestiam persentiens sibi venam pedis, oblato cesæ cannæ aculeo aperiat. Facilius est naturæ miranda moliri ad sua opera tuenda, quam nostræ imaginationi concipere; neque ejus potestatem, & amplitudinem nostro captu metiri fas est. Si tamen id neget Condemnator phlebotomiæ in belva, certe negare non poterit, quod evenire videmus in hominibus, quibus capitis gravitate, vel dolore laborantibus sanguis e naribus sponte exiliens sæpe levamento est. Sicut autem copia sanguinis caput gravat, ut ostendit fanatio, quid mirum inde totum corpus gravari posse, & levari per illius vacationem? Amputato brachio, vel crure in sphacælum corrupto, vel alia ex causa, utile creditur quotannis saltem in vigore ætatis venam cruentare, quominus sanguis solitus distribui membris ante amputationem, in reliquis perniciose cumuletur. Id argumentum propositum fuit ab Legato Regis Anglorum Condemnatori Phlebotomiæ, tanquam evincens, posse congeri supervacaneam, & noxiam sanguinis copiam, nec infirmum esse fatetur Condemnator; tamen responderet, post obtruncata membra *majorem a natura effici sanguinis*

guinis consumptionem, quæ ex sale in sanguine nidulante dependet, & de illius superabundantia majus fieri dispendium, aliasque partes aliquando perfectius nutriri. Hæc omnia donarem Adversario, si causam attulisset, cur, defectis quibusdam membris quantitas sanguinis solita illis nutriendis impendi, partim a sale dissipetur, partim erogetur in uberiores nutritum reliquorum membrorum. De qua tamen nihil dixit, nec ullo experimento ostendit, post sectionem membrorum reliqua ex copiosiore nutritione subsecuta augeri, totamque difficultatem arbitrio, non ratione solvit. Neque sane hanc solvere in proclivi est, observante Galeno^(a), in iis solere per circuitum redire sanguineam excretionem, qui a vita exercitata transeunt ad otiosam; item quibus aliquis artus præcisus est, ut inquit Hippocrates. ^(b) Poterius quoque credit, omnem Philosophiam ruere, si dicamus, posse sanguinis quantitatem nocere; qua scilicet non immutatur rei bonitas, sed augetur, perficiturque. Et sane, si consideretur quantitas abstracta, & quam habet in mente Poterius, fateor & ego, ex ea sanguinem non depravari, corrumpique. Si tamen comparetur quantitas sanguinis cum capacitate vasorum, & reputetur quid ex eis repletis, pro variis animalis accidentibus contingere queat, non obscure apparebit, quemadmodum ea sanguinem vitiet, & corrumpat, vel alias noxas infligat. Proxime vero quantitas sanguinem non corrumpit, sed corruptionis occasio est, si per eam, uti dictum est, imminuatur perspiratio, & inde febris excitetur. Similiter vasa proxime non diffringit, sed ruptionis occasio est in vehementi motu corporis, qui impetum faciens in vasa magna sanguinis copia distenta multo facilius hæc diffringet, quam mediocrem quantitatem continentia: quo respectu

B 2

Hip.

(a) *Lib. 3. de sympt. caus.* (b) *Lib. 2. de Febris cap. 8.*

Hippocrates monuit, cito solvendum esse habitum Athletarum. Porro periculum ruptionis, quod imminet a forti motu corporis, si vasa humore turgeant, pariter aliis ex caussis exagitantibus, & calefacientibus sanguinem impendere potest; itemque potest ex eisdem non solum ruptionis periculum, sed etiam inflammationis impendere.

Effectus primarii evidentes, & perpetui venæ sectionis sunt imminutio quantitatis, motus totius fluenti sanguinei incisam partem versus. Copiam tolli parte sanguinis adempta sensus judicat, nec ulla indiget instructione ad judicandum. Porro incisa vena totum sanguinem eam versus commoveri probat exinanitio vasorum inde secutura toto fluente exhausto, nisi foramen obturaretur.

Item venæ incisio primo per se refrigerat auferendo partem caloris cum sanguine exeuntis; deinde promovendo calidorum insensibile effluvium, & corporis perspiratum; demum tollendo sanguinis compressionem ortam ex illius affluentia. Ut enim explicant Recentiores, quando propter multitudinem sanguis vasa distendit, & ipse ab illis comprimitur, acquisitoque validiore elatere suis particulis validius concutit vasorum particulas; unde calor intenditur; & contra imminuta copia, & compressione remittitur. Verum enimvero refrigerationem non adnumero primariis, perpetuisque effectibus venæ sectionis: quippe quæ pro variis accidentibus interdum non refrigerat, interdum etiam calefacit, ut supra adnotatum est. Nunquam autem refrigerat, uti animadvertit Martianus^(a): si calor a sanguine non accenditur, sed ab humore bilioso. Quinimo idem auctor ibidem notat ex Hippocrate, sanguine immodice excreto febres excitari, & plerumque urentes propter bilem inde commotam, & commotione magis incalescentem.

Ex

(a) *Lib. 2. de Mor. Mulie. Hippo.*

Ex stabilitis primariis, & perpetuis effectibus phlebotomiæ duo ejusdem usus proficiſcuntur, videlicet ad minuendam copiam, corrigendumque motum præter naturam sanguinis per eam facta revulſione, & derivatione. Quia tamen eadem apta eſt per ſe refrigerare, niſi ex accidenti inhiſceatur effectus, aliquando refrigerationis gratia uſurpatur. Varia igitur præſtare poteſt venæ ſectio, & interdum accidere, ut ſimul tollat ſuperfluam quantitatem, revellat humorem aliquo præter naturam concitatum, derivet, refrigeretque. Si quis cum ſanguinis redundantia pleuritide dextri lateris tentari cœperit, vena in brachio ejusdem lateris perforata aufert plenitudinem, revellit, derivat, refrigeratque. Tolle plenitudinem; ſupereſt ſolum beneficium revulſionis, derivationis, & refrigerationis, niſi hæc ab aliquo fortuito interpelletur. In morbo autem, in quo ſola peccat copia ſine fluxu ſanguinis in certas partes petente revulſionem, & derivationem, ſolam affluentiam ſanguinis demet apertio venæ, non revellet, non derivabit, deficiente occasione revulſionis, & derivationis. Ut igitur variant indicantia, ſive occasio tundendæ venæ; item variat medentis intentio, qui modo unam tantum ex dictis utilitatibus ſibi reportandam præſigat, modo duas, modo omnes: quarum aliæ requirunt loci delectum in vulneranda vena, uti revulſio, & derivatio; aliæ ſolam vulnerationem, uti detractio quantitatis, & refrigeratio. Singularum igitur occaſiones veſtigemus, & primo detractioſis quantitatis.

CAPUT II.

Sola quantitas superflua, & infesta indicans est venæ sectionis, ut evacuantis.

EX contrariorum lege, universæ rationis medendi fulcimento, evidens est venæ sectionem tanquam prælidium evacuans ab sola quantitate supervacanea, & incommoda indicari posse; cui nullum aliud esse potest contrarium nisi detractio, unicum curationis instrumentum. Qualitati qualitatem opponimus, quantitati quid opponemus, nisi vacuationem? Cum autem vulgari sermone dicimus esse vacuandos malos humores, ad qualitatem respicimus inhærentem quantitati, sive rebus quantitate præditis, sine qua non conveniret evacuatio, sed sola correctio per contrariam qualitatem; id quod in medio positum est, extraque controversiam. Ergo primum in usu phlebotomiæ consilium, uti loquar cum Paulo, (*) est sanguinis redundantis ablatio, quæ quidem multimodis obtineri potest, parsimonia cibi, frictione, exercitatione, aliisque vacuantium generibus, sed citissime vena incisa. Quocirca statim ac compertum habemus sanguinem immodice adauctum esse, distringendum scalprum non est, sed meditanda redundantiae mensura, aliaque accidentia vel lentam detractiōem permittentia, vel celeriter factam exposcentia. Quantitas per venæ apertionem adimenda hujusmodi sit oportet, ut aliqua ratione magnum morbum pariat, vel foveat, vel minetur, nec tardam evacuationem patiatur. Quamvis enim in præsens tam levibus de causis sanguis hauriatur, quasi detractio parvi momenti foret,

ta-

(a) Lib. 6. cap. 4.

tamen ab Antiquitate inter magna, & generosa remedia reposita fuit, & solum ex gravi occasione in usum vocata, quam vel solus magnus morbus præsens, vel impendens exhibet.

Copia sanguinis ab Antiquis duplex est constituta, altera pervulgato nomine appellata ad vasa, altera ad vires, tertiam tamen addidit Horatius Augenius^(a), ut ait, a Recentioribus prætermittam, sed a Galeno, & Avicenna indicatam, ortamque ex permistione utriusque plenitudinis. Cum igitur ex plenitudine venarum, & copia sanguinis existat potissima occasio sanguineæ vacuationis, diligenter in eam inquirendum est; de qua nondum satis explicate, meo judicio, pertractatum fuit, pluresque extant controversiæ, & obscuræ interpretationes maxime de plenitudine ad vires relata, quæ multo difficilior est altera ad vasa pertinente. Hæc nihil est aliud ex communi consensu, quam boni sanguinis affluentia eo provecta, ut distensione vasis vim inferat, cognosciturque ex sensu ipsius distensionis, & tumore totius corporis præsertim ab exercitatione, qua omnia membra exporrigi videntur. Quamvis igitur hæc plenitudo confletur a copia probi, utilisque succi, suspecta tamen est, redditque animal variis morbis obnoxium, nimirum aut ruptioni vasorum, aut lethali syncopi, aut corruptioni, aut aliis effectibus pro diversitate caussarum incurfantium. Dividitur hæc plenitudo ad vasa in puram, impuramque. Puram creat sanguinis ubertas nullius qualitatis excessu intemperati, neque humoribus alienis inquinati, qualem imaginatur Hippocrates in Athletis, de qua loquens ait, ad extremum bonitatis pervenisse. Impura levi vitio afficitur, contracto vel ab exuperante qualitate, vel mistione incongruentis humoris, vel

(a) *Lib. 2. cap. 4. de sang. mis.*

vel alteratione substantiæ non insigni, citraque formæ corruptionem: qua corrupta, quod fluit per venas, non impura plenitudo, sed cacochymia vocatur. Sic levis, imperfectaque putredo, & si sanguinis substantiam permovet, calorem adauget; quia ejusdem formam, & essentiam non demolitur, plenitudinis rationem non tollit, neque parit vitiositatem, quam Græci vocant cacochymiam. Alias enumerant Priscorum scholæ plenitudinis differentias, acceptas ex quatuor diversis humoribus, quibus credunt fluentum sanguineum permisceri; aliamque appellant sanguineam ex parte sanguinis proprie dicta, aliam pituitosam, melancholicam aliam, aliam biliosam, sumpta nomenclatione ex pituita, melancholia, & bile sanguinem componentibus: de qua compositione satis dixi in mea methodo, ad eludendas Recentiorum oppositiones, qui multo se sapientiores Majoribus existimant eorum humorum oppugnatione.

Satis de plenitudine ad vasa, quantum attinet ad præsens institutum. Plura dicenda supersunt de plenitudine ad vires dicta, propter dissensum auctorum in ea constituenda, & ipsius rei obscuritatem. Nomine plenitudinis ad vires communiter intelligitur copia major sanguinis, quam ut possit a viribus regi. Cum autem nomine virium comprehendantur omnes facultates nostri corporis, animales, vitales, & naturales, primo in controversiam venit, ad quam facultatem plenitudo referatur; atque alii hanc referunt ad facultatem naturalem imparem mutantem copiam in alimentum partium; alii vero ad facultatem animalem; idque non uno in loco videtur sensisse Galenus: cujus tamen verba in suum placitum torquet Horatius Augenius oppositæ sententiæ strenuus propugnator. Verum convenienter ad prisca documenta videtur plenitudo

supra

supra vires tribuenda esse duabus facultatibus, naturali, & animali; naturali, quia sanguis inde redundat, quod nequit converti in partium nutrimentum, & conversio pertinet ad virtutem naturalem; animali pariter tribuenda videtur, quatenus indicatur a sensu deprimentis ponderis, quem infert ea plenitudo, atque ad vim animalem spectare indubitatum est. Itaque ex diversa ratione plenitudo ad vires utramque facultatem attingit, naturalem, & animalem; naturalem tanquam sui causam, animalem tanquam indicium. Placuit id litigium dirimere juxta veterem doctrinam, quamvis aliter ego sentiam de hac plenitudine, cogarque plura deferere ab Antiquis tradita, ex quibus nulla illius idea mihi clara occurrit. Fernelius^(a) sancit plenitudinem ad vires illam esse, in qua tametsi sanguis nec qualitate, nec copia symmetriam, & commodationem excessit, vires alia quavis ex causa imbecillas premit. Veruntamen si causa debilitans interna est, non apparet quomodo possit conjungi cum sanguine omnis vitiositatis experte. Horatius Augenius,^(b) qui definit universæ plenitudinem sanguinis esse redundantiam supra mediocritatem, aperte sancit, etiam in plenitudine respectu virium esse quantitatem majorem mediocri: quo definito, peto, cur hæc abundantia attineat ad vires, quod ab hisce regi nequeat, non attineat altera, quæ vocatur ad vasa? Si enim regi nequit, utpote uberior naturali quantitate, multo minus regi poterit a viribus redundantia comparata cum vasis, magis exsuperans mediocrem quantitatem: quæ proinde potiore ratione dicenda esset plenitudo ad vires. Quod si dicant in una esse vires imbecillas, in altera robustas, quærendum est, utrum imbecillitas præcedat copiam, an consequatur. Præcedere certe non potest: qua

C

præ-

(a) *De Sig. lib. 2. cap. 13.* (b) *Lib. 2. cap. 4. de mis. sang.*

præcedente nequit congeri copia boni sanguinis, ex quo credit Galenus plenitudinem ad vires creari^(a); idemque affirmat generari non posse redundantiam probi sanguinis, nisi cum virium robore. Sin autem infirmitas virium sequitur abundantiam, hæc iccirco cumulata non erit, quia virtus naturalis nequiverit absumere certam sanguinis quantitatem in nutritionem partium; ideoque nulla erit ad vires plenitudo. Itaque adeo obscurum est, incertumque, in quo consistat hæc plenitudo, ut non defuerint ex Antiquis, qui eam nihil aliud esse decreverint, quam cacochymiam, nec ullam maiorem copiam cum ea necessario coniungi; ut a nullo Veterum tradita sint certa signa illius cognoscendæ; idque aperte fatetur Fernelius^(b), qui difficultatem cognoscendæ non dissimulavit. Sensu inquiunt plures Antiqui, incumbentis ponderis, & segnitia corporis ad motum plenitudinem ex comparatione cum viribus indicari: sed utrumque indicium valde ambiguum est; quippe utrumque ab aliis causis sine plenitudine aptum proficisci; uti accidit tempore austrino, quo humectatæ laxatæque fibræ musculorum corpus onerosius reddunt, tardiusque ad motum. Quid quod docet Sanctorius^(c) corporis viventis pondus æquivocum esse, & fieri posse, ut corpus sit solito onerosius, cum se quis leviolem persentit; contraque se graviolem sentiat, dum corpus levius est? Quid plura? Horatius Augenius^(d) exponens notas plenitudinis ad vires definite asserit, esse multum obscuras, neque fidendum esse corporis gravitati; sed contemplari oportere, an cum gravitate copulentur causæ sanguinis incrementum ostendentes, persuasus sine aliquo tumore venarum, & tensione, non posse cumulari dictam plenitudinem.

(a) *Lib. 9. Meth. cap. 5.* (b) *Lib. 2. Meth. cap. 2.*

(c) *De Pond. Apho. 29.* (d) *Lib. 1. de sang. mis. cap. 11.*

nitudinem inseparabilem ab augmento sanguinis exsuperante mediocritatem. Hisce attentis offendiculis ad concipiendam plenitudinis supra vires productionem, productamque internoscendam, existimo vel eam commentitium quid esse, vel nihil aliud esse nisi quantitatem sanguinis suapte natura innocuam, sed ex aliquo affectu superveniente redditam gravem; meumque sensum sic declaro. Fac aliquem mediocri sanguinis quantitate donatum, tertiana continua corripitur: dico quantitatem, quæ ante febrem onerosa non erat, sed statui corporis conveniens, oborta feбри fieri posse onerosam: quatenus sanguis incallescens intumescit, magis vasa distendit, copiosos halitus effundit, & hoc pacto minuere potest perspirationem, febremque fovere. Itaque copia, quæ ante morbum nulla sui parte superflua erat, redundansque, videtur ex morbo parte aliqua major evadere, quam ut debeatur statui corporis; & hanc, si placet, potes vocare redundantiam ad vires, sive ad statum corporis comparatam. Verna cum Erasistrato^(a) aliter constituit plethoram ratione virium: quæ tamen nihil est aliud, nisi plethora ad vasa in eo augmento, ut nimia copia viribus incommodet, & pariat affectum, sive lassitudinem ulcerosam; quam multo congruentius Scholæ Galenicæ succorum acrimoniæ adjudicant, quam Verna redundantia, quæ distensione declaratur, non sensu rei ulcerantis. Aliam præterea Verna astruit generalem plenitudinem, & ait succrescere non ex vitio liquidi in quantitate, vel qualitate, sed primario ab constrictione, & convulsione vasorum vi causæ exterioris. Quamobrem ex mente Vernæ ita possunt a causis externis omnia vasa angustari, ut difficulter capiant naturalem fluidi quantitatem, expeditumque cursum inhibeant. Causas vero

(a) *De Phlebot. part. 1. cap. 5.*

vero ad hanc restrictionem aptas enumerat multas & primo loco frigiditatem ambientis, quam unice expendam. Af-
ferebant Antiqui ab hac causa cutis poros obstrui, impe-
diri liberum perspiratum, impeditumque variorum mor-
borum effectorem esse: id quod facilius intelligimus, quam
inde omnia vasa coarctari, reddique sanguinem multum,
& superfluum. Etenim si vis frigoris pervadens totum,
intimumque corpus externa, internaque vasa stringit, ipsum
quoque sanguinem cogit, aptatque restrictis alveis. Dicat
Verna, cur sæviente frigore quartanæ, quo vehementer
vasa angustantur, & deprimuntur, inclusus sanguis sibi
viam alicubi non aperiat. Id evenire certum est, quo-
niam ab eadem causa sanguis ipse restringitur, & angustius
spatium sine violentia occupat. Sunt etiam tunicae vaso-
rum flexibiles, aptæque ad majorem extensionem; neque
tam facile, ut imaginatur Verna, sic arctari possunt a ni-
su externo, ut naturalem contenti liquidi motum turbent.
Sed liberum esto unicuique sua uti, vel abuti imaginatione.

Declarata nostra sententia de utraque plenitudine ad va-
sa, & vires, diligenter vestigandum est, quam utraque
vim habeat ad indicandam venæ vulnerationem. Quanti-
tas magna sanguinis in morbis, extraque morbos pericu-
losa est, tollendaque, licet quantitas spectata ab omnibus
accidentibus abjuncta nocere nequeat. Multa necessaria,
& fortuita occurrunt extra morbos in usu vitæ nos alte-
rantia; adversus quæ munitiores sumus moderata sangui-
nis copia, quam exuberante; quam proinde præservatio-
nis gratia prodest vel reclusa vena semel imminuere, vel
paulatim aliis adminiculis. Ut autem nondum præsentem
morbo grandis copia suspecta est, & providentiæ causa
recte aufertur; sic multo magis in morbis, quos vel pro-
ducit, vel fovet. Fateor tamen a sola copia proxime, &

per

per se non produci morbos, sed alterius causæ interven-
tu; uti cum eo usque increvit; ut perspirationem inhi-
bens, aut diariam febrem, aut putridam accendat; cujus
accensæ causæ proxima erit extraneum in venis retentum,
& sanguinem turbans, agitanque, causæ remota copia per-
spirationem impediens; cujus ablatio initium est curationis.
(a) Narrat Galenus Adolescentem liberum, & palæstræ pe-
ritum incidisse in febrem absque putredine hoc pacto. So-
litus erat sese palæstra exercere, intermissaque dies circiter
triginta hac consuetudine, sese deinde vehementius brevi
tempore exercuit, & postridie imputri synocho detentus
fuit. Ergo intermissio exercitationis uberiores sanguinis
copiam, pleniorisque corporis habitum peperit; & inde
consecuta est restrictio cutis, & diminutio invisibilis eva-
cuationis. Accessit vehemens exercitatio, qua multum
sanguis agitato incaluit, effuditque copiosam materiem
insensibilis perspirationis, quæ a constipatione cutis retenta
vim fomitis febrilis acquisivit, febremque excitavit cum
intolerabili calore, totius corporis tensione, temporum-
que pulsatione. Remedio fuit præsentissimo detractio san-
guinis usque ad animi deliquium, inde refrigerato sangui-
ne, depletis vasis, restitutaque libertate perspirationis.
Sanguinis igitur uberior quantitas fuit occasio obstructio-
nis, impediti perspiratus, & inde febris, quam tamen
non accendisset, nisi a vehementi motu corpus æstuasset;
nec vehemens motus facile corpus ad febrem præparasset, nisi
plenitudo adfuisset; quam proinde etiam per sanitatem adi-
mere conducit, quo minus adversa, & fortuita offendant.
Oborta febre Galenus elicuit sanguinem ad animum usque
deficientem non ablaturus causam proximam febris, sed
quæ fovebat proximam, & partem etiam proximæ: liqui-
dem

(a) *Lib. 9. Meth. cap. 4.*

dem ex vulnere venæ una cum sanguine copia calidioris, & tenuioris materiæ effluit, causa, ut opinor, simplicis synochi. Pone nunc ab eisdem causis generari inflammationem vel internam, vel externam. Plenitudo vasorum occasio tantum erit inflammatae partis, non causa proxima, & principalis; & ideo videmus excitari inflammationes non solum in corporibus sanguine affluentibus, sed etiam in iis, quibus inest vix naturalis, & media sanguinis quantitas. Eadem tamen causa apta ad creandas inflammationes incidens in corpus sanguine refertum, promptius, & maiorem inflammationem creabit, quam in alterum minus sanguine abundans.

Vidimus magnam copiam sanguinis nocere, & quemadmodum noceat. Quid autem ista in morbis magnis indicet citam curationem exposcentibus perspectum est, videlicet citam oblationem, solum a venæ apertione impe-
v. s.
filiustrabilem. Neque vero unica est ratio in dictis morbis tundendæ venæ, scilicet ut auferatur causa alias concitans, vel conservans. Si enim assumamus repletionem vasorum nullo pacto fuisse in causa morbi magni; tamen iste perturbans corporis œconomiam redundantem sanguinem vitare potest, & in humorem noxium vertens morbum augere. Porro morbi magnitudine aliquod grande remedium postulante, quia omnium consensu utilius celebratur depletis vasis, quam copia tumentibus, hoc etiam nomine detrahenda est copia redundans.

De altera redundantia ratione status corporis difficilius est determinare, an sit adimenda per venæ sectionem; cum prudens determinatio pendeat ex sollerti examine singularis status corporis, cujus respectu dicitur sanguis abundare; cum beneficium sperabile ex scalpello sit obscurius, & incertius, quam in vera redundantia. Id unum mihi

reman-

remanet animadvertendum de utraque plenitudine, diu utramque perdurare non posse in magna ægrotatione, si præsertim febris adest, ob consumptionem assiduam, quæ fit per os, atque invisibilia spiracula, per detractionem alimenti, & inde impeditam reparationem deperditæ substantiæ: opinorque ab hac celeri dissipatione, quæ in morbis accidit, forsitan originem traxisse vetus illud præceptum traditum a Celso^(a), nunquam utile esse post diem quartum sanguinem mittere; quod materia spatio ipso exhausta est, vel corpus corrumpit. Porro quamvis difficile est statuere numerum dierum, quo quælibet redundantia exhauritur; tamen post quatuor dies, quibus æger passus est morbi afflictionem, cibi tenuitatem, aliasque causas extenuantes extrinsecus advenientes, non multum superesse posse existimo. Nescio igitur quid sibi velit monitum plurium medicorum, licere sanguinem detrahare post decem, viginti, pluresque dies, a quo tempore morbus incæpit, dummodo intersit plenitudo cum virium robore; nisi velint attendere solam quæstionem de jure, non de facto. Meam profecto fidem superat, posse viginti, vel plures dies in cibi penuria, & corporis febrili angore consistere plenitudinem venarum, exposcentem evacuationis gratia phlebotomiam. Neque Hercules commoveor aliquot exemplis, quæ videntur oppositæ opinationi favere, admonitione Senecæ,^(b) rerum omnium a Sapiente spectandum esse consilium, non exitum, cujus veram causam in negotio reductæ salutis sæpe ignoramus.

C A.

(a) *Lib. 2. cap. 20.*(b) *Epist. 14.**sat
pro Cel
ce*

CAPUT III.

*An liceat Venam in cacochymia evacuationis
gratia resignare.*

Varia est apud auctores cacochymiae interpretatio ; aliique hoc nomine solum vitium humorum designant , alii superfluam quantitatem , & vitium ; definitque clarissimus Fuchsius ^(a) cacochymiam excessum tum in quantitate , tum in qualitate , secutus Galeni placitum ^(b) , qui cacochymiam appellat , ubi tantum unus humor a sanguine proprie dicto diversus in corpore redundat ; cum qua redundantia necessario conjungitur prava qualitas , nutriendoque corpori inepta . Omnium humorum cum debita proportionem mistorum augmentum plenitudinem efficit , unius magnus excessus vitiositatem , copiamque . Inter hasce sententias Horatius ^(c) Augenius expeditiorem elegit , constituitque cacochymiam in humorum excrementitiorum incremento , aut summa eorundem malitia , aut utroque simul , cum manifesta læsione actionum , aut præparatione ad læsionem . Itaque , quia non unicum vitium nomine cacochymiae denotatur , factum putem , ut dissentiant inter se auctores de vena in eadem tundenda . Ut autem aliquid certius decernatur , inquirendum est , quot modis vitiosus succus in venis progeneretur ; quos tres ex Veterum doctrina invenio . Primus ex placito Galeni est , cum unus ex quatuor humoribus sanguinem componentibus , excepto sanguine proprie dicto , reliquos quantitate multum exsuperat . Alio modo vitatur sanguis , si hu-

(a) *Lib. 2. institut. Med. sec. 5. cap. 1.* (b) *Lib. 13. Meth. cap. 6.*

(c) *Epist. Medic. lib. 3. epist. 3.*

si humor aliquis natura sua inhabilis nutritui, veluti pituita falsa, bilis vitellina, alique hujus generis succi eidem admiscentur. Postremo sanguis suam bonitatem amittit non per admistionem exotici humoris, non per unius excessum, sed corruptionem suæ substantiæ factam a violentia causarum; quam proinde vocant deteriorem cacochymiam, aut corruptelam. Sanctacrux opinatus humores diversos, ex quibus sanguis coalescit, non potestate tantum, sed actu, & sua forma præditos in sanguine contineri, judicat in aliqua cacochymia vel pituitam, vel alterutram bilem separari ab optimo sanguine, inque varias partes tendere pro humorum, morborumque diversitate, in caput, ventriculum, aliasque partes; crassos vero humores, aut densos, aut glutinosos tanquam fœces adhærere parietibus vasorum plurimorum morborum effectores. Hisce expositis, quæ ab aliis animadversa sunt de vitiositate sanguinis multimodis contracta, adjicio, quæ mihi similia veri videntur, captuque facilia. Duobus modis opinor, vitari posse sanguinem, per corruptionem essentiæ, atque per ablationem convenientiæ inter quantitatem diversarum partium componentium. Corruptitur essentia sanguinis per dissolutionem partium, eo prorsus modo, quo res reliquæ corrumpuntur, uti docet Hippocrates, alique Leucippi, Democriti, & Epicuri fautores. Licet autem generalis corruptionis modus unus sit, partium componentium diremptio, tamen cum hæc fieri possit inter plures, vel pauciores sanguinis partes, & inter istas major, vel minor, sequitur plures quoque, & diversas esse mutationes, & a naturali mistione recessus. Aliquando priore mistura destructa, nova fit partium confusio, & novus humor ad sensum generatur ab sanguine colore, habituque diversus, qualis aliquando apparuit in

D

phle-

phlebotomia, qualem se vidisse testatur Jacobus Vvasdichius apud Mangetum in quodam Canonico Segnestadio, cujus incisa vena fudit humorem nullum habentem vestigium sanguinis, sed similem albumini ovi, vel feri gelatinæ, vel saniei. Aliquando etiam ita dirimitur compago partium, ut istæ in extracto dissolutæ, & sine solita coagulatione maneat, neque tamen ad sensum diversum humorem proferant; sicuti mihi aliquando obtigit observare in sanguine maligne febrientium, qui tamen e medio sublati sunt. Alio modo a suo statu recedit sanguis, cum auferitur convenientia inter diversas partes sanguinem compingentes; quas inesse aliarum rerum compositio ostendit, ciborumque, ex quibus sanguis succrescit: quas tamen non actu, & sua forma præditas inesse autumo sub physica consideratione, sed tantum potentia, donec sanguis naturaliter habet. Id tamen vitium levius est quam prius expositum, contrahiturque ex majore copia quam natura petit calidarum, & tenuium particularum, quas biliosas vocant, cumulata; vel siccarum, & frigidarum, quas melancholicas; vel frigidarum, & humidarum, quas pituitosas vocant. Id vitium appello leviolem cacochymiam, sicuti primum graviolem, si omnium, vel plurimarum partium diremptus factus sit. Cum autem humor exoticus, præterque naturam illabatur in sanguinem, parit vitium ejusdem, ad alterutrum ex propositis ex facili reducendum. Hæc sufficiant pro explicatione depravati, corruptique sanguinis intra venas, quantum huc attinet: existimoque, de qua re nihil sensus judicare potest, non multo plura probabiliter addi posse. Quod vero dicebat Sanctacrux, crassos, densos, & glutinosos humores affigi immobiles tunicis vasorum, improbable non censeo, sed rarum esse affirmo ex testimonio eruditorum, qui plurimum versati
in

in cadaverum profectionibus nihil tale se invenisse mihi asseruerunt.

Præmissa brevi notione cacochymiae, proximum est, ut deliberem de venæ incisione in ea celebranda, vel prætermittenda. Ac quidem celebrandam esse decerno, si humores venarum, amissa naturali bonitate, etiam quantitate mediocritatem exsuperent, quando eadem ratio valet in redundantiam vitiati, probique sanguinis. Fortassis dubitari potest, utrum sanguis vitiatus ea copia possit acervari, qua probus, eandemque producere vasorum distensionem; de quo disputandum non est; sed eo posito incremento, & cumulo, nequit ambigi de opportunitate phlebotomiae ad eum detrahendum; nisi præsens morbus, vel imminens lentiolem, tardiolemque aliis adminiculis factam detractionem permittit. Palam est redundantis mali succi germanum remedium esse purgationem; quam tamen sæpe cogimur procrastinare propter cruditatem, vel aliud vitium materiae, vel occlusas vacuationis vias, vel propter longius spatium, quo perficitur expurgatio. Subitam itaque morbo flagitante redundantiae ablationem, quo citius auxilio moliemur, quam icta vena ocysime superfluum adimente? Sin autem cacochymia non superet mediocrem quantitatem, neque vasorum insolitam distensionem pariat, videtur cessare præcipuum argumentum sanguineæ detractionis; & nihilominus clari nominis auctores ab ea non temperant: quorum deliberatio plures morbos attingens pensitanda naviter est. (a) Celsus docet, si materia deest, vel integra est, alienam esse, atque incongruam venæ vulnerationem; at si copia sui male habet, vel corrupta est, nullo modo melius succurri. Verum quo titulo corruptum sanguinem educemus? Quali-

(a) *Lib. 2. cap. 10.*

(et)
male
propter
corrupt
sanguis
& inveni
interven

tate nocet, non quantitate, quæ sola detractiōe curatur, sicuti qualitas per oppositam qualitatem tantum corrigitur; ideoque Galenus nunquam sanguinem mittit, ubi humores venarum plurimum ab illius natura distant. Quid autem magis inde distat, quam corruptus sanguis, si corruptio sit absoluta, non incipiens, & emendabilis. Imaginemur vel maiorem portionem sanguinis corruptam esse, vel minorem, vel æqualem, vel totum sanguinem corruptione affectum. Plurimo sanguine polluto sine spe emendationis, si uncias, puta, decem haurias, aliquam etiam portionem immisti boni vacuabis, prætereaque certam quantitatem spirituum, qui per omnia vasa fusi & motu perenni agitati ex aperta vena promptissime evolant. Quid igitur commodi sperabis ex scalpello in hac sanguinis conditione? Detrahis paucas uncias corrupti integro permistas, plures libras in venis vitiatas relinquis, & insuper multos spiritus dissipas. In æquali vero quantitate corrupti, incorruptique humoris par, vel efficacius argumentum urget venæ sectores. Neque porro confugiendum est ad rationem a pluribus inculcatam, vitiosum sanguinem naturæ oneri esse, per emissionem tolli partem oneris, levare naturam, & roborari ad vincendum quod superest infesti. Quippe tantum roboris inest naturæ, quantum boni sanguinis per venas commode fluit, quibus referatis effluunt contenta sine delectu, parque portio utilis, & inutilis, si pares portiones continentur. Age nunc: venam feri, ut partem oneris adimas, recrees, muniasque naturam adversus reliquum onus. At si simul tantundem virium eripis, præclare vides, naturam recreatum non iri, æquali parte oneris, & virium subducta. Porro speculatione non opus est, ut noscas in maiore quantitate intacti sanguinis quam polluti non sanam esse deliberationem, sex uncias,

puta, inculpati effundere, ut duas mali emittas. Cum autem totus sanguis inemendabili vitio affectus est, neque ducendi consilium superest, neque spes protrahendæ vitæ. Quamlibet igitur opineris sanguinis contaminatam esse portionem, inde nullum poteris arripere argumentum cruentandæ venæ, duntaxat ut partem aliquam contaminati excernas. Possunt tamen cum mala qualitate sanguinis conjungi alii affectus, propter quos utiliter vena resignetur. Pone ex multa in sanguine bile cumulata continuam, & vehementem febrem accensam esse. Inde totus sanguis agitur, æstuat, & tumet elevat copiam calidorum halituum, plus solito distendit vasa ex copia halituum, & tumente sanguine minuitur perspiratio, augetur fomes febrilis. Si venam tundas, ut ex facto foramine erumpentibus copiose halitibus, augeatur perspiratio, minuatur fomes febrilis, nonne probabili duceris argumento, & medicationem temere non inchoabis? At enim consultius esset, purgatione bilem educere, quam scalpello sanguinem. Concedo: & quidem ita exequendum decernerem, si sperare possem, commotionem materiæ crudæ, & nondum ad separationem dispositæ bene cessuram esse, quod nec Hippocrates speravit, nec sperabile natura ostendit, solum post coctionem crises moliri consueta. Cum optimum in morbis efficere nequimus, quod possumus optimum est, si unicum; nec hætenus inventa est fortium febrium continuarum melior curatio. Fateor tamen non in omnibus febribus, in quibus plurimi sanguinem vel iterato effundunt, in promptu esse congruam rationem sperandi levaminis, nisi liceat cum Villisio fabulari, qui hæc habet: ^(a) *Enim vero vasis aperto foramine statim sanguis fermentescens particulas extraneas, quæ licet una congregat, & sui portionem istam, in qua plurimæ* aggre-

(a) De Phlebot. sect. 3. cap. 1.

puta
hæc
celso
si non

i censa ac

aggregantur, foras extrudit. Itane, ubi agitur de vita mortalium, pro ratione utimur arbitrio, nostraque sequimur desideria, tanquam argumenta ex arte agendi? Utinam, bone Deus! ita contingeret, uti optat Vvillisius. Quam utiliter sanguis emitteretur! Quam frequentes essent boni successus! Quantum patrocinii nacti essemus contra Erasistratum, aliosque phlebotomiæ oppugnatores! qui tamen, uti credo, ad has imaginationes risu dissilient. Docta quidem est natura sine doctore, pluraque mira facit arti impossibilia; sed hæc effectū cognoscimus, nec assumere possumus esse facturam naturam, nisi constet facere consuevisse. Dicam cum Vvillisio, simul ac vena aperitur, sanguinem pollere ingenio congregandi extraneas particulas, & congregatas excludendi, si mihi constet de facta congregatione, & expulsionē; sed sine hac notitia nonne videar desipere, si cum Vvillisio fermentescenti sanguini eam vim tribuero? Exulet e scholis medicis poetica imaginandi libertas, & apertissima inanitas opinionum. Erratum in sanguinis de tractione esse capitale potest; de quo propterea fundendo quæstio graviter, intenteque pertractanda est, non perfuntorie, & pueriliter.

Sanctacrux^(a) tanquam evidens judicat in putrefactione sanguinis, sive incipiente putredine venæ punctiōem indicari, caussatus materiam peccantem esse sanguinem per venas facile vacuandum, nullo modo subditum medicamento purganti, neque alterantibus corrigendum. Miror autem, virum dogmata Galeni profitentem statuisse, in sanguine putrescere incipiente, non esse tentandam per alterantia putredinis cohibitionem, docente Galeno, exemplo vini imperfectam, neque terminum assecutam putredinem corrigi posse, & liquorem in pristinum vindicari.

Re-

(a) De Impedim. ag. auxil. cap. 3.

Retinendus igitur semiputridus sanguis, reprimendaque alterantibus putredo, nisi aliunde suadeatur extractio, videlicet ab utilitate in febre sperabili, ut supra expositum est, vel alio nomine. Fortassis etiam non improvidum consilium esset, si quis conjiceret, gravem putredinem late fufum iri per sanguinem, principio morbi, antequam vires acciduntur, & magna sanguinis portio plane corrumpitur, certam illius quantitatem emittere; quo minor quantitas corruptioni supersit; dummodo aliunde non timeretur ex emissionem noxa.

Huc spectat, ut inquiram in celebre præceptum Galeni, pro curatione melancholiæ jubentis vulnerari venam in brachio, oblata conjectura, sanguinem melancholicum in universi corporis vasis contineri, non solius cerebri, sub ea conditione, ut vulnerato vase, nisi sanguis melancholicus appareat, statim obturetur vulnus, nihilque sanguinis educatur. Ergo videtur, nihil esse posse Galeno in causâ solvendæ venæ in melancholia præter qualitatem melancholici humoris, & proinde videtur phlebotomia non solum redundantis humoris remedium esse, sed etiam vitiosi citra redundantiam. Quamquam autem a pluribus flocci penditur auctoritas Galeni, vigente tamen etiamnum præcepto si non ob auctoris cultum, certe propter vim consuetudinis, illud expendere non prætermittam. Horatius Augenius vir plane doctus, ^(a) atque doctrina galenica instructissimus demonstrat, Galenum imperantem venæ sectionem absque plenitudine habere pro scopo revulsionem; idemque Galenum pariter sensisse in curatione melancholiæ genitæ ex consensu totius corporis inde ducitur, quod ille medicationem cacochymiae congestæ vel copia bilis flavæ vel atræ instituit purgante accommodato superanti humori, non

fan-

(a) *Tom. 3. epist. lib. 5.*

sanguinis detractione. Sed donemus, Galenum sanguinem melancholicum fudisse non tollendæ multitudinis causa, non revulsionis celebrandæ, sed tantummodo ad extrahendam partem vitiati humoris; ejus nihilominus consilium supra stabilitis non opponeretur, neque probaret venæ punctiōem, congruum instrumentum esse vacuandi pravi humoris absque superflua copia. Afferens, vacuationem per phlebotomiam pertinere ad quantitatem immodicam, non labem sanguinis, intelligo perperam tundi venam ad educendum vitiosum succum confusum cum sanguine, vel ejusdem corruptam partem, quod ex aperto foramine sine delectu humores scaturiunt. Ceterum toto sanguine melancholico reddito, si quis portionem hauriret, ut ex sequente congruentiore victus ratione melior sanguis generaretur, & facilius superstes corrigeretur, non video cur reprehendendus foret. Si tamen inciderem in febricitantem sanguinis melancholici sine copia supervacua, non cum ea spe detraherem, ut superstes idonea victus ratione ad meliorem statum perduceretur. Quippe febris turbans, debilitansque coctionem, sicque impediens generationem boni succi operam absque dubio frustraretur: non tamen frustra esset sanguinis effusio in cachochymia melancholica citra febrem admittente per alias causas salubres correctionem. Siquidem autem sanguis melancholicus crassus est, & obstaculum liberioris perspirationis; & venæ incisio eum commovendo attenuat, sicque auget perspirationem, hac item utilitate incidere venam licet. Hic memoratu digna est curatio facta a Galeno cujusdam nobilis mulieris affectæ cacochymia melancholica cum extenuatione carnosæ substantiæ, & dejectione appetentiæ; in qua licet totius corporis moles valde consumpta foret, tamen eminebant venæ sanguine plenæ, colore licudæ. Primo itaque

medi-

medicationis die Galenus sanguinis sesquilibram elicuit, postridie libram, tertio uncias octo, sicque ægrotanti bonam valetudinem restituit. Duplici titulo profuit repetita venæ incisio, imminutione quantitatis, & correctione qualitatis, idest crassitudinis sanguinis attenuati per iteratas detractiones.

Sententia, quam tueor, refellens in cacochymia absque copia venæ apertionem ut evacuantem, eo fulcitur, quod humores ex referato vase sine delectu scatent, contra quam nonnullis oppugnantibus visum est. Hos igitur audiamus. Mediocri, inquit Prosper Martianus^(a), facta sanguinis detractione, is tantummodo emanat, qui optimus est, degener impurusque relinquitur, cum incremento cacochymia; suamque opinionem desumit ex Hippocrate affirmante, in jugulatis primum sanguinem calidum, & ruberrimum exire, deinde pituitosiores, & biliosiores. Favet evidenter hæc opinio Martiani mihi affirmanti, in cacochymia sine copia non expeti phlebotomiam ut evacuantem, quatenus asserit illa per mediocrem sanguinis quantitatem extractam exigi quod purius est, atque vividius, relinqui impurum. Quis enim inde non perspiciat in cacochymia, in qua portio sanguinis salva sit, nec adsit copia naturali major, non convenire moderatam sanguinis effusionem, scilicet hausturam inprimis purius vitioso superante? Verumenim vero hoc patrocinio uti mihi non placet, constanter sentienti liquidum venarum ex inflicto vulnere pro ratione commissionis sine discretionem erumpere, nisi discretio commistarum partium fiat, quo tempore vena vulneratur; quæ mihi factu difficillima videtur, & ab veri similitudine abhorrere. Cur autem melior, & rubicundior sanguis primum exiliet? An quia tenuior, levior mo-

E bilior-

(a) *De Natura Humana in Com. Hippo.*

biliorque? Ceterum docet Hippocrates aquam eorum, quæ in sanguine continentur, gravissimam esse; quam tamen una cum sanguine egredi cernimus, modo in majore, modo in minore quantitate, ut est major, vel minor quantitas per sanguinem fluctuans. Aspicimus insuper in mediocri sanguinis emissionem ex pleuriticis puriorem tantummodo partem non exire, sed omnes indistincte; uti apparet ex vitiosa superficie in liquore emisso, & coagulato, quamvis principio morbi totus sanguis eadem labe non sit affectus; quare hic solus in moderata extractione ex placito Martiani deberet emanare. Item Sanctacrux existimat in cacochymia, quam vocat cum supernatantia bilis, uberiorem portionem sanguinis, quam bilis ex incisa vena effluere; idque inde colligit, quia in febribus biliosis ab sectione venæ plus vividi sanguinis, quam bilis in vasculis apparet. Inane tamen id argumentum prorsum est, nisi probetur, majorem bilis portionem quam sanguinis in eis febricitantibus contineri, eamque sub propria aspectabili forma. Quis autem id probandum assumat? Quis probari posse speret? Siquidem universus sanguis venarum in conspectum non venit, ut dispicere liceat, quota pars sit sanguinis proprie dicti, quota bilis. Itaque quantum conjectura assequi possumus, quicquid fluidum est in venis, commistumque ex apertis promiscue scatet, & pro cuiusque quantitate: de quo si dubitatum est ab aliquibus Antiquis, certe dubitari nequit a Recentioribus fere omnibus pro evidenti habentibus, sanguinem per omnia vasa ab externo impulsu circumduci absque dubio foras expellente sine delectu, quicquid effluere aptum est. Non intelligo tamen, quam convenienter ad suam doctrinam plures ex hisce auctoribus moneant, ut late vena perforetur, quo possit sanguis æqualiter mistus exire sine diversarum partium di-

rem-

remptu . Ut id recte dixerint Antiqui , tamen qui volunt sanguinem totum per carniū poros , aut capillarium angustias citissime trajici , cur dubitant , ne tota sanguinis compages ex vulnere angustiore exiliat , cujus tamen angustia multum superat capacitatem capillaris meatus ?

Perfecto , & concluso , a cacochymia universali vasorum non peti vacationis gratia venæ punctionem , adnoto in particulari , hoc est vitiosis succis in particularibus vasis conclusis non alio remedio promptius subveniri , quam eorum apertione ; quæ fieri solet cucurbitulis scarificatis , in hunc finem , ut ait Celsus ,^(a) præcipue inventis , ut affectis partibus deplendis inserviant . Hac ratione , si concedimus limosum , & sæculentum sanguinem ab reliquo sepositum in vasa sedis demitti , congerique , ut opinati sunt Antiqui , quis non videat , viam vacationis appositissimam esse eorundem vasorum aperturam ?

C A P U T I V.

*De Indicante Phlebotomiæ ut revellentis ,
& derivantis.*

REvulsioni , & derivationi per venæ sectionem obtinendæ adeo ab Antiquis celebratæ inculcatæque non pauci Recentiores , ne legibus Circuitionis contradicere viderentur , vale dixerunt , alii etiamnum suffragantur , ut exposui in nova sanguinis Circuitus inquisitione : qui si minus cum ejus legibus congruunt , certe congruunt cum usu salutari venæ sectionis tandiu stabilito . Utiliter igitur non solum ex Priscorum doctrina , sed etiam plurium Recentiorum indagabo indicantia phlebotomiæ , ut vim

E 2 habet

(a) *Lib. 2. cap. 11.*

habet revellendi, derivandique; eaque colligam ex ipsis definitionibus revulsionis, & derivationis. Revulsio, uti communiter definitur ab scholis, est humoris in aliquam partem fluentis averfio ad opposita distantissima: ceterum videtur aptior definitio, si dixeris, esse averfionem humoris præter naturam, & perniciose fluentis. Unde patet indicans revulsionis per venæ punctionem, esse motum sanguinis præter naturam, non situm, & consensum partium, uti visum est Horatio Augenio^(a). Inventa est revulsio ex contrarietate locorum, situsque partium affectarum, aliarumque consentientium; eaque docet, ubi efficienda sit, sed a motu vitioso reprimendo indicatur. Ut enim quod evacuetur indicans primum est evacuationis; item quod avertitur, indicans est primum averfionis. Ergo sanguinis in partem aliquam motus contra naturæ institutum indicans est principale venæ sectionis, dummodo motus sit celer, & cum impetu factus, vel magnum morbum excitans, vel excitare paratus. Quandoquidem lentus, & debilis aliis instrumentis, quæ magnis remediis non adscribuntur, emendari, cohiberi que potest, scilicet cucurbitulis ficcis, frictionibusque: nec unquam scalpellum distringendum est, nisi adsit indicantis magnitudo, in fluxionibus ab impetu motus oriri solita. Pariter nisi fluat humor, sed esse in procinctu cognoscimus, & inde non leve detrimentum imminere, ex arte venam ferimus, inhibitori futurum impetum.^(b) Sic Hippocrates non ad solos curandos morbos, sed etiam futuros arcendos jubet vulnerari venam longissime a locis, ubi dolor, & sanguis cogi didicit; ut ita consuetudo mutetur, nec eodem sanguis, morbusque redeant. Fluens humor curationis gratia

petit

(a) *Lib. 2. de sang. mis. cap. 18.*

(b) *Lib. de Ossium nat. num. 13.*

petit revulsionem, fluxurus præservationis : qui sane antequam fluere incipiat, per venam ictam in parte contraria non retrahitur, sed solum impeditur, quo minus fluat ad locum consuetum, & hoc respectu in schola medica laxiore philosophica revelli quodammodo dicitur, & revulsio pertinere ad lapsum, lapsurumque humorem. Quanquam autem revulsio per partem contrariam, & quantum licet, a loco affecto distitam celebratur, tamen servandus est ex veteri doctrina rectus vasorum processus, quo citius, & fortius vis motus contrarii communicetur aberranti e via sanguini : ideoque ^(a) doctissimus Fernelius inter interna, externaque, dextra, & sinistra, anteriora, & posteriora, inferiora, superioraque contrarietatem idoneam revulsioni non agnoscit, nisi inter sectam venam, partemque affectam rectus fibrarum, vasorumque positus intersit.

Adversarii phlebotomiæ, ut hanc extra Medicinam eliminant, nec usquam conducibilem probent, iccirco ad revellendum inhabilem judicant, quod constat, pertusam in brachio venam non valere compefcendo sanguini, e naribus exilienti, licet adsint debitæ conditiones distantiae, contrarietatis, directique situs : quibus equidem manus victas darem, si labente e naribus sanguine, semper brachium frustra cruentaretur ; tamen utiliter cruentari sæpe experientia ostendente revulsio comprobatur. Quod si remedia aliquando frustrata rejicienda sunt, non video, quæ possint adprobari tanquam in omni occasione respondura, nullo occurrente, quod aliquando expectationem non fefellerit. Fac omnia esse paria in morbis, idem remedium quod semel profuit, semper proderit : diversitate aliqua non prodest, quæ impedit effectum, insitam

(a) *Lib. 2. Meth. cap. 5.*

tam virtutem non redarguit, idem semper acturam, ubi patiens idem prorsus erit.

De derivatione diffident inter se, discordantque auctores, quam alii pertinere credunt duntaxat ad illapsum humorem, partemque obsidentem; alii illabentis remedium faciunt, constituuntque, derivationem esse fluentis humoris aversionem a parte affecta per propinquas: ex quorum sententia idem est indicans revulsionis, & derivationis, totumque discrimen sumitur ex loco, per quem fluens humor a parte impetita revocatur; qui in revulsione valde distat a parte afflicta, parum in derivatione. Ut litigium paucis expediam, assero, derivationem spectare tum ad humorem illabentem, tum illapsum, dummodo liquidus sit, aptusque ad sequendum cursum manantis sanguinis e vena puncta: idque tantummodo inter revulsionem, derivationemque interesse existimo, quod illa propter loci distantiam vim debilem habet commovendi humoris ad sedem morbi delati, validiorem habet derivatio propter loci propinquitatem. Quare solam molituri derivationem, venam ipsam, cum permittitur, insertam in partem afflicta, & huic propinquam vulneramus. Secantes igitur venam in loco affectionis tantummodo evacuamus; in distantissima tantum revellimus; in spacio inter utramque medio revellimus, derivamusque; quoque magis accedimus ad partem affectam, magis derivamus, minusque revellimus; & contra magis revellimus ex longiore a parte affecta recessu. Is duntaxat humor neque revulsioni, neque derivationi exponitur, qui loco laboranti affigitur inhabilis ad fluorem, nec alio inde removeri modo potest, quam per ipsam partem obsessam.

Revulsio magis facit ad præpediendum ægrotationis incrementum, derivatio ad tollendum, quod genitum est,

ut

ut pote instituta ad removendum humorem in parte morbida conclusum, vel in propinqua. Ut autem revulsio- nis, & derivationis diversus scopus est, item diversum tempus. Revellitur humor, quo tempore in partem con- citatur, irrumpitque: derivatur, cum impetus fluxionis, ar- dorque remittit: cujus tanto major remissio expectanda est derivationem molituro, quanto propinquiorem vexato membro venam ferire mens est. Quippe inventa fuit de- rivatio ad supplendam vacuationem ex parte laborante vetitam ab istius interiore situ, vel dolore, aliove impe- dimento. In pleuritide dextri lateris vena cubiti in eodem latere perforata derivare creditur ab pleura progressum eo humorem; itemque ab oculo inflammato vena, quæ in alterutrum fertur angulum; & ab aure vena, quæ sub ipsa existit. Quanquam autem harum omnium venarum vul- nera derivare dicuntur, tamen præclare vides, quanta sit diversitas inter has derivationes, accepta a majore, vel mi- nore propinquitate loci, in quo vena propter eundem fi- nem præciditur: eademque diversitas ostendit quocunque morbi tempore ex eadem parte derivare non licere. Deri- vationem in Pleuritide opportune peragimus initio morbi pertusa vena brachii id loci occupante, ut neque magna distantia ab inflammata membrana derivationem impediat, neque magna propinquitate revulsionem. At, puta, in Phrenitide non auderem sanguinem e venis frontis, vel na- rium derivationis causa haurire, nisi fluxionis impetus rese- disset, præmissaque revulsione; sicuti præceptum est a Majo- ribus, veritis, ne sine dictis conditionibus recluso vase parti laboranti propinquo, eo major humorum copia alliciatur. Quocirca, cum in principio ægritudinis, & impetu fluxionis derivamus; id apte efficimus ex situ, consensuque partium præbente opportunitatem simul revellendi, derivandique.

Modus effundendi sanguinis revulsionis gratia, iudice Galeno, est quo modicum detrahitur, parcaque detractio pluries, ut vires ferunt, iteratur. Sic proponens Galenus^(a) curationem sanguinis e naribus erumpentis paulum adimit, & horam unam intermittit, instauratque pluries hoc intervallo vacuationem, si ab indigentia postuletur, permittatur a viribus. Hanc revellendi rationem, quamvis a plurimis Medicis adprobatam, tanquam abusum refutat Prosper Martianus^(b) in explicatione textus Hippocratis: *In vulneribus sanguis concurrit; opitulandum igitur, ut vacuum impleatur.* Pro repletionem vacui interpretatur Martianus, revulsionem, quæ humoribus ad partem aliquam extra leges naturæ fluentibus occurrit, vel totum corpus deplendo, vel partes adjacentes loco affecto. Cum itaque notabilis sanguinis detractio, non exigua idoneam inanitionem totius, vel certarum partium præstare possit, vellicat Galenum, ejusque fautores, qui duas, vel tres sanguinis uncias eliciunt, paremque repetunt detractioem revulsionis impetrandæ gratia. Et hercle generatim galenica revocandi humoris ratio admitti nequit; meritoque redarguitur in morbo forti, ortoque ab concitato humorum cursu, cui festinam revulsionem exposcenti minus opportuna est facta per minutas vacuationes, perque intervalla iteratas; opportunior est altera acervatim facta; ut servata proportionem virium inter contraria, celeriter irruenti humori oppositi motus pari, vel etiam majore celeritate obfistamus. In derivatione vero semel effundenda est tota quantitas, quæ requiritur ad cito inaniendam partem, non partitis vicibus; ne mora humor illapsus magis parti adhærescat, & inde difficilius abducatur.

CA-

(a) Lib. 5. Meth. cap. 3. (b) Lib. 6. Epid. sect. 5.

C A P U T V.

*Expenditur celebre præceptum Hippocratis de vena
præcidenda .*

IN acutis passionibus sanguinem mittendum esse , si fortis appareat morbus , & qui habent , vigenti sint ætate , & robur ipsis adfuerit , est notissimum præceptum Hippocratis , vel alterius doctissimi , gravissimique auctoris . Dubitat vehementer Galenus , sit ne liber quartus de ratione victus acutorum , Hippocratis , an alterius , non vero de illius præcepti præstantia , quod permagni facit , & proficitur , Senis gravissimam Doctrinam sapere . Ex ea sententia tres sunt constituti venæ cruentandæ scopi primarii , magnitudo morbi , robur virium , vigor ætatis , qui tamen non eandem habent scopi rationem . Convenit enim inter auctores , a morbi magnitudine indicari phlebotomiam , a robore permitti ; ætatem vero roboris indicium esse , quam aliqui proinde ad robur referunt , duosque tantum scopos faciunt , morbi magnitudinem , viriumque firmitatem . Ipse pariter ea tria scopos appello , nomine scopi intelligendo , quod offertur Medico speculandum pro remedio recte determinando ; in qua significatione omne indicans scopus est , sed non omnis scopus rationem obtinet indicantis . Sic ex illis tribus sola morbi magnitudo indicans primarium simul est , atque scopus : reliqua duo , scopi quidem sunt , non tamen primaria indicantia . Hoc loco acres miscentur controversiæ de indicatione magni morbi , fervetque Horatius Augenius contendens contra Alexandrum Massariam , ab grandi morbo grande duntaxat generatim remedium peti , non singulare venæ pun-

tionis, ut mihi videtur, veriore partem lecutus. Namque omnis morbus indicat remedium ex contrarietate cum remedio; qua ratione calidus indicat frigidum, ficcus humidum, parilique modo alii morbi alia contraria. At nulla contrarietas apparet primo, & per se inter morbum magnum, & phlebotomiam, nec apparere potest, nisi ex magnitudine morbi contracta ad aliquam differentiam. Morbus poscit sui expulsionem per contrarium, & quatenus inter morbum, & contrarium certa requiritur mensura, si morbus magnus est, magnum quoque remedium exigit, cujus tamen differentia non innotescit, nisi ex differentia magnitudinis morbi. Certe Hippocrates in textu non de quacunque magnitudine morbi locutus est, sed conjuncta cum acutie, seu celeri motu: nihilo tamen minus inde non elucet magnitudinis discrimen, potius sanguinis detractionem, quam aliud magnum remedium exposcens. Quo pacto igitur ad veritatem interpretabimur Hippocratis præceptum adeo commendatum a Galeno; Vallesius duplici ratione^(a) conatur illud ab omni dubitatione, & difficultate vindicare; & primo fatetur, a magnitudine affectionis non denotari per se speciem remedii, & sanguinis detractionem; denotari tamen ex accidenti; siquidem nunquam sanguinem detrahimus, quin adsint affectus vehemens, viresque firmæ. Utrisque vero præsentibus nunquam ab scalpello iccirco temperamus, quod nunquam cum validis facultatibus morbi vehementia conjungitur, per se sanguinis missionem non suadentis. Est igitur Vallesio morbi magnitudo una cum virium firmitate indicatio ex accidenti ducendi sanguinis, tanquam indicium, subesse morbum per se postulantem emissionem; & hoc pacto tuetur Hippocratis decretum in omnes morbos valere,

(a) *Lib. 3. contro. cap. 1.*

lere, nulla facta exceptione. Veruntamen hanc Vallesii defensionem ipse Hippocrates infirmat, qui in Pleuritide dolore descendente infra septum transversum utitur purgatione, prætermissa venæ incisura: atque in libris de morbis, de affectionibus, aliisque docet, inflammationes varias corporis partes occupantes sola purgatione curari, eas scilicet, animadversione Prosperi Martiani^(a), in quibus prævalet cacochymia plenitudini: & tamen hæ inflammationes morbi sunt acuti, vehementesque, cum virium robore idoneo tolerandæ purgationi a Sene imperatæ. Altera ratio Vallesii pro faucianda vena in omni magna ægrotatione est, quia omnis ingens ægrotatio magnum aliquod auxilium flagitat, & hoc quaecunque sit, rectius administratur misso prius sanguine. Ruit tamen hæc quoque ratio ex ipso Hippocrate, præcipiente usurpationem magni remedii, hoc est purgationis materiæ turgentis, itemque affluentia biliosæ effectricis inflammationis internæ, nulla præposita sanguinis effusione. Aliorum igitur interpretationibus omissis, dicam quod mihi minus ab veritate distare videtur. Vidimus, ipsum Hippocratem non in omnibus acutis cum viribus robustis sanguinem duxisse; ideoque ad omnia inutilia litigia declinanda animadverto hanc propositionem: In acutis passionibus mittendus est sanguis, si morbus est fortis, robustus æger, & vigenti ætate, esse indefinitam, & solum moraliter universalem, non logice: sicuti dicunt ipsi Logici propositionem indefinitam in materia contingente, qualis est ista, Cretenses sunt mendaces, esse tantum moraliter universalem, non logice, nec omnes ad unum Cretenses comprehendere, sed tantum plerosque. Hac eadem limitatione accipienda est Hippocratis præceptio de vena tundenda in acutis,

(a) *Lib. 4. de rat. vic. acut.*

aliæque plures ejusdem auctoris, ut est in confesso. Verum enim vero vel aliqua posita ejus præcepti exceptione, non frustra Galenus idem tot laudibus prosecutus est. Cum enim in Medicina operosa valde sit investigatio singularium indicantium exhibitorum a solis proprietatibus morborum, & multo operosior consecutio, magno in pretio habendum est præceptum, quod in magna rerum ambiguitate paucis regulam complectitur eliciendi sanguinis; quam si quis etiam nulla adhibita distinctione observaret, identidem, ut opinor, salutariter emitteret, nunquam cum notabili jactura; dummodo convenirent expositæ conditiones, & emissio foret moderata, & in principio facta; dummodo morbi acuties, ut audit apud Hippocratem, sumatur, qui animadversione Vallesii^(a), morbum, & alia quæcunque acuta vocat, quæ causas calidas sequuntur, celeritate, & vehementia testatas. Pone indicatum ab Hippocrate in morbo concursum. Hic certe conjungi nequit cum spirituum paucitate, neque cum sanguinis insigni corruptione, adversa firmitati virium, quam assumimus adesse. Abest igitur periculum infligendæ notabilis noxæ ab ista vena, non abest spes reportandi levaminis innixa ætatis, viriumque fortitudini, urgente affectu vehementi celerique, cui fovendo licet opinari non parum conferre sanguinem aut copia, aut æltu, & nimia rarefactione, aut motu præter naturam.

CA-

(a) *In Prognostico Hippocratis.*

C A P U T VI.

*De impedimentis venæ sectionis acceptis a rebus
naturalibus, & primo a viribus.*

DUO requiruntur recte, sapienterque deliberaturo in omni morbo remedia, siue magna sint, siue mediocria, siue parva, præsentia indicantis, vacuitas impediens: cumque satis de indicante phlebotomiæ disputaverim, proximum est, ut persequar impedimenta, de quibus scripsit non inerudite Antonius Ponce Sanctacrux; nec ego tractare constituissim, nisi alia occurrerent adimenda, alia addenda, multa illustranda, propter tot novas opiniones evulgatas, desertamque Galeni doctrinam post opus Sanctacrucis, illius vestigiis pressius inhærentis. Hinc mihi supervacua fugienti, nisi fallor, continget, ut cum utilitate non levi Tironum de integro retractem, quæ ab Sanctacruce agitata fuerunt, nihilque olent ex recenti Schola. Servabo tamen meliori ex parte ejusdem auctoris ordinem, nihilque momenti ab eo indicatum præteribo, meis additis animadversionibus, & detractis, quæ intermiscet Sanctacrux, nec pertinent ad susceptam provinciam, ordinemque præstitutum perturbant.

Quicquid Medicina speculatur, in tres partes distribuitur, res naturales, non naturales, præterque naturam, neque quicquam aliud meditetur oportet, phlebotomiam, aliaque remedia administraturus. Singulas igitur percurram, & vestigabo, quidnam inde impediendi obijci possit usui grandium auxiliorum, & primo phlebotomiæ, principio examinis ducto a rebus naturalibus, ad quas pertinent vires, temperamentum totius, & partis, habitus corporis, con-

Doqum

consuetudo, ætas, sexus, & quædam accidentia, veluti sensus partium, actionis dignitas, & alia hoc loco expendenda. Nomine virium intelligo facultatum robur nostris operationibus valide, & secundum naturam obeundi compar, oriturque a spiritibus, humoribus, & solidorum substantia, duo comprehendente, ut alias ostendi, convenientem temperiem, & materiæ modum. Cum autem in morbis lædantur actiones, liquido constat, vires integras esse non posse, quam tamen integritatem non requirit venæ sectio, sed tantummodo mensuram tolerandæ futuræ jacturæ æqualem, & spatio morbi sustinendo; quæ diligenter indaganda est, non una, nec æqualis efficaciz occurrente causa vires infirmante. Unde duplex in Scholis constituta est debilium virium differentia, quarum aliam essentiæ vocant, aliam oppressionis. Multa disputat Sanctacrux de virium debilitate in essentia, inquirens, utrum intemperies solum facta, an ea, quæ fit, possit illam inferre; inquisitio obscura, & spinosa, parumque nuperis placitis consentanea, mihi que omittenda, sectanti clariora. Quantum igitur attinet ad præsens institutum, omnem imbecillitatem in essentia appello ortam a causis, virium essentiam labefactantibus, nimirum humores, aut spiritus aliena qualitate imbuentibus, aut absumentibus; aut partium solidarum temperamentum, aliasque qualitates ad materiæ modum relatas pervertentibus, quas secundas vocant: quare Galenus^(a) immoderate laxantia, quæ primas qualitates non immutant, sed solum materiæ modum, causis debilitantibus ascripsit. Hujus debilitatis, doctrinæ gratia, tres gradus statuuntur, summus, magnus, & mediocris, quos quidem determinare generatim in proclivi est, sed valde operosum circumscribere, certisque notis definire, idque

(a) *Lib. 2. artis ad Glauco.*

idque opus est medici prudentis, exercitatieque, signa majoris, vel minoris imbecillitatis recte judicantis, dum affidet ægroto: quæ certum est, non aliunde melius defumi, quam ex actionum offensa, & in primis vitalium. Omnes facultates in unum coalescunt, concurruntque ad efficiendum corpus robustum, expeditumque ad officia vitæ, sed vitalis præ ceteris, quæ uberius sanguine, & spiritibus, irrigatur, hosque aliis distribuit, & cum hisce vitæ fulcimentum. Testatur igitur vitalis facultas conditionem, quantitatem spirituum, & sanguinis, & hac significatione modum virium. Ejus itaque imbecillitas denuntiat, quantum abs statu naturali vires recesserint, quam ex pulsu metiemur, extremamque esse cognoscemus ex illius magno languore, ex depressione, & parvitate. Roborabit indicium reliqua species corporis, facies decolor, extenuataque, venarum, quæ prominere solent, demissio, debilis respiratio, aliorumque motuum infirmitas. Item prægressæ recenter causæ inanientes, vel præsentis non levem vim habent ad stabiliendum judicium de imbecillitate, hujusque gradu; cujusmodi sunt vigiliæ productiores, cibi parsimonia, calor exurens, vehemens dolor, aliaque satis nota. Quanquam autem primas tribuimus actioni vitali ad virium statum arguendum, ea tamen interdum imponit propter conformationem arteriæ, situm profundum, exilitatem incapacem copiosi sanguinis, laxitatem fibræ muscularis, vel alia non satis perspecta, apta ad ingerendam speciem debilitatis vera majoris. Non semel observavi pulsum, parvum & debilem cum robore facultatis animalis, & hac fretus contra pulsus indicium spem sustinui; exitusque judicium comprobavit. Interdum etiam pulsus parum distat a naturali, ut in aliquibus febribus malignis, neque notabilem virtutis lapsum ostendit, sed notabilis inde

*Signum
debet*

inde arguitur, quod ægri prompte incidant in animi deliquium, si velint e lecto surgere, & toto languent corpore; ideoque, ut certius, quoad fieri potest, habeatur iudicium de viribus, respiciendum est ad omnium facultatum functiones. Omnium instrumenta proxima spiritus sunt, & singularum læsio indubitatum est argumentum, vel spiritus pauciores esse pro indigentia, vel vitiatos, si solida nullam noxam patiantur. Quare cum unum, idemque sit promptuarium spirituum sanguis, quæcunque functio detrimentum capiat spirituum læsione, communem omnium facultatum causam habet, indicatque communem infirmitatem, nisi spiritus in certa parte alterentur, vitiumque contrahant.

Alii duo imbecillitatis gradus, magnus, & mediocris ex eisdem specie notis, sed magnitudine differentibus deprehenduntur; tantoque minus vires esse imminutas apparebit, quanto magis indicia ab summis recedent, & pauciora erunt. Cognita summa virium dejectione ex resolutione apertissimum est, nihil sanguinis educendum esse. In magna vero quidam parcam approbant detractionem, perque vices repetitam: fatentur tamen periculosam esse, & antequam peragitur, exponendum periculum. Meo iudicio, si in aliqua affectione cum magna virium jactura licet venam cruentare, est sanguinis profluvium ex superioribus, vel inferioribus partibus. Quo enim tempore vires absumit sanguis, puta, ex naribus exiliens, venam in brachio revulsionis nomine improvide non feriam, dictante prudentia, paucas uncias sanguinis e brachio eliciendas esse spe uberius effluxus compescendi. Undecunque sanguis exeat, æqualis est virium jactura: qua instante conandum est, ut ex eo loco effluat, per quem inhiberi queat copiosius illius impendium, viriumque.

vir-

virtutis infirmitate paratior est deliberatio, abs qua volunt omnes non prohiberi in totum sanguinis effusionem, sed tantum quantitatem definiri, & indicari diversam, lentamque rationem effundendi.

Satis de debilitate ex essentia. Alteram, quam vocant ex aggravatione, docent Scholæ oriri ex copia succorum, siue boni sint, siue mali; in qua exponenda brevitati, & perspicuitati studens, aliorum placita missa faciam, solamque sequar rei naturam. Copia boni sanguinis non potest viribus negotium facessere, nisi eo devenerit, ut vasa nimium distendat, perspirationem minuat, liberosque spirituum motus inhibeat. Per se igitur causa imbecillitatis non est, & proxima, sed intermedia, & occasio; eademque habet indicia, quibus dictum est, comitari plenitudinem ad vasa. Hæc, uti palam est, petit phlebotomiam, non dissuadet; eademque ratione virium dejectio inde nata, quæ deprimente quantitate ablata, expediuntur, erigunturque. Porro copia mali succi potest infirmare vires, aut dissolvendo, aut tantum opprimendo. Dissolvit, si multum humor venarum recesserit a natura sanguinis, spiritus corrumpat, aut obstet, quo minus debita eorum copia generetur, sine qua vires elanguent. Sin autem ea copia mali succi nondum eo pravitatis provecta est, ut aliquam ex enumeratis noxis infligat, tantum onere premit vires, non diruit, inde non relinquimus phlebotomiam, si alia convenient exigentia. Debilitas nata ex copia cum cacochymia designatur, si nulla præcesserit recens evacuatio, vel adsit, aut alia causam clam exhauriens, & apparent notæ cacochymiae. Addunt alii sensum prementis ponderis, pulsus inæqualitatem, motus impotentiam; sed ista communis est etiam aliis, quos diximus ex essentia virium labefactata languere. Sensum vero corporis quasi quodam

pondere onerati sæpissime laborantes non ita manifestum habent, ut inde decerni possit de præsentia copiae aggravantis. Præterea, cum copia, de qua sermo est, sit admixta cacochymiae, & hæc pariat sensum ulcerantis rei, non deprimentis, ex sensu impositi veluti ponderis non significatur ea debilitas. Porro inæqualitas pulsus modo fortius, modo languidius micantis arteriæ, utpote quæ ab aliis causis proficisci potest, inter ambigua signa reponitur, minusque certa aliis jam propositis, quibus propterea standum est.

Hippocrates plures expositis debilitatis differentias enumerat, ^(a) desumitque a diversis causis debilitantibus; quibus ignoratis, ut inquit, in gravissima errata labimur; cognitis evitamus. Ait igitur laborantes infirmari a vasorum inanitione, irritatione, dolore, aliisque causis ortis ab corporis habitu, & natura singulorum. Verum omnes hæ causæ viribus incommodant alterutro ex dictis modis, scilicet aut earum substantiam corrumpendo, dissipandoque, aut opprimendo; nec alius superest debilitandi modus. Quicquid nostra corpora immutat, vel additio quantitatis est, vel ablatio, aut contraria qualitas. Additio quantitatis superfluae vires onere fatigat, ablatio utilium demolitur, itemque demolitur contraria qualitas, cuiusmodi est opposita temperiei spirituum. Duo itaque tantummodo sunt imbecillitatis genera, causæ vero debilitantes plures, Medico, uti monet Hippocrates, inter-noscendæ, congrua victus ratione, & remediis suppetias allaturo.

præterea

CA-

(a) *Lib. 2. Acut.*

C A P U T VI.

*De impedimentis venæ sectionis acceptis ab aliis
rebus naturalibus.*

SEparatim præmissa consideratione virium, de quibus plura dicenda occurrebant, uno, eodemque capite comprehendo reliquas res naturales, & principio temperamentum totius corporis expendam, quod unusquisque ab ortu, non mutatione ætatis recepit. Ergo quodlibet temperamentum per se spectatum, & intra sanitatis confinia, & ab aliis accidentibus mente amotum, circumscribere potest quantitatem ducendi sanguinis, non in totum detractionem impedire. Censentur communiter parum apta phlebotomiæ duo temperamenta, calida, & sicca, frigida, & humida; quæ tamen ipsa, si corripiantur morbo sanguinis effusionem poscente, non percipio, cur omnem vetent. Antequam laberentur in morbum, ea virium firmitate fruebantur, ut suas ederent pro modo naturæ functiones; nondum scilicet, ut assumpsi, excessu earum qualitatum lineam sanitatis egresso. Quid igitur in morbum lapsa nullum ferre poterunt sanguinis impendium? Affirmat Sanctacrux cum magno periculo sanguinem hauriri corde frigido existente, & propemodum idem periculum impendere, si frigidum est cerebrum, aut hepar, aut ventriculus. Nempe metuit ex frigiditate cordis syncopen, cerebri apoplexiam, paralysem, epilepsiam, vertiginem, metuit ex hepatis frigiditate hydropem, ventriculi tarditatem coctionis, & infestissimas cruditates. Hoc tamen timore non percellor, neque deterreor ab eliciendo sanguine, si adest indicatio cum virium constantia. Pone aliquem,

*Tem
men
ut a*

quem, ut loquar cum Sanctacruce, frigidi jecoris, prehendi forti pleuritide. An ea frigiditas prohibebit usum postulatæ phlebotomiæ, si ferendæ vires valent? An septem, vel octo sanguinis unciaæ ademptæ perfrigerabunt hepar usque ad productionem hydropis, eo præsertim tempore, quo sanguis exæstuans suum calorem solidis communicat? Nil minus timendum videtur, & præcipue ex sententia Recentiorum affirmantium, nullum inesse membris calorem, nisi quem impertitur sanguis uberiore sui copia, vel parciore perfundens membrum; & proinde præter modum sanguine excalesfacto, quis dubitet inferri perniciosam frigiditatem, ex moderata effusione, & temperamento accommodata? Itaque ex illis temperaturis admonemur quidem restrictius, & circumspicius effundendum esse sanguinem, non tamen ab omni effusione abstinendum.

Habitus corporis majus habet momentum, præsertitque clariora indicia ad venæ sectionem usurpandam, vel omitteendam, quam temperatura. In habitu vero corporis primo considerantur gracilitas, obesitas, raritas, densitas, & inter hos qualitatum excessus media constitutio. Gracilitas magna corporis cum rara textura, in qua amplè patent viæ exitui spirituum, resolvendæque substantiæ opponitur phlebotomiæ ut evacuant, vel denotando nullam esse indigentiam vacationis sanguineæ coactæ, ubi magna sponte fit dissipatio; vel non esse suffecturas vires utrique vacationi. Obesum quoque corpus, laxumque parum aptum est ad idem remedium: atque Galenus^(a) in juvene annos triginta nato, putridaque synocho impedito, sed laxo, molli, pingui, & albo, cum gracilibus venis nihil plane sanguinis demit, æstivo tempore, regione æstiosa, cælique statu calido siccoque. Fortior autem venarum

(a) Lib. II. Meth. cap. 14.

exilitas est obesitate, vel gracilitate corporis ad inhibendam venæ secturam; siquidem ex venis, ut admonet Celsus^(a), vis corporis melius, quam ex ipsa specie aestimatur. Aliqui non modica sanguinis copia redundant, licet admodum graciles sint, qualis fuit mulier memorata a Galeno,^(b) contraque aliorum medicorum spem iterata sanguinis effusione curata, cujus venæ sanguine plenæ eminebant; uti supra memoratum est. Itaque gracilitas, nisi jungatur cum laxo corporis contextu, aut venarum humilitate, & tenuitate ab sanguinea vacuatione non dehortatur. Enim vero ex difficultate magna cognoscendi quanta sit laxitas meatuum, & quantæ resolutionis causa, certius indicium sumitur a venarum tumore, aut depressione, magnitudine, vel exilitate.

Quanquam opinor, gracilitatem corporis cum raro fibrarum contextu obstare phlebotomiæ, ut evacuantis, significando paucitatem sanguinis, & vacuitatem indicantis, obstare tamen non sentio, ut revellenti, oborta in eodem habitu corporis notabili inflammatione interna, in qua propter metum infirmandæ virtutis, si tempere-
mus ab scalpro, apta revulsione inhibitura morbi augmentum, hinc majus detrimentum vires capient, quam ex convenienti sanguinis expensa. Galenus quidem, uti vidimus, in descripto juvene, pepercit venæ; ceterum in putridis, ubi sanguis multum non redundat, ejus emissio præcipuum remedium non est, sicut est in inflammatione incipiente, sanguinis motum ab parte affecta avocando.

Ad corporis habitum pertinet os ventriculi, quod si imbecillum est, vel acuto sensu præditum non fert inoffense sanguineam detractionem. Rarus fibrarum contextus imbecillitatem parit, declaratque languida cibi appetitio,

ex

(a) *Lib. 2. cap. 10.* (b) *Lib. 6. de mor. populi. sect. 3.*

ex accepto gravamen, nausea interdum, & vomitio. Molles vero nervi, tenuique membrana obtecti sensum nimis acutum efficiunt, impatientem omnis irritamenti ab acri, vel falso, itemque inedia. Cum autem pars nulla magis ore stomachi infestetur ab evacuationibus, ejus imbecillitas abs quacunque causa profecta, tanquam occasio animi defectionis, vel alterius molesti symptomatis metuenda est venam icturo. Sin autem magna indigentia, spesque non levis inde futuri commodi phlebotomiam tentare suadeant, prius roboretur stomachus, vicibusque partitis definita sanguinis copia hauriatur.

Inter res naturales ætas tanti ponderis est ad deliberandam venæ sectionem, ut ab Hippocrate, sicuti vidimus, pro principe scopo habita sit. Ætas nihil est aliud, quam vitæ pars functionibus, aliisque accidentibus ab altera notabiliter differens: ex qua conspicua differentia quatuor principales ætates constitutæ sunt, Pueritia, Juventus, Constans ætas, Senectus; quarum duæ creduntur a Galeno parum idoneæ phlebotomiæ, videlicet Pueritia, & Senectus, de quibus dijudicabo. Pueritia ut in plures partes distribuitur, quarum prima Infantia dicitur, ad annum quartum, & in aliquibus ad septimum extensa; ita non unam habet animadversionem, & diverso modo se habet ad remedia pro diversitate suarum partium. Dum adhuc pene lacteus cruor per venas fluit, quis animum inducat effundere? Quæ necessitas effundendi? Quis tantus fervor, aut impetus infantilis cruoris, ut evacuatione compescendus sit, aut refrigerandus? Quæ tanta copia acervari potest in raris, tamque fluxis corporibus, tamque levi nutrimento utentibus, ut sponte, & absque ferro non sit citissime evolatura? Pene dixerim in adultis tot venæ vulnerationes perperam factas permittendas esse, ad minuen-

dum

dum sanguinem in tot scelera, efferatasque affectiones identidem concitatur. At ex solo lacte succrescens, ejusdemque qualitatibus perfusus non absimilis est innocenti Infantiae, quam nutrit. Deest occasio detractiois, deest robur detractiois sustinendae. Omnia, ut ait Chrysippus apud Tullium, debiliora sunt in puero, quam in viro, multoque magis in lactente, qui totis artibus nutat, & omnium actionum humanarum impotens est; quare plures cordati viri non formidantes pro data occasione vulnerationem venae in pueris aliquanto grandioribus, formidant tempore lactatus: atque Hispani prout, crebrique ad venam cruentandam pueris, tamen infantibus dentire incipientibus, solum cucurbitulas cum levi scarificatu cruribus apponunt. Neque vero animos addit ad fundendum lactentibus sanguinem Sydenhamus^(a) asseverans, aequo tuto sanguinem duci ex venis adultorum, atque infantum, nec alii confidens remedio in convulsionibus infantum nono, decimoque mense occasione dentitionis excitatis, nisi phlebotomiae, quo tempore tument dolentque gingivae, nervique comprimuntur, atque irritantur. Quis enim non videat, quantum intersit inter vires adultorum, & infantum? nempe qui levi quacunque de causa alterantur, & multo minore in grave vitae discrimen conjiciuntur, quam adulti. Quod si naturam ducem sequi velimus, cur potius in convulsionibus puerorum venam, quam alvum referabimus? Qua scilicet multum subducente, ut observat Hippocrates^(b) dentientes infantes minus convelluntur, quam quibus alvus siccior est. At enim Sydenhamus illis convulsis venae incisionem adhibuit, & aliis remediis, decantatisque specificis utiliore comperit. Quid inde? An satis adduxit ad imitandum? Eum hercle imitarer, si mihi cer-

*Censura
in juvene
oratoria*

*Censura
Sydenhami*

(a) Pag. 226.

(b) de Dentitione.

certo constaret phlebotomo adjutos esse infantes sine eo perituros; quod tamen extra conjecturam est, affirmante Hippocrate^(a) non omnes in dentitione convulsos mori, multos etiam fervari, & quidem sine vena pertusa, cui tota Antiquitas pepercit, parcuntque in præsens permulti medentes: atque Riverius^(b) redarguit Parisienses infantibus lac sugentibus eam aperientes, nulloque e sapientibus Scriptoribus suffragio defendi posse affirmat. Frustra vero opponeretur ex Sydenhamo convaluisse infantes, quibus incisa vena fuit, quasi eidem non magis repugnaret ætas infantilis, quam adulta. Sat liquet, quanta sit illius imbecillitas, quantum dissipabilis substantia: neque aliquorum infantium reparata salus, qui passi erant phlebotomiam, probat hanc fuisse causam salutis, necessarium remedium esse, & suspicione vacuum; tantum evincit, non esse lethalem, & posse ab ea ætate ferri sine certa pernicie; quam nec ego necessario inferri contendo, æstimans infantiam impedimentum effundendi sanguinis, sed tantum in ea plura apparere ad inhibendum scalpellum, quam permittendum: atque hac moderatione intelligi velim plura, quæ propono impedimenta. Satis de Infantia lactente.

Alias Pueritiæ partes percurramus. Horatius Augenius^(c) persuasum habet, ante septimum annum non esse utendum phlebotomo, ob metum ne vires possint sufficere ferendæ petitiæ, & spontaneæ, quæ copiosa fit, evacuationi. Alii etiam trimos, quadrimosque cruentant, & fidentius natu majores, producuntque experientiam testatam, per eas ætates conducibilem fuisse pueris venam vulneratam. Quanto autem examine indigeat experientia, ejusque circumstantiæ, ut inde constet utilitas remedii, ex dictis apparet; & debere præesse experientiæ rationem ad cavendum errorem in de-
libe-

(a) De Dentitione. (b) De Vario. cap. 2. (c) Lib. 8. Epist. Tom. 3. cap. 14.

liberanda causa effectus, quem in usu remedii videmus. Ratio tamen ut in lactentibus pueris valde repugnat incisioni venæ; ita minus in trimis, & quadrimis, multoque minus in natu grandioribus, firmiore ætate exhibente majorem spem illius tentandæ. Enim vero si opponas, ut rite aliquod remedium usurpetur, non satis esse, ut minus ratio adversetur experientiæ, sed requiri, ut nihil omnino; scias hinc contradicente ratione remedio, illinc favente experientia, nos admoneri, ut attente meditemur, num effectus verti debeat experto remedio, an alteri causæ, & solius naturæ medicationi suæ conservationis studiosæ. Ut enim in mea methodo ostendi, solum nobis male cogitantibus, & vero ignorato, potest ratio dissentire experientiæ, aut dissentire videri. Ut verum vero contradicere nequit, item nequit ratio experientiæ, si utraque sit probe cognita explorataque. Itaque, quo debilior est ratio, quæ videtur opponi experientiæ, levior etiam est suspicio, nos ab ista in errorem induci: qua animadversione dictum est, in trimis, quadrimis, & natu grandioribus licere cum majore fiducia phlebotomum exercere.

Sat de Pueritia: dicendum de Senectute decrepita, quam aliqui desumunt ab anno septuagesimo, & hoc transacto eximunt scalpello. Verum in tanta corporum varietate cautius se gerit, qui fractam, & decrepitam ætatem non annorum numero definit, sed facultatum imbecillitate, extantibus numerosis exemplis, post annum septuagesimum venam commode perfossam esse. Sæpenumero observamus, quosdam iis annis valida senectute frui, quibus alii squalida, extremaque premuntur, exucci, flaccidi, modicoque cibo utentes. In explorandis tamen senum viribus cavendum est a pulsus fallacia, qui, ut observarunt experientissimi viri, flatu arteriam distendente, aliquando ina-

ne robur prætendit . Præsidio erit ad verum scrutandum , si præter pulsum tota species corporis , & actionum modus naviter considerentur . Veruntamen sicut ætatis macies abdicat phlebotomiam , item morbis patere non solet eam exposcentibus , videlicet febribus fortibus , acutis , & inflammationibus , uti Senex animadvertit^(a) . Apoplexia quidem , quæ fortis affectio est , non infrequenter decrepitis accidit , præmium , ut cum Plinio sentiam , antea actæ laboriosæ vitæ ; sed venæ incisione citius rem conficit . Itaque si videris Senem febris forti , & acuta , aut inflammatione vehementi tentatum , habes argumentum eo non processisse senium , ut vires fatiscentes testetur . Vidi nuper in nobili fœmina Patavina Lavinia Ivana octoginta octo annorum circiter obortam pleuritidem , cum tussi , sputo sanguineo , febris continua , dolore lateris ; sed nec febris , nec dolor , nec alia symptomata vehementia fuerunt , omniaque , meo consilio , intactis venis , evanuerunt .

Consuetudo ad res naturales relata nec indicat per se sanguineam vacuationem , nec prohibet , & tantummodo attenditur in morbis tanquam indicium ejusdem opportunitatis inveniendæ , & metiendæ quantitatis . Quis enim in pleuritico nunquam sanguineam detractionem passo ob insuetudinem tam conducibile remedium prætermittat ? Quis ex sola consuetudine venam in morbo feriat , nisi cognoscat inde subesse indicans feriendæ ? Tamen Galenus^(b) non levem dubitationem ingerit , affirmans vacuationibus insuetos , & si humoribus abundant , evacuandos non esse , assuetos audacter copioseque . Quid venerit in mentem Galeno hæc scribenti , non exquiram : illud certo certius est , cui nunquam sanguis missus fuit , nihilominus mittendum esse morbo postulante , viribusque permittentibus ,

(a) *Sect. 1. Apho. 14.* (b) *Lib. 1. de arte curandi ad Glanc. cap. 13.*

tibus, nec in usum potuisse venire id remedium, nisi adhibitum fuisset idem antea non expertis. Nunquam periclitatus Phlebotomiam, nil contrahit ejus usui contrarium; sicuti contrahit consuetudinem adversam frigidis cibis, qui diu solum calidis usus est. Ex usu longo certarum rerum generatur in nostris corporibus quiddam contrarium oppositis: tamen sola usus vacuitas, ut ipsa nihil est, ita nihil generare potest contrarium remediis petitis ab incidentibus morbis. Itaque propter insuetudinem non abstinebo a postulata sanguinis effusione, sed minus effundam, exploratoque eventu, si opus erit, iterabo effusionem.

Prægnatio inter res naturales hanc habet considerationem, ut venam vulneraturus cogitet de conservanda matre aliquo morbo impedita, itemque foetura; cogitet matrem sibi, & foetui vivere, plusque virium deberi tutelæ utriusque, quam unius. Non omnis igitur quantitas virium in vacua muliere venæ punctiōni sustinendæ compar, sufficit eidem ferendæ in utero gerente, suisque viribus foetum sustentante. Comperta in gravidis debita virium mensura, pensitandum remanet, num metus abortionis scalpellum inhibeat, executionemque indicati remediū. Quippe videmus prægnantes sæpe in eas ægritudines incidere phlebotomia curari solitas: certumque pariter est, evitandum esse abortum, cum propter periculum genitricis, tum foetus jacturam. Pluribus de causis, & sæpe levibus mulieres abortiunt, tamque frequenter, ut asserat Mercatus, rationibus subductis, constare plures foetus deperdi, quam justum ad tempus reservari; ut mirum non sit, natum hominem tam levibus de causis vita periclitari, qui ante ortum, atque in arctissimo complexu suæ creatricis tam facile perit. Hanc tantam fragilitatem qui

mente agitabit, ut cum Plinio loquar, ^(a) neque sui corporis viribus fidet, neque felicibus successibus tumebit, neque se fortunæ partum credet, sed vitam æqua lance pensabit. In magna igitur proclivitate mulierum ad abortum jure timetur, ne is accidere possit a venæ sectura, quæ omnes humores commovet, vasa laxat, multiplicique ratione officere potest foetura. Num igitur propter periculum abortus erit semper abstinendum a phlebotomo? Nisi urgeat necessitas, prudentis est abstinere præsertim in talo; si urgeat, utendum est, longa docente experientia, necessario non excludi foetum, siue superior, siue inferior vena, siue utraque præcidatur. Quis ignoret, plures mulieres repetita sanguinis effusione frustra tentasse illicitæ conceptionis labem diluere? Quædam mulier, dum hæc agitabam, propter paupertatem, animo intento in provocandum abortum, me advocavit, asserens se magno circa pectus dolore affligi, productisque indiciis, nullam adesse suspicionem graviditatis, affirmavit se eundem dolorem alias passam esse, & phlebotomia curatam. Itaque & eam leviter purgavi, & sanguinem ex brachio, deinde coactus sequi consuetudinem regionis ex talo misi, salvo conceptu, quem adesse postea cognovi, & dolorem non pectus, sed ventriculum occupare: quo perseverante, aliisque prægnationis notis apparentibus, confessa est mulier se se in principio cujuslibet conceptionis solere ea parte male habere. Hoc, aliisque pluribus exemplis liquet, incisionem venæ non esse necessario abortivam: imo Lodovicus Mercatus ^(b) existimat eandem habere animadversionem respectu sanguinis ducendi conceptum, atque ætatem, & utramque posse quidem moderari quantitatem emittendi, non posse omnem emissionem vetare. Si tamen ab ætate vires

(a) *Lib. 7. cap. 7.* (b) *De Pregnant. Affect. lib. 4. cap. 72.*

separentur , mihi videtur iccirco graviditas plus habere ponderis in consultatione de vena resignanda , quam ætas , quod constet , pluries foetum ea resignata periisse . Quocirca deliberaturus sanguinis detractionem in gravidis diligenter ponderet oportet quæcunque valent sufficere probabile argumentum de eventu foeturae , nimirum ægrotantis habitum , quem tenuem , aut nimis crassum metuit Hippocrates ; gestationis tempus , cuius pars prima , & magis ultima suspecta est ; consuetudinem prægnantis solitæ , vel insolitæ in aliis conceptibus scalpellum ferre ; proclivitatem ad abortionem , aut vim resistendi , frigiditatem nimiam tempestatis , vel caliditatem , utramque servando foetui parum aptam , idque genus alia . Oblata vero indigentia eliciendi sanguinis cum probabili spe conservandi conceptus , admonendi sunt domestici , vi morbi vehementis sæpe abortionem induci , neque phlebotomiæ semper imputari posse post eam secutam foetus exclusionem.

Lactis quoque generatio , inter res naturales numerata a Galeno , species quædam vacationis judicatur ; iudiciumque comprobat indigentia uberis cibi sollicitans nutricem . Quamobrem nisi morbus permittat eam eximi omni sanguinis detractioni , hæc parcior sit oportet , largiorem supplente vacatione facta per mammas . Veruntamen vehementia morbi poscente phlebotomiam in nutrice , fortius præsidium est ad eam , morbumque ferendum cessatio a lactatu , qua vel propter paupertatem , vel alia de causa impedita , succurrendum est restrictiore effusione sanguinis , tum paulo largiore cibo.

C A P U T VII.

*De impedimentis venæ sectionis acceptis ex rebus
non naturalibus.*

IN mea Methodo Medendi agens de sex rebus non naturalibus, multa ex aliorum sententia, sicuti propositi ratio exigebat, exposui, ut ostenderem, quemadmodum ex illis indicationes secundariæ remediorum eruantur. In præsentia vero explicaturus Tironibus impedimenta tundendæ venæ, magis ex mea sententia loquar, quam aliorum, deque his accuratius dijudicabo, quæ in methodo tanquam aliorum exempla produxi.

Aer, qui primus recensetur inter res naturales, magnum habet momentum ex placito Majorum ad venæ sectionem vel permittendam, vel prohibendam. Sic impense calidus ficcusque, quem Galenus^(a) loco symptomatis habet, itemque vehementer frigidus vetat sanguinem hauriri, sine his exsuperantiis permittit: quod documentum hac interpretatione recipio. Calidissimus aer cum æquali siccitate multum humorum, & spirituum dissipat, atque spatio aliquot horarum conficit per insensiles meatus, quod per apertam venam vacuatur. Quare, nisi ex mora periculum immineret, non est quærendum scissura venæ, quod aeris beneficio sine commotione humorum non multo post obtinebitur. Hinc validam erue rationem parcendi venis in febribus intermittentibus, aere vehementer effervescente, cito omnem superfluum copiam absumpturo. Caliditati, & siccitati aeris si adjiciuntur similes qualitates temperaturæ ægroti cum raro contextu, habes fortissimum argumen-
tum

(a) *Lib. 1. ad Glauco.*

tum cessandi a phlebotomia in omnibus morbis, in quibus nec mora grave discrimen infert, nec humores impetum in partem principem faciunt. Impetus vero præsens, cum celeriter retineri nequeat per copiosam exhalationem ab aere faciendam, validior est ad indicandam phlebotomiam, quam ad vetandam caliditas, siccitasque ambientis. Hisce tamen qualitatibus, incurrente necessitate venæ fodiendæ, variis externis occurrens, collocando ægrotum in domicilio ad septentrionem posito, humili, crassisque parietibus ab solis ardoribus tuto, effusione frigidæ aquæ, iniectione foliorum refrigerantium; itemque minus sanguinis educes, habita ratione copiosæ exhalationis. Hinc monentur Medici accersiti ad rusticos media æstate curandos, jacentesque in casis vix securam umbram præbentibus, ut cautiores sint ad miseros cruentandos. Porro inter magnos æstus extracta convenienti sanguinis quantitate, statim recreabimus vires grato aliquo odore, & paulo post cibo. Avicenna, quo per eam tempestatem impediatur largius spirituum efflu-
vium, jubet venam anguste perforari, nec jussum probabili ratione caret. Quo latius venæ vulnus est, magis commoventur humores omnes, & commotione attenuatis plures spiritus excitantur, quaque patet aditus erumpunt.

Galenus inter hibernas nives metuens vulnerationem venæ, non penitus interdicare voluit, ut alias interpretatus sum, sed tantum innuere per illud tempus ex gravi duntaxat casu esse ducendum sanguinem, & hunc restrictiore quantitate. Timentibus autem hyemale frigus, multo facilius est id temperare, quam æstivum ardorem, atque inhibere extinctionem spirituum ab excessu frigiditatis formidatam. Reliquæ vero partes anni temperatiores nihil obijciunt, quo minus vena resignetur; imo ver maxime oportunum est incisioni, quo, ut cum Virgilio loquar, tu-

ment

ang
unl
in
en

ment terræ, omnia succo plena sunt, ipse sanguis auge-
tur, & incalescit. Autumnus minus vere favet phleboto-
miæ ob tenuiorem sanguinis partem præterita æstate ex-
haustam, non tamen obstat, tantumque indicat in eadem
specie morbi, eodemque ægrotante minus esse fundendum,
quam vere. De aspectibus cœlestibus, qui ad aerem refe-
runtur, nihil addo ad ea, quæ in methodo medendi ex-
posui; liquidoque constat, saltem in morbis acutis occasio-
nem remedii præcipitem esse, & sumendam ex motu, &
conditione causæ morbosæ, statuque ægrotantis, non ex
favorabili astrorum positu. Perit æger, nisi cito succur-
ras. Quid de cælo cogitandum?

Secundum aerem inter res non naturales recensentur ci-
bus, potusque non minus aere vitæ sustentandæ necessa-
rii: quibus autumo posse prohiberi certam differentiam
temporis sanguinis emittendi, non emissionem. Paulo post
acceptum cibum, eumque crudum in ventriculo vivere
declarante ructu, & satietate, differenda est sectio venæ,
donec coctus sit, ne magis inde protrahatur coctio, &
portio succi crudi depletas venas subeat. Cum vero crudi-
tas ciborum non brevitatem temporis pro coctione, sed vi-
tio ipsius ventriculi contingit, rebus præter naturam ac-
censetur, de quibus infra. Etiam copiosus potus recens
ingestus retardat phlebotomiam; ex qua timet Avicenna^(a)
hydropem, si post potum aquæ plurimæ celebretur, ratus
inde in venas humidum trahi, illabique in profundum
membrorum. Mihi compertum non est, inde secuturum
esse hydropem, sed pro certo teneo refrigeratis, refertif-
que visceribus aquæ copia improvide venam aperiri; quate-
nus inde potest æquabilis motus sanguinis apertionem ver-
sus impediri, osque ventriculi offendi.

Mo-15

(a) De removen. impe. cap. 2.

Motus, quietisque consideratio, quod pertinet ad venæ sectionem, in eo vertitur, ut agitatam sanguinem ab corporis motu recens facta quiescere sinamus ante usum phlebotomi, postque contineatur æger in summa quiete, brevique tempore decumbat in spinam, quasi in corporis basim, hoc adjuvante decubitu æquabiliorem sanguinis distributionem. Motus igitur vehemens corporis recens prægressus remorari potest executionem phlebotomiæ, non interdicare, postquam vitari debet, imo ipsa phlebotomia eo die vitari, quo quis iter facturus est, vel alium motum non levem obiturus; ne commotioni humorum factæ per incisam venam, accedente valido motu corporis, exoriatur febris, vel syncope, vel alius inopinatus affectus.

Somnum, & vigiliam providus venæ professor multiplici nomine animadvertat oportet. Statim a somno admonitione Galeni, & rationis ducendus sanguis non est, dummodo id permittat motus ægrotationis, sed duntaxat post horam; quo intervallo humores, & spiritus ad interiora convocati tempore somni æquabilius in omnes partes dispenduntur, atque influxu vitali roborant. Sanguini educto indormiendum continuo non est, sed hora una, vel altera vigilandum, tum cibi boni succi exiguum offerendum est; & post horam ab accepto, si somnus irrepit, repellendus non est. Quædam tamen occurrunt, quæ statim post incisam venam obrepentem somnum admittere suadent, nimirum si æger debilis esset, vel antea multum vigilasset, si dolor vehemens externas corporis partes affligeret, vel etiam internas, modo absit inflammatio, qua præsentem, si confestim ab evacuatione sanguinea dormiat æger, timetur copiosior sanguinis illapsus in partem affectam, & incrementum inflammationis. Præterea, si puncta vena foret ad compescendum sanguineum profluvium,

*ra
som
cyp*

vium, aut de liriū, quis non videat optabilem esse quocunque tempore ad venientem somnum, eorum symptomatum remedium?

Vigilia, quæ nondum in causam morbosam evasit, neque modum excessit rei non naturalis, hortatur ut in morbo non præcipiti, atque moram concedente, differatur sanguinis extractio, donec corpus paratius sit ad ferendum, prægresso conveniente somno, remedium unde quaque non innoxium. Urgente porro indigentia festinationis remedi, quantitas hauriendi sanguinis adæquetur cum viribus a vigilia aliquantum debilitatis, considerato earum præsentis statu, futuroque.

In excretis, retentisque, quæ numerantur inter res non naturales, quædam sunt adeo quotidiano sermone trita inter medentes, ut operæ pretium non sit, longius agitare. Quis ex ipso Medicinæ limine ignoret, oneratam fœcibus alvum deplendam esse vel injecto clystere, vel assumpto laxante, priusquam vena inciditur? Item constat in suffocante angina, vel alia interna inflammatione, aut alio præcipiti casu, nisi foret in promptu clyster, recludendam protinus esse venam, deinde alvum. Ad difficiliora igitur convertatur opera, & primo ad fluxum menstruum pro modo naturæ manantium; de quo quæri solet, an opponatur sanguinis effusioni, morbo aliquo urgente, ea solito curari: quam quæstionem instituam secundum duplicem, oppositumque locum vulnerandæ venæ, inferiorem, superioremque, sedemque morbi supra, infraque diaphragma. Ordior ab sectione basilicæ, quæ creditur menstrua rite manantia retinere posse, aut saltem turbare, & imminuere. Invaluit enim mos apud Medicos, in lunari immoderate foeminarum effluvio Basilicam revulsio-
nem

tem ab emissario ampliore sequatur, sicque ab angustioribus emissariis, qualia sunt uteri, abducatur, aut saltem delabentis cursus retardetur. Quare menstruis secundum naturam fluentibus, nequit fieri, quin resignata cubiti vena vim aliquam inferat delapsui sanguinis ad uterum, & periculum vel suppressionis, vel imminutionis: & quamvis Vallæo persuasum sit, ea incommoda a venæ tali incisione facilius infligi, quam brachii; tamen neque ratio, neque praxis communis suffragatur, exceptis particularibus circumstantiis. Itaque solius necessitatis impulsu, puta, inflammationis internæ partium supra renes, in quibus instat, & urget revulsionis, derivationisque indicatio, dum menstrua recte peragitur excretio, venam brachii perfoderem; adhibendo præterea ea remedia, quæ contra vim punctæ superioris venæ adjuvant naturalem cursum ex utero fluentium, cujusmodi sunt frictiones crurum, balnea calida, cucurbitulæ; quibus usus est Zacutus Lusitanus in curatione juvenculæ menstrualis apoplexia impeditæ, cui quater cephalicam intra octo horas aperuit, admotis tamen femoribus cucurbitulis, adhibitaque cruribus frictione. Hæc scribens accersor ad scæminam trigintaquinque annorum temperamenti calidi, humidique, post vehemens corporis exercitium cœptam pleuritide tentari, & menstrua pridie pati, quam ægrotaret. Erat dolor fortis prope mammam dextram ad humerum pertingens cum tussi incruenta, magna inquiete, vigiliis, febris acuta continua, urina crassa. Qua hora adivi, quia menses copiose, imo magis solito manabant, nolui cubitum vulnerari. Postridie, cum tussis cæpisset leviter cruentari, mensesque multo lentius fluere, elicite sunt ex cubito decem sanguinis unciae, appositis eodem tempore antè femoribus cucurbitulis siccis, iteratisque post detractionem, nec

inde uterus stillare desivit. Ceteroqui, quia consuetudo regionis post sectam venam brachii incidendæ inferioris imaginationem foeminæ perterrefaciebat, permisi post aliquot horas saphenam fodi, modicumque sanguinis hauriri. Nonno die sine alia repetitione cruenta in tuto fuit, & prope modum febre immunis. Pleuritis copiosam sanguinis detractionem poscit, atque ex partibus aptis ad comparandam celerem revulsionem, derivationemque; ideoque lunari excretionem prius copiose fluente, postea lentefcente contentus non fui, invalida ad cito evacuandum tantum sanguinis, quantum morbus requirebat; atque ad præstandam festinam, efficacemque revulsionem, derivationemque. Tamen detractionem non iteravi, opinatus per spontaneam, & petitam vacuationem indigentia satisfactum iri, cum præsertim viderim inde febrim aliquantum remissam esse; neque sputa magis cruentata: quibus in deterius vergentibus, non dubitarem, venam brachii iterum cruentare, non omissis in partibus inferioribus jam descriptis revellentibus. Interdum pungitur vena superior ad provocanda menstrua retenta, & quidem fructuose venis sanguine turgentibus. Mulier extera, ut refert Riverius, ^(a) sanguineo temperamento prædita, varios patiebatur affectus, potissimum a mensibus suppressis ortos. Per litteras consulti sunt Medici Monspelienses ob contumaciam affectionum, narratumque fuit, toties cohiberi menstrua, quoties cædebatur vena malleoli, largius profluere brachio inciso; admiratique Medici adsidentes quærebant a Monspeliensibus, unde id eveniret. Responsum fuit, copiam comprimentem vasa, in causa fuisse; prius igitur eam adimendam vulnerato brachio, postea malleolum perforandum. Quo sane consilio non indignisset Medicus Priscorum

(a) *Centur. Observat.* 2.

rum minime negligens, docente Aetio^(a) curationem inhibitorum mensium fieri vena superiore, & inferiore resignatis, ubi sanguis redundat, & redundantiam insignis venarum tumor declarat. Hanc praxim saltem in hisce regionibus plurimi servant, quoties mulieri defectæ mensibus subvenire volunt, sed longo recessu ab Aetii vestigiis. Non in omni retentione utramque venam pandit Aetius, sed tantummodo in associata magnæ sanguinis affluentia testatæ potissimum, ut idem auctor notat, ab insigni venarum tumore. Immoderata copia iccirco concurrit ad retinenda menstrua, quod oscilla vasorum comprimit, cujus compressionis tollendæ causa prodest prius basilicam, deinde saphenam referare; quæ aperta sine ablatione compressionis, vel nullam fortassis afferret utilitatem, vel devolvendo majorem quantitatem sanguinis ad inferiora non leve importaret incommodum, causam compressionis adaugendo. Factam porro mensium retentionem sine plenitudine ab Aetio descripta, qui apertura venæ superioris inferiorisque curat, ab illius præscripto, & ratione longe discedit; frustra que ægrotantem bis vulnerat, multoque perniciosius, si mulier ex intercepto lunari fluxu cacochymiam contraxit. Hoc posito laborantis statu, soleo prius exhibere, quæ faciunt ad viarum impedimenta amovenda, excernendasque congestas impuritates, & adhuc permanente morbo talum solum vulnerare; neque semel hæc curandi ratio mihi bene vertit. Enim vero video duos magnos auctores Hippocratem, & Galenum inter se se plane discordes de medicatione stagnantium mensium, altero nunquam venam, uti observat Prosper Martianus^(b), feriente, semper Galeno. Quinimo idem Martianus habet pro indubitato, icta vena tali potius compesci menstruorum

cur-

(a) *Lib. 16. cap. 57.* (b) *Lib. 1. de Mor. Mulie. Hippo.*

*Aetius
super.*

*Martianus
icta vena
noni men
compre
indubita*

cursum, quam incitari, provocatque ad experientiam, ut inquit, ostendentem venæ punctione in malleolis, nunquam subsistentia menstrua commota fuisse. In eventum rationem producit stimulum lunaris purgationis, quam credit non peragi absque turbatione sanguinis, nec istum turbari sine copia potissimum circa partes inferiores, quæ ablata incisione tali menstruorum incitamentum adimit. Verum in hac ratiocinatione Martiani duo apud me non bene audiunt, nunquam per venæ pedis vulnus retentos menses provocatos esse, præterea eodem vulnere auferri copiam sanguinis in partibus inferioribus, ejusdem agitatione, & turbatione irritamentum lunaris effluxus. In primis mihi videtur nimia cum fiducia a Martiano assertum, nunquam istam venam pedis fuisse stimulum menstruis ad effluendum. Et sane quo argumento citra dubitationem id affirmari potest in tanta singularium multiplicitate, & varietate, de qua nemo mortalium in hac brevitate vitæ certior reddi potest? Experientia a singularibus proficiscente, & in singularium imperscrutabili diversitate facta nihil possumus universim affirmare, aut certo negare; possumus sæpe, aut raro aliquidpiam evenire asserere, semper, aut nunquam evenire, non possumus. Fateor, me quoque nunquam vidisse eodem die, neque postero ab reclusa vena tali incitata fuisse torpentia menstrua, vidisse tamen affirmo, post intervallum non longum emanasse. Non ideo asseverabo nunquam eorum exitum contigisse, quò die ad hunc finem cruentata est vena, neque contingere posse. Quod viderim aliquid evenisse, id renovari posse colligo: quod non viderim, id esse non posse, colligere nequeo. Item nisi subito, vel citissime incisa saphena evocat menses, non potest iccirco constitui inutilis evocandis. Itaque nihil momenti experientia præbet Martiano ad suæ sententiæ propu-

pugnationem: pensitemus, an magis adducta ratio suffragetur. Turbandus est, inquit, sanguis, ut fluat excretio lunaris, requiriturque ad perturbationem abundantia sanguinis circa partes inferiores, quam eripiens ista vena tali, impedit perturbationem, adjutricem effluxus. Primum autem mihi valde dubium est, an necessarius sit copiosus sanguis in partibus inferis ad efferendos menses, quos aliquando vidi statis diebus efferri in sanguinis inopia universali, genita in febribus paucitate cibi, aliisque vacuationibus. Age nunc: concedamus opus esse ubertate sanguinis in partibus inferis ad exigenda menstrua. Cur mediocri quantitate sanguinis venas irrigante timebimus cum Martiano, ne paucae unciae a pede elicite auferant necessariam copiam, sicque potius inhibeant effluxum, quam sollicitent? Certe vulnerata Saphena vim habet revellendi humores ab partibus superis, & universos deorsum commovendi: ex quo sperare licet, plus sanguinis ibidem superfuturum, quam quod elicatum fuit? Sin autem multum redundet sanguis, obstatque menstruae eruptioni, cur partem obstantis quantitatis non summovebimus, uti cum Aetio decretum est, cruentata Basilica, partem Saphena? An timendum erit ab hac pertusa incommodum in magna quantitate sanguinis, quod in mediocri vidimus non esse timendum? Solum illius scissionem metuerem in notabili humorum paucitate; contraque subsistentia menstrua aliis remediis pugnarem. Haecenus respondi Martiano ex Priscorum sententia ante inventum Sanguinis Circuitum, quo posito ea ratio funditus diruitur: siquidem externa vi sanguine per omnia vasa circumducto, distributoque æqualiter pro capacitate vasorum, copia major non cumulatur in vasis inferioribus, quam superioribus, nec facto circa uterum cumulo instigante fit menstruum sanguinis impendium.

Sancita ratio menstrualis mulieris per venæ apertionem curandæ in partibus superioribus gravi morbo vexatæ, videtur etiam apposita puerperæ lochiis fluentibus, abs quibus retentis multi formidant deteriora, quam menstruis; & proinde hisce suppressis semel tantum sanguinem e talo hauriunt, priusquam e brachio; in enixa vero securius judicant antea semel iterum, itemque tertio saphenam aperire. Qua in re primo adnotandum obversatur, facilius per vasis superni sectionem posse compesci menses, difficilius lochia, saltem pro notabili horum parte, eaque, quam celebres Anatomici existimant ex uteri substantia decidere, quæque tempore conceptus illi imbibita immane dederat augmentum. Hæc portio lochiorum proxime a fluente sanguineo non derivatur, abs quo scilicet tempore gestationis secreta fuerat, interfusaque uteri substantiæ; ac proinde motum scatentis e vena humoris sequi nequit, uti sequitur in vena contentus, & totus scissuram versus confluit. Solum igitur abduci poterit ab utero per vulnus Basilicæ per se, & primario portio sanguinis ab vasis eo delabentis, non inquinamenta ex illius interstitiis stillantia. Quod autem dicunt, pluries ex talo detrahendum esse sanguinem, antequam admoveatur phlebotomum brachio, mihi suspectum vehementer est timenti, ne uberibus cum sanguine dissipatis spiritibus minor etiam horum quantitas ad fibras uteri constrictorias, expultrices colluvionis illius substantiam occupantis, accurrat, minuaturque, aut retardetur expulsio. Inde admoneor, pro curatione subsistentis puerperii conducibilem quidem esse posse aliquam effusionem sanguinis ex pede, non tamen toties repetitam, ut aliqui solent, neque ex solius consuetudinis suasu. Profecto si apud nos aliquid ponderis habet Hippocratica praxis, multo rarius non apparentibus lochiis talum cruentabimus

Senem imitaturi ; qui duntaxat sanguinem ducit angustiore utero non emittente partus purgamina , sicuti advertit Martian.^(a) ubi magnus morbus inde ortus est , & materia per aliam viam commodius nequit amandari. Hippocrates igitur aut venam resignat , aut ventrem laxat , provocatque lotium , & sudorem , si ferat occasio . In affluentia probi sanguinis ceteris remediis videtur anteponenda phlebotomia , huic vero reliqua anteponenda in redundantia mali succi . Ceterum qui statim ac videt supprimi puerperium , vel parce fluere , iterato sanguinem haurit , sæpius , ut opinor , puerperam lædit , quam juvat. Sæpius enim quod negotium faceffit Puerperæ , est contentum in uteri cavitate , aut substantia non in venis totius corporis , quod reclusa vena pedis educere nequit , & solum aliquatenus potest adjuvare illius expulsionem laxando meatus : quod aliis remediis conari præstat , quam iterata venæ apertione cum sanguine vires hauriente , unde omne bonum.

Cognita providentia , qua pungenda est vena in superioribus partibus , propter vehementiam morbi ibidem coorti , reliquum est , ut de eadem tractem in morbo fortiore partium infra renes . Doctissimus Fernelius curans inflammationes partium inferiorum , fodit revulsionis gratia venam cubiti interiorē , idemque exequitur utero inflammato ; neque tutam , & conducibilem judicat inferioris sectionem ante superiorem incisam , maxime si vasorum ingens est plenitudo , fluxionis vehemens incurfio . Id Fernelii præceptum redarguit Sanctacrux , ceu Tironibus multiplicem errandi occasionem prætenderet : quos sane erraturos opinor , si tam oscitanter , uti Sanctacrux , Fernelium legant potius , quam ponderent . Scientissimus auctor non de quacunque inflammatione uteri loquitur , uti

K

arbi-

(a) *Lib. I. de Mor. Mulie.*

*Fern
sciat
super
in in*

arbitratur Sanctacrux, sed magna, maximeque cum insigni vasorum plenitudine, vehementique fluxione: utque omnem dubitationem tolleret, methodumque tundendæ venæ in eis morbis explicatiorem traderet, hæc subdit: *Sin autem levior existit inflammatio, neque plenitudo supra modum increverit, superiorum venarum sectionibus prætermis-
satis superque erunt, quæ ex inferis obeuntur.* Hisce tam lucide sua sensa expressit Fernelius, ut neque Tirones dubitare queant, utrum præceptum illud, quod carpitur a Sanctacrucis tanquam absolute prolatum, sit revera absque circumscriptione, quæ majore perspicuitate declarari non potuit, ad quoscunque erudiendos. Id unum animadvertendum adiicio, magis metuendam esse ex cubiti vulnerata vena impeditionem mensium rite stillantium inflammationis partibus superioribus, quam uterò. Quippe hoc inflammato totus sanguis inflammationis æstu, & ir-
ritamento eo allicitur; in partium vero superiorum inflammatione, mensuris manantibus, sanguis partim tendit ad superiora, partim ad inferiora.

Satis de menstrua purgatione: dicendum de venerea excretionem; postquam Avicenna agens de removendis impedimentis, venam non solvit; alibi tamen capitis dolorem ex coitu cum multa evaporatione ad caput, sanguinis detractione curandum sancit. (a) Coitus spiritus haurit, partes solidas enervat, turbat & vitiat coctionem ventriculi, hisque offensionibus opponitur utilitati phlebotomiæ. Itaque si post coitum morbus exoriatur, venæ vulnerationem flagitans, respiciendum est ad temperaturam ægroti, habitum corporis, ætatem, anni tempus, rationem coitus, ut recte decernamus de viribus; quas ex pulsu non semper metiri certo possumus, aliquando, uti ani-
mad-

(a) Lib. 3. Fen. 13

madversum est, præseferente pulsu fallacem validitatem, scilicet ortam a concitatione spirituum, non robore naturæ; unde multi decepti sanguine ducto post venerem, ægro- tantem in lethalem statum præcipitarunt. Provoco ad He- rediam ^(a) versantem ægrotationem Adolescentis in Melibea, & affirmantem fere omnes venereos acutis morbis oppres- sos, quibus vena pertusa fuit, extinctos esse; additque in similibus ægrotis non esse fidendum pulsus constantiæ; ex qua certo vires metiri nequimus, ob partes solidas ab ictibus venereis infirmatas. Id igitur generatim constitu- tum esto, post coitum recens, nec sobrie prægressum omittendam esse sanguinis extractionem, ingentique neces- sitate cogente, minus extrahendum, atque post extractio- nem providendum idoneis auxiliis lapsui virium inde se- cuturo.

Præsentis impetus animi, atque perturbationes vehe- mentes phlebotomiæ adversari certius est, quam ut pluri- bus oporteat ostendere. Omnes enim valde spiritus, hu- moresque exagitant, sive ad interiora commovendo, uti timor, & tristitia; sive ad exteriora, uti gaudium, cupi- ditas; aliæque definentes in voluptatem, in qua commo- tione quis venam resignare festinet? Quis non expectet turbarum sedationem? Statim a corporis forti motu non aperimus venam; cur aperiemus commoto vehementer animo, fortiore spirituum, humorumque turbatore? Ve- rum sicuti compertum, exploratumque est in ingentibus animi perturbationibus, non esse sanguinem adimendum; ita habeo pro maxime probabili, nullam tam præcipi- tem occasionem ablationis obtingere posse, ut nequeat ea differri in tempus sedati tumultus. Eo igitur disputatio- nem convertam, ut inquiram, utrum propter ingentem

(a) *Lib. 3. Mor. Epid. Hip.*

*Coisy w
D'any c*

formidinem ægrotantis sit temperandum a postulata phlebotomia; siquidem aliqui ægroti ita percelluntur denuntiata venæ sectione, ut Opifex hæreat, partemque formidinis concipiat. ^(a) Galenus offendens ægrotum scalpri valde meticulosum, nisi queat ulla ratione metum abigere, relicto ferro ad alia confugit auxilia; atque in curatione febris putridæ accensæ a stipatione meatuum cutis cum abundantia succorum, loco venæ punctiōis nimium ab ægro formidatæ, frigidam copiosam propinat. Non in omnibus tamen morbis hæc, vel alia suppetere potest substitutio remedii, in quibus scilicet phlebotomia non solum utilis est, ut in descripta febre, sed magnopere necessaria, veluti in magnis inflammationibus internis, in quibus majus negotium exhibet violentia morbi, quam formido laborantis, & principalem operam exposcit. Quinimmo vix credibile est, ægrotum coeptum premi vehementia inflammationis, ita timore concuti, ut magis sollicitus sit de vitando phlebotomo, quam periculo, leniendoque inflammatae partis dolore. Expone vitæ periculum, abigetque timor timorem; cujus scilicet evitandi gratia multo graviora tolerantur, edunturque conatus viribus majores, nempe illas concitante impetu animi ex præsentia magni periculi concepto.

De Ecstasi, quam Sanctacrux inter res non naturales enumerat, verba non faciam, cum rarissima sit, longe diversa a rebus non naturalibus, interque morbosas collocanda, nimirum affectiones soporiferas; quippe quæ alio nomine Catalepsis vocatur, inter eas affectiones collocata.

C A-

(a) *Lib. 9. Meth. cap. 5.*

C A P U T VIII.

De impedimentis Venæ sectionis acceptis ex humorum vitio.

Sanctacrux expositurus impedimenta venæ sectionis objecta a rebus præter naturam, principio expendit diversas cacochymiae species, biliosæ, pituitosæ, serosæ, malignæ; de quibus multa decrevi superius ostendens, generatim cacochymiae non convenire sanguinis emissionem, tanquam evacuans auxilium, nisi una cum mala qualitate succorum exuberans copia coniungatur: quo ostenso, liquet quid deliberandum in ejusdem differentiis. Quædam tamen subjungam de cacochymia serosa, & maligna, quibus uberius erudiantur Tirones, nec habeant, quod optent ex tractatu Sanctacrucis. Serosam cacochymiam Sanctacrux considerat in hydrope, disputatque, utrum sanguis sit eximendus, reprobaturque cum ceteris medicis detractionem in Ascite, & Tympanite, deinde totus est in explicando, quando ex mente Galeni prodest venam ferire in Anasarca. Est Galeni^(a) sententia ejus hydropis principio, qui creditur originem habere ex retentione hæmorrhoidum, vel muliebrium, vel ex alia qualibet causa sanguinem augente, utiliter minui; abs quo pauci Antiqui, sed multi Recentiores dissentiant, arcentque ab omni hydrope scalpellum. Paucis sensa mea aperio. Exant quidem apud Forestum, Riverium, aliosque exempla hydropis pituitosi excitati post menstrua intercepta, curatique perforata incipiente morbo vena; sed in tanta copia medicaminum alterantium, aperientium, alvum,

VO-

(a) *Lib. 4. de rat. vic. acut. Hip.*

vomitum, sudores, urinas provocantium post phlebotomiam usurpata, non potest certo colligi, quid ad salutem incisio vasis contulerit. Mediocris sanguinis detractio initio Anasarcae cum virium robore, tametsi non prodesset, tamen videtur non posse insignem noxam, manifestamque ad judicandum infligere, & relinquit incertum, utilis ne, an inutilis fuerit. Consulenda igitur ratio, quæ solum probabilem reddit venæ punctiōem in Anasarca, positis conditionibus a Galeno expressis, & antequam sanguis multum a naturali bonitate recessit. Alia etiam interdum cum Anasarca coniunguntur, quæ sanguineam vacuationem hortari possunt. Sic vidi Patavii textorem quendam annorum circiter quinquaginta eo morbo impeditum cum febre, vasa ampla, & distenta habentem, qui venæ punctura, & purgantibus curatus est.

Satis de cacochymia serosa, nunc de maligna. Alii morbi Medicis vocantur maligni, alii pestilentes, alii venenosi: sed hi, & pestilentes quædam differentiæ sunt maligni morbi, si malignitas sumitur pro pessima, occultaque corruptione succorum, quæ licet pessima dicatur, tamen habet diversos pravitatis gradus, & conjunctionem aliarum qualitatū, qualis est contagiosa, quæ solet esse communis pestilentibus. De hisce omnibus seorsum agendum non est, neque aliud inquirendum, nisi utrum id, unde morbi dicuntur pestilentes, aut venenosi, repugnet phlebotomiæ, eo assumpto, quod vis illa veneni fusa sit per sanguinem, ipsique inhæreat. Sanctacrux indagans venæ sectionis obstacula ex vitio pestilente sanguinis, probat eam esse necessariam propter indigentiam maxime urgentem revellendi humoris venenosi, obstandique, quominus in cor decumbat, & labefaciat; nititurque ostendere, humores per venam istam a centro vocari ad corporis

ris ambitum . Itaque breviter considerabo productas ab Sanctacruce rationes ad suum placitum fulciendum : quæ tamen jacent omnes , admissio sanguinis circuitu , ex cuius legibus obturata vena post sanguinis effusionem , totus qui remanet humor , per omnes partes circumfluit , & æquabiliter interiores , exterioresque rigat . Porro rejecto Circuitu , non apparet fructuosa revulsio humoris venenosi a corde per apertionem venæ , nisi posito , eum contineri in certis vasis communicantibus cum aperto , & inde ad cor deferri ; ideoque sperari posse revulsionem a corde ex ejus vasis apertione ; quod tamen est contra assumptum , videlicet qualitatem virulentam esse toti fluente sanguineo communicatam . Hanc vero in primis sentio sanguinis de tractioni adversari præsentem virium dejectionem , vel futura , deinde peculiari sanguinis vitio , quod duntaxat effectu deprehendere possumus , non ex perspecta explorataque venenosæ , pestilentisque qualitatis natura , quæ varietate , & dissimilitudine difficillima est ad cognoscendum ; ut mirum non sit alios testari , se utilem comperisse in febribus pestilentibus phlebotomiam , alios exitiabilem : de quibus tamen experimentis non est in proclivi dijudicare .^(a) Botallus , cujus scalpellum semper sanguine stillare videas , fortissime ejusdem utilitatem in peste tuetur , prædicatque divinum remedium ; & perniciofa conamina curandæ pestis educto sanguine ab aliis facta rejicit in eorum ignorantiam , & inde commissum erratum , vel parcius , vel tardius , quam indigentia postulabat , sanguinem eliciendo , vel utrumque peccando : cum quo facit Sydenhamus egregie commendans prolixam sanguinis effusionem in peste , dummodo fiat , antequam tumores efferantur . Proniore animo tot laudes phlebotomiæ pro curatione pestis exciperem , si
de

(a) Cap. 7. de curat. per vena sect.

de certa locutus esset, non de quacunque generatim, tot gravissimis auctoribus inter se se pugnantibus propter miras, variasque illius efficientias. Daniel Taurius^(a) in malignis febribus venam aperit, si tenet signa veneni sanguinem cogentis, non aperit apparentibus inditiis dissolventis. In hac ambiguitate videtur in eo genere pestilentis febris aptior sanguinis expensa, in quo vehemens est incendium, capitis dolor, aliaque symptomata fortium febrium putridarum, apparentque in urina solitæ earum notæ. Affirmat idem Taurius medicus Parisiensis in febribus malignis anni 1694. sanguinis detractiones fere omnes fuisse mortales in laborantibus febris maligna, sine permissione febris ardentis. Itaque suspecta valde est phlebotomia in ea pestilenti febre, in qua non capitis dolor, non sitis, ingensque æstus urgent, nec urinæ colore, habitu, contentisque differunt ab urinis sanorum: in quibus licet opinari venenum clam, furtimque spiritus, & tenuiorem sanguinis partem invadere, & labefactare, simulque vires pro ferenda sanguinis ex scalp pro imminutione. Illud etiam videtur magnum pondus habere ad eandem dehortandam, si ponimus seminium virulentum aeri inspersum esse, nempe recluso vase uberius & promptius penetraturum in pulmones, universumque sanguinem tenuatum, & rarefactum. Simili consideratione doctissimus Fernelius jubet, pestis viru late diffuso per aerem abstinere a pleniore victu, vehementi corporis exercitatione, aliisque causis, quæ crebram magnamque respirationem inducunt. Quoniam autem pravus humor sæpe effertur in cutem, inquirendum est, utrum in excretionibus ad exteriora liceat venam fauciare, & primum in bubone. ^(b) Sydenhamus clari nominis neotericus phlebotomum abjicit
in

(a) *De febr. malign. cap. 21.* (b) *Pag. 129.*

in pestilentia jam apparente tumore, arbitratus per eam humores a circumferentia ad centrum trahi, fierique motum contrarium naturæ a centro ad circumferentiam moventi; abs quo dissident, discordantque plures de Veteribus, & Recentioribus; suæque dissensionis non invalidas rationes afferunt, eamque præcipue, quod phlebotomiæ utilitas in internis inflammationibus inveterato, communique usu comperta evincit, per eam non acciri humores ad interiora, sed exteriora: quod insuper ex ipsis præscriptis Sydenhami luculenter apparet, haud facile ab evidenti contradictione vindicandis. Namque agens de curatione Diarrhææ in morbillis ortæ, uti credit, ex halitibus inflammati sanguinis in intestina ruentibus, affirmat, unicum levamen sperandum esse ab vena pertusa acres humores revellente, ipsumque sanguinem ad debitam temperiem redigente. Quorsum, peto, incitat phlebotomia humores, quos ab intestinis afflictis revellit? Certe ad oppositum locum, videlicet ad corporis ambitum. Cur igitur ex eadem in eruptione bubonis veretur, ne trahantur humores ad interiora? Quamobrem si sanguinis extractio potest turbare excretionem ad cutem, hanc quidem non potest, accersendo humores ad intima corporis, sed alia ratione, puta, infirmando conatum naturæ, sive pervertendo motum illum sanguinis, quo separatur materia bubonis, pelliturque ad exteriora. Quamquam igitur non arridet ratio Sydenhami, relinquentis phlebotomum ad intuitum exeuntis bubonis, tamen arridet relictio, multosque habet imitatores. Non tamen id perpetuo, & in quocumque loco nascatur bubo, observandum est, uti rarum idemque insigne docet experimentum a Riverio^(a) factum in febre epidemica Monspelii grassata anno

(a) *Lib. 17. Prax. med. cap. 1.*

Cory
bydhe

insigne
vimentum

1623 cum magna mortalium pernicie. Quibusdam peste affectis Parotides, species bubonum circa nonum, & undecimum morbi diem apparebant, & tanta sevitie, ut intra biduum ægrotantem de medio raperent, nil adjutum alexipharmacis frequenter adhibitis, admotisque Parotidibus attrahentibus. In hac desperatione reparandæ salutis Riverius, mente agitans illud Celsi, fatius esse anceps remedium experiri, quam nullum, deliberavit in aliquibus hanc medicationem periclitari, plurimos servaturam, si bene cessisset; & primo periclitatus est in quodam Mercatore Monspeliensi, qui post deliberationem curandus primus occurrit. Succrevit Parotis pone sinistram aurem die morbi 11, cui novam medelam adhibuit veteri posthabita. Jussit tres uncias sanguinis detrahi, invisoque ægroto post tres, aut quatuor horas, & cognito, pulsus esse paulo validiorem, minusque inæqualem, duas uncias sanguinis iterum duci præcepit, & postridie medicamentum purgans ex Senna, & Rheobarbaro, propinavit. O felix consilium, quo non ille tantum imminente morte redemptus est, sed quotquot deinceps toto eo anno, ut ait, in similem morbum incurrerunt, similemque medelam experti sunt. Angustia loci recipientis, & copia materiæ ægrum citissime jugulabant, ut ostendit sanatio per imminutionem consecuta. Si ad capaciorem locum detrusa illa foret, neque tantum periculi intulisset, nec eandem curationem indicasset.

Altera est in febribus malignis, & pestilentibus oppido frequens eruptio ad cutem, totaque consistit in maculis rubris, aut violaceis, aut alterius coloris plerumque publicum morsui assimilibus, aliquando in principio, crebrius in decursu morbi apparentibus. Hisce porro emicare incipientibus, disputatur apud Medicos, utrum liceat sanguinem

nem effundere, si aliunde effusio indicaretur. Controversiam dirempturus, primum inquiram, cujus conditionis sit ea excretio. Vidi has maculas in viro quinquaginta circiter annorum, temperamenti sanguinei, biliosique post equitationem frequentem, correpto simplici tertiana. Vidi in Puella decem, & octo annorum temperamenti sanguinei, quæ postquam choreis incaluit, incidit in tertianam duplicem continuam, restinctam tamen intra quatuor, aut quinque dies, & absque ullo maligni humoris inditio. Raro tamen id usuvenit, plurimumque in pravis febribus illæ apparent, pravitatemque denuntiant, æstumque malignum, imo a multis numerantur inter proprias notas virulentæ qualitatis; quibus tamen non assentior. Quandoquidem neque in omnibus malignis erumpunt, nec in solis, ut vidimus, malignis, quodque aliquando ab aliquo morbo separatur, ejus proprium inditium non est. Nemine tamen discrepante, quotiescunque apparent in febribus continuis cum gravium symptomatum comitatu venenosi succi significationem onerant, certiolemque præstant. Quinimo Sydenhamus (*) animadvertit, maculas purpureas in certis circumstantiis apparentes, esse certissimos mortis indices. Quamquam igitur Alexander Massaria, Rodericus a Fonseca, alique non obscuri nominis existimant, dicta exanthemata symptomata esse in principio morbi crudi exeuntia, critica post coctionem, mihi videntur nihil aliud esse, quam quiddam consequens ad fervorem malefici humoris; quemadmodum est color flavus viridisque inficiens corpora passa morsum viperinum; ideoque quocunque tempore efferantur, esse symptomata, & inutilia. Excretiones notabilis quantitatis in corruptione late fusa per sanguinem salutare esse possunt,

maule i.
3. implic
duplici in
significat: e
hæc non reat

mau
kenyo
poma

non exiguae quantitatis, cujusmodi sunt puncta rubra, vel aliter colorata interstinguentia cutem; quorum occasione nunquam observatum est, uti notat Petrus Forestus, ^(a) secutam esse crism. Hac animadversione constat supervacuos esse, & potius noxios plurimum Medentium conatus ad promovendam expulsionem peticularum cucurbitulis scarificatis, aut siccis, quasi earum copiosiore expulsionem fomes malignus cum levamine ægroti non parum minueretur. Numquam, cum mihi licuit libere mereri, consuetis remediis cuti adhibitis earum exitum provocavi, cavi tamen quæ possent impedire, ut pote quoque insensilem perspiratum impediencia; semperque in bonis habui, maculas paucas, rubrasque apparere. Quacunque vero quantitate apparerent, & cujuscunque coloris, harum aspectu in aliam curam animum non intendi, nisi ut temperarem sanguinis fervorem, pravamque qualitatem corrigerem, cutem punctatim maculantem; in quem finem soleo uti nitro purificato, & aliquo temperato cardiaco pro ratione accidentium. Magis enim, ut persuasum habeo, præstat interna causæ correctione obstare macularum eruptioni, quam externis auxiliari. Daniel Taury principio exeuntium stigmatum præbet fortia Cardiaca augmenta fermentationem; quæ meo arbitrato, locum duntaxat habere possunt, ubi majus negotium facessit pravitas humorum, quam fervor, non eo fine ut stigmata uberius efferantur, sed cor roboretur, vel opportune sudor provocetur. Ceterum observat Sydenhamus ^(b) ab intempestivo Cardiacorum usu & regimine paulo calidior maculas sæpius efflorescere, & purpureas in junioribus, & temperatura calidior præditis in quolibet Acutorum genere summæ inflammationis certissimum inditium esse.

Hæc

(a) *Lib. 6. de febr. Observat. 12.* (b) *De nova feb. ingressu.*

animadu
circa v. s. d
venis by m

Hæc si mecum adprobas, sancire debes, excretionem stigmaticam nullum habere momentum ad interdicendam phlebotomiam, tum hujus natura considerata, quæ non trahit ab ambitu ad centrum, tum conditione excretionis, quæ critica statui nequit, siue spectes paucitatem excretæ materiæ, siue causam excernentem. In dubium forsitan verti potest, an in maligno humorum statu ab interstitiis coloratis notis cute significato possit reperiri indicans ducendi sanguinis e vena grandi, sine impedimento a viribus objecto, solitis in hisce febribus accidi. Ceterum præsentem validam indicationem, cujusmodi esset copia sanguinis cum dolore capitis, procul dubio exequendum indicatum foret; uti exequendum visum est claris viris Montano, Rondeletio, Riverio, aliisque multis, initio tamen eruptionis; id quod præclaro exemplo confirmat Riverius, ^(a) qui erumpentibus stigmatis, licet violacei coloris, venam brachii resignavit, exituque felici, quem antea promiserat ægroto. Attamen Daniel Taury ^(b) ad pungendum utiliter venam non solum requirit initium eruptionis macularum, sed insuper morbi, rubrum earum colorem, æstumque febris ingentem.

Celebr
v. s.

Quandoquidem incidit sermo de eruptionibus ad cutem in febribus malignis, ad eundem attexo investigationem, utrum Variolæ, quæ sæpe exitiales sunt, malignamque febrem comitem habent, & maculas purpureas, sint perpetuum impedimentum phlebotomiæ. Fomes earum in sanguinem immergitur, natus certo tempore ad erumpendum, cutemque afficiendam; atque identidem tam feliciter eruptio procedit, ut nullam permittat quæstionem de incidenda vena, totum negotium absolvente natura absque artis præsidio. Interdum tamen vel prope exitum, vel in ipso exitu

(a) *De mor. Infreq. Obser.* 12. (b) *De Mac. purpu. cap.* 26.

exitu tam gravia & molesta accidentia interveniunt, ut ingerant gravem suspicionem sinistri eventus, exigantque artis providentiam. Quæritur igitur, an tanta sit vis Variolarum effundi incipientium, ut semper excludant usurpationem phlebotomi, quæcunque intersint accidentia. Quamquam autem apud vulgum invaluit opinio in præparatione corporis ad Variolas, semper esse perniciosam venæ magnæ vulnerationem, tamen & ratio docet interdum convenire, & utilem fuisse, experientia testatur. Atque primum animadverto phlebotomiam non opponi exituris, aut exeuntibus Variolis, quasi per eam induceretur motus contrarius ab extimo corpore ad intimum, uti supra quoque adnotatum fuit; imo multiplici experimento constat per sanguinis detractionem adjutum esse, festinatumque motum ad cutem. Vagantibus Patavio Variolis, quædam Virgo viginti duorum plus minus annorum correpta feбри cum magna anxietate, & agitatione mihi inditio fuit variolarum exitum conantium, quem sine sanguinis extractione opperiebar. Crescente tamen vehementia jactationis aliorumque symptomatum necesse fuit, venam tali resignare, id etiam suadente mensium non brevi retardatione. Vix clausa est vena, cum toto corpore, quasi fræno ablato, & signo dato apparuerunt variolæ, antea, uti opinor, cunctatæ, aut propter vasa nimis distenta, aut densiorem sanguinis compagem. Idipsum plures alii experti sunt, præceteris Amatus Lusitanus^(a), qui, uti narrat, non dubitavit puero quinque annorum habenti sensum punctiōis modo in una parte corporis, modo in altera, modo in pluribus, uncias quatuor sanguinis ex brachio dextro elicere; quo educto protinus transmissa ad cutem liberius materia pungens est, efformataque in variolas, cessante sensu

pun-

(a) *Curat. 7. Cent. 2.*

punctionis . Quemadmodum autem venæ incisio accelerare potest Variolarum egressum positis certis circumstantiis ; ita potest retardare , & perturbare illis mutatis , licet ex sua natura ab ambitu ad centrum minime ducat . Ut humor noxius in sanguinem immerfus efferatur in cutem , certus motus intestinalis , fervorque sanguinis requiritur adjutus a peculiari robore , & quantitate partium ejusdem ; quibus per phlebotomiam alteratis , vel retardatur , vel imminuitur , vel cum gravi discrimine impeditur expulsio . Unde nam nostris temporibus raro crises eveniunt in acutis , quas multo frequentius vidit Hippocrates ? Nil aliud in causa est , uti observant cordati auctores , nisi impedimentum injectum abs tot sanguinis de tractionibus , aliisque vacuationibus , & irritamentis naturam primariam effectricem salutis interpellantibus . Res manifestior est in Variolis pluribus , & clarioribus exemplis confirmata , ideoque etiam vulgus illis instantibus , vel egredientibus vehementer formidat venæ incisionem , Medicique hunc consensum sequuntur , nec deferunt nisi aliqua forti causa coacti , puta , notabili plenitudine venarum , difficili egressu cum incremento febris , aliorumque symptomatum : quibus significatur , naturam copia premi , aliquod allevamentum habituram ab venæ incisione . Copia tamen probabilem eam reddens , videtur tantum reperiri posse in natu grandioribus , in quibus tam cito sponte dissipari nequit , ut in tenellis puerulis .

Haftenus dicta de eruptionibus ad cutem in maligna humorum qualitate , quantum attinet ad venæ solutionem , valent etiam in ceteras humorum conditiones . Eadem enim semper est remedii natura per se spectata , & solum ejus effectus variant pro varietate accidentium concurrentium in actionem recipiente . Quicumque sit humorum

*Optima
v. s. h
ad vari
s. in ve*

*Cur
crise
tempe*

*e. s.
no*

rum status, nunquam Phlebotomia adversatur motui ad exteriora alliciendo succos ad interiora; quamvis adversari possit alia ratione, videlicet enervando vim expultricem. Sic in Erysipelate, in quo Celsus, Paulus, aliique non metuunt venam aperire, metuunt alii cum Galeno, eam certe apertionem timere nequeunt, tanquam advocaturam ab ambitu, & revocaturam ad centrum prius in ambitum transmissa. Verum enim vero quia satius est commotam bilem extra ferri, quam intus remanere, & sanguinis detractio, mutans ejusdem contextum perturbare potest motum expulsores ad externa, cadit in controversiam, an ea sit usurpanda in Erysipelate; & hinc etiam cadit in controversiam, quoniam per eandem attenuatus sanguis facilius vertitur in bilem, quando istius fermentum emersum viget, & dominatur; quo nomine Majores declinabant venæ punctiōem tempestate æstiva. Quamobrem consultius agunt cum ægroto, qui venam non feriunt in sincero Erysipelate, sed tantummodo phlegmonoso, eoque minaci, aut propter febris intensiōem, aut partem affectam, aut magnitudinem, & alia accidentia supervenientia. Quare in Erysipelate capitis, & faciei & propter partis dignitatem, & morbi conditionem in iis partibus, ut animadvertit Galenus, fere nunquam exquisiti, non pauci confugiunt ad venæ sectionem, si magnitudo morbi & accidentium cohortetur; eam omittunt in Erysipelate crurum, in quibus frequentius accenditur, & aliarum ignobilium partium. Animadvertendum tamen est phlebotomiam in brachio in Erysipelate faciei, capitique interdum notam perniciosæ subivisse, quasi traduxisset causam morbi ad pulmones cum interitu ægrotantis, qui secutus est. Et sane interdum Erysipelata in facie accensa repunt in cutem capitis, quorum multa affirmat Vallesius,

sius, ^(a) se vidisse citra periculum ægrotantium replevisse; interdum tendunt deorsum, & ista cum Vallesio opinor, periculosiora esse ob metum, ne fauces, guttur, & pulmones invadant. Itaque morbi descensu ad inferiora observato, si sanguinis effusio requiritur, certe consultius erit ad omnem suspicionem declinandam, cucurbitulis scarificatis tergo appositis eum effundere, quam vena cubiti vulnerata. Sydenhamus in curatione febris erysipelatosæ postquam descripsit faciei Erysipela, nulla adhibita distinctione ait, ut primum accedit ad ægrotum, præcipere satis largam sanguinis effusionem, eamque iterum, & tertio repetere, si morbi constantia repetitionem exigat, ad educendam materiam immistam sanguini, plerumque, uti asserit, Pleuriticorum sanguinem æmulanti. Nollem tamen inde Tirones animos caperent ad large sanguinem generatim detrahendum in eo morbi genere, prætermisso examine, quale sit temperamentum ægroti, quibus humoribus scateat, cujus conditionis sit Erysipelas. Quandoquidem Londini, ubi Sydenhamus praxi floruit, Medicus alter clari nominis Joannes Freind ejusdem morbi faciem insidentis comitati febre vehementi, delirio, & distentionibus nervorum curationem confecit in Virgine admodum generosa stirpe orta iteratis purgantibus, iisque non infirmis, nulla prorsus mentione facta de sanguinis detractione.

Flatus, de quibus Sanctacrux, postquam egit de vitio sanguinis maligno, & pestilenti, inquit an phlebotomum rejiciant, quamvis a variis causis generari possint; tamen quia ad eorum generationem humores concurrunt, sequor ordinem Sanctacrucis hoc loco idem examen instituendo. Materia flatus potissimum creditur

M

hu-

(a) *Lib. 6. Morb. Popu. sect. 3.*

*Freind
Sydenham
oppor
in un
Eysela*

humor crudus, vel pituitosus, vel melancholicus, atque, si facimus cum Prospero Martiano, humor, in quo ficcitas prævalet humiditati. Quæcunque tamen determinetur flatus materia, hunc minime generat, antequam in vaporem attenuatur; fitque primario attenuatio a calore, modo remissiore, modo intensiore; uti declarant varia corpora flatibus abundantia. Abundant flatibus senes jam languente calore; abundant plures hypochondriaci, quibus intus venter exæstuat. Itaque ex materia proxima flatus, quæ halitus est, liquet omnem cum aliquo calore coniungi; neque posse dividi in calidum, frigidumque absolute, sed tantum comparate; cum materia rarefacta conservari nequeat sine calore. Porro flatus, ut est halituum distendens congeries, si ab vehementiore calore habeat originem, nihil præsefert, quod valeat incutere dubitationem de celebranda indicata phlebotomia: sin autem ab remissiore calore generetur, per se non contradicit sanguinis impendio, sed solum tanquam indicium, aut imbecillitatis virium, aut affluentiae crudorum succorum, aut alterius morbosæ causæ. Quod si flatus in vasis concluditur, ibi conclusus varios morbos parit, ideoque apertione venæ curatur; idque Hippocrates in epidemiis docet^(a) his verbis: *Anemien venæ sectio*. Non unum habet hæc vox *Anemien* interpretem, non unam enarrationem, sed probabilior est assignata a Vallesio, nomine *Anemien* intelligente morbos a flatu exortos, quos indicat Hippocrates agens de flatibus, ostendens istos in causa esse omnis fervoris sanguinis, febrium, & morborum subito voce privantium; pro quorum curatione paulo post in eodem libro sanguinis emissionem commendat. Sanguinem turbat flatus, ut ait Hippocrates,

tur-

(a) Lib. 2.

turbatione fervere facit, præparatque ad varias affectiones creandas. Ac sane subitum levamen, quod aliquando in febribus fortibus, atque in inflammationibus fuso sanguine obtineri videmus, alteri causæ fortasse verius non adjudicatur, quam flatuum resolutioni, vaporosæque materiæ vacuationi; unde sanguis agitated incalescit.

Cognito ab universali venarum cacochoymia, prohiberi phlebotomiam, ut evacuantem, proximum est, ut vestigem, num etiam prohibeatur, ut revellens, derivansque: de quo decernere in proclivi est animadvertenti ab alto lapsis cum gravi capitis offensa sanguinem detrahi revulsionis gratia, licet malus sit; detrahi eodem respectu patienti largum e naribus profluvium sanguinis alia revellentia frustratum; itemque detrahi Angina laboranti, vel alio gravi morbo ab impetu confluentium humorum coorto, cujuscunque sit sanguis conditionis, nullo adminiculo citius, efficaciusque obistente violento humorum motui cruenta revulsione. Videtur tamen id præscriptum parum consonum Hippocratis monumentis, ex quibus habemus etiam in inflammationibus, prævalente cachochoymia Senem ad solutionem alvi, non venæ confugisse. Quocirca incipiente phlegmone, si urget indicatio revellendi, neque revulsionem molitus est Hippocrates phlebotomo propter malum succum, vel ille ex arte non egit, vel malus succus vetat sanguinis extractionem etiam ut revellentem. Hæc tamen consecutio non tenet: quandoquidem exoriente inflammatione, & dominante cachochoymia adduci in controversiam potest, utrum præstet revulsionem peragere venæ punctione, an purgatione, & pro utraque parte suppetunt similia veri, & utroque modo fit revulsio. Hippocrati visum est per istam venam sanguinem attenuari in cachochoymia biliosa, novam vim

mat
vapp
ent
sub
vau

acquirere ad morbum augendum, & proinde declinandum phlebotomiam esse. Mihi vero consideranti concursum humorum ad partem, quæ inflammatur, videtur valentius præsidium esse motus contrarius in confluentes humores inductus: quem autumo facilius, & securius induci per venæ vulnerationem, quam purgationem. Pars cœpta inflammari magis tenditur, & reliquæ ex consensu, tensaque obstant expurgationi; quam propterea postpono venæ sectioni, quæ revellit simul, & relaxat; prætereaque postpono, quia mitia purgantia sunt inefficacia, fortia vero in febribus fortibus, quales comitantur inflammationes, suo calore, acrimonia, & vi turbatrice suspecta sunt; & talia judicavit Galenus, qui retrohabitis vestigiis Hippocratis, in Pleuritidis descendente dolore scapellum acrioribus purgantibus præfert. Hanc autem prælationem inde quoque securiorem existimo, quod difficile cognitu est, an ita malus succus superet bonum sanguinem, ut potior sit ad revellendum expurgatio; & insuper quia per mediocrem sanguinis effusionem, qua relaxatis partibus remittitur aliquantum dolor, non tollitur opportunitas expurgationis: quam methodum plures graves auctores tenuerunt in Pleuritide biliosa.

Post considerationem cacochymiae generalis vasorum ratione incidendæ venæ, in examen voco particularem conclusam in prima regione, quæ extenditur ad gibbam usque jecoris partem, lienem, complectiturque ventriculum, intestina, mesenterium, pancreas, cavum jecoris, & lienis. Multa in hisce locis generantur excrementa, præsertim in ventriculo, & intestinis, quorum alia rebus non naturalibus accensentur, alia causis morbosis: multa quoque abs toto corpore tanquam ad publicam sentinam eo transmittuntur. Nunc sermo est de colluvio-

pro v. s.
a pur-
ione

my oppo-
Hippocratis
pleuriti-
descendens

ne in dictis partibus acervata, variorumque morborum effectrice, frequenterque febrium non solum intermittentium, quarum sedem in ea regione fixit Fernelius, sed etiam aliquando continuarum, uti scite Sanctacrux adnotavit, & inde Medicos ducentes sanguinem falli, opinatos earum causam per venas fluctuare, quæ in prædictis latibulis continetur. Itaque si morbi curandi fomes subsistit in ventriculo, intestinis, & conterminis partibus, proprie non impedit venæ sectionem, sed tantum ostendit, ejusdem indicem deesse. Id tantummodo proprium plebotomiæ obstaculum voco, quod eam indicatam vetat executioni mandari; ceterum non indicatur, si humor effector morbi extra venas consistit, cujus evacuandi conveniens via non potest esse vena soluta. Ergo ponamus causam febris inesse sanguini, simulque primas vias excrementis affluere: quod cognoscemus ex oris amarore, vel alio ingrato sapore, sensu nimiae satietatis, nausea, prægressis erratis in victus qualitate, & quantitate, aliisque similibus indiciis. Quæritur, utrum ea purgamenta obstant vulnerandæ venæ vulnerationem exigente febre. Mos est apud plures Medicos saltem clystere primo die ventrem expiare, secundo venam aperire: sed unicum clysterem judico sufficere evacuandis imis intestinis, non ventriculo, proximisque partibus, sed requiri vel electuarii lenitivi completi propinationem, vel similis mitioris purgantis. Quia vero unica propinatione difficile est, impuram affluentiam primæ regionis tollere, postridie minus sanguinis eo scopo ducere, ne multum depleta vasa superstites impuritates allicerent. Non comittam hoc loco, ut præteream perutile monitum Sanctacrucis de vitando errore in curatione febrium, qui censet multa genera febrium originem sortiri a latibulis impuris primæ-

*Febres
sentien-
a San-
animad*

marum viarum^(a): Omnia signa febris putridæ venarum, uti monet, reperiri possunt in febre a cruditatibus dicti loci putrefactis, aut ustis, aut alio modo depravatis, aut in alienos humores conversis. Signa sunt calor intensior, inæqualitas pulsus cum frequentia, & celeritate, urina rubea, dolor, gravitasque capitis, inquietudo, cibi fastidium, lingua arida, & nigra: quæ omnia affirmat se observasse in quodam præclaro viro, ad quem vocatus est die 28 ægrôtationis. Videbatur æger, uti narrat, agere animam difficile respirans, cum dolore intenso dorsi, pectorisque, cum nigra, & aspera lingua, pulsu veloci, inæquali, magnoque. Alter Medicus præscripserat venæ apertionem, quam inhibuit Sanctacrux, capta conjectura ex contrectatione ventris inferioris, in isto esse febris originem; quam protinus amovere incœpit clystere purgante; excretaque bile adusta, aliisque crassis purgaminibus, statim multo melius ægrotus habuit. Hinc fortitan suam sententiam traxit non obscuri nominis Baglivus,^(b) plures continuas febres cum gravibus symptomatis, malignamque qualitatem præferentibus non aliunde accendi, quam ex primis viis immundis; atque ex tribus partibus febrium Romæ frequentium, duas saltem produci a mesenterii sordibus, ibique diu congesta putri cacochilia. Utrum hujusmodi febres tam frequenter excitentur, non disputo, interdum excitari concedo: existimo tamen a colluvie primæ regionis impurum aliquid ipsi sanguini communicari, eundem præter naturam turbans, fermentansque. Videtur enim difficile, ita concludi in eo loco fomitem febrilem, ut dum fermentatur, & agitur, nulla portio in venas infiliat. Posuit Fernelius^(c) eundem

(a) Lib. 3. cap. 12. de Imped. Mag. Auxil. (b) Prax. Medic. lib. de feb. malignis, & mesentericis. (c) Lib. 4. de feb. cap. 10.

dem febrium intermittantium circum præcordia, circum ventriculum, diaphragma, jecoris cava, lienem, pancreas, omentum, aut mesenterium; neque tamen putat in gravioribus accessionibus totam materiam febrilem in illis partibus retineri, sed tenuiorem portionem impetu invasionis in venas majores irrumpere. Est etiam observandum, non raro febres malignas futuras incipere sub forma tertianæ intermittentis, & post aliquot accessiones fieri continuas, cum perniciosis symptomatibus, & eruptione peticularum: in quibus ægrotis cenſeo pravorum humorum congestum eſſe tum in prima regione, tum in omnibus venis, ſed in hiſce minus præparatum eſſe ad accenſionem, quam in illa, poſtea præparari & a calore intermittentis febris, & portione corruptæ materiæ illapſæ in venas, ſubinde oriri continuationem febris, aliaque infauſta accidentia. Ut igitur vitetur error tundendæ venæ in febribus a Baglivo meſentericis vocatis, diligenti meditatione opus eſt, ſignorumque inquisitione. Sanctacruci deſcriptæ febris indicia fuere, quod diligenter explorans primam regionem, variisq; in locis compri- mens, ſenſit rugitum ſimul cum tenſione, quæ in aliis partibus cedebat, in aliis reſiſtebat, & urina excernebatur, qualis per ſanitatem. Cæterum hujusmodi urinam non judico certum indicium cauſſæ febrilis regionem primam inſidentis: quoniam identidem videmus in febribus intermittentibus, quarum ſedem Fernellius circum prædicta viſcera collocat, aliiq; multi cum eodem, colore, habitu, & ſedimento urinam ſæpe a naturali non leviter recedere. Primum igitur, ut recte judicemus, contrectandum abdomen eſt, deinde reſpiciendum ad omnia accidentia demonſtrantia inquinamenta ventriculi, & partium vicinarum, cauſſasque præpoſitas, abs quibus ea pro-

*Febres
Liquæ
ſpecie
mittent
tertia*

*S.
a la
con
pro*

producuntur ; cuiusmodi sunt diuturnæ animi perturbationes , longæ vigiliæ , sollicitæ intentæque cogitationes , gula , aliaque id genus.

C A P U T IX.

*De impedimentis venæ sectionis acceptis
ex morbis .*

Dissimilibus morbis , aliisque petentibus phlebotomiam , aliis recusantibus idem corpus teneri posse extra controversiam est ; ideoque ad expediendam Tiroom deliberationem in hisce complicationibus , percurram morbos sanguinæ vacuationi contradicentes , ordine servato eorum divisionis , quæ traditur ab Scholis , in similes , organicos , & communes . Ad similes pertinent intemperies , quas Recentiores multi explodunt , nec attinet in præsens vel comprobare , vel refellere , omnesque velitationes declinandi causa , eas solitarias , & simplices non considerabo , sed conjunctas cum morbis . Ex omnibus intemperiebus creditur maxime rejicere phlebotomum intemperies frigida , & humida totius corporis ; quam meditabor ut conjunctam cum cachexia , vel hydrope . Esto igitur : corripitur cachecticus , vel hydropicus , affectus dicta intemperie Angina , vel Pleuritide cum dolore ascendente , ex Dogmaticorum consensu flagitante scalpum . Credo hos ægrotos tam calidos morbos difficulter incurrere posse , sed hoc posito , venis parcendum non esse credo , tantumque detrahendum sanguinis , quantum imbecillæ vires permittunt , revulsionis , & derivationis causa . Citra tamen tam apertam indigentiam detractiois , hæc omittenda est etiam in morbis solitis ea curari , uti sunt

sunt plures febres putridæ, in quibus censetur utilis phlebotomia, non necessaria.

Sanctacrux dicere instituens de refrigeratis, quatenus inde desumuntur impedimenta vacuationum, asserit, hos casus frequenter accidere, producitque pro exemplo frequentiæ febres ortas ex refrigeratione cutem obstipante, solitumque effluvium intercipientem, deinde frigiditatem initio plurium febrium sævientem. Verum quod pertinet ad febres accensas propter cutem a frigore obstructam, id cessat dissipatum a calore febrili, tolliturque dubium, an liceat refrigeratis sanguinem adimere. Obstructio a refrigeratione, si magna est, solet excitare putridam, si minor ephemeram, in qua non inciditur vena, nisi sublit insignis copia sanguinis, minitans conversionem ephemeræ in putridam. Cum vero ex refrigeratione obstipante, & inhibente insensibilem effluxum creatur putrida, refrigeratio prægressa non vetat, quo minus educatur sanguis, detractionis legitima indicatione oblata. Porro ex sententia Galeni frigus non copulatur cum febre intermittente, sed præcedit, indicatque eam imminere, non adesse. Fac tamen copulari. Quis affligente frigore animum inducat, admoveere venis scalpellum? Quis non videat, quo tempore omnia contracta sunt, conversi humores ad interiora, primasque vias, cum magno ægrotantis labore quiescendum esse, totamque operam navandam discutiendo frigori? Nihil apertius. Ad difficiliora igitur transeamus; primoque ad febrem hæcticam conjunctam cum putrida phlebotomo curari consueta, nisi hæcticam sociam habeat. Tres hæctica gradus habet gravitate, & periculo differentes; de quorum primo, qui levior est, vertitur controversia, an cum putrida copulatus permittat fissionem venæ: quam non per-

N

mitti

*Galenus
negat
in frigore
non*

*Quæstio
an per
in hæcti
gradus
putrida*

mitti a reliquis duobus in confesso est. Contra plures graves auctores in primo gradu hecticæ conjunctæ cum putrida non refugiunt a parca sanguinis detractiōe pro curatione putridæ. Quia tamen modo hectica supervenit putridæ, modo hecticæ putrida, agitabo quæstionem, ut altera alteri supervenit. Itaque hectica superveniente putridæ, plus huic prægressæ tribuendum videtur, quam hecticæ, positoque, a putrida sanguinis emissionem exposci, nec esse factam, parca permitti potest. Ceterum illud semper ante oculos habendum est, in febribus putridis sine plenitudine venarum, aut inflammatione nobilis partis phlebotomiam esse posse fructuosam, non esse necessariam; hecticamque super additam indicium esse paucitatis sanguinis, testante communi observatione, eam duntaxat in corporibus pauci sanguinis excitari. Enim vero cum hectica præcedit putridam, primas curationis sibi vendicat: in qua conjunctione sequor Galenum ^(a) minime utentem scalpello, non Botallum, non Petrum Forestum, Sanctacrucem, aliosque putridæ respectu venam cruentantes. Sine discrimine Galenus in hectica associata putridæ abstinet a phlebotomo, sive hectica putridam antecedit, sive putrida hecticam: mihi tamen visum est putrida antegressa locum aliquem relinquere considerationi resignandæ venæ.

Verna ^(b) effusus in existimationem phlebotomiæ non solum febrem hecticam, si antecedit putridam, non habet pro illius impedimento, sed in hectica incipiente, & præcipue originaria decernit, mittendum esse sanguinem; imo etiam in tabidis, si principio morbi adest vera plethora, aut apparens, vel impuri adaucta moles, solidique tensio, semel, bis, ac ter emittit, robore virium

(a) *Lib. 10. Meth. cap. 5.* (b) *De Phlebot. Part. 2. Cap. 10.*

annuente. Accipe, quam affert, hujus consilii rationem. Phlebotomia enim humores acres salinos evacuat, ipsumque cruorem roridum minus ac balsamicum deplet, Spiritus eisdem impetum nimium facientes, confundentes, ac tumuluan-tes, roremque dissolventes, ac abradentes deprimit, & dif-
flat: unde imaginatur plura commoda in ægrotantes re-
dundare. Multa continet id placitum mihi aspera, & spi-
nosa. Ergo concedo, si possit conjungi cum febre hec-
tica, & tabe vera sanguinis redundantia, hunc esse mi-
nuendum perfossa vena; sed an possit conjungi, vehemen-
ter dubito ex pulsu parvo hecticorum, denotante pau-
citatem sanguinis, non copiam, qui communiter inditium
hecticæ febris existimatur: dubito ex acrimonia sanguinis,
aliisque qualitatibus vitiosis, quibus imbutus humor, red-
ditusque inhabilis ad nutritionem Cacochymiam generat,
non Plethoram veram: dubito ex inchoata consumptione
partium solidarum non consentanea ubertati probi san-
guinis. Quid quod febris hectica, si statim ab initio pre-
hendat, nec alii febri succedat, solum accidit temperatu-
ris calidis, siccisque, atque ex causis calefacientibus, & sic-
cantibus non aptis ad cumulandam sanguinis copiam;
sin alii febri succedat, veri simillimum est jam absump-
tam esse copiam? Alterius quoque plenitudinis vasorum,
quam Verna vocat apparentem, conjunctio cum hectica,
& tabe vera mihi non minus improbabilis exhibetur, iis-
demque fere rationibus. Eam plenitudinem ait compa-
rari ex sanguine febrili, vel simili fervore turgente, in-
star vini generosi usque adeo ebullientis, ut ora vasis ex-
cedat. Enim vero congruit ne hæc agitatio, fervor, tu-
morque sanguinis assimilis vino generoso vehementer bul-
lienti, impetuque bullitus extra vas erumpenti, parvo
pulsui hecticorum, lentoque febris motui? Quanto fa-

Cory
Vern
v. s.
hectic
laud

+

cilius est hunc fervorem concipere in acuta, vehementique febre tumentibus vasis, tanto difficilius est in lenta febre, & tabe non tumefaciente vasa, neque ea intensione calefaciente corpus, qua calefacere deberet vehementia bullitus. Porro adaucta moles impuri humoris, quam Verna cum iis affectibus copulari posse arbitratur, multo aptior est principio ad producendam putridam, quam hecticam, quæ ex communi consensu ex qualitate exotica sanguinis, non affluentia impuri generatur. Sed hæc missa faciamus. Quis vero adprobet rationem Vernæ pro fodienda vena in hecticis, tabidisque, quæ tota in ejus desiderio consistit, non in legibus naturæ? Mira hercules foret phlebotomiæ efficientia, si, uti ait Verna, humores acres salinos evacuet, ipsumque cruorem roridum minus, & balsamicum depleret, contra legem fluidorum intra eadem vasa permistorum, & contra impulsu circumacti sanguinis promiscua liquida æqualiter foramen venæ versus protrudentem. Mira, inquam, esset, si spiritus impetum nimium facientes, confundentes, & tumultuantes deprimeret, difflaretque, minime vero alios, uti optat Verna, impetu minore agitados, utiles, destinatosque animali œconomiae moderandæ; siquidem illa æqualem vim adversus omnes exercet, neque in aliquos tantum cum delectu. Separet Verna suis votis in venæ sectione horum effectuum necessariam conjunctionem, efficiatque, ut permistarum partium sanguinearum aliæ vacuentur, aliæ retineantur, spiritus turbatores deprimantur, alii nihil suæ alacritatis, & roboris perdant, nec eam declinabo in hecticis, tabidisque.

Hippocrates^(a) mentionem facit de viro in Oeniadis, qui jejunos laborabat forti suctu ventris, & dolore, qui post

(a) Lib. 5. Morbo pop.

sumptum cibum, & contritum mitescebant, & paulo post revertebantur: itaque corpus tabescebat, ei non accedente alimento ab assumptis, & cibus pravus, & combustus subducebatur. Pharmaca omnigena sursum, & deorsum purgantia invicto morbo accepit. Secta autem vena in utraque manu usque dum exanguis redderetur, adjutus est, & malo liberatus. Allegat hanc historiam Verna eo fine, sicuti ait, *ut practicantes facile concipiant, quod quamvis in hecticis phlebotomie adversantia symptomata appareant; re penitus considerata ipsa comprobetur, & maxime profut.* Veruntamen si Tirones id faciliter percipient, tanto difficilius percipient provecti; neque sane percepit acutissimus Vallesius, qui aliter quam Verna interpretatur causam levaminis relati ab venæ punctione. Affectio principalis viri in Oeniadis non fuit tabes, sed fortis suctus ventris cum dolore, qui a cibo quiescebat, neque pro tabe detractus fuit copiose sanguis, sicuti neque pro tabe exporrecta fuerant purgantia sursum, & deorsum. Profuit tamen detractio sanguinis prolixa ad animi deliquium usque; sed cur profuerit, in promptu non est evidenter determinare. Solebant Antiqui educere sanguinem tam abunde, ut sequeretur animi defectio valde, citoque refrigerandi causa, atque ob eandem in eadem quantitate narrato ægroto habet pro certo Vallesius eductum fuisse, referens consumptionem corporis non resecti ab assumpto cibo ad vehementem caliditatem cito resolventem alimentum; quo resoluta, inanitoque ventriculo fortis suctionis sensus affligebat: cui interpretationi favent, quæ subducebantur prava, & combusta, in hecticis apparere non consueta. Ceterum tam rara curatio, non plane tuta judicata a Vallesio, & sine imitatore, non intelligo, quid ponderis habere possit ad stabilienda controversa, & communi praxi dissentanea.

Quæ-

O b i e
v e n

V e s

Quædam etiam febrium tempora, nisi quid novi incurset, opponuntur phlebotomo exercendo, nimirum status universalis, monente Hippocrate, ^(a) in vigore morbi consultius esse quiescere: quam quietem indubitate turbaret fluctuatio sanguinis per effusionem excitata. Et sane, si in vigore febris fortis vires constent, exhibeantque spem fore, ut natura salutarem aliquam vacuationem moliatur, quam per id tempus moliri solet, quid hujus interpellandæ periculum incurremus sanguinis emissionem? Quid quod in vigore, & paulo ante, Hippocrate præceptore, imminuendus est cibus, ut natura toto conatu vacet subigendæ, expellendæque materiæ noxiæ? Anne poterit natura & cibi, & sanguinis imminutionem innoxie sustinere, & opus suum urgere? Quidam tamen clari nominis auctores hisce rationibus minime permoti, suspectam non habent in statu febrili sanguineam detractionem, imo Heredia tanquam fatuum reprobatur præceptum Fernelii eam per id tempus vetantis; qui tamen doctissimum virum, magis rationi, & Hippocratis documentis consentientem nimium acerbè habet. Neque hercules apparet, quare in statu febris præsertim acutæ, in quo omnia sunt vehementiora cum magna naturæ afflictione, sola febris causa spectata, sit educendus sanguis, si apto tempore jam fuerit eductus; atque sit melior actio cruenta, quam quies ab Hippocrate imperata.

Alia mihi non obversantur pensitanda in morbis similaribus, qui a Veteribus ad intemperies referebantur. In organicis, qui multiplices sunt, primo in examen vocabo pertinentes ad conformationem, initio factò ab obstructione, quam Majorum Scholæ volunt fieri a multitudine succorum, vel a lentore, aut crassitie. Quam copia san-

gui-

(a) Sect. 2. Aph. 30.

*dia
ikeny
elis
.5.
re febrij*

guinis generat, ex communi consilio, curat phlebotomia, dubitaturque solum, utrum genita ab aliis duabus causis eam respuat, interdicatque. Multi ex Priscis auctoritati magis, quam rationis indagini intenti hærent, laborantque in variis Galeni textibus, qui inter se se dissidere, & discordare videntur: cum quibus sane nihil temporis ponam; nec in verba controversa Galeni, sed in rem ipsam inquiram, primoque differam de obstructione totius corporis, deinde partium. Occlusis in ambitu corporis finibus capillarium venarum ab crasso, lentoque sanguine sine ulla copia Sanctacrux constituit, venam non esse feriendam, opinatus per apertam venam exire calidum, tenuemque sanguinem ad exitum paratiorem, & hoc educto magis reliquum perfrigerari, subinde obstruente magis densato augeri obstructionem, solvendæque difficultatem. De hoc tamen mihi non convenit cum Sanctacrucis, sed congruenter ad superiora assero, sanguinem crassum, viscosumque inhærentem extremis capillarium non egredi ex facto emissario, reliquum tamen fluentem per venas indiscriminatim exire, exitum omnibus partibus permittente amplitudine foraminis; præterea probabile esse, commotum sanguinem vim aliquam inferre oppilanti, adiuturum solutionem, si præsertim oppilatio recens sit; & proinde venæ apertionem ab ea minime inhiberi coram morbo eam postulante. Non inquirō, quemadmodum debeat curari indicata obstructio, deterrens Sanctacrucem ab incidendo vase, sed ea præsentē, & morbo incisionem exposcente, affirmo, me deterritum ab ea non iri, quasi per vulnus non alius sanguis exiturus esset quam calidus, tenuisque. Quin etiam interdum ipsa obstructio universalis potest esse occasio plenitudinis, & inde phlebotomiæ. Docemur ex Statica Sanctorii, quantum per insensilem

per-

perspiratum dissipetur, quantum eo impedito retineatur, nisi per aliam viam facta excretio suppleat; posse proinde ex hoc impedimento repleri venas, exhiberique opportunitatem fructuose solvendi, siue puro, siue impuro sanguine repletæ fuerint. Hanc rationem attigit Sanctacrux, ^(a) inquit propter locum occlusum, siue universa cutis obstipetur, siue solum certæ partes, in venas refluere humorem, hisque punctis moderatam detractionem prodesse: *Similiter, inquit, si obstructio sit in brachio, aut crure, aut alia parte, quæ non permittit intrare alimentum ad alendum, clarum est esse occasionem redundantie in reliquo corpore, non secus ac in mutilatis membris dixit Galenus accidere redundantiam.* Et paulo infra Galenum, Avicennam, aliosque auctores resignantes venam in Apoplexia, Epilepsia, surditate, oculorum hebetudine, torpore, Paralyfi, Convulsione, Icteria, lienis, aut hepatis obstructione, aut duritie, in lapide renes obturante, & Asthmate interpretatur permoveri ex obstructione facta multo, aut vitioso sanguine, aut ex redundantia in toto corpore boni sanguinis, aut crassi. Igitur assentio Sanctacruci, in obstructione orta a multo sanguine hunc esse minuendum, pariterque in redundantia boni, aut crassi: in orta vero absque ulla multitudine venam duntaxat aperirem, cum recens est, subitoque genita, ut in Apoplexia profecta ab interceptione venarum, ut loquar cum Hippocrate, alioque morbo producto a celeri humorum illapsu: cum enim paulatim facta, & vetus est oppilatio, meo iudicio, plus habet momenti ad dissuadendam, quam suadendam phlebotomiam. Porro dicebat Sanctacrux per obstructionem cruris, vel brachii fieri redundantiam in reliquo corpore, uti contingit ex detruncatis membris; de quibus tamen

val-

(a) Lib. 3. cap. 14.

valde dissimilem rationem esse censeo, atque de parte ex morbo obstructa. Ponamus partem aliquam Paralyfi affectam esse, cum ejusdem macie ob impeditum alimenti accessum. Ita ne succrescet sanguis in venis ex hoc impedimento sicuti occasione defecti membri? Ex omnium partium corporis uno consensu, & conspiratione licet opinari, parte aliqua resoluta, etiam reliquum corpus pristina integritate non frui, & præcipue viscera, animali œconomiae præsidentia, proinde minus sanguinis generari: id quod non accidit post recisa membra, si post recisionem corpus in pristinum revertatur. Sed concedamus ex membro paralytico, defectoque nutritione aliquid plus sanguinis in venis congeri; adaucta tamen quantitas admodum exigua erit, paulatimque congesta; ex qua non supeditatur indicatio cruentandæ venæ, quippe tenui, nec existente in principio paralyseos; quo transacto cordatissimi auctores scalprum non assumunt, & solum in ejus principio assumunt, quæ subito fit, non paulatim. Tamen, si, uti placet Sanctacruci, cumlaretur sanguis in reliquis venis propter constrictionem partis paralyticæ, nec ejus generatio imminuitur, ut mihi videtur imminui, potius in excursu morbi, cumlante majorem copiam sanguinis, quam in principio, ejus imminutio tentanda foret contra communem praxim. Quid autem dicam de inveterata obstructione jecoris, quam Sanctacrux cum Avicenna curat vulneratione basilicæ, quasi ex ea acervaretur copiosus humor in venis? Ex ejusdem confessione deliberabo, fatentis, oppilato jecore pravum sanguinem generari, & antea genitum inquinari. Defœcandus igitur est idoneis purgantibus, leviter vitiatus corrigendus alterantibus, non portio sana una cum morbosa per venas exigenda; ideoque nisi fiat oppilatio, vel ex copia, vel cum copia, operam phlebotom-

*Altera
res pici
laria vi
sanguis*

botomi non requirit. Copia vero diu perseverare nequit, occluso jecore; quo impedimento, minus cibi sumit æger, plusque generat excrementi, quam probi succi in venas ituri; uti arguitur ex alvi diversis fluxibus in hoc morbo contingere solitis.

Illud etiam sine examine prætereundum non est, quod Sanctacrux Tirones docet, in suppressione mensium ab crassis humoribus obstruentibus, alacrius sanguinem ducendum esse, si vetus ea sit, quam recens. Quo documento assumit, in antiqua suppressione generari consuetam per sanitatem sanguinis quantitatem, singulis mensibus ad uterum moveri, retineri ab occluso, sicque in vasis omnibus redundare. At quo pacto id excogitatum probabit? Mulieres defectæ mensibus solent multa pati, præ ceteris dejectionem appetitus: ex qua minus comedentes minus sanguinis progenerant, nec eam copiam in venis congerunt, quam Sanctacrux imaginatus scalpello minui decrevit. Mihi placet arbitrari, incommoda consecuta ad menstrua cohibita potissimum importari ex retento in utero aliquo vitioso succo, qui sanguine menstruo dilutus cum ipso extillare solebat; vel ex ipso sanguine in vasis uteri corrupto; vel ex alio, qualecunque sit, & ubicunque, qualitatis vitio, non quantitatis adaucti sanguinis congestique in venis propter consuetam excretionem retentam, post quam diutius perseverantem solent apparere symptomata denotantia vitiositatem humorum, non ubertatem. Est tamen mira historia Galeni, quam supra attigi, quæ videtur evincere ex menstruis interclusis infestam copiam acervari. Quædam mulier jam octo menses menstruis deficiebat, cum languido appetitu, & magna totius corporis extenuatione, cui Galenus brevissimo tempore pristinum habitum restituit, detracta primo die sesquilibra sanguinis, poste-

postero libra una, tertio unciis octo. Quamvis igitur hæc mulier parum comedebat ob inhibitam lunarem purgationem, cumulatam noxiam sanguinis redundantiam, uti ostendit sanatio per illius ablationem facta. At quare Galenus in muliere vehementer extenuata sanguinis sesquilibram subito eduxit? Nimirum venæ eminebant sanguine plenæ, lividæque: & istæ fuerunt Galeno argumento copiosæ detractionis faciendæ. Quotiescunque igitur easdem notas comperies in muliere menstrua purgatione destituta, permitto Galenum imiteris; sed illas perraro apparere indubitatum est, neque inde sanciri posse generalem regulam curandæ mensium suppressionis; quæ, uti docet Hippocrates, (*) cum quo facit Mercatus, aliique, sæpe tollitur purgatione, aliisque remediis, purgatione, inquam, auferente impuritates ea occasione genitas, atque perturbantes animalem œconomiam, solitasque excretiones. Nunc vestigemus, cur ea mulier ob appetitus languorem parum comedens, copiosum tamen sanguinem congesserit. Turgebant venæ sanguine plenæ, & nihilominus gracile totum corpus erat, extenuatumque. Qui convenit macies corporis cum plenitudine venarum? Quid has replevit in parsimonia cibi? Huc inclino, ut putem magis quam ex retentis menstruis succrevisse copiam ex sanguine crassiore reddito, nec apto nutritioni, attenuationi, & dissipationi per insensiles meatus, per quos scimus quantum continenter evolet. Cum autem hic casus infrequens admodum sit, non affirmabo, ex impedita diu lunari vacuatione molestam copiam acervatam fuisse, nisi testimonio tumorem venarum, quo permotus est Galenus, vel aliis, si qua sunt, perspicuis indiciis.

Pleuritis morbus conformationis ob adauctam magnitu-

O

2

di-

(a) *De Mor. Mulic.*

dinem reponitur ab Hippocrate ^(a) inter obstacula venæ
 sectionis, non tamen in omnibus, sed tantum cruenta
 spuentibus. Verum enim vero nostris temporibus, saltem
 in nostris regionibus nihil est usitatus, & commendatius
 in Pleuritide sanguinis emissione, nullo habito delectu
 temporis morbi, causarum, aliorumque accidentium;
 pluresque Medici ad exitum usque morbi intento scalpro
 ad pleuriticum adeunt, contra Hippocratis, aliorumque
 documenta. Prosper Martianus hanc sententiam Hippo-
 cratis: *Impedimentum in spuentibus cruenta, anni tempus,*
pleuritis, bilis; tres exponit modos, quibus pleuriticus
 potest sanguinem exspuere, & in omnibus rejicit pleboto-
 miam, adducitque pro rejiciendi causa, sanguinem bi-
 liosum, aut ferosum, tenuemque redditum. Sed non con-
 venit cum aliis, & in primis cum Galeno asserente, sputa
 cruenta in Pleuritide esse impedimentum feriendæ venæ,
 ut pote ostendentia eam mitem esse, & salutarem. Sancta-
 crux vero ex sanguineo sputo in Pleuritide existimat, largam
 tantummodo sanguinis effusionem prohiberi, non quamcun-
 que; quod duæ facultates laborent, animalis expellendo
 sputum, naturalis spuenda concoquendo. Enim vero Ga-
 lenus, & Sanctacrux mutant sententiam Hippocratis, non
 interpretantur: nec alia congruentior interpretatio supe-
 rest, quam asserendo, eo nomine obstare Pleuritidem ve-
 næ apertioni, quo innuit Senex in eodem textu de Hu-
 moribus, anni tempus æstivum, & bilem obstare; videli-
 cet Pleuritidem supervenientem sputo sanguineo ex rupta,
 vel quoquomodo aperta vena inditium esse prævalentis bi-
 liosæ cacochymiae, in qua Hippocrates abstinet ab effusio-
 ne sanguinis. Cui tamen sententiæ non acquiesco, qui
 superius stabilivi, ex vitiositate sanguinis non prohibe-
 ri

(a) In Lib. de Humo.

ri phlebotomiam ut revellentem, postulatam ab ingenti morbo, genito a pernici confluxu humorum, cujusmodi est Pleuritis. At enim per eam sanguis evadet magis biliosus, tenuisque. Esto. Verum si admittimus, inflammationem concitari a concursu humorum, videtur auxilium motu contrario fluxum minuens plus utilitatis, quam detrimenti allaturum esse sanguinem attenuando, & partem aliquam ad conditionem biliosam perducendo. Ob hanc ipsam tamen rationem minus sanguinis detrahendum erit, & solum vigente fluxionis impetu, non toties, nec tam copiose ut aliqui solent, de quibus in alio tractatu verba faciam.

Inquiri Sanctacrux, num morsus canis rabidi phlebotomiam dissuadeat; nec ego hanc quæstionem prætermittam. Rasis asserit, (*) ante attractionem veneni ad interiora non esse vulnerandam venam, duobus, vel tribus diebus post attractionem commode vulnerari. Dioscorides tamen diligens curandi morsus rabidi nullam prorsus mentionem facit phlebotomiæ, nullam Paulus, Aetius, alii qui multi clari auctores, cum quibus facit ipsa ratio. Antequam enim late serpat venenum, erumpatque, summa curationis est, ut per partem affectam expellatur, & prohibeatur diffusio; cui prohibendæ opponitur vulneratio venæ, non infervit. Se se autem prodente veneno, vimque suam late spargente, cui bono sanguis elicietur? An ut minus supersit venenati? Verum sanguine rarefacto per emissionem, se se latius insinuabit vis rabida, inferetque citius atrociora. Hisce ita constitutis, imaginemur, postquam aliquis ab rabido cane ictus est, tentari morbo phlebotomia curari solito: erit ne hæc celebranda ante, & post virus propagationem? Ante pro-

V.S.
in vab

pa-

(a) *Lib. 2. tract. 2. cap. 2.*

pagationem nihil magis cordi habendum est, quam ut eam compescamus missa venæ punctione, apta, ut vidimus, ad adjuvandam, non impediendam. Urgente vero indicatione mittendi sanguinis, partium inferiorum scarificatus detractionem supplebit. Post latam effusionem rabidæ pestis, obortoque aliquo effectu expositente sanguinis detractionem, aliqui non dubitant venam grandem aperire etiam in partibus superioribus, Sanctacrux mavult in inferioribus, obstaturus raptui violentiæ ad superiora: quæ tamen ratio cessat jam facta ejusdem extensione. Verum conflictato ægrotante ab angoribus efferati veneni, alteriusque acuti morbi, non video qui pateat arti locus, quid boni sperari possit a phlebotomo.

C A P U T X.

De impedimentis venæ sectionis acceptis ab symptomatis.

QUandoquidem merum symptoma, uti tritum est in Schola Galenica, neque curationem indicat, neque immutat, pariter nullum poterit objicere impedimentum venæ sectionis ratione sui, sed duntaxat effectuum, quos parit. Sic delirium, ut examen instituiam a symptomate facultatis regentis, & supremæ partis, ut est rectæ rationis depravatio, nihil præferebat adversum venæ tundendæ, nec adversari potest, nisi evadens in causam morbosam, aut tanquam inditium alterius offendiculi; quinimmo solet ea tundi in morbis, abs quibus dependet delirium, nimirum in inflammatione cerebri, septi transversi, jecorisque. Quamvis autem Sanctacrux agens de impedimentis vacuationum proficiscentibus ex symptomatis, in-

qui-

a Galenico

quirat in varias causas delirii, & quales ex istis petant, aut recusent venæ apertionem, cum eo tamen e via non digrediar, qui hoc loco investigo obstantia venæ sectioni, non eam indicantia, eaque sumpta ab symptomatis, non a causis, quæ inventurus delirii effecta considerabo. Hæc multiplicia sunt; quando æger vi delirii amisso regimine vitæ, neque suæ conservationi vacat, uti sanis mentibus inditum est, neque aliorum salutaria præcepta capeffit. Custoditur, reparaturque salus idoneo servato cibandi tempore, vestiendi modo, opportuna quiete, & motu, somno, & vigilia. Quis hæc omnia in deliro moderetur, componatque ad salutem? Statis horis cibum non capit, non somnum, nec se se defendit ab ambientis molesto incurfu. Pertinacibus vigiliis fatigatur, motibusque violentis phantasmatum, corporisque: quæ omnia attendenda sunt, si delirus tentetur morbo, & præsertim acuto venæ sectionem exigente, ad vires præsentis recte æstimandas, conjectandasque futuras: quarum lapsui minus providere possimus in hujusmodi ægrotante, quam in aliis Medico parentibus, suæque saluti advigilantibus.

Vigiliæ longæ immoderatæque multiplici nomine, aut dissuadent sanguinis extractionem, aut restringunt; quæ scilicet multos spiritus exhauriunt, corpus siccant, bilem inflammant, congeruntque cruditates. Non igitur sola ratione virium, quas vigiliæ demoliuntur, nec permittunt diu vigere, suspecta est incisio venæ, sed propter bilis fervorem, proventumque cruditatum. Quare diu perseverantibus, nulla potest subesse copia scalpri minuenda, & solum revulsionis gratia accidere potest, ut sine temeritate sanguinem detrahare liceat, habito earum respectu in definienda quantitate. Imagineris igitur, morbum ob-

or-

ortum esse cum vigiliis, & agitari de vena incidenda. Principio universali, in quo solet illa incidi, nondum eo processerunt vigiliæ, ut incisionem impedire valeant; si tamen perseverent, habes quæ meditanda sunt ante incisionem.

Aliud genus symptomatum ad excreta relatum non raro occurrit, magnum habens pondus ad curationem regendam: in quo genere symptomatum Sanctacrux tantummodo considerat alvi fluxum, non sudorem, utrumque tamen considerandum. De alvi fluxu est celebris sententia^(a) Galeni, in febre eo præsentem, neque sanguinis, neque alia vacuatione opus esse, sed solum sufficere, licet nequaquam sit pro multitudinis ratione. Veteres tamen Galeni studiosi varie hanc sententiam interpretantur, inquiruntque, abs qua parte producat fluxus, utrum a venis, an prima regione, cruditatibus, semicoctisque humoribus referta, & vitiata; observantque, quos parit, effectus. Ut ego judico, sic res habet. Vidimus supra febres continuas comitatas iis symptomatis, ex quibus solemus pravitatem concludere, creari quoque posse ex colluvione primæ regionis, in quibus, qui venam aperiret, causam morbi non educeret alibi contentam, sed potius adaugeret, traducta ad venas portione quicquiliarum in primis viis subsistentium; itemque vires debilitaret. Itaque in ea febre cum alvo ex dicta causa fluente constat, abstinendum esse a scalpello si veterem, & probabiliorem doctrinam sequi velimus.

Verna Baglivi fautor^(b) quinque species febrium mesentericarum constituit, decernitque, in quinta sanguinem esse ducendum, licet adsit alvi fluxus symptomaticus, & aquosus, quo ignotum vulgus deterretur a scalpro.

Hu-

(a) *Lib. 1. ad Glanc.*

(b) *De Phlebot. cap. 16.*

Hujus febris fomitem collocat in toto vasorum genere, præcipue minorum, & capillarium, & maxime mesentericorum copia insignium. Nempe in omnibus vasis, & præsertim indicatis exilioribus continetur, ut ait, sanguis indolis restrictæ, torpidioris, atque lentescentis: quare hujus febris initio dijudicat, venæ incisionem esse maximum, præsentaneum, & princeps remedium, & si alvus largius fluit, persuasum habens per eam exhauriri sanguinem multum, lentescentem, & asperiores excitantem fluxum aquosum, tenuemque. Placet Tironum gratia id placitum Vernæ paucis expendere. Primum igitur cupio a Vernæ doceri, num sanguis ille lentus, fluxus aquosi incitamentum, contentus præcipue in vasis minoribus, & maxime capillaribus mesenterii sit exemptus. Circuitioni in vasis obstructis conclusus, an cum reliquo sanguine circumducatur. Si stagnat in obturatis vasis, cur venam grandem tanta fiducia aperit, sibi que persuadet, per eam extrahi sanguinem vitiosum, quem statuit principalem causam fluxionis aquosæ, collocatque potissimum in angustiis capillaribus Mesenterii? Apertissimum est, per venam ictam in brachio nihil sanguinis educi subsistentis in vasis imi ventris. Sin autem affirmet, sanguinem exiliorum vasorum, & maxime mesentericorum cum alio circumduci, non est, cur potius sanguinem minorum vasorum, quam grandium accuset, non est, cur eas febres mesentericas vocet. Sat temporis cum Vernæ posui; nec ejus meditationibus longius opponor, quam ut petat Tironum, quibus ad laborem, instructio, eaque mente, ut nova cogitata præsertim spectantia ad usum remediorum diligenter expendant, plus satis procliviter non amplectentur. Id unum sustineo, causa fluxus ventris, febrisque in Mesenterio conclusa, non esse tundendam venam ob ex-

*112 vny
in feb. m
venæ*

positas rationes mihi valde probabiles. Nunc inquirendum est, utrum in febris cum alvi profluvio concitato a succis venarum, vitioque totius sanguinis liceat educere phlebotomum; præterea an liceat causa febris fusa per venas, sed alvo duntaxat commota ab inquinamentis primarum viarum. Galenus tamen de hisce minime dubitavit, qui generatim pronunciavit, ventre soluto tolli indigentiam alterius vacuationis, quacumque via arte comparandæ. Et quod attinet ad venæ incisionem, etiam Hippocrates ^(a) jubet, ut alvus firmetur, prius quam vena incidatur. *Sin autem cuiquam convenit sanguinem auferre, ventrem firmare oportet*: cuius auctoritate vellicat Martianus Medicos in Disenteria venam perforantes. Ipse pariter sentio multitudinis auferendæ gratia in febris, cum alvi fluore, non esse ducendum sanguinem, emissioni satisfaciente excretionem per alvum facta, cito plenitudinem ablatura, insuper festinante ablationem ipsa febris, quæ multum absumit, absumptique reparationem tenui victu impediante. Quod nunc ratione concludo, mea quoque praxis confirmavit, qui plures huiusmodi febres citra sanguinis effusionem prospere curavi. Item Sanctacrux refugit ab scalpro in proposito casu, assumens per alvum laxam morbi fomitem amandari. Quicquid tamen excernatur, dummodo prodeat e venis, harum plenitudinem adimit, simulque indigentiam venæ solutionis, ut evacuantis. Porro cognoscemus e vasis detrudi ad cavitatem intestinorum materiam, quæ excernitur, nisi præcesserint causæ acervantes cruda, impuraque in prima regione, nec adsint notæ eadem declarantes superius recensæ. Huc adde inditia tradita ab Hippocrate ^(b) ad idem internoscendum. Credit ille excrementum.

(a) De Rat. vic. aq. n.

(b) Lib. de Humo.

menta in alvo genita, non aliunde profecta, spumosa non esse, per modum inclinationis exire, neque ea vi, quam requirit aliunde provenientium excretio. Item foetor excrementorum sine siti superveniente facit ad significandum, ea prodire ex venis. Sitis enim quæ antea non erat, si accenditur in excretionem foetida, indicat æstum ventris putrefacientem ingesta, excretisque nidorem communicantem. Ceterum, orto foetore a maligna putredine succorum e venis in ventrem delabentium, non excitatur sitis, quæ ante excretionem non aderat.

Dispar ratio est de phlebotomia revellente, quam iudico non prohiberi ab alvo soluta, si celer efficaxque revulsio a morbo flagitetur. Narrat Botallus^(a) Andreæ Birago laboranti febre ardentissima, ob quam detractus jam sanguis erat, supervenisse foetidissimam lenteriam, iterumque jussu suo resignatam esse venam cum felicissimo successu. Rogabunt Tirones, unde profecta fuit tanta felicitas in extractione sanguinis, quæ supra stabilitis repugnare videtur. Sentio prosperum successum Biragi referendum esse ad phlebotomiam retrahentem succos ad æstuantem ventrem delatos, nec aliam mihi apparere congruentiorem rationem fateor, nisi confugiendo ad singularem causam, nec interesse solitam; de qua certiores reddi nequimus. Quid inde? Non exitus medicamenti, sed exitus cognita causa facit ad exemplum. Galenus profecto cogitans de morbo Adolescentis decumbentis in foro mendaciorum descripti ab Hippocrate^(b), qui vexabatur ardentissima febre, cum alvi fluxu bilioso tenui multoque affirmat, peticulosissimum fuisse huic, aut venam ferire,

(a) *De Curat. per sanguin. mis.*

(b) *Lib. 3. Morbo. propn. sect. 2.*

Siqu
ab Hipp
divin
dico
logu
ex si
tentia
non

rire, aut alvum movere. Quamquam autem Heredia assentitur Phrigio in eo adolescente sanguinis emissionem suadenti, tamen fatetur, anceps esse remedium, suumque protegit assensum celeberrimo effato Celsi, Melius esse anceps remedium experiri, quam nullum. Similiter ratio supra exposita contra phlebotomiam, ut evacuantem alvo fluente, non pugnat contra eandem administratam ad derivandam, vacuandamque plenitudinem particularem, uti evenit in curatione Pleuritidis, in qua etiam superveniente Diarrhea, Sydenhamus, alique, nisi sat sanguinis detractum fuerit, repetunt detractionem; cuius praxeos hæc mihi ratio est. Pleuritis morbus acutus est, & sæpe peracutus, indigens cita vacuatione lateris affecti, non alia ratione promptius impetrabili, quam vena resignata, eaque propinquiore, quam fieri potest, affectæ parti, si potissimum derivationis nomine resignatur.


Nunc imaginemur, causam febrilem extensam esse per totum sanguinem, & istum copiosum, ventremque uberius fluere ex purgamentis duntaxat primarum viarum. Quid in hac conjunctione deliberandum erit? Si quod imaginatione conceptum est, deprehendere possem, existimaremque, esse conducibilem venæ sectionem, accelerarem medicamento expiationem ventris, & postmodum, si viderem inde fluxum alvi, vel in totum cohibitum, vel magnam partem, perseverante indicatione venam recluderem. Ceterum non ita in proclivi est etiam expositis notis internoscere, utrum fluor sit tantummodo a prima regione, an per consensum totius corporis, de quo dubitans sine manifesta indigentia ad venam non accederem, committeremque opus inchoatum naturæ. Fortassis Galenus hac cognita difficultate co-

gno-

gnoscenti, abs qua parte, causaque fluat alvus, ea fluente universim sanxit aliis vacuationibus abstinendum esse.

Sudor interdum erumpit, quo tempore constitutum erat sanguinem effundere, idque non raro in febribus; in quibus alias sudor est criticus, alias, ut ajunt, symptomaticus. Factus in principio universali morbi, & ante coctionem habetur symptomaticus, & hac ratione nullum inferens impedimentum phlebotomiæ, si fortis urget celebrandæ indicatio, sicuti in febribus accensis ab inflammationibus internis, in quibus non timerem, sudanti ægroto scalprum admoveere, si timerem ex mora incrementum phlegmones, si dolor sæviret. Sic doctissimus Heredia meditando morbum Erasini apud Hippocratem laborantis magna inflammatione, vel lienis, vel hepatis vel, uti placet Vallesio, utriusque hypochondrii, semperque sudore manantis, universe decernit, erumpente sudore concitato ab inflammatione, celebrandam esse phlebotomiam, mitigaturam inflammationem, inhibituramque nimium sudorem. Monet tamen sanguine misso, observandum esse, utrum minuatur, an cesset, an augeatur sudor; & hoc imminuto posse repeti venæ sectionem, adaucto omitti debere. In minore vero indigentia sanguineæ vacuationis, citraque inflammationem, expectarem intermissionem sudoris, quo scatente indubitatum est, sanguinem commoveri, & tempus remedio pariter commoventi opportunius esse, quo minor est commotio, & tumultus. Quod si sudor notabilis esset, perseveransque, opponeretur detractiōi sanguinis faciendæ propter copię imminutionem, quæ scilicet ipso sudore perseverante tolleretur. In sudore item critico, & salutari, scilicet erumpente concoctis humoribus,

Duerger
i
bus, negotium totum naturæ committendum est, arti-
que quiescendum. Quamvis enim venæ sectio non adver-
setur eruptioni sudoris trahendo succos ab ambitu corpo-
ris ad centrum, imo laxando vasa fibrasque, faveat,
tamen imminuendo calorem, alterandoque contextum
sanguinis, potest inchoatam utilem vacuationem tur-
bare.



D E
R E G I M I N E
MAGNORUM AUXILIORUM
In Curationibus Morborum

DISSERTATIO SECUNDA.

C A P U T P R I M U M.

De Purgatione, & Medicamento purgante.



Xpurgatio generatim accepta nihil aliud sonat, quam aliquid fordibus liberare, purumque agere: quo significatu Agricolaevellentes lolium, gramen, aliasque circumnascentes herbas dicuntur triticum expurgare: eodemque amplo sensu Medici corpus purgare dicuntur, dum ejusdem inquinamenta evacuant, quacunque id via praestent, sive concitato vomitu, urina, sudore, sive alvo soluta, sive alio quopiam modo peracta vacuatione. Contracta tamen significatione corpus duntaxat purgare dicitur, qui excrementa, vel per alvum, vel per vomitum amandat, quem Hippocrates superiorem purgationem vocat, & cum nomen purgationis simpliciter usurpat, inferiorem intelligit. Infra de vomitu: nunc de inferna purgatione, quam cum Celso^(a) dejectionem appello; & Scholæ cum Galeno definiunt evacuationem humorum qualitate peccantium. Ap-
tior

(a) *Lib. 2. cap. 12.*

tior tamen definitio erit, si dicamus, dejectionem esse vacuationem per alvum humorum qualitate peccantium medicamento factam, ut purus sanguis conservetur. Sic enim fecernitur dejectio spontanea a petita, indicaturque purgandi scopus. Declarandum tantum est, quid intelligi debeat nomine qualitatis, ratione cujus humores expurgandos censemus. Fernelius^(a) nomine qualitatis complectitur primas, secundas, & cujusvis substantiæ corruptionem, existimatque non sola excrementa, sed succos quoque purgatione auferendos, si vel intemperiem, vel alienam qualitatem, vel corruptionem contraxerint. Inter hæc enumerata a Fernelio purgatione submovenda Horatius Augenius^(b) asserit, male collocatos esse succos intemperie affectos, vellicatque Fernelium, quasi methodum confunderet, everteretque, causatus, intemperiem nudam simplici alteratione corrigendam esse, evacuationem omnem excludente. Verum Fernelius non destinavit purgationi nudam intemperiem, qui apertissime subdit, excernendam esse materiam vitiorum, cum ista a naturali constitutione eo usque jam recesserunt, ut neque victu, neque alteratione sola emendari, neque naturæ, calorisque beneficio in pristinam bonitatem vindicari queant: in quo documento non video quid redarguere possit Augenius. Corruptam humorum substantiam evacuari oportere dubitat nemo, noxiæ vero qualitates siue sint primæ, siue secundæ efficaciores primis ex sententia Hippocratis ad nocendum, cum licet, contrariis emendandæ sunt, sed indociles correctionis petunt excretionem materiæ, cui inhærent.

Purgatio multiplex est remedium, evacuans, revellens, derivansque, & pro diversis occasionibus, aut tantum evacuat, aut evacuando simul revellit, derivatque. Succum
sola

(a) *Lib. 3. Meth. cap. 1.*

(b) *Tom. 3. Epist. Med. Epist. 6. Lib. 3.*

sola prava qualitate infestum, nec emendabilem educit, eundemque in certam partem noxie illabentem revellere potest, & derivare. Quo respectu Galenus^(a) ex doctrina Hippocratis, si pars superior ulcere cum fluxione afficitur, dejectionem molitur, si inferior, vomitionem: quo pacto purgationis utilitas augetur, nempe simul infesta detrahentis, atque a parte ulcerata fluxionis impetum avertentis, propter contrarietatem inter partem, per quam expurgatur, locumque fluxionis. Idem locus, cum proximus est viæ excretionis, opportunitatem derivationis præbet, veluti cum fluentia ad vesicam pharmaco transferimus ad alvum. Multa alia præterea ex accidenti efficit purgatio, ut diversos e venis humores eximit; qui calidi si sint, refrigerat; si crassi, attenuat; si tenues, incressat, aliosque effectus præstat per ablationem materiæ, varie sanguinem alterantis, & a sua naturali bonitate dejicientis. Cum autem puritas sanguinis egregie conducat ad animalem œconomiam, multæ utilitates purgationem ejusdem consequuntur, corporis robur, sensuum, mentisque alacritas; quam impetraturi plures Antiqui ad altius penetranda, quæ meditabantur, se se helleboro purgasse, atque inter hos Carneadem responsurum libris Zenonis, Plinius auctor est.

Instrumentum petitiæ purgationis medicamentum est expurgans, cujus operatio evidens est, operandi modus ita obscurus, & retrusus, ut inde aliqui argumentum sumpserint omnis purgationis de medio tollendæ; quo nomine medicamenta specifica, aliaque omnia, quorum actio explicari nequit, tollant oportet. Non inficias eo, hanc explicationem difficilem esse, sed rem ipsam eventum ostendit; neque propter ignoratam agendi rationem,

Q

aut

(a) *Lib. 4. Meth. cap. 6.*

aut non clare perceptam, quod sensu constat, rejici potest. Sic Tullius loquens ^(a) de facultate purgante scammonæ, inquit, dum videt purgationem, se videre, quod satis est, licet nesciat, cur purgare possit. Si habeo remedium pariturum utiliter effectum, quo indigeo, cur relinquam ex ignoratione modi agendi? Purgationis igitur utilitatem contra Chrysippum, Erasistratum, Asclepiadem, aliosque antiquos, recentioresque plurimorum suffragiis sustineo. Præ ceteris contra purgationem vehementer declamat Helmontius ^(b) acerrimus Galeni oppugnator, refutatque universam, tanquam fraudibus plenam, necibusque, persuasum habens, quicquid evacuant purgantia, esse ipsum sanguinem eorum veneno corruptum, ejusque foetens cadaver per anum ejectum; id quod confirmat historia cujusdam Principis, qui sumpto medicamento scammonæto, unico die quadraginta & unum secessus habuit; posteroque toto squallebat corpore, tremantibus genibus, manibusque, rauca voce, oculis concavis, depressis, exhaustisque venis, sitique pressus importuna cum dejecta appetentia: quibus accidentibus constat, ut ait, utiles succos corruptos esse a pharmaco, excretosque. Idem autem argumentum efficacius proposuerunt Chrysippus, Erasistratus, aliique hujus sectæ patroni, considerantes a purgante præstito perfecta sanitate fruente, excrementisque vacuo educi copiam purgaminum, qualia educi videmus e corporibus ægrotis: quæ proinde, nisi prius aderant, genita sunt, & non aliunde genita, quam a viru medicamento humores sanos, utilesque pessumdante. Hæc opponunt purgationis hostes; quos licet satis redarguat frequens utilitas relata a purgantibus, amplius etiam ratio convincere potest. Atque in primis non infior,

(a) *Lib. i. de Divi.*(b) *In tractatu de Febr.*

cior, a purgantibus etiam utiles succos labefieri posse, labefactos amandari, hincque reddi rationem animadversionis Hippocraticæ, corpora sana difficillime ferre purgationes; quæ sane difficilis tolerantia oritur ex pharmaco probos succos, & naturæ familiares, vel vitiante, vel auferente. Sic fateor, in descripto Principe non solam bilem evacuatam esse, sed alios etiam humores in flavum liquamen commutatos; idque in causâ esse debilitatis consequentis copiosas dejectiones, una cum agitatione humorum, & effusione spirituum; propter quam etiam aqua hydropicorum absque periculo confertim non hauritur. Veruntamen hinc refelli nequit purgatio, tanquam perniciofa, & nulla ex parte frugifera: nec ullus unquam id evincet, nisi probet in redundantia excrementorum a purgante bonum sanguinem vitari excernique, excrementa intus relinqui, contra quam quotidiana experientia demonstrat. Cur enim tota vis, puta, scammonii sæviet in solum sanguinem, minime in obvia purgamenta? Hanc reddit rationem Helmontius: *Sensi, inquit, ideo laxativa putrefacere vitales succos, raro autem excrementa morborum occasionales causas. Etenim cum venena sint respectu nostri, & non excrementorum, hinc nos potius, quam morbos adoriuntur.* Enim vero, si res ita habet, uti judicat Helmontius, cur adeo corpora sana offenduntur a purgantibus, juvantur morbida, sordibusque affluentia? Nimirum in sanis corrumpuntur benefici succi, aut educuntur; in morbidis noxii expurgantur; & si quid etiam utilis, & benigni pessum it, multo plus infesti extruditur; uti tot morbi purgantibus depulsi præclare confirmant. Quis vel leviter artis peritus nesciat, lucem gallicam sæpius quidem mercurio, sed aliquando solis etiam repetitis purgantibus, expugnari? quo pacto sanavi Cre-

monæ Rhedarium saniosa scabie, ob retentam gallicam gonorrhæam, laborantem; videlicet potu purgante epithimi, & polipodii quindecim dies hausto. Vidi alterum atroci diuturnoque capitis dolore ex immunda venere conflictatum, aliis remediis insuperabili, decoctione stibiata, senæque foliis additis dejiciente, triginta circiter dies sumpta, abs qua pluries quotidie desidebat, convaluisset. Mitto febres, mitto tot alias affectiones auxilio purgantium, aut fortiorum, aut mitiorum edomitas, aut saltem mitigatas, teste quotidiana experientia. Quo mirum est, Helmontium tam intrepide asseruisse, purgantia potius impetum facere in puros humores, quam fœculentos. Quinimmo, cum videamus pura corpora, ceteris paribus, magis resistere venenis, quam impura, par est credere, actioni purgantis magis resistere intactos succos, quam vitiatos, quos ipsa natura exturbare nititur, alios retinere: eoque in febribus nacturi adjumentum naturæ, concocta excrementa ejicere conantis, horum coctionem opperimur, subinde purgantia propinamus, nisi spontanea evacuatione nostram operam natura præveniat. Fatetur Helmontius raro, sed aliquando excrementa invadi a purgante, exportarique. Prome rationem, Helmonti, cur aliquando catharticum suæ naturæ oblitum nocuos potius succos adoriatur, quam utiles, ejus actioni, ut ais, magis expositos, nisi temere id asseruisti. Aliam nequis excogitare causam, quam majorem excrementi proclivitatem ad sequendam actionem medicamenti, quam naturalis succi. Quotiescunque igitur hæc aderit major proclivitas, fatearis oportet, prosperam purgationem effectum iri, nec bonos succos corruptum. Atqui Medicus agens ex arte nunquam exhibere debet purgans, nisi a natura purgandus humor est præparatus, ut in febribus, vel arte præparetur, vel sit
hujus.

hujusmodi, ut ceteris facilius eximatur, absque ulla præparatione, qualis est colluvies aquosa. Argumentum itaque tuum solum ferit inconsideratos administratores purgantium, non cautos, & opportunitate utentes, non intimam ferit virtutem purgantium, sed comparatam conditioni expurgandorum.

Vindicata purgatione ab obtrectionibus Helmontii, aliorumque, pauca agitabo de modo, quo purgantia opus suum absolvunt, & primo inquiram, utrum ea cum delectu humores purgent. Alii ex Antiquis senserunt, ab catharticiis elici, extrudique similes sui humores, sed variant in explicanda attractoria similitudine singularis, & affinis humoris: quam Fernelius^(a) collocat, non inter primas, secundasque qualitates, sed in totius substantiæ proprietate a calore tamen adjuta, alliciente humores, quemadmodum magnes ad se se ferrum adducit. Vallesius^(b) vero declinaturus reconditas proprietates Fernelii, clarioraque allaturus causam, cur potius hic, quam alter humor exturbetur a purgante, refert ad similitudinem intercedentem inter accidentia sequentia modum substantiæ, cujusmodi sunt crassities, tenuitas, aliaque hujus generis. Auctores rati similitudinem inter excreta, vimque excernentem, excretionis causam esse cognati humoris, ducem Hippocratem habuerunt, ^(c) docentem a purgantibus, trahi sui similes humores, sicuti ab radicibus feminum, & stirpium succum suæ naturæ convenientem. Quanquam autem Senex videtur, aperte purgantibus affigere facultatem tractoriam affinis materiæ, non inficiatur tamen, aliam ab eisdem vacuari. Si enim, inquit, eidem homini idem medicamentum quater in anno voles exhi-

(a) *Lib. 3. Meth. med. cap. 4.* (b) *Lib. 9. Contro. cap. 1.*

(c) *Lib. de Nat.*

exhibere, Hyeme pituosissima tibi evomet, Vere liquidissima, Æstate biliosissima, Autumno nigerrima. Hinc commonefactus Fernelius doctissimus, præter vim educendi humores cum delectu profectam ab occulta proprietate, aliam addit communem purgantibus, positam in calore, & acrimonia, conceditque, plerumque vacuari humorem immodice exuperantem, aut in via purgationis subsistentem, aut promptissimum ad fluendum. Alii porro ex Antiquis, nulla admissa similitudine effectrice purgationis cum delectu humoris, judicarunt principio semper evacuari tenuiorem, paratioremque pati actionem cathartici, ideoque, si istud sit validissimum, primum dejici serum tenuissimum, deinde bilem flavam, postremo pituitam, bilemque atram, omnium humorum crassissimam. Item vim tractoriam purgantis ad eruendum particularem succum, siue similitudine occultæ proprietatis fultam, siue primarum, aut secundarum qualitatum, modique substantiæ convenientia, Recentiores bene multi refellunt; oppositum Antiqui crediderunt, non probarunt, nec aliunde probandi potest sumi argumentum, si sensibus stemus, quam ex colore, habituque, idest tenuitate, vel crassitie excretorum, abs quibus tamen nihil certi constituere licet, propter ipsa medicamenta fucum facere idonea, diverso modo alterando, & colorando humores eorum actionem recipientes. Jalappa, aliaque hujus generis decantata hydragoga, viscosa purgamenta, uti notat Lemrius^(a), ita incidunt, attenuantque, ut convertant in aquam, quam excerni videmus. Utimur sirupo rosato solutivo in diversis morbis, temperaturisque, & nihilominus sæpissime detrahuntur similis coloris excrementa, scilicet acquisiti ex medicamento. Itaque nec color, nec habitus ex-
cre-

(a) *Cursus Chi. cap. 19. part. 2.*

cretorum probat in purgante facultatem egerendi sibi respondentem humorem, non quemcunque paratiorem. Id etiam clarius confirmat Rheumbarbarum, quod licet destinatum fuerit a Medicis ad bilem extrudendam, tamen a clarissimis auctoribus exhibitum in curatione veri hydropis, hunc depulit, & quidem causa morbi depulsa, quæ creditur succus longe diversus a bilioso. Vvillisius postquam rejecit, ab substantiæ similitudine, & specificis qualitatibus proprios humores prolektari, opinatur Rheumbarbarum, ut pote compactum ex particulis materiæ veluti adustæ, commovere fœcem sanguinis adustam, & adducere uberius ad canales coledochos, inde ad imum ventrem; itaque non advertens approbat, quod paulo ante reprobaverat. Alii tuentes vim purgatoriam cum delectu, hanc conjectant in Rheobarbaro, similiterque in aliis purgantibus ex proportionem inter solvens, & solvendum. Rheumbarbarum, inquit, præ ceteris succis copiose, uti constat ab effectu, bilem educit; quam docet chimica resolutio abundare sale, & sulphure. Cum autem salino sulphurea, teste experientia, apta promptaque sint ad penetranda, & dissolvenda composita pariter ex sale, & sulphure, par est credere, Rheumbarbarum vacuans large bilem ex similibus elementis compingi, iisdemque pati facilem solutionem a bile, & hanc propterea aliis succis uberius excernere. Magis hæc speculatio ingeniosa accedit ad similitudinem veri, quam Vvillisii, sed vereor, ne fundamento admodum dubio, & controverso innitatur, quatenus asserit apparere ex effectis per Rheumbarbarum copiosius bilem dejici. Quænam, oro, sunt hæc effecta ostendentia, ope Rheibarbari fieri copiosiores bilis excretionem? An flavus color excretorum, qualis est color bilis? Id tamen caput est controversiæ, utrum humor

deje-

dejectus sit bilis, qualis antea existerat, an humor alter immutatus, fucatusque colore purgantis. An igitur hæc effecta erunt morbi redundantia attributi, & Rheobarbaro curati? Verum ipsa redundantia esse potest in causa, cur redundans potius excernatur, quam non redundans humor, absque similitudine inter solvens, & solvendum: quare videmus interdum eodem purgante morbos diversis causis genitos expugnari, ut etiam de Rheobarbaro adnotatum est. Itaque ut hæc incerta, nec utilia praxi omit- tam, censeo, purgantia opus suum absolvere, irritatio- ne partium, & spirituum, solutione succorum, quomo- documque hæc fiat, & fermentatione. Irritationem par- tium arguit dolor, solutionem liquiditas ejectionum, fer- mentationem tumultus ventris, caloris augmentum, pul- sus frequentia, insolita ad somnum propensio, pro geni- ta a copioso halitu, e succis agitata, & fermentatis emisso, itemque copia flatus, quæ cum ipsis fœcibus ex- pellitur. Interdum fere sine dolore peragitur purgatio, sæ- pius tamen cum dolore frequenter recurrente, si præfer- tim fortior est. Illam potius tribue solutioni succorum, & laxitati viarum, quam irritationi; hanc præcipue ir- ritationi. Non describam hoc loco totum purgationis ordinem, & modum, quem satis descripsit Vvillisius, neque expedit repetere, quæ majorem partem a nostra pendent imaginatione. Solum adnoto, quia purgantium impetus major excipitur in prima regione, hanc crassis humoribus inquinatam prius abstergere oportere, quo la- tius se se insinuent vires cathartici; cum animus est aman- dare infesta longinquis partibus infidentia, sumpto docu- mento ab Antiquorum diligentia, methodoque præparan- tium corpus helleboro vacuandum: *Corpus, inquit Plinius* ^(a),
Septem

(a) Lib. 25. Nat. hist. cap. 5.

septem diebus ante præparandum cibus acrioribus, abstinencia vini, quarto, & tertio die vomitionibus, pridie cænae abstinencia. Qua præparatione præmissa, persuasum habeo, non solum helleborum, sed alia purgantia multo efficaciora futura esse ad difficiles longosque morbos extirpandos, a materia in remotioribus partibus latente excitatos; & in præsens multas purgationes in irritum cedere, propter debitam præparationem prætermissam. Mitto hoc loco investigare, quibus qualitatibus inhæreat vis purgandi, primis, an secundis, & quibus ex hisce, vel illis; cum difficillimum sit invenire quæsitâ, nec satis valida suppetat conjectura pro stabilienda sententia. Vis purgandi creditur a multis insita partibus calidis acribusque, ut aptis ad stimulandum, quibus alias humano captu superiores adjungere necessum est; quando liquet multa calida, & acria, cujusmodi est piper, pirethrumque, carere facultate purgandi; quando plures Chymici affirmant, posse a purgantibus separari vim irritantem. An virtutem purgativam collocabimus in partium tenuitate? Certum enim est plura purgantia, dissipatis tenuioribus per ebullitionem partibus, ut accidit in Senna, ea spoliari. Aliqui etiam Chymici opinantur, eandem vim particulis ita tenuibus includi, ut omnia pervadant, ne vitro quidem coercitæ. Quædam tamen purgantia viscosis partibus coagmentantur, uti resina Jalappæ egregium evacuans, quæ adeo viscosa est, observatione Lemerii, ut sola propinanda non sit, sed alis immiscenda, impedituris, quo minus arcte adhæreat tunicis intestinorum, easque mordeat, exulceretque. Tam varius igitur est purgantium contextus, tam infirma argumenta ad determinandum illud ultimum, quo proxime cathartica constituuntur; ut operæ pretium non sit, huic indagini longius immorari sine spe utiliter

tempus ponendi . Frustra quoque id conati sunt plures Chymici , quorum alii opinati purgatoriam facultatem consistere in sale purgantium , alii in sulphure , alii in mercurio , facta separatione , & separatarum partium periculo , has inutiles ad purgandum compererunt .

Conclusum est , purgantium naturam esse valde retrusam , neque satis probabile , ea per attractionem similium opus suum præstare . An igitur in morbis omnis delectus purgantium superfluous erit , & quæcumque porriguntur , æqualis erunt opportunitatis ? Non ita hercle . Fateor occultam quidem esse in multis specialem qualitatem effectricem purgationis , sed alias inesse manifestas , quibus nec in omnibus morbis , nec in omnibus temperaturis quælibet purgantia conducibilia sunt . Quædam etiam debilius purgant , alia fortius : quædam leviter ventrem pervellunt , alia gravius cruciant , diversosque diversa purgantia pariunt effectus longa observatione compertos ; eademque observatione constat , alia in aliis morbis utiliora fuisse , minus alia , quædam etiam nocere , uti Rheumbarum laboranti Stranguria , aut fluxu hæmorrhoidali : quibus attentis oritur occasio pro diversitate ægrotationum , & ægrotorum eligendi peculiare catharticum .

Est aliud purgantium genus , quod laxativum vocatur , græce eccoproticum , cui nemo affinxit virtutem similitudine substantiæ peculiare humores eliciendi ; quippe quæ laxando magis fibras , quam vellicando negotium faciunt , paratioribus succis ad laxamentum accurrentibus . Credunt aliqui hæc laxativa ventriculum quiete , nihilque agendo præterlabi , suasque duntaxat vires exercere in duodeni sensiliorem tunicam . Effectu tamen apparet , tum ea , quæ purgatoria elective appellantur , tum lubricantia , non in sola intestina agere , sed etiam in ventricu-
lum,

lum, quocunque id fiat modo, five propter actionem in qualibet parte editam, five propter continuationem membranarum; quarum uni parti affectæ a medicamento reliquæ consentiunt, alliciunturque excrementa; quibus proinde videmus non sola intestina, sed etiam ventriculum ab veris purgatoriis, & solis laxantibus exonerari.

C A P U T II.

De indicante purgationis inferioris.

TRiplex est remedium, ut vidimus, expurgatio, evacuans, revellens, derivansque; utque hæc tria præstare potest, ita tribus indicantibus subjicitur. Solius evacuationis nomine usurpatæ indicans est vitiosus humor, neque natura, neque arte emendabilis, in nullam certam partem perniciose motus, neque in eo loco insidens, ut brevi via detrudi queat ad alvum; in quo si foret, porrigeret opportunitatem derivationis, sicuti porrigeret revulsionis in aliquam partem, ratione situs oppositam alvo præter naturam illabens. Cum autem purgatio possit fieri forti, aut debili pharmaco, forti facta, quæ magnum remedium est, petitur a vitioso succo, vel magnum morbum excitante, vel mox excitaturo, ut quantitas remedii respondeat quantitati morbi. At enim Galenus ait^(a), non in sola pravi succi redundantia purgationem convenienter suscipi, sed duplici titulo, & occasione, videlicet, aut propter magnitudinem morbi, aut propter redundantiam alterius cujuscumque succi; quemadmodum etiam sectio venæ celebratur, aut propter sanguinis affluentiam, aut morbi magnitudinem. Hanc difficultatem explanaturus

R 2

Ho-

(a) *Lib. 4. Meth. cap. 6.*

*Purgatio
triplex
venæ
sectio*

Horatius Augenius^(a) distinguit succum vitiosum a cacochymia, quam sobolem, illiusque speciem constituit; ita ut cacochymia semper demonstret affectum præter naturam, non item vitiosus succus: & inde concludit posse purgari sine cacochymia, non sine vitioso succo. Quo igitur sensu dixit Galenus purgationem convenire, aut ratione magni morbi, aut abundantiae alterius cujuscumque succi? quo videtur indicare, etiam sine vitioso humore opportune purgari. Non multum laborabo in explicando Galeno, sed sequens, quod magis ex rei natura est, sentio, uti liquet, non esse purgandum sine indicante purgationis, nec magnitudinem morbi esse proprium illius indicans, sed duntaxat magni remedii, quod multiplex cum sit, præsentem grandi morbo, adhuc inquirendum restat, quale ex magnis conveniat. Eligam vero purgationem, si conjecta vero, vehementem affectum oriri potius a malis succis, quam copia sanguinis; licet non adsit ea quantitas, quæ sine vehementia affectus non postulare vacuum purgante factam, sed tolleretur, vel sola victus tenuiore ratione, vel aliis mitioribus instrumentis. Etenim magnus morbus exigit celerem vacationem mali humoris etiam non copiosi; qui nempe sanum in vehementia morbi ex facili corrumpens, cito mali copiam parit. Vel dicas, succum malum non copiosum esse posse indicans purgationis, ut revellentis.

Sæpe vitiosus humor præterquam sua qualitate, infectus est etiam motu in aliquam partem nobilem: cuius respectu, si pars superior est, imperatur purgatio inferior, non solum ad amandandam noxiam qualitate materiam, sed ejus corrigendum motum excitato contrario, in quo revulsio consistit. Hoc nomine Antiqui in principio Phre-

(a) *Lib. 3. Epist. Medic. tom. 3. cap. 5.*

Phrenitidis biliosæ dejectione utebantur, ad revocandam bilem caput impetentem, deducendamque ad alvum. Cum autem corrupta materia occupat partem circa ventrem inferiorem, instituta purgatio habet rationem derivantis præsidii, evacuando per partem vicinam morbofa; uti accidit, quando fluentia ad vesicam transferimus ad alvum, eodem tempore revellentes simul, derivantesque.

Vitiosus humor, grandem morbum produciens, vel mox producturus, est quidem indicans purgationis, non tamen potius inferioris, quam superioris, aliaque requiruntur, uti alterutra eligatur. Sic humoris crassities ad descensum proclivior, quam ad ascensum, infernam purgationem moliendam esse demonstrat. Idem demonstrat indigentia revulsionis humorum a partibus superioribus; idem opportunitas derivationis nuper indicata. Locus etiam, in quo concluditur eliminanda materia, docet commodiorem esse purgationem per alvum, cum inferior est, ideoque viæ vacuationis propinquior.

C A P U T III.

De cōparatione purgationis cum venæ sectione.

A Nimus est, duo magna remedia venæ sectionem, & purgationem inter se se comparare, vestigandi causa, plusne virium exigit purgatio, an phlebotomia; utque, cum utraque opus est, decernamus, quænam sit præmittenda. Quod attinet ad primum, liquido constat, certam virium mensuram requiri ad ea generosa remedia administranda, sed valde controversum est, plusne virium venæ incisioni, an purgationi celebrandæ debeatur. Galenus, qui venæ punctiōni purgationem, tanquam
levius

levius auxilium substituere solet, aperte sentit minus hinc vires accidi: idque multis rationibus niscus est comprobare Vallesius ^(a), & ea potissimum, quia sanguinis detractio exhaurit humorem naturæ familiarem, & oppido necessarium, & proinde vires ipsas, earundem imminuto fomento. Parem vero virium jacturam, ut ait, non infligit purgatio, educens exoticum succum, naturæ infensum, & ipsis viribus. Hinc persuasum est gravibus auctoribus, majorem magnitudinem morbi requiri pro phlebotomia, quam purgatione. Aliis tamen oppositum videtur, inde motis, quod venæ apertio sola vacuatione debilitat, multifariam purgatio, videlicet infesta qualitate lædens viscera, humores agitans, perturbansque, molesta symptomata inferens, & præterea aliquod utilium succorum dispendium, non suppetente pharmaco, quod noxios succos tantummodo extrahat, nihil utilium, & salubrium: ex quibus concludunt, oportere, robustiorem esse ægrotum passurum purgationem, quam sanguinis effusionem. Hisce rationibus hinc inde pugnatur pro oppositis partibus, utroque remedio generatim considerato, neque ad suas differentias relato, sine quarum consideratione nihil praxi conducibile, & dubitationibus expeditum in hac controversia decerni posse judico: cum nec omnis expurgatio, nec omnis sanguinis effusio habeat eandem animadversionem, sed valde diversam, profectam ex diversis instrumentis, quibus peragitur expurgatio, & quantitate sanguinis, quæ detrahitur; & detrahendi varia occasione. Purgantia alia sunt acerrima, & fortissima, veluti Colocynthis, Veratrum; alia mediocria, puta, Senna, Agaricus; tertia debilia, & potius laxantia, quam purgantia, uti flos Cassiæ, Manna: quas quoque diffe-

(a) *Lib. 7. Contro. cap. 10.*

differentias assumit purgatio hoc, vel illo deicientis genere peracta. Similiter tres differentias phlebotomiæ ex diversa quantitate eliciendi sanguinis constituere licet, scilicet ex magna, mediocri, parva. Fortis expurgatio, & copiosa sanguinis effusio validas vires desiderant, sed validiores expurgatio, facta comparatione cum larga sanguinis emissionem, ad demendam multitudinem dictam ad vasa vires fatigantem; quam ablatam sequitur earum recreatio, non afflictio. Sine hac plenitudine vasorum magis est ambiguum, deliberare de larga sanguinis extractione, collata cum vehementi purgatione: attamen hæc videtur plus virium iccirco exigere, quod valentis purgatorii opus moderari nequimus, qui possumus ex pulsu metiri quantitatem hauriendi sanguinis, nec longe a convenienti recedere. Prudentis igitur est, plus roboris requirere ad usum remedii, in quo perniciosius peccari potest, propter ejus fortem actionem, nostro moderamini non expositam. Fernelius^(a) existimat magis deici vires ab exuperante phlebotomia, quam immoderatæ purgationis violentia, territus animi deliquio ex profusione sanguinis metuendo, imaginem mortis, speciemque cadaveris præferente. Veruntamen evenire potest, ut immodica sanguinis detractio animi defectum accersens, citius vires sternat, non tamen gravius, totumque simul, & semel mortis periculum inducat, non tamen majus, quam immoderata expurgatio. Semper horrendum est, ut ait Fernelius, ægrum exanimari, incertumque vitæ apparere. Sæpe tamen id periculum, mortisque imaginem promptius excutimus, quam perniciem ab immoderatione purgantis importatam; quæ, testimonio Hippocratis^(b), lethalem convulsionem parere potest, aliasque affectiones difficilius, tardiusque

(a) *Lib. 3. Meth. cap. 11.*(b) *Lib. 7. Apho. 25.*

que superabiles animi defectione. Propterea, licet Hippocrates interdum vacuationem ad animi casum usque permittat, hanc merito Vallesius rejicit purgante factam, approbat tantummodo factam sanguinis impendio largiore. Aliter res habet de mediocri, & debili purgatione, quas minus virium; ceteris paribus, ut opinor, tutatur, quam requiritur pro mediocri, vel modicæ quantitatis sanguinis effusione e vena grandi; qua totus sanguis commoveatur, non a mediocri, vel debili purgante. Ad alia tamen respiciendum est, quæ reddunt ea duo remedia levius, aut gravius tolerabilia; ideoque minus, vel plus roboris poscentia, cujusmodi est consuetudo; qua constat, quosdam phlebotomiam pluries passos, eam fere inoffensis viribus tolerare, & purgantibus insuetos magis inde offendi. Item si quis vehementer formidaret ictum scalpelli, minus averfaretur purgantia, hisce minus virium absumptum iri existimaverim, quam cruenta detractione. Ipsa quoque ratio morbi, propter quem sanguis effunditur, vel expurgatur, reddit alterutrum remedium facilius toleratu: itaque observamus in inflammationibus minus fere vires imminui sanguinis extractione, quam in solitariis febribus. Cetera persequere declarantia, unde major virium jactura dependeat, sicque rectius decernes.

Satis de prima quæstione. Nunc consultemus, data indigentia purgationis, & phlebotomiæ, quænam sit præmittenda, loquendo de purgatione ad excernendos humores sanguini intermixtos celebrata, & quidem valido pharmaco, non debili, eoque, quod laxativum vocant, solentque multi propinare ad expiandam primam regionem ante venæ vulnerationem. Galenus, ^(a) cum quo faciunt Vallesius in controversiis, Fuchsius in paradoxis medicis, alii-

(a) Lib. 6. Epid.

aliique clari nominis, constituit, oblata occasione utriusque remedii, a venæ sectione citra controversiam incipiendum esse. In hac ambiguitate Fernelius parum laborat, persuasus, non magni interesse, a purgatione, vel phlebotomia vacuationem inchoare, quando omnium humorum putredo corpus æquabiliter invasit. Hinc admoneor, controversiam generatim dirimendam non esse, sed certis conditionibus attentis, atque in primis majore, vel minore alterutrius indigentia. In morbo, cui principale remedium est venæ apertio, Hippocrates definit^(a), hinc auspiciandum esse, non a purgantibus, enumeratque eodem loco morbos primario phlebotomiam exposcentes; parilique ratione sequitur, purgationem anteponendam esse, quoties hæc principaliter requiritur. Possè vero incidere affectus utrumque auxilium expetentes, extra dubitationem videtur: siquidem repleti possunt vasa sanguine impuro, & cacochymix particeps, venæ, alvi que solutione minuendo; ideoque alvi solutionem præponemus, majus negotium facessente impuritate, quam redundantia, contraque postponemus venæ apertioni, præpollente redundantia. Cum autem hæremus, nec apparet clarum argumentum præpollentis, cenfeo cum Galeno, aliisque bene multis, satius esse phlebotomiam præmittere, & quidem multiplici comodo. Cum enim ex mea sententia omnes humores ex aperta vena sine delectu exsiliant, si aperitur ante purgationem, educetur sanguis impurior, quam post purgationem, ideoque minore utilius consumptione. Illud etiam accedit emolumentum ex pertusa prius vena in affluentia impuri sanguinis, quod corpus præparatur ad faciliorem purgationem. Laxat enim venæ sectura vasa, fibrasque viscerum, uti arguunt vacuationes spontaneæ sæpe eam

S

con-

(a) *Lib. 4. de rat. vic. acut.*

consequentes: quare se promptius insinuat vis medicamenti, latiusque fundit per depleta vasa; prætereaque, ut sentit Sydenhamus, ^(a) catharticum mox a sanguine dempto assumptum longe mitius vim suam exerit, neque perinde sanguinem, vel calefacit, vel exagitat, uti solet, si phlebotomiam præcedat. Hæc agitati obversatur egregia dubitatio injecta a Prospero Martiano quærente, an post purgationem, dum isthæc judicatur principale remedium magni acutique morbi, detur locus phlebotomo. Hippocrates aperte docet, morbo magno acutoque non remittente post resignatam venam, celebrandam purgationem esse: idem tamen, animadversione Prosperi Martiani, post purgationem nunquam præcipit phlebotomiam: quam ideo Martianus post purgationem necessariam non esse præfinit, hac adjecta ratione. Evacuatis, inquit, purgante vitiosis humoribus interfusis sanguini, non potest superesse magna plenitudo, tantaque, ut inde timenda sit gravis noxa, quippe conflata ab humore benigno. E contrario dempta scalpello plenitudine, nec remittente morbo, remanens qualitate infestus humor purgatione necessario tollendus est. Adprobo adductam Martiani rationem, dijudicoque, post purgationem, si perseveret sola indicatio auferendæ plenitudinis, non incutientis metum gravis offensæ, abstinendum esse phlebotomia, quam supplet, aufertque indigentiam remedii tenuis victus morbo conveniens, & imminutio succorum permanentem morbum brevi secutura. Si tamen cum ea plenitudine coniungeretur perniciosus motus petens revulsionem, inchoataque foret curatio a purgante, opportuna nihilominus esset revellens phlebotomia, quæ ita exigente morbo, sola adhibetur, sive adsit, sive desit plenitudo.

CA-

(a) *Epistola 1. responsoria.*

C A P U T IV.

*De impedimentis inferioris purgationis acceptis
a rebus naturalibus.*

Impedimenta infernæ purgationis expositurus non ibo per singulas res naturales, sed eas tantummodo graviora objicientes; pressiorque aliquanto ero, quam in præmissa tractatione phlebotomiæ, iis omissis, quæ communia sunt cum superioribus, pertinentque ad generalem rationem utriusque vacuationis.

Comperto, adesse in corpore humano humorem a sanguine alienum, & noxium, nihil aliud fortius obstat ejusdem vacuationi debilitate virium actioni medicamento non restitura: & iccirco obstat, quia nequit solus vitiosus succus, & sine aliqua mistura incorrupti excerni, nequit sine perturbatione aliorum succorum, & spirituum aliqua jactura. Quamvis enim dixerit Hippocrates^(a) si purgentur qualia oportet, vacuationes facile ferri, & prodesse, atamen non ita facile feruntur, ut nihil incommodent viribus, præsertim a morbo accisis. Multo faciliores sunt ad ferendum evacuationes peccantis humoris, quam innocui: certa tamen virium quantitas requiritur, sine qua gravia impendent pericula; id quod præclare apparet ex ingentibus apostematis semel toto educto pure, itemque confertim effusa hydropicorum aqua, licet ea duo mera excrementa sint. Omnis igitur evacuatio virium modum egressa periculo non caret; quod evitaturus diligenter consideres oportet, qualem vires excretionem, & quemadmodum factam sustinere possint, semel ne, an

S 2

plu-

(a) *Sec. 1. Apho. 2.*

pluribus vicibus, & quo medicamenti genere factam; item utrum apparens imbecillitas originem ducat a consumptione essentiae virium, an ab copia mali succi opprimente; cujus detractio licet aliquantum eisdem officiat, tamen deinde levamento est. Porro imbecillitas ex ea copia genita innotescit potissimum, si nulla præcesserit notabilis vacuatio, nulla causa latenter absumens, nullaque subsit maligna qualitas virium elementa corrumpens.

Avicenna (*) credit, temperiem calidam siccamque, sive totius corporis, sive partium principalium adversari purgationi, quippe peragenda medicamentis calidis, & siccis, partes simili temperatura præditas prompte offensuris. Enim vero præsentem infesto humore purgationi cessuro, inde non deterrebatur a caliditate, & siccitate totius corporis, vel partium certarum; qui formidato incommodo prospicere possum, eligens minus calidum, siccumque pharmacum, & super addens haustum feri lactis caprilli, vel similis: quo pacto certum est, multo plus commodi reportatum iri deiectione, quam noxæ inflictum a caliditate, & siccitate deicientis.

Habitus corporis rarus, & mollis copioso effluvio viam muniens, una cum morbo vires non leviter infirmans, tanquam inditium, vel causa futuræ debilitatis, aut inhibet purgationem, aut duntaxat restrictiorem permittit. Hoc nomine Fuchsius in paradoxis pueritiam exemit purgationi, persuasus, puerorum substantiam facillime dissipari, excernique sponte in aliis ætatibus artis opera vacuandum. Tamen passim occurrunt experimenta de purgatione feliciter in pueris obita, quæ redargui nequeunt, exitu considerato, & ipso consilio. Concedo, multum e pueris jugiter evolare, aptum per angustissimos meatus permeare.

Pof-

(a) *Lib. 1. Fen. 4. Doc. 5. cap. 3.*

Possunt tamen in eisdem multum edacibus congeri crassiora purgamenta difficulter clanculo dissipabilia, neque ea temporis brevitatem, quam morbi curatio requirit, propterea adjumentum artis exposcentia. Propter largum in pueris perspiratum lubentius abstinere ab venæ punctione, quam purgatione; quod copia sanguinis per insensiles meatus facilius dispergi possit, quam excrementorum. An non ipse ^(a) Hippocrates elaterio præstito nutrici purgat infantes ipsos? Verum enim vero idem monet, ^(b) ne pueros calidioribus, & siccioribus purgantibus agitemus, præsertim ante primum septennium, eo tempore convulsionibus maxime obnoxios. Temperatura quoque humida puerorum sui conservationem petens, ægre patitur sicciorum, & calidiorum usum; & videmus quam moleste ferat summum æstatis, vigente caliditate, & siccitate. Eos præterea subduxit natura indigentia acriorum purgantium, quos scilicet ex facili mitioribus perducimus ad purgationem propter fibras egregie sensiles, & irritabiles, humoresque paratos ad solutionem. Senes contrario præditi temperamento, idest frigido siccoque, & durioribus fibris, tametsi humidis, & pituitosis excrementis abundant, purgantibus fortioribus quatiendi non sunt, & maxime in ultimum senium delapsi, oblucente virium infirmitate. Nequeunt hi, licet nullam præter senectutem extremam patiantur ægritudinem, sustinere quantitatem cibi unica vice sumptam sanis hominibus congruentem; qui monitu Hippocratis ^(c) exiguis indigent fomitibus; ideoque crebro, sed modica cibi portione instar ægrotantium nutriendi sunt; eademque ratione vehementiore purgante non exercendi.

Nil aliud momenti inter res naturales expendendum superest

(a) *Lib. 6. Epid. Sec. 5.* (b) *In prognosticos.* (c) *Sec. 1. Apho. 14.*

pereſt præter graviditatem, & inde ſequentia. Ita vero gravidarum purgationem moderatur Hippocrates.^(a) *Pregnantes medicamentis purgare oportet, ſi turgeat humor, quarto menſe, & uſque ad ſeptimum. Minus vero haſ. Juniores autem, & ſeniores fœtus vereri oportet.* Hanc ſententiam intelligendam cenſeo de forti purgatione Priſcis uſitatio- re, inde tamen moneri quoque artificem, ut etiam levem meditate, cauteque uſurpet, & tantummodo ex graviore occaſione, quam in vacuis, propter periculum abortionis ab utraque impendens, licet ex utraque non æquale. Quo validior eſt expurgatio, eo magis commovet humores uterum verſus, agit partes ei conterminas, officiit acrimonia medicamenti, incutitque gravio- rem deperdendi fœtus ſuſpicionem. Debilior minus quidem eſt formidoloſa, ſed non omnino tuta, extraque omnem ſuſpicionem in quacumque conſtitutione prægnantium. Itaque ſemper conſultius foret in gravidis parcere purgantibus quibuſcunque, niſi acciderent affectiones modo infirmiora, modo fortiora exigentes, etiam cum aliqua trepidatione uſurpanda, ne patiamur, matrem, & conceptum abſque ullo ſubſidio vita periclitari. Cum autem fœmina aliis temporibus magis, aliis minus proclivis ſit ad abortum, tanto major pro expurgatione imperanda circumſpectio requiritur, quanto major eſt ea proclivitas. Hanc vero majorem eſſe primis tribus, & poſtremis menſibus, animadvertens Hippocrates abſtinet purgante, primis tribus ob mollitudinem vinculo- rum, ultimis tribus propter magnitudinem infantis ſuo pondere eiſdem infeſtam, & magis accedente purgantis irritamento, impulſuque. Solis igitur mediis menſibus vacuationem molitur, eamque, ſi materia turgeat, ob hanc conditionem facilius, & ſine magna moleſtia

(a) Apho. 1. Sec. 4.

in Hipp.
purgante
dant.

lestia cessura medicamento. Veruntamen tempore junioris, & grandioris foetus, magno morbo postulante non levem purgationem, & materiae non turgentis, ullus ne patebit aditus ad eam celebrandam? Quod tutius est indicavit Hippocrates, non quod unice fieri potest. Si enim ex violentia morbi in magnum discrimen adducta sit parens, una cum prole, anne deferemus utramque sine ullo praesidio, ob periculum abortionis, quod nihilominus impendet a morbo? Utique deferenda est, nisi suppetat saltem ambiguum remedium, neque certam perniciem allaturum. Quapropter, si ostendero, purgationem non esse necessario abortivam, proculdubio evicero, anceps esse remedium, nec omni spe destitutum, nempe causam morbosam imminuens. Porro etiam primis mensibus sine abortu tentatam esse purgationem vel fortem, constat apertissime ex impudicis mulieribus, eam non semel & incassum expertis ad vitandam impudicitiae notam ex grandescente foetu inurendam. Legimus praeterea apud Hippocratem^(a) uxori Antimachi in Larissa a diebus circiter quinquaginta praegnantem potui datum esse elaterium vehementius, quam oportebat quod eduxit cotylas quinque excrementorum, & subcruentum ramentum intestinis dera-sum, quae ulceraverat: neque tamen quo tempore supervixit mulier, apparuit ullum indicium commoti conceptus, & futuri abortus, si longius supervixisset. Congruit id eventum observationi Celsi asserentis,^(b) posse servari foeminam, ipsumque foetum reservari etiam in torminibus ventris, cum dejectione sanguinis, & strigmentorum. Curcigitur idem sperabile non erit ex assumpto dejiciente, non parituro tormina, excretionemque sanguinis, & strigmentorum? Itaque si gravida, ex. gr., cadat apoplectica,

cum

(a) *Lib. 5. Morbo. Popu.*

(b) *Lib. 2. cap. 8.*

*Amim
acc*

cum aliqua spe salutis, non sola manna, vel alio simili contenti erimus, affectu validiora exigente, sed hæc ipsa sunt usurpanda, eligendo tamen citra notabilem molestiam opus absolutura. Damnat in gravidis Rodericus a Fonseca, elleborum, colocynthidem, turpetum, scammonium, aliaque de genere eodem. De ceteris non disputo, sed scammonium, si admisceatur mitioribus purgantibus, reprobandum non duco, quod ea missione benigne, efficaciterque purget, ut Bohnii, aliorumque constat frequentibus experimentis. Non metuentes exhibere gravidis, uti communis est praxis, sirupum rosatum solutivum, vel electuarium lenitivum, aliaque similia habentia, puta, facultatem purgandi uno numero, neque causam habent metuendi purgans uno numero fortius, si morbus isthuc requirat, & cetera consentiant; quod sane nemo probaverit, esse indubitate abortivum, nec probandum suscepit. Tota difficultas vertitur in cognoscenda opportunitate faciendi periculi: quod neque in morbis evidenter lethalibus, neque in salutaribus, & sponte cessaturis locum habere judico, sed duntaxat in ambiguis, nec aliud remedium præter anceps subjicientibus. Hoc loco omittenda non est trita controversia, utrum liceat perdere foetum ad tuendam matrem, si rationabiliter sperare liceat, eo perduto matrem defensum iri. Communis est controversiæ diremptio, non esse facienda mala, ut eveniant bona; cui dogmati tamen aliud addendum est non minus vulgatum, e duobus malis minus esse eligendum. Si igitur suppetit gravis conjectura, sine tali medicatione perituram cum prole matrem, cur minus malum non erit eligendum, & custodienda mater? Actum est, imaginemur, de prole, & parente vi morbi perseverante. Medicina servat matrem, occidit foetum vel non servata matre

interiturum. Si medicinam relinquis, matrem perire finis, & nihilominus proles interit. An igitur matri non subvenies, ut foetui nihil proficias? Si Theologi, rerumque divinarum interpretes ita decernunt, jubentque, obtemperare necessum est. Verum in hoc casu, ut in aliis multis medicis, longe difficilior est quaestio de facto, quam de jure: nec quisquam, ut opinor, in se recipiet, per provocatum abortum matrem iri conservatum, & non provocato, utrumque periturum esse. Ambigenti vero videtur nefas, destinare prolem ad mortem ob spem incertam tuendae parentis.

Haftenus de muliere praegnanate. Nunc de enixa agendum est, vel patiente morbum ante partum inchoatum, vel a partu, rite fluentibus lochiis, vel parcius, vel uberius. In puerperis nata aegrotatio originem habet, vel ab humoribus vitiosis ante partum congestis, vel occasione partus genitis, vel a corrupto puerperio: de quibus causis huc non attinet, prolixius differere. Demus igitur, puerperam teneri morbo genito ab excrementis contentis extra uterum, purgamenta uteri congrua mensura manare, indicarique purgationem. Erit ne indicationi satisfaciendum? Utique; si morbus anceps sit, nec appareat, eum a lochiis rite fluentibus imminui, jamque fluxerit eorum moderata quantitas: de quo suppetit praxis Hippocratis^(a), qui praebet quintam partem consuetae quantitatis Scammonii ad sollicitandam restrictam alvum. Morbi vero vehementia majorem quantitatem purgantis exigente, cur non erit porrigenda, habita ratione virium, & aliorum accidentium? Attamen clari quidam viri cum Riverio, donec naturaliter purgatur uterus, omnem per alvum purgationem interdicunt percussi timore, ne natura distrahatur ab

T

excre-

(a) *De Sterilibus*.

excretionē lochiorum vacuatione per alvum facta. Ac sane id recte meritoque decernerent, si certum foret, inde secuturum esse formidatum incommodum; quod metuere quidem possunt, pro certo habere non possunt. Quemadmodum enim, ut mox ostendam, purgatio non est certum impedimentum fluentium mēstruorum, item censeo, non esse puerperii. Quapropter in puerperæ affectu periculoso apparentibus clavis inditiis, totum corpus redundare pravis humoribus, purgatio temere non tentaretur, etiam in convenienti lochiorum effluvio: quod si parcius, vel largius foret, habes ex superioribus, quemadmodum te geras. Namque, si pro modo naturæ se se utero exonerante, in angustiis puerperæ impeditæ gravi morbo ab humoribus vitiosis extra uterum contentis producto, patet locus purgationi, magis patebit, si restrictior erit exoneratio; quando scimus, parciolem uteri purgationem alvi fluxu a natura aliquando suppleri. Porro lochiis supra modum erumpentibus, si posceretur expurgatio, hæc minus roboris haberet ad ea supprimenda, quam in fluxu moderato; & hoc respectu minus esset metuenda. Quem lateat, laboriosius cohiberi humorem concitate defluentem, quam lente, copiosum, quam paucum?

Lactis quoque generatio in enixa propter multarum nutricum paupertatem conservanda, eam habet animadversionem ratione purgationis, quam exposui agendo de impedimentis venæ sectionis.

C A P U T V.

*De impedimentis purgationis inferioris acceptis a rebus
non naturalibus.*

AD aerem, primum non naturalium, in usu magnorum auxiliorum respiciendum esse, dictum superius est, notumque quid dixerit Hippocrates de purgatione ex aeris consideratione: sub cane, & ante canem difficiles purgationes sunt; quam difficultatem non peculiaris quædam occultaque astri proprietas parit, sed caliditas, siccitasque aeris per id tempus maxima; abs qua Senex timet, ne præter modum calefacta, siccataque viscera pharmacum ad se se alliciant, & frustrentur; eodemque timore commotus vetat purgationem in febribus fortibus^(a). Quanquam autem id præcipit Hippocrates,^(b) tamen in febre ardente æstiva purgationem instituit lacte asinino; quo exemplo Martianus in Comment. suadet propinationem copiosam decoctionis Cassiæ, & pulpæ Thamarindorum; eodemque monemur, summos inter æstivos æstus non quamcunque purgationem, nec quolibet medicamento peractam declinandam esse, sed tantummodo calidioribus, & acrioribus: quorum sane adhibendorum occasionem, & indigentiam ipse fervor tempestatis adimit, congerens tenues, calidosque in corporibus humores etiam mitibus purgantibus cedentes, non crassos & viscosos, fortioribus abducendos. Insuper tolles metum formidati ab Sene incommodi tempore canis, si assumpto medicamini superaddas potum refrigerantem & humectantem, qualis est decoctio malvæ, serum lactis caprilli; si præbeatur illud ante-

T. 2

luca-

(a) *De Medic. purgant.*(b) *Lib. 4. acut.*

lucanis horis ; si refrigeretur cubiculum aqua, & virentibus foliis, quod humile sit oportet, tutumque a Sole. Ceterum hæ cautiones in usurpandis purgantibus in apice æstatis potissimum attingunt morbos acutos cum febre, in quibus eorum, & calor tempestatis coeunt, geminantque invicem molestiam laboranti, maxime in regionibus calidis, quales sunt, in quibus scripsit Hippocrates. Quocirca orto, æstivo tempore, morbo gravi sine febre ingentique calore validam purgationem postulante, circumspectius quidem, sed peragendam censeo.

Nonnulli ab exposito monitu Senis ansam arripiunt declinandæ purgationis etiam in media hyeme, secuti auctoritatem Avicennæ temperantis a purgante, quiescentibus in montibus nivibus : cui sane obtemperarem in morbo dilationem remedii permittente, non obtemperarem in fugaci occasione, nec moram concedente. Neque sane ulla subest ratio obtemperandi. Cur enim sæviente frigore abstinendum est a purgante expostulato ? An propter difficultatem obtinendæ purgationis ? Hanc tolles, si vim frigoris igne temperes, si præpares humores, efficaxque medicamentum propines.

Satis de aere. Reliquæ res non naturales sunt cibus, & potus, motus, & quies, somnus, & vigilia, excreta, retentaque, animi perturbationes : quarum omnium habenda ratio est rite purgationem celebraturo ; & quemadmodum habenda sit, exposui in Methodo medendi, tractans de indicatione sex rerum non naturalium. In præsens agendum duntaxat remanet de menstrua purgatione, plura requirente, quam eo loco exposita fuerunt. Ergo certum est, eam vacuationem salutariter a natura institui, nec proinde interturbandam esse purgantibus, si hæc interturbandi vim habent, uti pluribus auctoribus visum est

habe-

habere. An jure id visum sit, vestigabo. Duo in purgantibus cadunt sub præsentem considerationem, qualitas eorumdem, motusque humorum, quem pariunt. Qualitas, quæcunque sit, fibras, vel irritat, vel laxat, & alterutro modo potius facit ad incitandam lunarem purgationem, quam compescendam; observatumque est, ab eisdem in pauca quantitate exhibitis loco alvi moveri urinam, motione consentiente cum provocatione menstruum: quorum proinde inhibendorum suspicionem solus motus purgantis injicere potest. Placet pluribus, causam cientem menstruam excretionem esse fermentum uteri, cujus portio in sanguinem illapsa eundem agitat, dissolvit, præparatque ad exitum. Quadam pariter peculiari commotione sanguinis expurgans efficit, ut inde separentur excrementa ad alvum defluxura. Hinc dubitatur, ne motus factus a purgante pervertat alterum, quo natura studet menstrualem sanguinem rejicere. Hunc autem perverti, tam certo credit Rodericus a Castro cum aliis non paucis, ut dijudicet, etiam in magnis morbis purgationem requirentibus differendam esse, donec menstrua cessarint, annuens adagio hispanico, feriatam diem esse, cum hospites adfunt. Veruntamen mihi nulla sat firma, manifesta que ratio suppetit, cur illis auctoribus assentiar, & pro certo teneam, a purgantibus impeditum iri fluxum menstruum, eorumque propinationem differendam esse ad cessationem usque fluxus etiam in grandi affectu. Satiùs quidem est, scatentibus menstruis purgationem procrastinare, si commodè fieri possit dilatio, sine periculo gravioris noxæ in morbo vehemente. Ut enim ea excretio in sanis conducit ad salutem tuendam, item in ægrotis ad reparandam, inhibendumque morbi incrementum; neque semel observatum est, eandem vacuationem concocta jam materia factam

Etiam partem criseos fuisse, & restinctæ febris causæ, uti contigit mulieri in Thaso austeræ, & asperæ, cui narrat Hippocrates, sub iudicium copiose menstrua profluxisse. Ceterum urgente purgationis indicatione, purgationem temere non adhiberemus, ipsius experientiæ monitu, quæ constat, purgantia mediocria sæpius casu præstita tempore menstruorum hæc minime compescuisse, aliquando etiam magis incitasse, ut vidi contigisse mulieri triginta circiter annorum, cui propinatum a juniore medico, cupidoque agendi pharmacum non solum fluentia menstrua minime suppressit, sed præter modum stimulavit. Quicquid autem opponatur, poterit forsitan evincere, purgationem celebratam in menstruali muliere anceps esse remedium, non temerarium, nulla ratione demonstrante, ex ea fore, ut manantia certo retineantur. Quod si sermo sit de leni purgante, seu laxante, cujus actio primam regionem non prætergrediatur, multo minus inde timenda erit menstruæ fluxionis suppressio. Id confirmo meo experimento. Uxor perillustri D. Antonii Sberti solita, lactatus tempore madere menstruis imo copiosioribus, anno 1731 mense Martii incoepit lactare; sed solitis temporibus, contra consuetudinem non fluxere menstrua, solum aliquot stillæ apparuerunt. Sub fine septimi lactatus mensis, tempore menstrualis purgationis correpta est tertiana duplici continua cum vehementibus symptomatis, ingenti renum dolore, cordis angustia, sensuque quasi manu cor constringeretur, siti, vigiliis. Dolor renum, & cordis angustia valde imminuebantur circa statum febris, alvo egerente multa liquida, biliosa, & æruginosa. Petebat Ægra, optabant domestici, ut venam aperiri juberem, quibus non indulsi ex animadversione, molestiora symptomata mitigari per excretionem biliosam, & adhuc murmurare ven-

ventrem, indicium ad eum devolvi vitiosos humores, cum quadam, ut ait Vallesius, impropria turgentia. Itaque exhibui unciam unam Ellectuarii lenitivi, concepta spe fore, ut magis imminuta humorum copia uteri purgamina largius emanarent. Neque me spes fefellit, facto eodem die liberaliore fluxu, & fere eadem mensura perseverante ad finem usque. Consuetum spatium menstruationis erat octo dierum, quo exacto, & tribus diebus amplius omnia cessarunt.

C A P U T VI.

*De impedimentis purgationis inferioris acceptis a rebus
præter naturam, & primum ab ipso
humore purgando.*

Non minus spina digito infixæ statim sui extractionem petit, quam humor noxius, nec emendabilis sui excretionem, quam proinde per se vetare nequit, sed tantum ex accidenti. Sic materia cruda, quam vetat Hippocrates agitari, purgarique, poscit quidem tanquam infesta sui expulsionem, sed ex accidenti prohibet, deficiente pharmaco eam commode molituro: quod si suppeteret, proculdubio in usum vocaretur, & protinus cruda depellerentur. Iterum propono, de quo alias mentionem feci, sanguinem in carnes effusum, & phlegmones effectorem sui excretionem protinus indicare, non tamen tentari, antequam in pus commutetur, nullo suppetente instrumento ante hanc mutationem vacuationi idoneo. Igitur quemadmodum materia inflammationis per se postulat ut excernatur, vetat ex accidenti; item vetat eodem respectu materia cruda, quæ difficilis est ad dejiciendum, fru-

ma
an
phl
un
ele

frustraturque purgantia. Oritur hæc difficultas ex materia cruda, de qua loquimur, utpote contenta in venis, & interjecta sanguini; quæ proinde vi medicamenti expelli nequit, nisi per coctionem a sanguine fecernatur, sicque ad expulsionem præparetur. Quamobrem non aliam concipio cruditatem in materia in venis conclusa, & recusante purgationem, nisi eam dispositionem, per quam ita partibus sanguineis immiscetur, & adhæret, ut nequeat opera medicamenti fecerni, extrahique: & hinc colligo intimam rationem, cur Senex in generali præceptione de non vacuanda materia cruda turgentem exceperit. Turget humor ex sententia Galeni, Vallesio, aliisque pluribus adprobata, qui nulli parti affixus modo in hanc, modo in illam agitur, omnium membrorum natura, ut ait Vallesius, ad illius expulsionem nitente. Itaque si humor turgens in venis est, certe nequit vagum motum habere, variasque partes irritare, nisi emerferit, & fuerit solutus arcta cum sanguine mistione. Emersus vero liberque eum propemodum habet præparatum ad ejectionem, quem acquirit materia cruda per concoctionem disponentem ad separationem, per quam aufertur impedimentum commodæ excretionis.

Quanto sententia Hippocratis de purgatione materiæ coctæ, non crudæ celebrior est, tanto minus a plerisque Medentibus observatur, qui in principio febrium statim deicientia porrigunt; eamque dictæ sententiæ interpretationem afferunt, quasi inde fortis duntaxat, non mitior purgatio prohiberetur, quam *minorativam* vocant, & alteram *eradicativam*. Sic Manardus Ferrariensis^(a) affirmat se se annis octo supra quadagesimum variis in locis medicinam fecisse, atque in principiis febrium semper præbuisse

(a) Lib. 3. Epist. 13.

buisse flores Cassiæ absque ulla noxa notatu digna . At Martianus , qui multum operæ studiique contulit in eum aphorismum exponendum , post diligentissimum examen concludit , crudos humores nullo modo , nec in principiis morborum purgandos esse ; idque mihi recte constitutum videtur . Cur enim fortis expurgatio crudorum non convenit ? Nimirum imparata sunt ad vacuationem ob eorum confusionem cum succis utilibus ; agitataque a medicamento non educerentur , superstite agitationis detrimento . Sin autem robustum pharmacum non potest elicere immatura inquinamenta , multo minus poterit imbecillum , quod minores quidem turbas ciebit , non tamen afferet majorem utilitatem . At Manardus tam longo annorum excursu , incipientibus febribus , Cassiam præbuit , nec unquam inde secutum esse grave detrimentum , animadvertit . Esto . Nihil tamen evicit pro purgatione minuente ; cujus tantummodo aliquam defensionem protulisset , si tot annorum usu animadvertisset , illud debile pharmacum semper , aut plerumque profuisse . Argumentum medicaminis adprobandi est levamen inde relatum , non vacuitas notabilis jacturæ . Unica utilitas ab Cassia , quæ clyster ventriculi appellatur , sperabilis est in redundantia impuritatum in eodem insidens , & intestinis , non imminutio materiæ fusæ per venas : quæ tamen redundantia non semper adest , prætereaque tolli potest etiam clysteribus . Non tamen ob isto , quin tollatur etiam Cassia , Ellectuario lenitivo , similique ; dummodo adsint graves notæ , eam adesse , quam tamen non semper adesse , in medio positum est , proptereaque in omnibus febribus incipientibus non esse porrigenda , uti fecit Manardus , ea laxantia . Itaque qui celebrant initio febrium purgationem , quam vocant minuentem , si hanc intendunt in materiam febrilem

V

brilem immistam sanguini, falluntur, operamque frustrantur: sin autem animum habent tantummodo eluendæ primæ regionis, constat ex dictis, eam non semper esse peragendam, nec minuentem apte vocari, quasi minueret fomitem febrilem sanguini intermistum.

Stabilita cum Hippocrate necessitate coctionis ad idoneam purgationem conficiendam, reliquum est, ut coctionis gradus designetur. Fernelius gravissimus auctor late interpretatur decretum Hippocratis de coctione expectanda, opinatus, eo solum prohiberi vacuationem omnino crudi purgamenti; atque coctionem in tres gradus distribuens, obscurum, manifestum, perfectumque, sancit, in obscuro parce purgandum esse, moderate in manifesto, perfecte in perfecto. De duobus ultimis gradibus minime dubitat, utrum sufficiant pro recta purgatione, tantum ambigit de primo, nititurque hoc argumento dubitationem tollere. In neutra, inquit, corporis affectione impendentem morbum sæpe arcemus purgatione, quæ vitiosos jam congestos humores detrahat. Arqui tum maxime, multoque magis, quam ipso morbi initio crudi sunt. Cur igitur pari utilitate moti eos initio non purgabimus? Teneret id argumentum Fernelii, si probasset, succos vitiosos in neutra affectione crudiores, quam inter initia morborum esse, quod adeo certum non est, ut assumit. Et sane animadvertit Prosper Martianus,^(a) ante ortum morbi noxios humores neque crudos esse, neque coctos; & Vallesius^(b) in morbo regio, nisi febris adest, bilem ante purgationem coctione non indigere, indigere tamen accedente febre; cujus accessio indicat intra venas omnia agitari confundique ex coorta febrili fermentatione, uti evenit in musto, cum incipit ebullire: qua facta con-

[a] Sect. 1. Apho. 22.

[b] Lib. 7. Contro. cap. 15.

confusione coctio expectanda est, subactura purgamina, & secretura, inde ad spontaneam, vel artis praesidio faciendam vacuationem praeparata. Itaque, si quis ver. gr. multam bilem in venis congesserit, ex qua in febrem sit postridie incursumus, hodie ea cruda non erit, erit postridie oborta febris, facta majori cum sanguinis confusione, & commotione, vi fermentationis febrilis, propter quam cruda dicitur, nec apta ad excretionem. Insuper concessio, materiam parce coctam parce purgandam esse, difficillimum est, ita purgationem instituere, ut exaequet debitam mensuram, nec infra, aut supra peccet. Enim vero Senis praceptum vetans purgationem in principiis morborum comprehendit etiam materiam obscure coctam, imo etiam manifeste, quae talis esse creditur in argumento morbi. Hippocrates enim, uti probat Prosper Martianus^(a), tria tantum tempora morborum facit, principium, statum, atque declinationem, sub principio ipsum argumentum complectens. Quare Fuchsius, aliique graves auctores ut sese ab errore tutentur, tantummodo in declinatione febrium ad purgatoria confugiunt, natura, quae solet concocta sponte excernere, excretionem non absolvente. Num igitur reprehendendi Fernelius, Montanus, aliique multi, qui Syrupo rosato solutivo, & Rheubarbaro conantur semicocta deicere? Mihi sane videntur cum suis aegrotis multo tutius agere, qui solum apparentibus notis perfectae coctionis purgantia administrant, suum opus feliciter peractura. Natura enim semicocta non separat, sed perfecte cocta; totaque utilitas speranda ex coctione vacuationis gratia consistit in separatione, qua peracta, facilius feliciorque obtinetur purgatio. In morbo tendente ad salutem, qualis est febris exhibens signa indubiae coctionis,

V 2

non

^(a) *Lib. de Affectio.*

non est tentandum remedium, quod opus naturæ futuræ victricis, aut pervertere potest, aut retardare, ut potest intempestiva purgatio; quam Vallesius ait, ^(a) esse in causa, cur nostris temporibus tam paucae contingant judicationes: de quibus non impediendis tam solliciti fuerunt Antiqui, totque accurate scripserunt. Animadvertendum tamen est, bifariam coctionem fieri, aut tota materia semper novum coctionis gradum acquirente, donec tota perfecte cocta sit, quod in fine status accidit; aut cum materiæ aliqua pars subigitur, altera crudior remanet: dumque coctio hoc modo peragitur, difficilius est, deliberare de purgatione ex signis concoctionis, quæ ex portionibus materiæ inæqualiter coctæ obscurantur. Verum, quia hic modus coctionis solet evenire in febribus longis, in quibus non reservatur tota materia ad statum unica decretoria, & copiosa vacuatione extrudenda, cum majore fiducia licet purgationem tentare, quamvis non exhibeantur inditia absolutæ coctionis.

Quamquam Hippocrates in exposita sententia tantum excipit turgentem materiam nulla expectata coctione purgandam, tamen Posteriores non solum alias plures limitationes excogitarunt, sed illam ipsam amplificaverunt, rati, materiam duplici modo turgere posse, proprie, & improprie, & utroque modo turgentem materiam purgari oportere. Proprie turget, ut explicant, quæ per internas corporis partes jactatur, & furit, omnesque ad excretionem irritat: improprie turget, uti placet Vallesio, cum venter murmurat, & dejectiones biliosæ sunt: quibus apparentibus cum Hippocrate ^(b) intra primos quatuor dies celebrat purgationem, murmure ventris cum biliosa dejectione testante, bilem sponte ad ventrem ferri. Expurgan-

(a) Lib. 4. de rat. vic. (b) Lib. 4. Acut.

gandus est noxius humor, quotiescunque expurgationem facile utiliterque consequi possumus; & nisi possumus, differimus, & opperimur coctionem. Commodam autem excretionem obtentum iri, declarat murmurans venter, biliosaque dejiciens, sicque denotans bilem, nulla in parte retineri, ab aliis humoribus seponi, ad ventrem fluere prompte secuturam, propinatum purgatorium. Cur Hippocrates in Pleuritide dolore descendente infra septum transversum injungit purgationem? Non alio sane nomine, uti placet Martiano, injungit, nisi spectata inclinatione humoris noxii ad partes inferiores; quam pariter exposita inditia significant, eandemque adesse vacuandi occasionem, uti cum Vallesio concludo.

Præter turgentem humorem flagitantem per initia morborum dejectionem asseverant plerique, dejiciendum pariter esse, quod coctibile non est, aut propter imbecillitatem facultatis coctricis, aut ratione suæ naturæ; præterea quod valde redundat; denuum quod in partem aliquam nobilem exitiosum illabitur. Humores respuentes coctionem iccirco Sanctacrux purgat, quod persuasum habet, a natura non retineri, sed eos duntaxat retineri, quos corrigere, & subigere potest, eorumque, quos non retinet, optari depulsionem. Optantem igitur credit, adjuvandam esse medicamento, idque ex propensione naturæ ad opus feliciter cessurum, ita de natura loquens, similiter ac si ex cognitione, & consilio operaretur salutem. Verum licet natura, ut ait Hippocrates, sit docta sine doctore, tamen non cognoscit agenda, nec agit quia cognoscit, sed sequens leges motuum. Itaque dicuntur cruda in venis conclusa retineri a natura, quia sanguini immissa cum sint, nondum evecta, & a fociis partibus soluta, eam non irritant ad excretionem. Quæ vero concoxit, eliminat,

aut

aut sola, aut opitulante pharmaco: quippe per coctionem ab aliis secreta, quibus temperabantur, fortiora fiunt ad irritandum, vel paratiora ad exeundum. Ex modo, quo dixi, naturam retinere excrementa coctibilia, in proclivi est, colligere modum, quo dico non retinere correctionis indocilia. Nempe credere par est, ista minus arte copulari cum sanguine, facilius separari, promptioraque esse ad instigandum, & secedendum: ex quo apparet ratio, cur speremus in hac conditione humorum utile dejiciens futurum, non speremus in coctibilibus. Quin etiam conatus ad statim ejiciendos indomabiles succos inde commendatur, quod nihil melius sperare possumus ex procrastinatione purgationis, nihil ad hanc adjuvandam longiore spatio molituro. Hæc de humore non coctibili ex propria natura. Quid autem deliberabimus de humore, quem imbecilla facultas coquere nequit, quamvis coctioni aptus sit? Avicenna^(a) non cognoscens, virtutem constaturam esse usque ad maturitatem, non dubitat expurgare cruda; sed ego dubito, nisi afferatur ratio tollens dubitationem. Si namque immaturos succos agitare non oportet, facultatibus vigentibus, cur agitandi in earum infirmitate? Si timemus, ne turbetur coctio a medicamine præstito robusto ægrotanti, cur non idem timebimus, si detur imbecillo? Respondebis, cognita imbecillitate naturæ ad subigendam materiam nihil melius superesse, quam dubium remedium experiri, & istuc esse purgatorium. Hæc mihi tamen obstat ratio, quominus id periculum adprobem. Si enim tentata purgatio acerbæ materiæ cum virium robore perniciofa, & coctionis turbatrix judicatur, cur anceps erit remedium cum debilitate? Dissimilem rationem non invenio, nisi dicendo, purgationem post materiæ co-

ctio.

(a) *Lib. 1. Fen. 4. Doc. 5. cap. 3.*

ctionem optimam esse, minus bonam ante coctionem, sed minime infensam; quod tamen funditus evertit stabilitam cum Hippocrate purgandi legem. Et sane Vallesius ^(a) etiam cognoscens, non posse vires ad coctionem usque materiae permanere, adeo periculosum censet experimentum purgationis ante coctionem, ut asseveret, se solum illud tentaturum, aliunde objecta certa futurae mortis praesagitione.

Aliam, ut dictum est, praecipi exceptionem suppeditat ingens copia nocui succi, quam Manardus credit efficacior ad suadendam crudorum ejectionem turgente materia. Par est opinari, vix fieri posse, quin magna succorum redundantia in venis contenta non sit elata, supernatetque, sicque reddat probabile tentamentum purgationis.

Fernelius ^(b) decernit in morbo ancipiti, gravique incipiente non utiliter solum, sed necessario utendum esse purgante, neque prudentis esse Medici coctionem opperiri, quae fortasse futura non est, imminente metu, ne graviora obtingant, morsque statum praeveniat, & speratam coctionem. Utile existimo id documentum Fernelii, si tamen contractius sumatur, definita ambiguitate, & gravitate morbi, non generatim accepta. Omnes morbos acutos periculosos esse gravesque, aperte denunciat sententia Hippocratis, omnium acutorum exitum incertum esse. Ergone in omnium initio instituenda purgatio est? Non ita sane, sed quia acutorum non aequalis pravitas est, & periculum, monitum Fernelii intelligendum est tantummodo de maxime periculosiss, multoque plura indicia timoris, quam spei praesferentibus; in quibus angustis, nisi suppeditantur certa, etiam dubia locum habent.

(a) *Sec. 1. Apho. Hip. 22.* (b) *Lib. 3. cap. 1.*

bent . Verum cum apparent plura , & valde ominosa signa , hæc ipsa significant materiam coctioni repugnantem , occasionemque purgationis periclitandæ .

Altera exceptio sumitur ex humore in aliquam partem nobilem influente , revulsionemque exigente , ut accidit in inflammationibus , in quibus ex sententia Hippocratis alias est principale remedium venæ incisio , alias expurgatio , & ista cum cacochymia prævalet multitudini , siue plus habet virium ad nocendum sanguinis recessus a naturali temperatione , quam redundantia . Hanc medendi rationem tradit Senex in curatione Pleuritidis dolore infra septum transversum protenso , nullam prorsus mentionem faciens de sanguinis detractione ; eandem tradit in biliosis temperaturis , si corripiantur non purgatæ eodem morbo ; & præterea tradit in inflammationibus partium promte vitiosos succos recipientium , cuiusmodi est uterus in foeminis , quo phlegmonem patiente fere præfert alvi solutionem venæ punctioni . Dolor vero in Pleuritico descendens infra diaphragma argumento est Hippocrati propinandi cathartici , ex interpretatione Martiani , tanquam indicium magnæ cacochymiae . Itaque inflammationibus excitatis in corporibus malis succis refertis iccirco utiliter instituitur purgatio , propterea quod educendo cacochymiam e venis , revellit materiam eas foventem . Illud tamen mihi non convenit cum Hippocrate , in dictis inflammationibus purgandum esse , omittendam phlebotomiam , qui supra decrevi , a cacochymia non prohiberi venæ scissuram ut revellentem . Materia inflammationum proxime scatet e venis ; quæ mihi videtur expeditius revelli per venæ apertionem , quam expurgationem , quamvis fatear etiam per expurgationem revelli , nec in totum reprobem praxim Hippocratis . At mihi tutius videtur , curationem

in-

inflammationum etiam in cacochymia venarum auspicari revulsione facta per detractionem sanguinis, quam expurgationem, hanc tamen non omittendo illa peracta: qua consideratione primo quidem venam aperirem, sed minus sanguinis detraherem, ut alterius vacuationis revellentis opportunitatem relinquerem. At quare in inflammationibus incipientibus cum copia mali succi, nulla habetur ratio cruditatis ad expurgandum revulsione nomine, habetur in solitariis febribus? Si expectatur coctio propter separationem nocui humoris intermissi sanguini, & inde secuturam multo utiliorem evacuationem, cur non expectatur etiam in inflammationibus? Opinor in istarum generatione cacochymiam quasi turgere, elatam esse, commotamque, ideoque facilius educi. Nec enim quæcunque cacochymia petit retrahentem dejectionem, sed magna tantummodo, quam copia præstat cathartico paratiorem, & præterea ipsa qualitas, quæ in acutis, de quo genere sunt inflammationes, solet esse biliosa, tenuisque. Capi-vacceo alia ratione suspecta est purgatio revellens humoris facientis impetum in aliquam partem, nempe quia pars affecta, uti persuasum habet, calore, & dolore irritata efficacior est ad trahendum humorem, quam purgans ad retrahendum; qua repugnantia ejus actio, utilitasque impediuntur. Veruntamen quis vires medicamenti ad alvum ducentis, partisque irritatæ contra nitentis, ita mensus est, ut affirmet, non esse victuras contrariam tractionem? Calor, & dolor trahunt ad locum insuetum, repugnantemque legibus naturæ, medicamentum ad locum destinatum a natura superfluitatibus: qua conditione loci cum studio naturæ ad sui custodiam non temere speratur, efficaciorum futuram esse tractionem purgantis, quam irritamenti partis affectæ.

Postremum offendiculum exhibet crassitudo evacuandi humoris exigens attenuationem, sine qua purgatio ex consilio Hippocratis rite non instituitur, imperantis, corpora purganda esse fluida efficienda, tum aperiendo meatus, si obstructi sint, tum humoribus fluorem comparando, si crassitie impediti. Propinatum pharmacum ad crassa, viscosaque inquinamenta propulsanda non omnino quidem frustra erit, non tamen tantæ utilitatis, quantam attulisset, illis incisus attenuatisque. Verum crassitudo obstans commodæ vacuationi solum cadere potest in humores extra venas, atque in cavitatibus contentos, non illos interjectos sanguini, atque concoctos a natura, quos scilicet nequit coquere separatura, nisi prius attenuaverit.

C A P U T VII.

De humoribus non coctilibus, aut coctione non indigentibus.

STatuto superius, humores invincibiles, & coctioni repugnantes initio morborum esse educendos, proximum est, ut hos producam, & occasionem præcepti exequendi; de quibus etiam Sanctacrux egit, sed non satis clare, & quantum Tironum captus requirit. Multiplices enumerat differentias humoris non coctibilis, & primam desumit a copia humoris, quam prætermitto; cum redundantia non denotet naturam præcise obstantem coctioni, sed tantum ex comparatione cum facultate: de qua deliberandum quid sit, supra sancitum est. Alteram differentiam refert ad humorem natura sua rebellem, omnemque coctionem respuentem, cujusmodi est atrabilis effectrix Cancris; humorque venenosus, qui vel insuperabilis

bilis est, vel tantum superabilis speciali modo, non coctione: quam differentiam humoris ipsa curatio febrium malignarum, & pestilentium confirmat, contra quas antidotis pugnamus peculiari secretaque dote obsistentibus veneno. Tertia differentia ex Sanctacruce est humor ejus conditionis, ut licet aliquem gradum coctionis recipiat, tamen ita tarde ad perfectam adduci potest, ut prius æger ab accidentibus, morboque vita periclitetur. Quarta differentia reperitur in morbis minacibus, & perniciosis, non toto genere salutaribus, sic ab eodem auctore descripta. Humor quidem superatur, coquiturque a nostro calore, tamen vapores, qui elevantur in concoctione, partes principes maximo afficiunt periculo; cui credit, non posse subveniri repercutientibus, & revellentibus propter pravitatem humoris inhærentem nimium tenuibus particulis, aut crassis. Verum hæ meditationes, loquendo de tertia, & quarta differentia, sola fultæ imaginatione, & difficillimæ ad cognoscendum, nihil conferunt ad praxim dirigendam. Quo enim indicio in morbo nascente, dum agitur de purgatione imperanda, cognoscere valeam, humorem posse quidem coqui, sed nimis tarde; itemque ejus esse conditionis, ut licet concoquatur, tamen in concoctione tot effundat vapores, ut partes principes in magnum periculum adducat? Hisce igitur imaginationibus relictis, inquirendum est, utrum tennes purgandi humores coctionem requirant, an tenuitas sufficiat commodæ expurgationi: de quo video, multa plures Antiquos disseruisse. Nomine tenuis humoris duo valde diversi comprehendi solent, solaque tenuitate convenientes, humor aquosus, qualis est aqua stagnans in ventre hydropicorum, pariterque bilis flava, causa tertianæ intermittentis exquisitæ, vel continuæ. Ita Pacinus^(a), aliique. Ergo credunt non

(a) *De incrass. tenuis humo. cap. 2.*

pauci aquosos humores concoqui non posse, quod instar aquæ careant oppositis patibilibus, sine quibus nulla materia idonea est coctioni. Etenim quæ concoquuntur, ut ajunt, crassiora evadunt; & hanc crassitudinem acquirere nequit aqua, tota vi caloris mutabilis in vaporem. Verum nolo distrahi in physicam disputationem de natura coctionis, sed assumens per eam separari humorem ab aliis, cum quibus confundebatur, & hoc pacto parari ad excretionem, vestigabo, an talis dispositio requiratur in tenui humore, ut commode amandetur. In febribus ardentibus, aliisque tertianis continuis acutis, quæ creduntur genitæ a bile tenui, cum natura prævalet, apparent in urina inditia coctionis, sicut in aliis; atque in eisdem febribus, uti tota Antiquitas observavit, spontaneæ evacuationes salutare sunt, si post coctionem fiant, sicuti in reliquis. Ex quibus concludo, etiam tenuem humorem, dum totum sanguinem in tumultum agit, febremque accendit, concoqui oportere, atque ad evacuationem per coctionem expediri, ad fortunandam morbi solutionem per alvum, quinimo alios etiam per aditus. Identidem enim febres ardentes sanguinis e naribus effluvio finiuntur, cui nihilominus præcedunt notæ coctionis in urina, uti contigit juveni triginta annorum, descripto a Petro Foresto, (a) laboranti causo exquisito, cui die 7 sanguis e naribus copiose fluens febrem confecit. At enim tenuis humor promptè fluit, sequiturque actionem purgantis? Cur igitur non eliciendus incipiente morbo? Quia, respondeo, confusus est cum sanguine, longeque melius detrahitur, cum a natura conante detractionem separatur, quam ante separationem. Quinimmo multorum sententia est, commoda expurgationi tenuitatem obesse, & iccirco opperendam

(a) *Lib. 2. de feb. com.*

dam esse coctionem, per quam nimis tenuia aliquantum cogantur, eamque mediocritatem habitus, sive consistentiæ acquirant, qua facilius exturbantur; uti evenit in iis, quæ per rursim rejiciuntur, quibus expellendis nimia tenuitas obest, conducit aliquanta crassitudo. Existimo tamen, esse valde diversam rationem de contentis in pulmone per asperam arteriam explodendis, atque de contentis in venis per alvum excernendis: definitque Fernelius^(a), humorem per coctionem præparari ad expulsionem, non per acquisitam coctione tenuitatem, aut crassitudinem, sed quatenus ab aliis secernitur, secretumque natura studet amandare. Si dicas, requiri mediocrem crassitudinem, ut possit secludi, experientia non semper tibi favet, sincereque testor, me nuper vidisse, in statu tertianæ continuæ multum biliosarum quisquiliarum flavescentium instar aquæ tenuium utiliter separatum dejectumque. Videmus, etiam in copiosis dejectionibus decretoriis non omnia dejecta unius esse conditionis, sed alia aliquantum crassa, alia tenuia, ideoque tenuitatem non obsistere vacationi. Præter experientiam ipsa ratio tenuitatis luculenter arguit, nullum inesse tenuibus impedimentum ad expulsionem, si cetera conspirent. Fit separatio præcedens ejectionem vi motus intestini sanguinis extrudentis in superficiem ejicienda, quæ, si crassa sunt, difficilius extruduntur, priusque attenuari oportet, quod fit opera naturæ.

Nonnulli iccirco tenues humores statim evacuandos judicant, nullamque coctionem expectant, propterea quod abs tenuitate semper turgent, jactatique huc illucque transfluunt; tamen non probant, quemadmodum sola tenuitas pariat in humoribus eam dispositionem, quam Scholæ vocant turgentiam, censentque argumentum purgatio-

(a) *Lib. 3. Meth. cap. 13.*

gationis absque coctione . Neque sane sola tenuitas reddere potest turgentem humorem , sed requiritur certa ejusdem quantitas , irritansque qualitas ; unde partes instigatæ ad excretionem pariunt motum humoris , quem vocamus turgentem . Bilis , quippe quæ , ut animadvertit doctissimus Fernelius , cum sero sanguinis confunditur , eique innatat , tenuis humor est , neque tamen cum affluit , accenditque febres biliosas , abs sua sola tenuitate vim turgendi , & impetum habet . Quid multa ? Celer motus febris acutæ biliosæ continuæ non ne tenuitatem humoris testatur , itemque a sola tenuitate eum non turgere ? Si quidem frequentes sunt eo de genere febres , neque tamen semper , aut frequenter causa febrilis turgendi motum habet , generatim animadvertente Hippocrate , raro materiam eo motu jactari .

C A P U T VIII.

De humoribus motis ad ambitum corporis , & in eo subsistentibus .

HUmorem conversi ad cutem , vel per eam excernuntur , vel in ea subsistentes varios morbos creant , Erysipela , Variolas , Morbillos , Scabiem , idque genus alia . Expositis igitur impedimentis purgationis profectis abs qualitate infesti humoris , prosequor objecta a motu ejusdem ad externum corpus facta . Frequens est in morbis excretio sudoris , & maxime in febribus , pluresque hac excretionem , vel sponte mota , vel artis opera curantur . Interdum tamen inutilis sudor est , & a natura copia instigata absque levamine provocatur , uti Senex^(a) observavit :

(a) Sect. 4. Apho. 52.

vit: *Febricitanti sudor superveniens, si febris non solvitur, malum: prorogatur enim morbosus, multumque humorem significat.* Quare, licet purgatio ducens humores ab extimo corpore ad intimum, possit interpellare sudorem, tamen a copia materiæ fluens, non a conatu victricis naturæ eam non prohibet, imo postulat ad minuendam quantitatem, si reliqua consentiant. Ubi enim adeo redundat humor, ut inopportune fundat sudorem, vix fieri potest, quin adiit aliqua crassior copia utiliter per alvum evacuanda. Cum autem salubriter sudor erumpit, parcendum est purgantibus, si perfecte morbus judicatur, nec ulla subest portio crassioris humoris, petens etiam dejectionem. Anno, antequam hæc scriberem, quidam Theologiæ Doctor annorum triginta circa finem ætatis in statu febris malignæ stigmaticæ incoepit large sudare; cumque ex multo cibo, quo per sanitatem uti solebat, aliisque inditiis collegissem, non modicam portionem etiam crassi humoris adesse, nec sudoris eruptio plures dies perseverans optatum commodum afferret, eum semel, iterumque, nec sine fructu leniter purgavi. Intermittebat sudor post purgationem unum, vel alterum diem, sed ejus fomite non extincto revertebatur; tandemque utraque vacuatione restituta salus est. Hæc de humore, qui excernitur per cutem. Eum vero, qui eodem fertur, ibidemque retinetur, ad interiora trahendum non esse, sed proximiorē via vacuandum, tam apertum est, quam quæ continentur in intestinis, esse deturbanda. Non ideo in omnibus morbis cutis purgatione abstinemus, imo artis est in pluribus non abstinere. Abstinemus erumpentibus Variolis, in quibus alvus suppressa, non laxa in pluribus prospere ominatur. Purgamus in Erysipelate, Scabie, aliisque morbis externi corporis; evidensque disparis consilii ratio animo obversatur.

In

*Febril
-ca pur*

*de
urgand.*

In Variolis totus humor infectus, cum prævalet natura, speciali instinctu ad cutem permeat, in pustulas elevatur, eademque via salutariter vacuari, tot sæculorum observationes sat comprobant; contra quas quis audeat, tam salubrem motum purgatione debilitare, aut pervertere? In filio meo undecim annorum mense Februarii anni 1727 Variolas patiente, novem dies, quibus alvus astricta penitus fuerat, etiam a supposito temperavi, ne moverem, irritaremque, integre judicari, quæ videbam. Interdum tamen non ita feliciter procedit Variolarum cursus, sed illis emerfis, & exarescentibus pustulis febris nihilominus intenditur; in quo statu videtur, omnino non esse rejicienda saltem mitior expurgatio: quinimo Joannes Freind^(a), cum quo faciunt alii plures Angli, ad purgationem tanquam ad præcipuum remedium confugit, eique maxime multorum vitam conservatam adjudicat.

Sunt plures alii cutis affectus, in quibus totus humor illapsus non resolvitur, sicuti resolvi solet in salutaribus Variolis, foveturque ab altero in venis concluso, sine cujus expurgatione non reducitur salus, quemadmodum accidit in Scabie pertinaci, aut in pustulis gallicis externum corpus foedantibus, quas ex Gonorrhæa intempestive suppressa contractas memini, me feliciter curasse in quodam Rhedario Cremonæ sola decoctione purgante Sennæ, & Epithimi absque ulla inunctione. Porro postquam humor in cute coactus est, spissiorque redditus, abest periculum, ne per dejectionem ad interna transferatur. Cum autem humor tenuis est, calidusque, veluti in Erysipelate partium exteriorum, videtur, timenda esse illius recursio ad viscera. Verum Galenus, aliique plures in Erysipelate exquisito, abdicata venæ sectione, bilem excernunt, si tamen

(a) Comm. 7.

tamen egregie redundet ; ex qua ubertate minime timent , ne ejus portio ad alvum deducta retrahat confluentem ad cutem , nisi purgatio vehemens sit . Enim vero Ettmullerus , ubi caput Erysipelas occupavit , purgationem quamcunque summe vitari jubet , & medelam confici internis sudoriferis , cephalicisque . Attamen oblatis notis biliosæ redundantiaë , mihi non apparet , quare dejectione minuenda non sit , præsertim si pars tentari incipiat , quam constat , non raro cum periculo tentari , cujusmodi caput est . An omitemus purgationem opperituri coctionem materiaë , ut in solitariis febribus ? Veruntamen bilis copiosa , & tenuis est , nec immersa adhærensque sanguini , sed elata , commota , tendensque ad separationem ; quam propterea vel cathartico non forti licet sperare commode evacuatum iri . Hippocrates , uti supra vidimus , incipientibus inflammationibus internis genitis ex ubertate cacochymiaë expurgat . Cur non erit expurgandum in Erysipelate negotium exhibente abundantia biliosa ? Vergit quidem humor biliosus in hoc morbo ad partes externas , quas præstat affici , quam internas ; sed si faciem insideat , non raro periculum creat ad internas effusus ; ideoque si copiosus est , videtur aperte indicari purgatio . Quinimo etiam sine insigni bilis copia ante paucos menses blanda purgantia bis adhibui in Sene laborante Erysipelate faciei , brevique liberavi . Hæc scribens accersor ad Ancillam Nobilis Patavini vexatam Erysipelate faciei , cui , licet nulum observaverim biliosæ redundantiaë indicium , præbui unciam unam Cassiaë cum granis 5 Diagridii , cum alvum per tres dies restrictam haberet . Multa dejecit , nihil tamen biliosi ex colore præseferentia ; tamque prospere vertit dejectio , ut post tres dies fere in totum morbus evanuerit . Tertio tantum die ægrotationis advocatus eam

conveni, & quarto pharmacum accepit. In hisce tamen duobus ægrotis, nec valida febris erat, nec ullum infestum symptoma, præter capitis ingentis caloris sensum. Si tamen febris intensior esset, cum delirio, aliisque gravibus & formidolosis symptomatis, eruntne purgandi Erysipelate affecti? Joannes Freind^(a) dolet, a scriptoribus nihil hactenus distinctum, exquisitumque traditum esse, quantum attinet ad purgantia in medio febris impetu porrigenda. Ipse igitur ita sibi experimentis edoctus esse videtur, ut pronuntiet, in Capitis Erysipelate, si quando cerebro tentato oborjatur Coma, delirium, nervorum distensio, aut nullam subesse spem, aut purgantia maxime profectura. Procliviter annuerem Freind, si numerosa exempla similis curationis produxisset, non unam tantummodo, quod subjicio, pressius tamen, quam describitur ab auctore. Virgo admodum generosa stirpe orta, prægressa febricula cum levi horrore incæpit tentari Erysipelate faciei. Proximo die febris invaluit; nec facies modo, sed circa aures atque colum cutis cum rubore turgebat; sicque tumor processit, ut die tertio ingentem in molem excreverit rubicundior factus. Sub noctem penitus delira evasit. Omnia die quarto exasperata sunt, eodemque die Freind eam primo invisit horis pomeridianis. Delirium erat cum febre vehemens; non nunquam quasi veternosa jacuit, subinde obortis nervorum distentionibus. Hora tertia pomeridiana præbitum est Catharticum ex decoct. Sen. Gereo. Tinctur. sacr. cum vin. alb. & Syr. de Rhamno cathartic. ; a quo cum nihil dejiceret, circa mediam noctem propinatae sunt unciae duae Tincturæ sacrae. Quinto tamen die, alvo constricta permanente, ad meridiem aliud catharticum exhibitum fuit, non tamen meliore eventu; quod proinde mane primo repe-

(a) In Epist. ad Richardum Mead.

repetitum fuit. Perpauca dejectio secuta est, & parum attulit auxilii. Clyster acer itidem frustra injectus. Die septimo rebus in deterius ruentibus, iteratum fuit catharticum, cujus non exigua pars ex Scammonio constabat. Hinc alvo quinquies subducta ad se se rediit ægra, sed immemor eorum, quæ sex præteritis diebus acta erant. Tumor subsedit; febrisque ita decessit, ut eodem cathartico bis repetito pristinae prorsus sanitati restitueretur. Hoc experimentum adeo potuit apud Freind, ut non dubitaverit affirmare contra timiditatem aliorum, oborto Erysipelate capitis cum enarratis symptomatis, in medio febris impetu vel Scammonio purgandum esse. In hac tamen curatione, pace clari Viri, mihi magis arridet exitus, quam consilium. Ut enim incipiente Erysipelate capitis non dubitarem obire purgationem ad minuendam, retrahendamque materiam a capite; ita vehementer dubitarem vigente morbo, & febre intensa, maxime, si illam vidissem, semel, iterumque frustra fuisse, uti contigit in descripta Virgine; atque aliquam febris remissionem melius ominantem de cathartico expectarem. Scamandro in Larissa, de quo memorat Hippocrates^(a), facta est coxa in sphacelum corrupta. Cœpit convelli die duodecimo post sectionem. Infusus est clyster, exiitque parum veteris stercoreis; deinde pharmacum biliosum bibit, & superbibit, & exiit quidem; nihil autem a potione juvatus est. Iterum bibit pharmacum valde biliosum, & vespere occidente mortuus est. Multa, inquit Vallesius in consideratione hujus historiæ, Medicus peccavit, primum quod convulsionem ex vulnere factam pharmaco forti curare tentavit, deinde quod cum tentasset, & nihil proficeret, nescivit a purgatione desistere.

Y 2

Res

(a) Lib. 5. Epid.

Res aliter cecidit Freind, qui pariter minime deterritus a purgante intra tres dies quater incassum tentato, quinto prospere usus est. An igitur hæc curatio debet ire in exemplum tanquam fulcimentum similis morbi curandi? An in medio Erysipelatis impetu cum intensa febre fortis expurgatio peragenda erit? Mihi videtur, ex narratis valde dubitandum esse de simili medicatione exequenda. Ex quatuor vicibus, quibus præstitum est purgans, tantummodo una vice perpauca dejecta sunt, & cum exiguo levamine: quod apertissime arguit, materiam non fuisse expeditam ad excretionem, undecunque id fluxerit impedimentum, sive ex contractione fibrarum obsistentium irritationi cathartici indicata a motibus convulsivis, sive ex ipsa materia nondum reddita separabili, sive aliunde. Cum igitur Medicus debeat quam maxime cavere propinationem cathartici in irritum cessuri, & damnose, qua mente poterit imitari Freind quater deceptum in ejusdem usurpatione? At enim quinta vice septimo die prospere exhibitum fuit. Esto. Casus protexit anceps experimentum, effecitque, ut bene verteret, de cujus exitu valde ambigendum erat. Quid ergo? An non consultius fuisset, evitare occasionem toties incassum iterandi cathartici, quam incur-rere? quam puto evitatam fuisse, si alia ratione curatum foret Erysipelas, plusque datum providentiæ naturæ, quam medicamentis. Quamquam enim illud caput invadens aliquando lethale est, sæpius tamen vel sine ingenti opera curatur: existimoque, die septimo, quo præstitum fuit Virgini pharmacum, in melius omnia intrinsecus præparata fuisse; quandoquidem die sexto mitescere jam calor visus erat. Dies septimus morbi peracuti, qualis fuit illud Erysipelas, terminus est, in quo propterea vel imminet mors, vel adest præparatio ad propinquam salutem.

Hæc

Hæc Tironibus, quibus scribo, ob oculos posui, admonitos volens, utilia quidem esse experimenta in re medica, sed æqualiter damnosa, nisi ad veram rationem diligenter referantur; sine qua, uti loquar cum Fernelio, tot experimentorum undis, & procellis demergimur.

Postremo, quantum attinet ad id, unde aliquantum digressus sum, observandum est, perniciosam esse tractionem ab externis ad interna, quæ tracta intus relinquit, non evacuat; itemque eorum, quæ apte per alvum non expurgantur, cujusmodi sunt succi in variolas erupturi; vel a natura superante morbum ex intimo corpore truduntur ad extimum, uti contingit in morbo regio salutari, de quo scripsit Hippocrates^(a). In febribus biliosis ante septimum diem morbus regius cum rigore accedens solvit. Excitatur rigor ab humore bilioso a partibus internis, quas occupans febrem producebat, ad cutem commoto, & hac commotione moliente salutem, nullo propterea purgante, aut debilitanda, aut interrumpenda.

C A P U T IX.

*De impedimentis infernæ purgationis acceptis
a morbis, & symptomatis.*

EX doctrina, & ordine Priscorum primum inquirō impedimenta profecta a morbis similaribus, sive intemperiebus copulatis cum aliis morbis purgationem exigentibus. Calidam siccamque intemperiem credit Sanctacrux, adversari propinationi cathartici, quod nempe calidum, siccumque similes qualitates auget, & præterea detractione humoris: quod tamen placitam sine limitatione prolarum
aper-

(a) Lib. 4. Acut.

aperte convincitur. Namque febres a pluribus intemperies calidæ siccæque creduntur; & tamen in multis præfente indicatione purgationis, hæc celebratur, eligunturque ad purgandum minus calida & sicca, & deinde occurritur augmento caliditatis, & siccitatis impendenti a purgante, adjiciendo haustum feri lactis caprilli, vel decoctionis refrigerantis, & humectantis. Quid quod inflammationes internæ non solum sua, sed etiam febris acutæ inseparabilis comitis caliditate resiccant? & tamen Hippocrates in Pleuritide dolore descendente, aliisque pluribus inflammationibus, uti vidimus cum Prospero Martiano, purgationem injungit. Profecto in hectica solitaria, quæ creditur ab Antiquis intemperies calida & sicca sine materia, ex confesso reprobatur purgatio ob consequentem corporis extenuationem; non tamen reprobatur, si cum ea copuletur febris putrida, vel alia affectio id auxilium flagitans; uti videre est in praxi clarissimorum auctorum in ea copulatione ad mitiora purgantia confugientium. Eadem purgantium electione utendum est, in certarum partium extenuatione, earum scilicet, quæ circa umbilicum sunt, infraque, uti monemur ab Hippocrate^(a): & admonitionis ratio est, quod earum partium gracilitas arguit debilitatem earundem; quæ proinde nequeunt innoxie ferre vim fortis pharmaci, possunt tamen remissioris; quo usus est Hippocrates obortis torminibus in tabido, quem, nil proficientibus clysteribus, lacte asinino cocto purgavit.

Præter extenuationem partium in ventre inferiore, alii ejusdem morbi difficilem reddunt expurgationem, aut omnino vetant, cujusmodi sunt inflammationes ventriculi, atque intestinorum. Vulgatum tritumque est, non esse

(a) Sect. 2. Apho. 35.

non per
gandum
phlegmonem
venarum

esse ducendos humores ad partem affectam, si nequeunt per eandem commode amandari: itemque manifestum est, phlegmonem patiente ventriculo, aut intestinis, non posse sine noxa educi, quod eo trahit expurgans. Inflammatae partes nequeunt se se perfecte contrahere ad expulsionem excrementorum, & sine dolore notabili; acciditque, ut commota, & retenta excrementa morbum augeant. Sicut igitur inflammatis renibus, aut vesica, absurdum est propinare, quæ cient urinam, auctura fluxum humorum ad locum inflammatum; pariter non minus incongruum est, porrigere purgantia in phlegmone ventriculi, atque intestinorum. Avicenna, Tamarindorum decoctum, aut Cassiam sero lactis dissolutam præbet, nec ullum inde veretur detrimentum, ob eorum medicaminum facultatem, quæ laxando, & molliendo vacuat, non attrahendo. Mihi tamen tutius videtur consilium Galeni^(a), qui per initia earum inflammationum in totum purgantibus abstinet, & solum mitissima porrigit, ubi phlegmone prorsus inclinaverit; cum præsertim repetiti clysteres gerere possint vicem debilis purgantis absque ejusdem incommodo. Non solum autem præsentem phlegmonem in viis purgationis, proxime obnoxiiis viribus pharmaci, sed etiam in partibus vicinis, hepate, mesenterio, aliisque cavendum est a purgatorio, maxime affectionis principio, quo ad contrarias partes concitanda est materia, non ad vexatas, nec cruda agitanda, ut est celeberrimum Senis decretum; quod Galenus^(b) specialiter interpretatur, & accommodat ad internas inflammationes.

Ab inflammationibus internis ventris inferioris transeo ad alios affectus ejusdem partis interponentes purgationis offendicula; inter quas primum occurrunt vulnera, quibus

[a] *Lib. 13. Meth. cap. 10.* [b] *Lib. 8. de Medic. secun. locos cap. 7.*

bus ob eandem rationem noxia sunt deicientia saltem per initia, qua nocent inflammationibus; nimirum convocando humores ad partem, unde avertendi sunt; idque observationes chirurgicæ confirmant. Fateor, in Dyfenteria humorem mordentem ulcerantemque per alvum medicamentis expurgari, sic clarissimis viris adprobantibus, Vallesio, Fernelio, aliisque. Ut enim ait Fernelius, quod per anfractus parum idoneos sensim educebatur, per convenientiores affatim ope pharmaci educitur, nec hæret in parte, in quam ducitur, sed præterlabitur, nec præterlabens offendit, si commoda qualitas medicamento assumatur. Tollit igitur in Dyfenteria purgans causam ulcerationis, atque ad partem ulceratam allicit, quod ad eandem sponte, sed graviore offensa lapsurum erat. In vulneribus vero extrinsecus inflictis egregie dissimilis est ratio, quorum causa non est humor abducendus per dejectionem, utilem in dyfenteria ad evacuandum ulcerantem humorem.

Intestinorum obstructio a pituita crassa, & tenaci, aut fecibus induratis retardat purgantis administrationem, ne undequaque attracti pravi humores ad ventrem, ibidemque retenti novas excitent turbas, priore incommodo non ablato. Prius igitur incidenda, attenuandaque crassa sunt, atque viscosa, indurataque mollienda, pariterque clysteribus munienda via, postea purgandum. Sed hæc præclara, extraque controversiam. Pensitemus, an obstructiones viscerum, hepatis, lienis, mesenterii, & aliorum ejusdem regionis inhi-beant pharmaci administrationem: & inde quidem inhiberi fortia purgatoria, existimo, si purgamina deicientia fusa sint per venas. Corpora cum quis purgare voluerit, inquit Hippocrates, fluida facere oportet; & fluida facimus attenuando succos, expediendo

vias,

vias, ut medicamentum se se festinanter quoquo versum effundat, agitataque excrementa ad alvum traducat. Obstructionibus igitur impredientibus velocem transitum medicaminis, humorumque ad alvum, boni successus purgantium sperari nequeunt, & præsertim in oppilatione jecoris; ex quo via patet ad intestina, & probabile est, etiam illac commotas quisquillas depelli. Recte igitur hisce obstructis visceribus lenia solum purgantia, quæque tantum ex vicinis partibus excrementa proliciunt, sine irritatione læsarum, exhibentur. Video insuper peculiari respectu ab Hippocrate^(a) vetitum usum purgantium in lienosis, hoc est, lienem induratum diu patientibus; idemque præceptum confirmatum a Medicis antiquis, celebratis a Celso, Galeno, Aetio, Plinio, qui universam curationem dari lienis diureticis perficiebant, extenuantibus, & emollientibus, præviis, ut opinor, experimentis id suadentibus. Namque Martianus in Com. affirmat, se communi consuetudine impulsus laborantibus pluribus inveterato lienis tumore validiorem purgationem adhibuisse, neminem tamen esse adjutum. Alias circumspecte partes inferioris ventris, aliaque purgationis obstacula reperies. Uteri prolapsus curans Hippocrates^(b) vetat alvi solutionem, & habetur pro certo, sola præsentis indicationis uteri in suam sedem restituendi, alvum non esse solvendam. Controversum tamen est, utrum conjuncta indicatione restituendi uteri cum altera expurgandi per inferiora, huic danda sit opera. Sanctæcrux nimium hac in re parcus, nulla facta distinctione, inter impedimenta purgationis uterum prolapsus enumerat. Contra Hieronymus Mercurialis, urgente indicatione purgationis infernæ validam quoque suadet, peractamque pilulis de Colocynthide, A-

Z

gari-

(a) *Lib. 4. de Vic. rat. agna.* (b) *Lib. 2. de mor. Mulie. num. 38.*

garicoque ; atque interpretatur , Hippocratem eamdem ventuiffe , ubi adest sola indicatio uteri reducendi . Antequam vero inter has opiniones dijudicem , adnoto , raro uterum vere procidere , & solummodo , uti placet Fernelio , ex vehementiore pariendi conatu , quo uterus foetum , secundasque excludens impetu consequitur , seque invertens praecipitat . Plerumque igitur uteri prolapsus , uti vulgo appellatur , nihil est aliud , quam rugosæ , internæque uteri vaginæ extensio , laxatis rugis , vel alio humore repletis ; quæ propterea non adversatur inferæ purgationi , imo hanc petit ad evacuandum superfusum humorem , nisi adest opportunitas movendæ superioris purgationis , vel alio modo tollendi superflui . In utero vero prociduo ex vehementi partu declinanda purgantia deorsum sunt , neque præbenda , nisi magna humorum copia appareret , alii vacuationi minime idonea , sed eligenda mitia purgantia ; quæ prospere cesserunt Fabricio Hildano^(a) curanti prolapsum uterum occasione partus , & imperitæ obstetricis . Fortius uteri prolapsione purgationi opponitur intestinorum descensus in scrotum , vel inguina , ne repleta flatibus , vel excrementis , tumorem partium , in quas delapsa sunt , adaugeant , inflammationem , mortemque accersant . Ut enim cum Celso^(b) loquar , purgans aliquid ducere in scrotum potest , educere ex eo non potest . Similiter exitu intestini recti difficillimam reddi purgationem , in aperto est , vexando partem affectam , egressumque urgendo .

Ad ventrem inferiorem quoque attinent morbi in viis urinæ , quorum aliqui purgantia saltem calida & acria recusant . Hisce ulceratis , aut ardorem patientibus , si præbeas calida & acria , vides inde morbum nova irri-

ta-

(a) *Centur. 4. Observat. 60.* (b) *Lib. 7. cap. 10.*

tatione auctum iri, nec ullum commodum vacuatione expectari posse, quod superet timendam noxam. Quamvis enim alvum moventia huc perducunt, derivantque ad meatus urinæ labentia, tamen non totum derivant, sed pars aliqua succorum, & ipsius purgantis ad partem afflictam permeat; uti declaratur ex colore urinæ post certa purgantia assumpta.

Inquirente Sanctacruce, utrum morsus canis rabidi sinat, nec ne expurgari, de hoc quoque Tironibus meam expono cum Dioscoride sententiam, promerito gravissimorum auctorum assensum, Pauli, Aetii, Actuarii, aliorumque, qui pro curatione demorfi a cane rabido, postquam omnia obita sunt circa partem demorsam, ad extrahendum, compescendumque venenum purgationem imperat: tantum abest, a morfu impediri, si ab alio associato morbo flagitatur.

Symptoma, nec indicare curationem, nec immutare, pervulgatum est apud veteris doctrinæ studiosos, nisi vim causæ adipiscitur, aut morbum augentis, aut vires atterentis. Propositis igitur impedimentis purgationis objectis a causa morborum, ipsisque morbis, ut summa capita complectar, reliquum est, ut pensitem, quæ ab symptomatis impendent, omissis pertinentibus ad significationem symptomatis, quæ intempestive Sanctacrucem morata sunt, ut pote ad hunc locum minime spectantia. Sufficit, revocare in memoriam Tironibus, tria esse symptomata in Scholis vulgata, actionis offensam, mutationem excretorum, vel retentorum, & qualitatem mutatam, atque ex hisce tribus duo tantum, nimirum actionem læsam, excretaque, vel retenta alterata posse ita increlescere, ut vel morbum deteriorem reddant, aut vires delumbent, invertantque curationis ordinem. Nam-

que aliud genus symptomatum in qualitate mutata, cuiusmodi est mutatio coloris, eo pervenire non solet, ut in causam morbosam evadat. Hippocrates non uno in loco varia enumerat symptomata reluctantia purgationi, quorum præcipua ponderabo, initio facto a delirio, in quo Cous^(a) purgationem interdicit cum valida febre conjuncto, non in aliis, quibus Anticyra nutrit validissimum purgans. Itaque si delirus, & vehementer febricitans agitur, vigilet, renuat cibum assumere, habes, cur delirium purgationem prohibeat, scilicet inde viribus detritis. Has vero non labefactans delirium, solum ut signum purgationem interdicare potest, si putemus, indicare magnamurbationem humorum, majoremque futuram a præstito purgante; vel cum Veteribus opinemur, a simplici calida siccaque intemperie progenerari. Delirium enim per se non prohibet expurgans; & Avicenna, aliique gravissimi Auctores in Phrenitide a copia bilis revellentem in principio purgationem instituunt. Quin etiam in delirio superveniente febribus acutis nonnulli mitia purgantia ex intervallis propinant, ut vacuent materiam biliosam, persuasum, leni purgatione coctionem interturbatum non iri. Mihi multo tutius videtur negotium repetitis clysteribus transigere, operamque præcipuam impendere morbo principali, nimirum febre delirationis effectrici. Etenim sermo est de delirio genito in acutis febribus per consensum totius corporis, in quibus solum facta concoctione rite peragitur purgatio, nihil ipsa natura moliente. Sequitur id delirium vices febris, nec aliam ab ipsa febre curationem requirit, nisi vires prosterneat, aut pertinacibus vigiliis, aut vehementibus motionibus; quibus non alia ratione melius subvenitur, quam alliciendo somnum. Adde in delirantibus

(a) Lib. 1. Prædic.

tibus cum febre acuta, uti notat Heredia, in ægritudine uxoris Dealcis ab Hippocrate in Epid. descripta, sensum adeo obtusum esse propter imaginationem variis spectris affixam, ut sæpe magnos dolores non sentiant, minus proinde sensuri irritamentum levium purgantium, reddito non solum inutili, sed etiam noxio tentamine per eadem facto. Quod si in deliro appareat oculus ferox, claususque, in medio positum est, abstinendum esse purgantibus, indicante clausi oculi ferocia convulsionem ab siccitate omnem vacuationem respuente: abs qua multo magis cavebis, si delirus cibum aversetur, & recuset accipere: cujus abstinencia, non solum in mente motis, sed in omnibus ægrotantibus purgationis impedimentum esse potest, si longioris temporis est.

Nigra vomentes, ait Hippocrates, purgandi non sunt, videlicet infera purgatione, quam semper intelligit Autor, simpliciter nominans purgationem. Vomitus nigri succi, sive atræ bilis alibi perniciosus a Sene pronuntiatur tanquam indicium pravi humoris tam copiose in corpore congesti, uti vomitum instiget; tametsi bonum est, acervatum expelli. Unde sequitur, hanc expulsionem interturbandam non esse dejiciente, quod ferocem humorem agitarret, ab inchoata via deflecteret, neque secundum indigentiam evacuet, quippe difficulter medicamento cedentem.

Duo inter alia symptomata Senex constituit, purgationi repugnare, quæ summo ad expendendum, dejectionem crudorum, vehementemque dolorem. Duo sunt affectus, in quibus cruda dejiciuntur, alter Lienteria vocatus, alter Cæliaca affectio, sola magnitudine, sive ratione majoris, & minoris differentes, si spectentur excreta; quæ, si omnino cruda sint, & immutata Lienteriam creant, relatam

*pro Lienteria
et alia*

ad actionem abolitam ; si tantum imperfecte cocta, Cæliacam affectionem pariunt affectum imminutæ actionis. Hæ tamen affectiones ratione partis affectæ, & causæ aliquando notabiliter differunt, diversamque medicationem exigunt. Existimant enim multi, Lienteriæ effectricem esse imbecillitatem ventriculi, qui nequit retinere ingesta alimenta, donec coquantur, sed finit elabi immutata. Hæc eadem imbecillitas, si minor est, neque tam cito permittit exitum ingestorum, parere Cæliacam affectionem apta est, neque penitus cruda, neque probe cocta dimittendo alimenta. Enim vero ejusdem affectionis diversam causam non pauci assignant, nimirum tenacem materiam adhærentem intestinis circum ostia vasorum lacteorum, ingressumque chyli impredientem : ex qua procul dubio generatur affectus cruditatis ratione quadantenus similis lienterię, sed dissimilis ob partem affectam, causamque effectricem. Quid igitur erit determinandum in hisce affectionibus, in quibus cruda egeruntur, de purgatione ? Quorum alvi, inquit Hippocr.^(a), intestinorum lævitate laborant, hos hyeme per superna purgare malum. Ex qua sententia plures curationem Lienterię a purgantibus per inferiora auspiciantur ; atque Riverius præbet medicamentum compositum ex Aloe, Rheobarbaro, & Mirobalanis. Alii contra cum Alexandro Massaria a patientibus Lienteriam, vel Cæliacam passionem omne genus purgantium arcent. Verum nisi discernitur causa, quidquid univèrse deliberetur, univèrse verum esse nequit. Genitus affectus, in quo cruda excernuntur, si pender a laxitate, & emollitione fibrarum ventriculi sine materia in cavitate contenta, quam Prisci vocabant imbecillitatem facultatis retentricis, videtur satis aperte petere constrin-

gen-

(a) *Sec. 4. Apho. 12.*

gentia, & roborantia, rejicere purgantia illis opposita. Eodem tamen affectu orto ex materia pituitosa, uti plures autumant, implente, & obducente rugas ventriculi, sicque inhibente amplexum, & retentionem ingestorum, frustra tentabitur medela, nisi vomitione, aut dejectione causa auferatur. Item materia tenax adhærens intestinis, obstruensque ostia vasorum lacteorum prius incidenda attenuandaque, postea paulatim expurganda est. Interdum etiam largior crudorum egestio contingit, non proprio vitio ventriculi, aut intestinorum, sed humore a toto corpore ad eas partes traducto; quem tantum abest obstare purgationi, ut hanc sæpe eo respectu poscat, quo docuit Hippocrates, vomitum vomitu solvi. Nimirum identidem expedit, humorem unico die evacuari, qui paulatim, & longo tempore fluens magis partes debilitat, & animalem Æconomiam perturbat; idque multo magis expediret, si humor malignus pareret Diarrhœam alios humores corrumpendo, ut animadvertit Heredia^(a) in Historia Apollonii, qui post decimum quartum diem incæpit egerere excrementa prævæ conditionis, quasi haberet intus venenum omnia corrumpens. Hac occasione decernit, alvi fluxionibus in febribus acutis factis nullum esse præstantius auxilium purgatione festine succum corruptorem auferente, dummodo eligatur catharticum, quod pariter vim habeat roborandi.

Alterum Symptoma positum ab Hippocrate inter purgationis offendicula est dolor vehemens, antequam mitigari incipiat, idque monitum pluries inculcatum ab Hippocrate, maxime commendat Prosper Martianus,^(b) doletque, cum magna Ægrotorum calamitate a pluribus non observari. Enim vero Vallesius citatum textum non
Hip-

(a) *Lib. 3. Epid.*

(b) *Lib. 4. Acut.*

Hippocrati, sed alteri minus exacto auctori attribuit: quod licet concederem, excipiendum nihilominus puto consilium de omittenda purgatione in vehementia doloris ante aliquam mitigationem. Profecto Hippocrates purgationem suadet in dolore pleuritico descendente; atque in aphorismis ^(a) ait, dolores, supra septum transversum, qui purgatione egent, curandos esse superna vacuatione, infra vero inferiore: quæ tamen præcepta non pugnant cum altero vetante expurgationem, antequam dolor aliquantum minuatur. In quocunque cruciatu excitato a materia purgationi expolita, ea procul dubio executioni mandanda est, sed ea animadversione adhibita, ut in vehementi prius studeamus vehementiam temperare, in minus intenso statim purgemus, si cetera consentiant. Non inaniter timet Martianus, ne propter doloris vehementiam commoti a purgante humores, nec depulsi in locum afflictum confluant, huc convocati a doloris acerbitate cum periculo inflammationis; cujus arcendæ gratia solet sanguis effundi. Omnes dolores, vel intentione superat Colicus, vel omnibus æqualis est; in cujus curatione Galenus ^(b) executus jussum Hippocratis non ausus est cogitare de purgatione, donec mitigatio opportunitatem tulerit; idemque alii plures in eadem affectione observant, prius anodynis, quam purgantibus utentes. Scio esse peculiarem rationem de colico, quippe affligente partem, ad quam agitati humores decurrunt. Ceterum etiam in aliis partibus dire vexatis eandem methodum adhibendam cenfeo, priusque levamentum pœnarum querendum, quam tentandam per pharmacum dejectionem: vidique nuper in fœmina vehementer dolente ab oculo puncto Aloes aculeo, plus valuisse granum unum Laudani repen-

(a) *Sec. 4. Apho. 18.*(b) *Lib. 12. Meth. cap. 7.*

repentes ad leniendum dolorem, quam sanguinis missionem, & purgationem. Itaque sæpe in vehementissimis doloribus statim ad soporifera confugi, & postea de aliis remediis cogitavi. Fœmina sexaginta quinque circiter annorum. torquebatur dolore femorum, tergi, & brachiorum, ut neque in lecto se se movere, nec surgere posset, vitamque, ut sibi videbatur, diem unum protrahere. Exhibui statim uncias tres aquæ flor. Papav. Rheados cum gut. octo Laudani liquidi, tanta utilitate, ut circa mediam noctem se se cum indolentia moverit, e lecto surrexerit ad corpus exonerandum, nec aliis remediis indiguerit. Attamen res non semper tam prospere cadit, nec in omni magno dolore mulcimentum aliquod ab soporiferis petendum est, ut in dolore lateris, quem Hippocrates prius fomentis lenire studuit. Pariter sunt quædam remedia, quæ indicata ad tollendam causam ingentis doloris, non requirunt, ut præcedat lenimen, sicuti est venæ sectio, de qua propterea non est locutus Hippocrates, sed tantum de purgatione. Quid plura adjiciam ad comprobandam Senis deliberationem? Fatentur omnes, interdum esse negligendam causæ demolitionem, ut attenti simus symptomati: quod si in alicuius symptomatis vehementia observandum est, certe in acerbissimo dolore, valde vires prosterrente cum syncopes periculo.

C A P U T X.

De Vomitu, ejusque indicante.

Multum habet diversi purgatio superior ab inferiore propter viarum diversitatem, motusque diversos partium irritatarum opera purgantis: eoque & ordinis per-

spicuitati, & majori Tironum commodo studens, separatim de utriusque indicantibus, & impredientibus tractandum judicavi. Quæ antequam expono, quæstionem dirimam, an vomitus sit excretio naturalis; quam agitans Vallesius, postquam multa collegit Galeni^(a) dicta utrique parti faventia, concludit neutram evinci posse. Hic, me judice, quæstionis exitus est. Si nomine naturalis excretionis intelligitur, quæ necessario fit, atque pro instituto naturæ, hoc respectu vomitum naturalem non esse, inde liquet, quod aliqui toto vitæ curriculo nunquam vomunt, plures rarissime. Hac præterea ratione naturalis non est, quod instigatur stimulo præter naturam, nimirum vel a medicamento, vel pravo aliquo cibo, aut nimii corruptione, aut alius vitiosi succi in ventriculum illapsi irritamento; fitque insuper cum aliqua semper molestia, modo graviore, modo leviori. Demum vomitum naturalem non dices, si consideres motum ventriculi vomentis, quo ejus fundus contrahitur orificium sinistrum versus, opponi ejusdem naturali motui, quo pylorum versus contrahitur chylo confecto. Est tamen vomitio in eo sensu naturalis, quod natura habet instrumenta illius efficiendæ, scilicet fibras carneas, viasque apertas; nec inde ullus sequitur morbus, nisi sit admodum vehemens, quinimmo, sive sponte, sive arte tempestive mota sæpe plura in nos commoda redundant.

Vomitum alius spontaneus est, alius petitus, qui nihil est aliud, nisi humorum qualitate peccantium sursum facta excretio per conatum, & impetum ventriculi irritati a medicamento vomitorio. Enim vero Franciscus Bayle de facultate nutritiva censet, a ventriculo vomente nullum edi conatum, vomitumque cieri ope musculorum abdominis,

(a) Lib. 5. contro. cap. 1.

nis , & constrictionis diaphragmatis . Ecce quemadmodum id probet . Si cani detur sublimatum corrosivum cum cibo , statim atque veneno pungitur ventriculus , ingestus cibus vomitione rejicitur . Quo tempore si aperiat abdomen , cessat vomitus , mox rediturus , si partes abdominis sejunctæ consuantur . Veruntamen id experimentum evincit , in vomitu esse necessariam actionem , & compressionem musculorum abdominis , non tamen nullum esse conatum in ventriculo vomente ; a quo scilicet sursum acto ipsi muscoli abdominis irritati ejus motum adjuvant , & secuntur . Cum enim sublimatum proxime non mordeat , & pungat musculos abdominis , sed ipsum ventriculum , extra dubitationem est , induci eum motum in musculos a ventriculo laceffito . Quo tamen pacto communicabitur hæc irritatio musculis nisi per motum fundi ventriculi ad superiora ? At enim aperto abdomine desinit vomitio , iterum clauso revertitur . Esto . Quid inde sequitur ? Nil aliud fane , nisi solum ventriculum , neque musculis abdominis contactum , & adjutum in vomitum non adduci . Ex quo vides , non probari ventriculum vomentem in statu naturali omni conatu carere , nisi de nomine litigetur . Interdum per spuitionem redundantem humorem , vel ob immoderatum potum , vel aliam causam ventriculus excernit , uti observavit Fernelius , & sæpe unicuique observare licet : quæ tamen excretio differt a vomitu , ut pote facta sine conatu , motuque ventriculi ad superiora . Vomitus spontaneus est , qui sine ullius medicaminis ope provocatur , fitque eodem ventriculi motu ; totumque discrimen inter spontaneum vomitum , & arte factum est , quod alter sine medicamento fit , alter medicamento , cujus potissima qualitas scrutanda est . Nonnunquam vomitionem cient etiam deicientia acquisita ex ac-

motu
per
non

Spui
dum
ca
abj

cidenti hac virtute : cujus acquirendæ causæ multiplices sunt , variæque , nimirum imbecillus ventriculus , vel pharmaci averfatione agitatus , vel succorum copia laceffitus , vel commotæ colluvionis egressus a duriore fecce præpeditus , vel portio purgantis arctius adhærens , & insuperabilis ventriculo . Quia tamen hæc vomitionis incitamenta extrinseca sunt , & fortuita , non attinent ad medicamentum vomitorium ; cujus vis intrinseca est , neque pendet ab externis . Hanc vim intrinsecam instigandi vomitus Antiqui non pauci referunt ad specificam , occultamque qualitatem humores sursum agendi , & istam ad similitudinem , familiaritatemque inter particulas medicinæ , humorisque ejiciendi , qualem etiam purgantibus inferne affixerunt . Utraque vero iisdem difficultatibus exponitur , imo fortioribus vis vomitoria , qua vehemente impetu jactatus ventriculus , quam deiciente obvium quemque humorem , expeditioremque , non particularem propulsat . Quis credat , in vehementi vomitionis nisu , paratos succos , quia dissimiles vomitorio retineri , alios affimiles proturbari ? Itaque nulla potest esse ratio probabilis deligendi potius hoc , quam aliud vomitorium , præter benigniorem naturam , majorem , vel minorem efficaciam ; debiliorem requirentibus succis tenuibus , nec a remotis partibus proliciendis , sed in ventriculo conclusis ; validiorem crassioribus succis , trahendisque ab aliis præter ventriculum partibus . In quo ergo consistit facultas vomitorii , & quare potius vomitum , quam alvum movet ? Vis pungens irritansque haud dubie incitatrix est vomitionis ; uti similis causa est dejectionis ; sed dejiciens a ventriculo cito delapsum ad intestina ibidem impetum facit , pellitque commota ad alvum . Diutius igitur remanens in ventriculo vomitorium , cum subigi

ne-

nequeat, usque adeo extimulat fibras, donec cum aliis contentis, tanquam quid exoticum, & invincibile extrudatur. Hinc evenit, ut quædam vomitoria per secessum purgent, si cito a pondere deorsum traducantur, cujusmodi est pilula perpetua ex regulo antimonii, quæ suo pondere cito decurrens ad intestina copiose movet alvum, non vomitum. Porro inter partes ventriculi a vomitorio magis instinctas opinari licet, orificium sinistrum esse valde exquisiti sensus, instigationique magis obnoxium; quod primum imminentem vomitum persentit; recteque Lemerius facultatem Antimonii ad vomitionem tribuit parti sulphureæ sal acidum orificium sinistrum versus extollenti. Credo enim, pharmaco vomitorio quiddam peculiare inesse ejus actionem dirigens ad os ventriculi, sicuti Cantharidibus inest ad vesicam; quæ vel remotis partibus admotæ suos aculeos in eam jaciunt. Idem autem affirmat Dioscorides, accidere a veratro albo, quod vel plantis pedum, aut ventri appositum, aut inditum ano in formam suppositorii irritamentum vomitorium ad stomachum transmittit. Illud porro interest inter vomitorium, & dejectorium, quod tametsi utrumque partes vellicet, pungatque, magis vomitorium irritatione, quam solutione, & fermentatione succorum opus suum absolvit, dejiciens magis dissolvit, fermentatque. Hæc locus exigebat, ut præfarer de qualitate vomitorii, cujus historiam, operandique modum perinde describit Vvillisius, ac si omnia exquisitissimo microscopio vidisset, aut naturæ operibus præsideret.

Indicans supernæ vacuationis idem est, atque infernæ, & utraque in eisdem fines celebratur, videlicet ad expellendos succos qualitate peccantes, in eo significato sumpta qualitate, quo exposita superius est agendo de alvi solutione.

*Willis
Spec
quar
vom*

*Pa
ar
vi*

*D. J.
vom
pur*

*Willis
ceny*

tione. Profecto utilis est etiam vomitus ad deplendum
 ventriculum nimia quantitate ciborum pressum, sed iste
 finis primarius artis non est, ideoque minime in ejus de-
 finitione inclusus. Utraque purgatio generalis est: &
 quamvis vomitio maxime faciat ad educendam illuviem
 ventriculi, deinde partium conterminarum, evellendam-
 que materiam ipsis membranis adhærentem; tamen totum
 corpus evacuare potest, & superfluitatem late vasa occu-
 pantem. Quinimmo Martianus cum Hippocrate sentit,
 aptiorem viam ad totum corpus expurgandum esse ven-
 triculum, qui, ut ait Hippocrates^(a) omnibus partibus dat,
 & ab omnibus accipit. Multiplex pariter remedium est
 vomitus, uti dejectio, evacuans, revellens, derivans-
 que. Sursum adaëtis per eum humoribus, partes inferio-
 res exercentibus, conditionem habet revellentis, conside-
 rataque partium propinquitate, in quibus stagnant, deri-
 vantis. Quamquam autem utriusque vacuationis superæ,
 & inferæ indicans est humor vitiosus inhabilis nutritioni,
 & correctioni, modo tamen vomitionem, modo dejectio-
 nem molimur, suasi ex quibusdam proprietatibus, &
 accidentibus viam vacuationis commodiorem designanti-
 bus. Alii succi facilius per superiora amandantur, eo
 fluere sua levitate parati, qualis biliosus est, jussu Hip-
 pocratis^(b), per os expurgandus. Alii procliviores sunt ad
 inferiora, adjuvante gravitate descensum, & talem cen-
 suit idem auctor^(c) succum melancholicum, ex ejus præce-
 pto per alvum evacuandum. Ut igitur vomitum deliberes
 ex qualitate humoris, respicias oportet ad notas multipli-
 ces, quibus docearis, eundem prompte ad superiora ac-
 cursurum esse, & præcipue respicias ad corporis habitum,
 an-

(a) *Lib. 1. de Dieta.*(b) *Sect. 4. Apho. 6.*(c) *Sect. 4. Aphor. 9.*

annique tempus. Graciles apti sunt ad vomitum ob affluentiam humoris biliosi, dummodo sint natura graciles, non ex morbo, quibus, uti monet Celsus^(a), vomitus inutilis est; & insuper gracilitati conjuncta sit vaforum amplitudo, hac conjunctione testante bilis redundantiam, & proclivitatem ad superiorem vacuationem. Ob eandem rationem Celsus æstate vomitionem commendat, nimirum hac tempestate congerente bilis copiam ad eum exitum propensam. At enim hyberno tempore idem auctor ad depurgandam pituitam utitur vomitorio, non dejiciente, neque timet crassitudinem humoris, neque tempus oppositum æstivo, quo vomitionem suadet. Ita quidem; sed inde redargui nequit Senex, quasi foret sui oblitus. Ad vomitionem hortatur calor æstivus indicando ubertatem succi eum conatum facile secuturi; hyemale frigus denotando, pituitam hoc tempore cumulari solitam; quæ licet, utpote crassa per alvum commodius detrudatur, tamen si continetur in solo ventriculo, opportunitate loci melius per os excernitur. Hinc nosces, cur Senex salubrem diætam constituens jubeat vomitionem ad exportandam pituitam, in aphorismis alvi solutionem. Tradens diætam respexit Senex ad pituitam in solo ventriculo acervatam, alio loco ad ejusdem in toto corpore redundantiam. Itaque etsi natura ponderosi humoris in solo ventriculo collecti ad alvum inclinatur, tamen loci commoditas ad rejectionem Hippocrati argumento est ad hanc imperandam. Tandem finis multiplex, ob quem purgatio celebratur, potius vomitum, quam alvum provocandam esse ostendit. Si enim inducto animo evacuari, ablatio simul, & revulsio a partibus inferioribus propositæ sint, profecto revulsionis ratione vomitus concitan-

an
acut

(a) *Lib. I. cap. 3.*

tandus est ceteris consentientibus ; idemque concitandus ex occasione moliendi derivantem vacuationem humorum partes superiores afflictorum : in quarum morbis Senex semper ad vomitionem confugit.

C A P U T XI.

*Utrum vomitio, an dejectio sit præstantior
evacuatio.*

SI Chrysippum, Erasistratum, Cælium Aurelianum, aliosque Methodicos consulimus, vomitio adeo præstat purgationi per inferiora, ut omnem tollat comparisonem, solaque retinenda sit vomitio, rejecta dejectione tanquam inutili, & damnosa. Attamen Hippocratis, Galenique doctrinæ addicti, & utramque vacuationem admittentes recte inter eas vacuationes comparisonem instituunt, quo clarius utriusque effecta, & utilitates patefiant, rectior usus obtineatur. Commendant multi inferiorem purgationem, præferuntque superiori, tanquam faciliorem, naturæque consuetudini accommodatiorem. Nullum ajunt reperiri, quin pluries in vitæ excursu alvi fluxum spontaneum passus sit, aliquos tamen, qui nunquam, vel rarissime vomuerunt: præterea intestina esse ignobilia ventriculo, imo sentinam totius corporis, pluraque, & ampliora vasa eis interferi, quam ventriculo, eo commotas sordes deductura. Hæ tamen rationes minime perculerunt Fernelium^(a), qui vomitionem omnium purgationum præstantissimam deprædicat, si facilis & moderata obtingat; quippe quæ noxios humores ex ipsis fontibus sinceros elicit, & vacuat, eosque, quos ple-

(a) Lib. 3. Meth. cap. 3.

plerumque nec Hyera, nec aliud vehementissimum deiciens etiam repetitum in alvum detrudere potest. Meo iudicio in hac controversia ita habendum est. Dejectio magis est e natura vomitione, minus molesta, & impetu facta levior: cumque immoderata contingit, solet esse minus periculosa, & jactatione minus incommoda immoderata vomitione. Diverso tamen modo ad diversos morbos se se habet utraque vacuatio. Morbi sede ventriculum occupante, pancreas, & mesenterium, aliasque conterminas partes, vomitorium noxiam materiam cominus adoritur, citiusque expugnat, ejusdem vicina latibula conatu ventriculi fortiter contrahente, inclusaque exprimente. Ad hæc multo imbecilliora sunt subducentia, ut mirum non sit, tot morbos sæpius iteratis deicientibus invictos unica vomitione subactos fuisse: asseveratque Galenus^(a), in tertianis nothis inveteratis præsentaneum remedium vomitum esse; multosque novisse, quibus ea febris inveteraverat, statim post vomitiones liberatos: cujus eventus causam habent in promptu, qui cum Fernelio earum febrium fomitem in designatis locis collocant. Ergo circa viscera imi ventris vis vomitorii potissimum occupatur, hisque expurgandis præcellit. Neque tamen inficias ivero, etiam remotiores partes, universumque corpus eodem adminiculo vacuari; quod, uti vidimus, Prosper Martianus fultus doctrina Hippocratis judicat præstantius ad totum corpus depurgandum alvi solutione. Quo Martiano concessio, excipiendi tamen sunt quidam morbi, & in primis febres putridæ continuæ, in quibus humor effector febris immixtus est sanguini, soletque salutari naturæ impulsu per sedem, non os amandari. Cum igitur natura victrix proculdubio congruentiore via hostem exterminet,

B b

net,

(a) *Lib. 1. ad Glanc.*

net, eandem & Medicus terat oportet, similem causam ablaturus. Nec sane Galenus ab ea recessit, qui curans febres putridas synochas jubet putrida, & corrupta excerni alvo mota, aut urina, aut sudore, nec unquam vomitum permittit, nisi quando humores ad os ventriculi sponte feruntur; & Avicenna^(a) in eandem sententiam hæc habet: *Et febrem quidem habentis ventrem solvere melius est, quam facere, ut vomat.* Veruntamen plures auctores exteri febrium malignarum curationem inchoant a vomitorio, nec imbecillo: imo ex sententia Prosperi Martiani^(b), videtur vomitorium in febribus anteferendum esse dejicienti, afferentis, ab illo minus inhiberi coctiones, crises, aliasque solutiones morborum, opus suum conficiente irritatione, & concussione ventriculi, non exotica qualitate per sanguinem late fusa, & turbatrice; qua purgans per inferiora imbuitur. Revera, si in principio universali febrium, materia cruda existente, purgandum esset, ob indicatas a Martiano rationes rectius adhiberetur vomitorium, quam dejiciens, contraque in decursu febris, cum materia est concocta, inciditque occasio purgationis, hæc per inferiora peragenda est, non superiora; naturaque hanc viam ostendit subactum humorem febrilem per alvum exturbare consueta: quod observans Hippocrates^(c) ait, concocta purgari oportere per alvum, redundantia per vomitum; imo etiam reprobatur spontaneas concoctorum vomitiones: quo monemur multo magis esse cavendas violenter provocatas. Concocta sunt in potestate naturæ; quæ quando suo jure agit, pellit excrementa ad intestina, tanquam ad publicam corporis sentinam: atque hæc consuetudo naturæ firmo argumento arti est, commodiorem viam concocti expurgandi ventrem esse, nisi ulla per causam ratio

(a) Lib. 1. Fen. 4. Doc. 5. c. 5. (b) Lib. 4. Acnt. (c) Lib. de Humo.

causam
causam
causam

ratio suppeteret . Per vomitum autem natura rarissime fe-
brem solvit : atque ex omnibus ægrotis relatis ab Hippo-
crate^(a) tantum mulier trimestri foetu gravida die 14. post
vomitionem biliosam flavam , & copiosam febre liberata
est , non tamen hac sola vacuatione , sed pariter oborto
sudore . Observabile porro minus est , a natura initam
esse viam insolitam expellendæ materiæ in gravida muliere
consueta , per illud tempus pati rejectiones : quam mate-
riam a natura fuisse subactam , censeo ob expulsionem
factam die decimo quarto , & consecutam salutem . Illud
tamen explicandum remanet circa expositum documen-
tum , quod indubium est , multas febres a bile fieri , &
uti visum est Hippocrati , nullas sine bile ; idemque au-
ctor docet , bilem ob proclivitatem ad superiora , per
eandem extrudendam esse . Cur igitur in tertianis continuis
productis a bile interjecta sanguini hæc per supernam regio-
nem exigenda non erit ? Autumo , Hippocratem univer-
sim præcepisse purgationem bilis per superiora præservatio-
nis gratia : & licet in aliquibus morbis eadem purgatio
conveniat , & utilissima sit , ea tamen in multis occur-
runt , quibus accommodatior infera merito existimatur .
Quare Galenus^(b) in tertianis exquisitis a flava bile accen-
sis vomitione duntaxat utitur , si bilis sponte sursum fer-
tur ; generatimque decernit , eam melius educi per alvum ,
quam per urinam , & sudorem ; observatque præterea ,
bilem in justis tertianis impulsu suo deorsum labi . Ex qui-
bus habes , quomodo circumscribenda sit Hippocratis præ-
ceptio de purgandis gracilibus , & biliosis per superas par-
tes . Vvillisius^(c) quadam peculiari dote Priscis ignota vo-
mitum commendat , quæ sine examine prætereunda non

B b 2 est .

(a) *Lib. 1. § 3. de mor. populi.* (b) *Lib. 1. ad Glauco.*

(c) *Sect. 3. cap. 1. de Vomitu.*

est. Credit, vomitione humoris nervosi superfluitates, aut stagnationes eximi, & inde curari Arthridem, Asthma, Epilepsiam, Maniam, & alios plerosque morbos magnos, herculeosque. Duo igitur continet opinio Vvillisii, & morbos illos magnos curari, & iccirco curari, quia vomitus elicit superflua humoris nervosi, aut stagnantia. Quod attinet ad morbos herculeos enumeratos vomitu curabiles, nemo ignorat, quam difficulter subigantur etiam repetitis vomitoriis: de quo extra locum est disputare. Utrum vero curati subactique attribuendi sint vomitionis operæ descriptæ a Vvillisio, affirmare non ausim, animadvertens, incertum admodum esse, an per nervos fluat succus ille spiritibus animalibus crassior ab Anglis excogitatus, non probatus; neque posse certo statui, cujus excrementi depulsione sanitas contigerit, quæque germana morbi causa fuerit. Illud interim extra dubitationem positum est, plures morbos ab impuritatibus foveri inhærentibus visceribus imæ cavitatis, quibus vomitorio extrusis, natura, quod reliquum est, perficit. Quocirca Fernelius eisdem morbis, quibus Vvillisius, vomitum destinat, opinatus, eos ortos esse ex impuris succis e præcordiis in omne corpus effusis.

Postremo loco adnotare succurrit, generatim superam purgationem oppido commodiorem esse inferiore ad custodiendam sanitatem, arcendosque morbos, uti toti Antiquitati visum est: ex cujus consensu exemploque monet Fuchsius, omnes qui recte valere, & senescere cupiunt, ne prorsus vomitum negligant. Revera Hippocrates^(a) præcipit ficcioribus temperaturis, ut in singulos menses bis vomant, ter humidioribus: constatque Majores, adeo vomitoriis assuevisse, ut etiam fortiora, posterisque ad-

mo-

(a) Lib. 3. de Diata num. 32

modum formidata facile perferrent, nec solum valetudinis causa fumerent, sed acuendæ mentis, testante Plinio (*), Carneadem helleborum album accepisse libris Zeyonis responsurum. Quinimo ex sententia Antiquitatis vomitio ita opportuna est præcavendis morbis, ut Hippocrates, sicuti observat Prosper Martianus, ob hunc finem eam semper imperaverit, nunquam dejectionem. Hinc apparet, quantum ab Hippocratis praxi recedant Neoterici, qui verno tempore medicationes ad præservandum instituentes saltem in nostris regionibus nunquam, aut rarissime vomitum provocant; ut mirum non sit, plurimas in irritum cedere, aliquas etiam nocere. Exotici succi futuri morborum causæ, qui solent in primis viis acervari, adhærentque membranis, vomitorium petunt adhærentes avulsurum, non potionem, uti ajunt, angelicam cito præterlabentem, credulosque magnæ vacuationis specie fallentem, longeque diversam opere ab imposito nomine. Quandoquidem igitur plurimorum morborum fons, & origo est in prima regione, quæ promte egregieque superna purgatione abstergitur, ad tutanda corpora ab eorum incurfibus Caus vomitionem prætulit dejectioni.

C A P U T XII.

De impedimentis Vomitionis.

IN exponendis impedimentis vomitionis superflua fugiens, frustra que repetita, tantum de iis agam, quæ peculiariter attingunt viam, per quam efferuntur excrementa, relictis, quæ generatim opponuntur vacuationi,
jam

(a) *Lib. 2. cap. 5.*

jam exposita tractando de inferiore ; ideoque cuncta sub uno capite comprehendam , ordine tamen non mutato. Itaque si concitandus vomitus est ita morbo poscente , ex arte concitabitur , primum inter res naturales respiciendo ad conformationem , habitumque ægroti : ex quibus Hippocrates (a) argumentum capit prohibendi vomitus in mediocriter carnosus , pinguis , cum venarum angustia , inde sumens inditium crassi , & pituitosi humoris totius corporis promptius ad infera lapsuri. Enim vero id præceptum , meo arbitrato , pertinet ad vomitum præsevationis gratia , non curationis usurpatum : atque iccirco ex habitu in morbis non deterrerer a vomitu ciendo , quem aliunde utilem cognoscerem , nisi adderetur magna vomendi difficultas . An non fieri potest , ut indicatus habitus incurrat in morbum ab ubertate pituitæ in ventriculo cumulatae ? in quo si quis vomitum instigare , certe observaret Hippocratis legem paulo ante expositam. Multo vomitus suspectior est in ægrotis , quibus ex natura gracilis est , & oblonga cervix , pressum angustumque pectus , ut a tergo in morem alarum promineant scopulæ , unde alati dicuntur : in quibus timendum est , ne vomitus concussione rumpat in pulmonibus venam , expleatque funestum omen ex corporis conformatione , si difficilis contingat. Item Avicenna vomitum arcet ab iis , quibus non est facilis respiratio , vel apta gula est ad contrahenda apostemata , ne adducat humores partem versus consuetam vexari ; sed initia , & rara vomitoria noxam , quam timet Avicenna , non incutient.

In habitu quoque pleniore , & sanguine redundante obnoxio vasorum ruptioni in vehementi contentione vomitionis , hæc multo tutius sanguine per phlebotomiam prius

(a) Sec. 4, Apho. 7.

prius depletis vasis tentatur, quam turgentibus.

Senectus vomitionibus incommodat, pituitosis frigidisque purgamentis affluens facilius descensuris, quam ascensuris; & præterea propter duritiem, & siccitatem membranarum ventriculi, aliarumque partium contractioni obluſtantem. Opposita ratione pueri multo humidiores senibus ad vomitionem paratiores sunt, & apparatus exhibet frequens vomitus non solum in recens natis, sed etiam, uti observat Hippocrates, ^(a) in aliquanto majoribus. Multa cruda congerunt in ventriculo voraces pueri, rectius per os, quam per alvum elicienda, attenta viæ opportunitate, & ad vomitum propensione: leniora tamen vomitoria adhibenda sunt, quando acriora possent teneras membranas, nervosque in convulsionem agere per eam ætatem non difficilem excitatu.

Avicenna prægnantibus vomitum interdicit, veritus, ne labore vomendi æstuantibus inhibeat evacuationo agitatarum sordium: quod præceptum interpretor tantum de forti vomitorio. Si enim prægnans laboraret ventriculo impuritatibus affluente, nec sponte vomeret, ut frequenter solent utero gerentes, non dubitarem mite vomitorium offerre, sine vehementi concussione proximam, & paratam materiam duntaxat commovente, commotamque efferente; cujusmodi est radix Raphani domestici, vel Peponis, teste Fernelio, neque puero, neque seni, neque prægnanti gravis, vel Ellectuarium diasarum ab ipso descriptum illis corporibus similiter tutum. Ac sane cum prægnantes vomitus spontaneos frequenter patiantur sine propria, foetusque offensa, cur erit formidanda propinatio lenis vomitorii ab aliquo affectu postulati? Imo etiam mediocre non videtur formidandum, animadvertente

(a) Sect. 3. Apho. 24. (b) Lib. 1. Fen. 4. Doc. 5. cap. 11.

Senectus
pueris
vomitibus
propter
duritiem,
siccitatem
membranarum
ventriculi,
aliarumque
partium
contractioni
obluſtantem.

Suggerit
vomitum
vomitibus
quali

tente Prospero Martiano ^(a), plurimos utero gerentes quotidianis vomitibus ita sollicitari, ut cibum assumptum raro contineant, priventurque convenienti alimento, & nihilo minus inde nondum secutum esse abortum.

In rebus etiam non naturalibus eadem fere vomitionis, atque dejectionis offendicula interveniunt, si excipias frigiditatem hyemalem, effluxumque menstruorum. Hyberna frigiditas, Hippocratis monitu, vomitui obsistit, si mens est, non solum ventriculum, sed totum corpus evacuare crassis purgaminibus redundans, quibus ea tempestate scatere solet, ascensui repugnantibus: quæ tamen admonitio Hippocratis, ut etiam supra adnotatum est, potius dirigitur ad præcautionem, quam curationem. Lunarum purgatio ea ratione de vomitu movendo dubitationem ingerit, quod sursum humores inde trahuntur, menstruo motu deorsum tendentes. Verum data necessitate vomitorii in menstruali muliere propter inquinamenta in ventriculo acervata, forti abstinere, non mediocri. Cum enim illud, uti vidimus ex Prospero Martiano, non exotica fermentatione sanguinis, & turbatione, sed irritatione, & concussione ventriculi in actionem erumpat, sedato vomendi conatu, nihil post se relinquit intercepturum fluxum inchoatum.

Percursis brevi impedimentis vomitus exhibitis a rebus naturalibus, & non naturalibus, plura dicenda remanent de objectis ab rebus præter naturam, quæ tamen ipsa pressius quam potero, proponam. Motus humoris ad cutem, sive per eandem facta excretio, uti vidimus, non leve obstaculum est purgationis infernæ; idque nunc inquiri de superna. Glissonius ^(b) affirmat, vomitu humores a centro corporis cutem versus propelli, hujus obstructions potentissime

(a) In Com. sect. 5. Apho. 34. Hip. (b) De Facult. excret. cap. 24.

*Anim
accu*

tissime aperiri, Variolarum eruptionem urgeri, totumque corpus ad sudorem præparari: contra quæ mihi non levem scrupulum non nulla incutiunt. Perseverante vomitu, explosis ventriculi inquinamentis, ipsum tandem corporis habitum consecutione succorum expurgari cum Hippocrate sancitum est; qui sane non expurgaretur, nisi humores fusi per corporis ambitum interiora versus moverentur. Cum igitur eodem tempore fieri nequeant motus contrarii, quo tempore alliciuntur succi ad intimum corpus a vomitu, iidem non poterunt propelli ad cutem; uti apertissimum est. Itaque, si tempore vomitus, sudor erumpit, trahunturque succi ad ventriculum a venis, in diversa materia diversi motus concitentur oportet, & ita fieri utramque vacuationem. Nempe, dum irritatæ, contractæque membranæ ventriculi ad se se adducunt succos vasorum; similiter contractis, & constrictis cutis glandulis, vasisque proximis, aquosum, quod paratum inest, exprimitur, abitque in sudorem. Interdum etiam imminens vomitum præcedit largus sudor, ut in me ipso expertus sum, provocatus ex commotione humoris mox rejiciendi, & peculiari modo afficientis stomachum. Sentiebam quandam afflictionem ventriculi cum nausea potius languoris, quam doloris similem; eodemque tempore sudor copiosus manabat, mox sequebatur vomitus, quo sedato, inanitoque ventriculo, sudor cessabat. Itaque proprie vomitio, dum fit, non propellit humores a centro corporis ad ambitum, sed extra pellit humores, qui circum cutem sunt propter indicatam contractionem, validumque totius corporis conatum. Quocirca in excretionibus ad cutem salutariter prodeuntibus, succisque ab intimo corpore ad extimum delatis, tutius existimo, prætermittere vomitoria, nisi magna causa adhibendorum

subesset. Quod si Sydenhamus in Variolis confluxuris post istam venam forte vomitorium propinat, id sane non præbet in Variolis regularibus, distinctisque futuris; neque præbet in confluxuris ad earum eruptionem promovendam, sed extrudendam insolentiorum materiam ægritudinis, ejusque depulsione recreandum ægrotum.

Pluribus in morbis coctionem humoris per alvum eliminandi cum Hippocrate requiri, decretum est; & cum eodem non requiri, sancit Prosper Martianus ad materiam per vomitum excernendam, siquidem per coctionem densior, & gravior reddita, amissoque fervore, motuque evadit proclivior ad descensum, quam ascensum; quod documentum in hunc sensum flecto. Si per vomitum esset elicienda materia admista sanguini indigens separatione, proculdubio beneficium coctionis præstolari oporteret, per quam ad separationem præparatur. Non solemus tamen vomitum incitare ad exigendum humorem, opportunitatem coctionis requirentem; uti constat ex medicatione febrium, in quibus vacuanda materia petens coctionem per inferiora purgatur, non superiora, sicuti supra explicatum fuit.

Quemadmodum quidam morbi vomitu feliciter expugnantur, item alii asperantur, eidemque repugnant; inter quos primo capitis morbi recensentur. Concutit caput vomitio, & sursum humores agit, partemque affectam versus; itaque in vehementiore videmus, rubere faciem, oculosque, & caput tendi. Cum igitur a parte affecta abducendi sint humores, non illuc adducendi, ab Aetio, aliisque pluribus vomitus damnatur in Epilepsia, in capitis doloribus, in oculorum omnibus affectionibus. Adhibenda tamen est distinctio, sine qua graves auctores videntur, inter se se vehementer dissentire; nec scienter decer-

decerni potest, pro qua parte standum sit. Namque Prosper Martianus, commentans hanc sententiam Hippocratis: *Si supernæ partes turgeant, quæ circa caput, ulcerum purgatio vomitus, aqua*; carpit Medicos formidantes vomitum in morbis capitis, quem admodum conducibilem de-
prædicat, & Hippocraticæ praxi consentaneum. Contra Vallesius in ejusdem dicti explicatione, postquam adnotavit, solere Hippocratem vomitum vocare omnem purgationem, subjungit purgationem supernam in morbis capitis magna consideratione indigere, & raro posse insigni noxa carere. Quo pacto igitur tolletur hoc diffidium? Quo indice innotescet, utrum vomitio sit profutura, an nocitura in morbis capitis? Originem attende, & diligenter scrutare, unde morbus ortum acceperit. Si enim partium inferiorum, sive præcordiorum sympathia genitus sit, effusa in reliquum corpus impuritate, constitue cum scientissimo Fernelio^(a), vomitum opitulari Hemiplegiæ, Vertigini, Incubo, Epilepsiæ, Suffosioni, ceterisque morbis capitis ex inferioribus originem nactis; iisdemque morbis non opitulari, si vitio principali capitis exorti sint. Inter morbos, qui capiti adscribuntur, tremor nervorum est, uti vocatur a Celso^(b), qui ejusdem auctoris sententia vomitu intenditur; si tamen, ut ego interpretor, frequens sit. Cum enim ventriculus pluribus propaginibus nervorum cum reliquis communicantium spargatur, ejus concussio frequens jam infirmos nervos magis debilitat, augetque tremorem.

Quamquam Platerus, Sennertus, Horstius, alique plures, quos enumerat Bohnius, ^(c) observaverunt per vomitoria, & rejectionem adjuvari expulsionem excrementorum e pectore, & pulmonibus, his tamen solutionem

Cc 2

con-

(a) Lib. 3. Meth. cap. 2. (b) Lib. 3. Cap. 27. (c) Sect. 4. Apho. 8.

*Dispu
in
fove*

*Solu
Fen*

*in
neu
prot*

continui patientibus vomitum incommodum esse, docet Hippocrates^(a) vetans, quo minus tabidi unquam ad superas purgationes perducantur. Tabes, quam Græci Phthisim vocant, omnem extenuationem comprehendit, siue sit totius corporis, siue unius duntaxat partis: atque universalis varias species, & ab variis causis subortas idem auctor describit. Potissimum tamen appellatur tabes, quæ producitur ab pulmonibus ulceratis, indicaturque in aphorismo, majori obnoxia incremento ex concussione vomitionis, apta ad ulcus amplificandum, vas aliud diffringendum, mortemque accelerandam. Ac quidem, si vomitus arcendus est a præparatis ad tabem, ulcerationemque pulmonum, quanto magis ab istam patientibus? Verum enim vero Prosper Martianus^(b) propugnans praxim Hippocratis^(c) in tabe pulmonum ex Aphtis orta porrigentis vomitoria, ab hisce temperandum esse decernit in præparatis ad tabem, hisce utendum in tabidis, hac dispari ratione persuasus. Patientes tabem assueti sunt concussioni pulmonum, propter tussim solitam vehementer tabidos exagitare; præterea habent venas pulmonum supra modum inanitas: in quibus proinde metuenda non est concussio a vomitu, quasi ruptura foret venas; timenda tamen est in pronis natura ad tabem, quos inanitio venarum non tutatur a ruptura. Quamvis autem hæc ratio Martiani præferat aliquam similitudinem veri; tamen non uni patet difficultati, & certe paucos ad eam praxim hortata fuit. Etenim agitatio pulmonum, cui ex tussi assueti sunt tabidi, non impedit, quo minus ejus vasa debilitentur, nec tollit periculum majoris ruptionis, accedente concussione vomitionis. Ictus vel longo tempore repetiti vim suam non amittunt, neque minorem exe-

runt

(a) Sect. 4. Apho. 8.

(b) Ibid.

(c) Lib. 2. de Mor.

runt in partem percussam, istaque ex ictuum repetitione debilior evadit ad resistendum, non validior propter majorem extenuationem membranarum a motu violento iterato. Inanities vasorum assignata a Martiano pro defensione a ruptura in vomitu, hanc ne efficaciam habebit? Existimo quidem, exinanita vasa difficilius rumpi, quam plena, si quassentur, non ideo esse tuta a ruptione ampliore, quæ jam rupta sunt, tussi addito vomitionis impulsu: quo solo plures dies iterato vidi mense Februarii anni 1734. in Sene septuaginta trium annorum, temperamenti biliosi, & sanguinei excitatum copiosum sputum sanguineum, quod nunquam antea passus fuerat. Utcunque igitur conatur Martianus tollere repugnantiam inter Hippocratem prohibentem in aphorismis vomitionem in tabidis, & curantem vomitorio tabem ex Aphthis, sive fervidis ulceribus pulmonis, stat difficultas interpretationis, & ratio contra vomitoria in tabidis administranda.

Imbecillitas ventriculi, quæcunque sit, sive similis, sive organica omnium suffragiis fortia vomitoria non patitur, quibus vehementer concussus magis infirmatur, apparatusque ad novas impuritates recipiendas, solitas ad partem infirmam promptius accurrere. Ex eadem infirmitate ventriculi Aetius^(a) purgationem superiorem in animi deliquiis damnat ob magnum consensum inter utramque partem, & veretur, ne languor ventriculi adauctus vomendi nisu, sit occasio graviori deliquii. Enim vero nollem, Tirones inde colligerent, dum æger animi defectu jacet, quocunque modo non licere vomitum proritare. Assentior Aetio, non esse frequenter, & fortiter perducendos ad vomitum animo debiliores, & facile defecturos, ne inde labefactato ore ventriculi, quod alterum
quasi

(a) *Serm. 3. cap. 119.*

*In ve
culi
ribus*

quasi cor est, eodemque nomine ab Antiquitate donatum, inde cor ipsum graviolem noxam contrahat. Ceterum approbandus Galenus est, qui generatim subvenit accessionibus Syncopes provocatione vomitionis, in gulam immisso digito, vel pluma; quæ irritatio, vel nullum movet vomitum, & tamen egregie facit ad excitandum ægrotantem, vel si movet, vehemens motio non est, & solum accidit in facile vomentibus, humorumque proclivitate ad superiora. Quinimo si conjicerem Syncopem a pravis humoribus ventriculum obsidentibus produci, cum Galeno confugerem ad mite vomitorium, cujusmodi est hydrelæum, vel oleum sincerum; & subinde si foret opus, adhiberem irritamentum digiti, vel plumæ. Idem Actius (*) in uteri strangulatu vomitum rejicit absque ulla distinctione, sine qua nutat præceptum. Non inficias eo, in uteri strangulatione genita ab vitioso succo in eodem congesto summam medicationis circa uterum versari debere, nec esse ciendum vomitum; si crederemus cum Antiquis uterum in ea affectione ascendere, vomituque magis ascensurum. Veruntamen, quia non uno eodemque modo ingruit affectio, neque ab una eademque causa, neque uterus ascendit, uti notant recentiores Anatomici, opinor, vomitum in eo affectu sæpe non inutilem futurum esse; atque in primis, si mulier cibo gravaretur, aut impuro humore occupante ventriculum; itemque si cum uteri suffocatione Syncope conjungeretur: ad cujus citam resolutionem non dubitarem lenem vomitionem usurpare, uti dictum est de sola Syncope. Non nunquam enim uteri strangulatu forte deliquium animi associatur, indicatum a magna pulsus debilitate, aut interceptione, pariterque respirationis. Interdum cor affectionis expers est,

(a) Serm. 16. cap. 60.

est, ægra tantum vehementius respirat, aliæque operationes salvæ remanent.

Quoniam ad uteri morbos descendi, vestigabo, utrum inter offendicula vomitionis sit recensendus uteri prolapsus; de quo dissentiunt, discordantque auctores. Hippocrates, cui Sanctacrux, aliique plures subscribunt, sperat, vomitione omnia viscera inferiora sursum cum ventriculo movente partem prociduam reductum iri. Ex opposito Riverius, aliique in utero prolapso vomitoria prorsus interdiciunt, ne vomendi contentio magis uterum extrudat, causati, constare experientia, nullo præsidio parum difficilem promptius extrudi, quam vomitu: quem item Angelus Sala in triumpho emeticorum ad foetum mortuum excludendum Mercurio vitæ provocat. Id litigium solutionem habet ex superioribus, ubi adnotatum est, quid intelligendum sit, nomine uteri procidentiae, vulgariter dictæ: ex quibus liquet, curationem uteri delapsi perficiendam esse remediis humores vaginæ rugas implentes, extendentesque solventibus: quibus absumptis vagina naturalem contractionem recuperat, & situm. Quocirca, si alter morbus exigeret vomitionem, utero, modo prædicto, procidente, non dubitarem movere, neque inde metuerem majorem consecuturum prolapsum; quem scilicet non rupta, aut laxata ligamenta efficiunt, sed imbibiti vaginæ humores. Quinimo etiam in vera uteri procidentia non formidarem mite vomitorium ab Hippocrate propinatum, decoctionem lentis cum melle, & aceto; similemque animadversionem esse, judico in descensu intestinorum ad inguina, vel scrotum, si alia de causa vomitus exposceretur.

In u
prola

In
dis

Ly

D E
R E G I M I N E
MAGNORUM AUXILIORUM
In Curationibus Morborum

D I S S E R T A T I O T E R T I A .

C A P U T P R I M U M .

De Sudore, ejusque causis, & viis.



Gens de impedimentis magnorum auxiliorum Sanctacrux nullam mentionem fecit de sudore : quem tamen inter universales, magnique momenti vacuationes recensendum cenfeo, si pluribus diebus conjunctim provocetur ; uti solet in aliquibus morbis difficillimis ad extirpandum. Cur enim inter magna remedia collocandum non erit, quod ingentes efficit in corporibus mutationes, gravesque aliquos morbos profligat, vel repetitis purgationibus invincibiles, a Majoribus inter magna præsidia recensitis ? Hac tamen occasione aliqua dicenda occurrent etiam de sudore non pluries, acervatimque ducto, nec præferente speciem magni remedii. Sudor alius sponte fit, vel motus a natura sibi consulente depulsione superflui, vel a morbo corpus dissolvente. Alius artificio propellitur, isque semper calore, quem proinde auctorem sudoris, de quo locuturus sum, constituo, suum opus conficientem, cutis spiramenta refe-

referando, liquando succos, diffundendo, magisque impellendo. Argumento est, quod erupturo sudore, inflatur cutis, tumentque vasa, non alia sane de causa, nisi propter rarefactos a calore succos, commotosque. Interdum a frigidis causis sudor evocari videtur, sicuti experitur, qui tempore æstivo exæstuans, se se multa frigida ingurgitat, moxque large fudat. Verum potio aquæ frigidae non viribus suis, sed acquisitis ex accidenti sudoris causa est; quoniam inde refrigeratis visceribus, quod per cutem invisibile discutiebatur, in sudorem cogitur, effluitque. Quiddam simile, animadvertente Hippocrate^(a), incidit illis, qui donec sub sole ambulant, nihil sudoris effundunt, multum, cum in umbram devenere, insensilem excretionem densantem: nisi mavis credere, a calore urente solis ficcari partes, constringique poros, postea sub umbra referari, liquatisque exitum permittere. Quomodocunque tamen explicetur effusio sudoris post epotam frigidam, certum est effundi, vel proxime a calore, vel alterius etiam causæ interventu, quæ apte occasio vocatur.

Expositæ causæ effectrici sudoris, adjicio materiam, quam Vvillisius distinguit in elementarem, & humoralem; sed congruentius distinxisset in remotam, proximamque, de qua potissimum agendum est. Antiqui sudoris naturaliter, & sponte fluentis materiam ad excrementum aquosum secundæ coctionis referunt, serum appellatum; idemque affirmant Recentiores, sed nolunt, serum excrementum esse secundæ coctionis. Namque Bergerus^(b) affirmat, sudorem generari ex materia insensilis excretionis ad cutem copiosius, & confertim delata, hacque de causa in sudorem coacta; eam vero materiam magna ex parte esse aquam ex primis viis cum chylo in sanguinem il-

D d

lapsam.

(a) *Lib. de aere, aquis, & locis* (b) *De occulta transpiratione*

lapsam. Quocunque tamen modo serum generetur, quam aliam constituemus aptiorem materiam sudoris, quam aquosum humorem, per vasa totius corporis fusum? qui generatur in nostris corporibus, vel in potu hauritur; idemque humor, & sudoris, & urinæ materiam suppeditat; quam minui, conspiciamus largo sudore manante, & hunc aliquando referre conditionem assumptæ potionis. Multi, ut observat Bergerus, post haustum aquæ frigida odore cinamomi, florum citri, jasmini, similiumque medicata, æstivo tempore fundunt sudorem, præsumptos odores redolentem. Quin etiam in Eph. Germ.^(a) narratur, sudorem luteum ab usu Rheibarbari ex omni parte manasse. Itaque aquosus humor, vel intus genitus, vel haustus suppeditat materiam sudoris, qui tamen alias particulas admistas habet, & mea sententia, quascunque ad exitum paratiores, & meatibus penetrandis accommodatiores. Galenus^(b) observat, tenuem bilem, & aquosam cum sudore efferri, videns in strigilibus, quibus sudor in balneis detergitur, bilis colorem. Color sanguineus non apparet in sudore, sed perseverante non exiguam sanguinis partem absumi, indubitatum est: quem proinde Galenus^(c) tanquam instrumentum sanguineæ redundantiaë auferendæ proponit. Sanguis alterantium violentia, ut omnes fatentur, in degeneres exoticosque succos mutatur, priorisque formæ dissimiles; ut mirum non sit, a vi effetrice sudoris posse laxioris compaginis partem in ejusdem materiam verti, sive dissociatas partes sero immergi, extrudique. Febri Helode laborantibus pene continuus manat sudor, suffectus a sanguine vitiositate febrili dissolutus. Cum sudatorium primo admovetur, turgentibus sero venis ex majori parte id hauritur, parum aliorum humorum

(a) *Anni 6, & 7 Observat. 78.* (b) *Lib. 13. Meth. cap. 6.* (c) *Ibid.*

rum, sed eo plures dies continuos iterato, alii quoque humores funduntur, liquanturque in sudorem; affirmatque Archibaldus Pitcarnius^(a), quamvis sanguinis partem, & humorem quemvis in quamvis naturam cogi, mutarique vi alicujus violentiæ. Qui porro opinantur, nervos liquore quodam ab Anglis excogitato irrigari, ejus non exiguam portionem cum sudore excludi, iccirco autumant, propterea quod foraminibus corporis reticularis universæ cutis fibrillarum quoque nervearum papillæ pyramidales continentur. Licet autem diu evocato sudore non solum serum, sed alii quoque vacuentur humores in serum dissoluti, nullus ante alium cum delectu trahitur, sed expeditior, sive ob majorem fluorem, sive propinquitatem viæ cutis. Quemadmodum enim per dejectionem quod promptius est ad fluendum, contineturque in viis evacuationis, primum amandatur; ita vis sudatoria, sive intrinsecus comparata, sive exterius admota prius elicit circa cutem consistens, deinde in paulo remotioribus partibus, & continuatione in interioribus.

Inventa sudoris materia, indagandum remanet, quo pacto in eum mutetur, quibusque viis efferatur. Circuitionis fautores bene multi volunt, sudorem emitti, cum sanguineum fluentum vehementius in glandulas subcutaneas propellitur, liquidiorum ejus partem, sibi congruentiorem separantes. Huc alii plures inclinant, ut credant, a causa effectrice sudoris copiosam attolli materiam insensilis perspiratus, confertim ad ambitum deferri, ex copia sibi viam coarctare, & aliquantula mora in guttas contrahi, subinde ab insequente explodi: quæ tamen opinio multis Recentioribus non arridet, sed videtur materia sudoris devolvi ad cutem in modum liquoris, non va-

Dd 2

poris,

(a) *De Curat. Feb. per evacuat.*

poris, quippe impeditioris ad superandas angustias viarum liquore. Helmontius in tractatu de Latice affirmat, ab vapore centuplo majorem locum occupari, quam ab aqua, & proinde in sudore corpus centuplo magis, quam ejus naturalis extensio est, tumere debere, si sudor specie vaporis ad cutem a calore pelleretur. Item Craanem inquit, unam aquæ guttam constitui a trecentis particulis vaporis, trecenties majus spacium requirentibus. Nolo cum tam exacto Calculatore rationem ponere, sine qua evidens est, ex nostris corporibus multos vapores exire, quibus videmus maculari læve argentum, speculumque ad digiti contactum. Quin etiam ostendit Glissonius^(a) hoc experimento, a vaporibus membranas penetrari, & quidem facilius, quam a liquore. Vesica urinaria, ut ait se expertum esse, extracta, & inflata, dum siccescit, aquam frigidam injectam sine dispendio retinet: eadem vero si vitro aqua semipleno coaptetur, arcteque ligetur, vitrumque arenæ calidæ imponatur, dum aqua bulliat, vapores aquæ non implent vesicam, sed eandem pertranseunt, exter- namque superficiem humectant. Quid mirum igitur a succis excalefactis agitatique tolli copiosos vapores, densari- que circa cutem in guttas? Non tamen diffiteor, serum sub forma liquoris emitti posse; idque puto evenire, cum succi admodum rarefacti, ampliusque spacium exigen- tes, quam ut permittatur a tunicis vasorum, ab hisce com- primuntur, sicque exprimitur, quod liquidius est. Con- cipias, ut libet, sudoris generationem, sive modum, quo ejus materia defertur ad cutem, hæc speculatio, me lon- gius non morabitur, ad utiliora de sudore exponenda pro- perantem.

Via sudoris, uti sequitur ex superioribus, sunt com-
mu-

(a) De Cute vera cap. 4.

munes cum viis invisibilis effluvii, quando id ipsum cogi potest circa cutem in sudorem. Materia vero delata ad cutem sub forma liquoris ex placito Recentiorum devehitur per vasa excretoria glandularum miliarium; nec inde valde recedit opinio Galenica asserens^(a), poros cutis esse venas subtilissimas, in quas si dicimus, solam aquosam portionem fluenti sanguinei illabi posse, vides, quantum vetus opinio ad recentem accedat, neque invisibilia foramina ab Antiquis admissa esse mera figmenta, uti opinatur Martinus Lister^(b) quem indicata opinio Galeni de poris cutis latuit. Glissonius^(c) de re anatomica præclare meritis vult, halitus ex intimo corpore ad extimum pervenire non per poros interjectos solidarum partium substantiæ, sed per ipsam substantiam poris vacuam, & undequaque clausam. Aliquos tamen esse meatus in certis partibus, non inficiatur, sed hos fieri, credit a frequentiore expiratione: quam controversiam Philosophis relinquo, parum conducibilem praxi. Siquidem non immutatur proliciendi sudoris ratio, nec indicantia, aut impedimenta, si opinemur carnes esse imperforatas, si invisibilibus foraminibus distinctas, & quocunque modo opinemur materiam sudoris ad cutem devolvi.

Hisce cognitis de sudore, non erit supervacuum attexere brevem quæstionem, utrum sudor sit naturalis evacuatio, an secus. Diocli visum est, sudorem esse vacuationem toto genere præter naturam, non ita Galeno, nulla tamen rejectæ opinionis Dioclis ratione adducta, quam postea excogitavit Vallesius^(d), defendens contra Dioclem, aliosque, sudorem genus esse naturalis vacuationis; quæ pariter talis mihi videtur, si sudoris materiam confide-

(a) *De utilitate Respi.* (b) *De humo.* (c) *De cute vera cap. 4.*

(d) *Lib. 5. Contro. cap. 5.*

siderem, quæ communis est cum urinæ materia; sive vias, quæ pariter a natura munitæ sunt; sive modum exeundi sudoris sine molestia. Id unum discrimen invenio inter sudorem, aliasque naturales vacuationes factas per os, vesicam, & alvum, quod hæ quotidianæ sunt, sudor tantummodo certis occasionibus erumpit. Ceterum Helmontius tam benignam judicat hanc vacuationem, ut explosis phlebotomia, & purgatione tanquam prædatricibus virium, sola diaphoretica, & sudatoria protutissimis habeat in curatione febrium, aliarumque plurium ægrotationum. Profecto etiam Hippocrates^(a) sudorem præ ceteris vacuationibus manifestis commendare videtur, asserens, omnes morbos finire, aut curari vacuatione, aut per os, aut per ventrem, aut vesicam, aliumque similem aditum, sed sudorem omnibus communem esse, aut omnes æqualiter finire.

C A P U T II.

De instrumentis eliciendi sudoris.

Multiplicia sunt instrumenta ducendi sudoris; & quamvis omnia ad eundem effectum tendant, tamen habent diversum usurpationis modum, aliaque foris admoventur, alia intus assumuntur. Celsus, fuse prosequens adminicula evocandi sudoris, nihil de internis, solum mentionem de externis facit; istaque in duas classes tribuit, alteram sicco calore, alteram humido opus conicientem, istamque in solo balneo reponit, illam vero in pluribus; suntque clibanum, sive laconicum, ita dictum a Laconibus, quibus in usu frequenti fuit, ut indi-

cat

(a) *De rat. vic. acut.*

cat Martialis^(a), laboriosa corporis exercitatio, insolatus, lateres igniti, fervens aqua, vel oleum cucurbitis, aut doliolis inclusum, arena calida, maximeque marina operiens corpus. Quasdam etiam siccas sudationes terra sufficit, ubi ex ipsa calidus vapor profusus ædificio includitur, cujusmodi super Baias in Myrtetis idem Celsus extitisse, narrat. Omnium porro sudationum vis, & potestas, si-ve humidæ sint, si-ve siccæ, in calore posita est, & uno, eodemque modo sudorem trahunt, humorum attenuatio-
ne, liquatione, impulsione, & pororum apertione: nec alia ratione suum effectum promunt in eundem finem intus assumpta. Unde habes, quibus partibus compingantur oportet, medicamenta diaphoretica vocata; quæ nec attenuare, nec fundere, & urgere valent, nisi consent particulis calidis tenuibus & actuosis, si-ve sulphureis, aut salino sulphureis, uti vocantur a Chymicis, expedite venas subeuntibus, externarumque sudationum æquantibus potentiam; sed æquare posse, difficillimum existimo, nullo suppetente medicamine, quod pauca quantitate, qua porrigitur, tantum caloris innoxie contineat, quantum externum sudatorium toti corpori admotum. Quod autem impense calet, visceribus inclusum periculo non vacat, ipsaque vehementia caloris obstat, quo minus sudor ducatur; recteque admonet Fernelius^(b), diaphoretica, seu dissolventia moderate calida esse oportere, ne adustione, & siccitate immodica meatus coarctent, succosque adurant. At moderate calida quis speret, motura esse sudorem e toto corpore, nisi natura suppetias veniat, atque multum operis ipsa conficiat? Fere omnem vim internis diaphoreticis adimit Vvillisius, affirmans, meatuum apertionem debitam sudori provocando per solas administra-
tio-

Vah
actio
sudor
m

Mon
Ferne

(a) *Lib. 6. Epigram. de thermis helveticis.* (b) *Lib. 6. Meth. cap. 6.*

tiones externas parari ; ideoque opus esse ad vim internorum eruendam calore laconici, balnei, aliorumque externorum. Nihilo tamen fecius operosissimus fuit in describendis internis diaphoreticis ; quibus accenset non solum prædita partibus calidis, activisque, qualia sunt folia Scordii, Cardui, & cetera pro antidotis a Veteribus habita, sed etiam Margaritas, oculos Cancrorum, idque genus alia hebetia mista, nec incitata calore ad agendum. Calidorum virtutem ad sudorem affigit sali volatili, acri, aut amaro ; ceterorum sali alchali, & quodammodo fixo. Enim vero calidis, & tenuibus, sive uti loquitur Vvillifius, sali volatili inesse stimulos sudoris, ad percipiendum difficile non est ipsius experientiæ documento ; quæ tamen nil simile docet de sale alchalico, & quodammodo fixo. Quomodo igitur Vvillifius hanc virtutem cognovit in Matre perlarum, oculis Cancrorum, aliisque hujusmodi sale alchalifato, ut ait, donatis ? Sal iste, inquit, occurrens sali acido tum in visceribus, tum in sanguine cum eo effervescit, fervore sanguinem solvit, & facit separare ferum. Hæc ne in nostris corporibus evenire, Vvillifi, aspexisti, quod sane non affirmabis, an tantum imaginaris ? Imaginor, inquis, quia video acida & alchalica, si miscentur, ebullire ; idque video in Margaritis, Coraliis, aliisque similibus aceto distillato perfusis ; & hac similitudine in animum induco, sanguinem humanum ad ingressum alchalicorum incipere fervere, & inde sequi dictos effectus. O lepidam similitudinem, melius dicam, evidentem dissimilitudinem ! Quantum enim interest inter acetum distillatum insigni aciditate pollens, & sanguinem humanum gustui dulcem ? Fateor cum Hippocrate, multas esse in sanguine humano secundas qualitates, hasque potentiores esse ad agendum primis, quæ tamen nisi sint evectæ, nequeunt

puer
hinc
nec
clij
lib.
ilij
a sanguine

vim suam expromere. Quare Vvillisius non potuit ex arte præbere alchalia cum spe fore, ut effervescent cum sanguine, nisi prius illum ægroti degustaverit, vehementerque acidum compererit, ut ex aceto distillato ducta similitudo valeat. Logicus ad eam similitudinem tuendam requireret pariles qualitatis gradus; Medicus saltem parum dispares requirat oportet. At inter acidum occultum sanguinis & aceti distillati tantum est discriminis, quantum inter imaginationem, & rem ipsam. Profecto si oculis Cancrorum affundas distillatum acetum, & modicum aquæ acidas cuspidis retundentis, aspicias, admodum levem bullitionem, brevique desituram cieri. Demus tamen, sanguinem alchalicorum mistura bulliturum esse. Quam quantitate illa sumenda erunt, ut inde in tanta copia liquoris consequatur effectus? Quota portio assumptorum illabetur in venas, cum tanta per alvum excernatur? Portionem vero venas subeuntem nemo, meo arbitrato, in se recipiet tantum fervoris parituram esse, ut sudorem propellat, si velit eum metiri calore excitato ab ebullitione oculorum Cancrorum, & similium, cum aceto distillato immerguntur; qui, ut unusquisque experiri potest, vel nullus, vel insensibilis est. Quandoquidem, uti vidimus, obtusa alchalicorum substantia, facta comparatione cum sanguine, nullum exhibet indicium virtutis ad sudorem, experientiam consulamus, cujus testimonio standum erit, si constet, illis propinatis, plerumque, vel saltem sæpe effectum respondere. At ipse Vvillisius fatetur, raro, aut nunquam ab internis diaphoreticis sponte sudorem moveri sine opera hypocausti, balnei, uno verbo, externi caloris. Quamobrem erumpens sudor post accepta diaphoretica externasque sudationes admotas, efficaces absque internis ad eum proliciendum, nequit fidem facere

facultatis internorum. Veruntamen parvo constat contra has imaginationes disputare; eoque superfedeo aliis sex differentiis diaphoreticorum expendendis, quas Vvillifius assignat, desumitque ex partibus elementaribus misti in Chymicorum fornacibus divisi dissolutique, ne videar captare occasionem urgendi casum tam male fultorum. At enim turba Medentium provocat ad lapidem bezoarticum; quem in maximo acute febricitantium discrimine porrigit ad movendum sudorem, speratque frequentibus experimentis confisa, motum iri. Utinam hercle ita res eveniret, uti credit, tamque securo diaphoretico Medicina ornaretur, & valeret ictus extrema minantes repellere. Sæpe in magna febrientium jactatione præbetur Bezoar, atque interdum fateor sudare ægrotos, sæpius tamen non sudare, compertum est. Cum vero sudant, incertissimum est, cujus id opera contingat; quando sudor in febribus acutis identidem erumpit, vel salubri conatu naturæ, vel infalubri irritatione. Aut igitur sæpe fallimus ægrotos pellectos dulcedine pro se sperandi, ut ait Plinius^(a), aut fallimur inertis nostrorum medicaminum fiducia. Ac sane Vallesius, alique sollertiores cordatioresque non leviter dubitant de lapidis bezoartici decantatis dotibus, veræne sint istæ, an illi affixæ a casu, & optantium Medentium imaginatione, non solum illius, sed plurium medicaminum commendatrice. Non proinde omne diaphoreticum internum in febribus, aliisque morbis tanquam nullius efficacitatis, & nihil utile moliturum despicio, licet omnibus parum fidendum esse judicem sine externorum auxilio, aut contentionis naturalis; quam cognoscens, dubitanisque, ne sola sufficiat, opus urgerem aliquo calido interno diaphoretico, videlicet Scordeo, Contragerva, aliis-

(a) *Lib. 29.*

aliisque ejusdem conditionis . Valeant ergo per me cornu Cervi, Margaritæ, oculi, & chelæ Cancrorum, ossa piſcium, aliaque ſimilia, in quibus ſalem alchalicum occurrentem acido ſanguinis Vvillifius imaginatus eſt . Calida duntaxat diaphoretica probabiliora cenſeo, & iſta cum Jacchino non per ſe, ſed ex accidenti, & alterius ope ſudori accerſendo idonea eſſe, ſolaque externa inſtrumenta id per ſe efficere .

C A P U T III.

De Indicantibus Sudoris.

OMnis magnæ excretionis indicantia in eo conveniunt, quod ſuppeditentur ab inutili, nocuoque ſucco, qui arte nequit emendari, aptuſque reddi animanti conſervando, produciens magnum morbum, vel minitans magni productionem . Cum igitur ſudorem copioſum, perque plures dies elicatum grandibus remediis adſciverim, ad hunc evocandum non accedam, niſi notabilem ægrota- tionem pariat, vel proximam ad pariendum potentiam prætendat; & inſuper alia concurrant hortantia vacuationem potius per cutem, quam per alios aditus peractam . Humores enim impuri multifariam lædunt, diverſa occupant loca, habentque diſſimiles qualitates, diverſasque vias facilioris expulſionis; quibus diverſi vacuationum modi reſpondent, indicati quidem ab humore infeſto, ſed certis accidentibus comitato, & circumſcripto .

Sudoris excretio multiplex eſt remedium, revellens, derivans, evacuanſque, uti quoque de purgatione dictum eſt . Si humor excernendus in totum ſpargitur corpus, totumque offendit, non ex una parte in aliam labitur, eam-

que peculiariter exercet, sudatio rationem habet simplicis evacuationis: eademque revellens simul, derivansque erit, si eliminandus humor ex aliquibus partibus, vel toto corpore in certas partes influit: quo multiplici titulo sudorem invitamus in fluxionibus ad ventrem, aliasque partes, in quibus ratione oppositionis, vel propinquitatis conducit infensa per cutem abigere. Vix medicinam facere incæperam, cum accersitus sum ad curandam uxorem amici mei D. Jacobi Galli Cremonensis, temperamenti calidi humidique, per aliquot annos laborantem uteri albo profluvio, cum levi impedimento, & dolore articulorum. Plurima experta erat aliorum Medentium consilio, sed omnia incassum, nulloque morbi decremento. Aliorum conatibus animadversis, sudorem sicco calore laconici elici curo, non tantum ad discutiendam materiem articulis infestam, sed revellendam ad uterum labentem, causamque profluvii; intraque mensem circiter, quod optaveram, impetravi. Hisce præmissis autumo, humorem indicem ducendi sudoris esse paratiorem ad vias cutis, vel sua qualitate, vel propter loca occupata, vel ipsius naturæ ad cutem motum. Ex qualitate humoris liquet, tenuem, fluidum, aquosum prompte in sudorem mutabilem esse, & hunc primum locum habere inter sudoris indicantia, uti Medicorum consensus comprobat, in Catharrhis, Anasarca, aliisque morbis a simili humore natis frequenter ad diaphoretica confugientium. Alia imaginis excrementa, acida, falsa, amara, sed multo fero perfusa; proderit hæc omnia sudationibus pro data occasione amandare, docente experientia, uti observat Galenus^(a), modo sudorem falsum esse, modo acidum, modo amarum, interdum etiam lutosum, virusque olentem,

(a) *Lib. 4. de Sanit. tuen. cap. 4.*

tem, sapore, odore, colore sensibus obnoxium: quem proinde movet in pluribus ægrotationibus a diversis humoribus progenitis. At biliosos humores, acidos & austeros, seu melancholicos non nulli excipiunt, autumantque parum aptos, induere formam sudoris; nec ego sine distinctione aptos esse contendo. Biliosi acres adustique diaphoreticis agitandi non sunt; non tamen omnes biliosos illis eximo, videns in declinatione tertianæ intermittentis largum calidumque sudorem effluere, cum quo non temere credam, portionem bilis excerni: quippe quæ, ut etiam supra cum Fernelio adnotatum est, in venas irrumpens non sanguini, sed sero commiscetur. Item terrei, & valde sicci humores, qui melancholici vocantur, diaphoretica respuunt, non tamen antequam tam intensam siccitatem acquirunt: atque Galenus testatur, se balnei opera educto sudore, absque aliis remediis incipientem Melancholiam non semel curasse, nondum per longioris temporis spatium humore reddito inhabili excretioni per cutem moliendæ. Existimo tamen, melancholicis balneum non sola evacuatione opitulari, sed inducta humiditate peccanti humori contraria. Mihi pariter accidit Venetiis sudore per plures dies balneo evocato, ut Mercatorem Armenum ante duos, vel tres menses laborantem Melancholia in pristinum vindicarem. Erat æger temperamenti sanguinei, florentis coloris, succo plenus, lapsusque in melancholiam propter domesticas curas: cui proinde conducibilem judicavi ei sudorem humido calore prolicitum. Idem humor, qui sicco calore laconici irritaretur, superatur humido balnei, ideoque metiri oportet habilitatem humoris ad sudorem, habito respectu diversorum instrumentorum, quibus excitatur. Sunt alii humores, qui licet non aquosi, fluidique sint, nihilominus, si prius aliquo

*Melancholia
Sudor*

quo decocto incidente, & attenuante præparentur, non incommode per cutem educi possunt; uti sæpe educuntur humores ex lue venerea progeniti. Quinimo non solum præparatio humoris hunc reddit aptum excretioni per invisibilia foramina, sed hæc ipsa majori dilatationi non repugnantia, observante Archibaldo Pitcarnio^(a), nulla esse vasa fecernentia, nullasque in corpore nostro secretioni inservientes glandulas, quæ non possint augeri in tantam amplitudinem, ut pares sint accipiendo, fecernendoque cuivis humori, etiam in aliis glandulis naturaliter apto secernei. Et sane Vallesius affirmat^(b), se vidisse ex una longiuscula, & cum vehementibus perfusionibus facta car-nium lotionem in aqua balnei evacuationem sordium, crassæ lentæque pituitæ, quæ non solum aspici poterat, sed digitis baculoque in longum trahi, non absimilis apparere consuetæ in pelvi ex venæ sectione. Opinor hanc materiem egressam crassiores redditam fuisse, sed etiam egredientem tenuem non fuisse pro certo teneo: idque experimentum arguit, poros cutis non adeo angustos esse, ut soli aquoso humori pateant, vimque pati, & posse multum dilatari. Numerat Bohnius inter humores diaphoreticis accommodos, malignos cujuscunque generis, siue cum febre lædant, siue soli. Enim vero cum maligni humores adeo varient, sintque incomprehensibilis qualitatis, solo effectu cognoscere licet ad sudorem expeditos esse. Effectus autem frequens quidem est, non perpetuus, & sæpe per sudorem malignæ febris fomes exturbatur, non semper; uti constat ex narratis ægrotis ab Hippocrate^(c), ut missa faciam aliorum exempla, quorum quidem plures in pristinum vindicati sunt sudore, non omnes, sed aliqui urinæ profluvio, aliqui fluxione alvi, unus abscessu. Ita-
que

(a) De cærat. feb. per evac. (b) Lib. 3. de rat. vic. ac. (c) Lib. 1., & 3. de Mor. Pop.

que in hisce pariter febribus exploranda est propensio naturæ indicantis se se exonerandi viam; neque ex sola consideratione pravitatis febris diaphoreticis insistendum est. Sentit quidem Archibaldus Pitcarnius^(a), sanguinis partem quamlibet, & humorem quemcunque in quamvis naturam cogi, mutarique, uti supra indicatum fuit; sed hoc concessio, non sequitur, quemvis humorem per quamlibet sine discrimine viam eijciendum esse, negligendamque inquisitionem qualitatis humoris, ad inveniendum aditum aptiorem ejectioni. Incertum enim est, an per instrumentum vacuationis tam brevi tempore queat excernendus succus assumere naturam accommodatam destinatae excretionis viæ. Alius enim humor aptior est natura sua ad insensibilem vacuationem, alius ad sensibilem, & hanc per diversos aditus factam; sicuti apparet ex natura victrice, quæ subactum hostem, modo per vias sudoris exterminat, modo urinæ, modo alvi, modo etiam per plures aditus, si diversi sint humores.

Situs expellendi humoris admodum opportunus sudori eundem suadet; si nimirum articulos occupat, vel interjacentium partium interstitia: quo nomine frequenter in doloribus gallicis eas partes male multantibus laconicum usurpatur, materiam lentam, viscosamque citius extracturum, quam evacuantia per alvum, propter brevior viam a carnibus ad externa foramina, quam ab illis ad intestina; quo nequeunt infesta traduci, nisi de integro venas ingrediantur, perque medios alios humores viam inveniant. Neque opponas, sudore alvum elici tenuiora, & liquidiora; atque in vasis sanguiferis, lymphaticisque uberem feri copiam contineri, materiam sudoris abunde suffecturam, absque solutione, & commotione crassæ exterioribus partibus

(a) *Dissert. de Curat. Feb.*

tibus adhærescentis. Concedo, in sudore semper quod fluxum magis est, liquidumque emanare, neque posse viscosos succos per meatus tam angustos facile propelli, nisi prius incidantur, atque eliquentur; quo nomine ad sudorem perducendis ægrotis decoctio Salsæ, Guaiaci, aliaque dissolventia porriguntur. Profecto liquidiora ad cutem incitatus feruntur, parsque sanguinis aquosa accurrit, tamen hac per iteratas sudationes imminuta, ipsaque natura adjuvante, crassius lentiusque nocens diffunditur, fitque sudor. Ejus quoque excrementi depulsionem adjuvat locus ipse exterior, in quo continetur; cujus opportunitate admotus calor suis viribus integris in illud agit, resolvitque; & quidem resolvi posse, ipsa experientia in podagricis frequenter ostendit, quorum humores quamquam crassi per modum vaporis naturali calore dissipantur.

Ratione itidem situs humor in cutem effusus, eamque, vel pustulis asperans, vel aliter infestans, sæpe sudationem exposcit; qualis est humor Scabiei effector, cui abigendæ post intimum corpus expurgatum, modo sicco, modo humido calore pro diversitate temperamenti, & Scabiei prodest sudorem elicere, ad materiam cuti affixam insensamque dissipandam. Balneum tamen videtur accommodatius generatim ad corrigenda cutis vitia: de quo ita sentit Celsus^(a), *Fereque adhibetur, ubi summam cutem relaxare, corruptum humorem evocari, & habitum corporis mutari expedit.*

Spontaneus quoque motus humoris ad cutem demonstrat potius hanc, quam aliam viam evacuationis tenendam, juxta celebre Hippocratis consilium, quo natura vergit, eo ducendum esse; dummodo indigeat adjumento, nec opus sola absolvere possit. Comperta in febribus acutis naturæ propensione ad sudorem, inchoantis, non per-

(a) Lib. 2. cap. 17.

perficentis conatum, eum stimulamus: & idcirco eam inclinationem inter indicantia sudoris reposui; quia inde docemur, subesse humorem paratum ad eam rationem excretionis.

C A P U T IV.

De Impedimentis provocandi Sudoris acceptis ab rebus naturalibus, & non naturalibus.

SUdor efficacibus instrumentis per plures dies conjunctim motus, vires extenuat, uti aliæ vacuationes ingentes; & hoc etiam titulo magnis remediis repetitionem sudoris pluribus diebus continuis factam adnumeravi: cuius proinde impedimenta, uti feci in aliis magnis auxiliis, expendam. Id tamen commodi præ pharmaco purgante habet sudatorium externum, quod apparentibus inditiis, inde vires accidi, statim illud amovere licet, & amoto cessat sudor: ceterum porrecto cathartico nequimus ex arbitrio moderari, & debita festinatione compescere vacuationem, si supra indigentiam, viresque contingat. Verum enim vero antequam destinemus ægrotum ad sudorem, virium quantitatem diligenter æstimare oportet, cum præstet, earum infirmitate provisa id curationis genus non suscipere, quam susceptum paulo post, vel statim relinquere, non sine ægrotantis incommodo, & sine confessione rei non satis meditata. Quæ igitur differui de imbecillitate virium respectu aliarum insignium vacuationum, valent etiam in factam per cutis spiramenta. Animadverto tamen, impedimenta sudatorii non esse communia humido siccoque; sed quædam opponi sicco, non humido; aliaque humido, non sicco; itemque diaphoretica interna non

patere iisdem offendiculis, atque laconicum, balneum, aliaque externa. Sic inter varias hominum temperaturas sudori sicco calore ciendo calida, & sicca, affluensque biliosis succis multo minus opportuna est, quam eidem excitando humidi caloris ope, imo temperamentis impen- se biliosis nunquam laconicum adhibendum est.

Ex habitu corporis capiuntur inditia proclivitatis ad sudorem, vel repugnantiae, & inde argumentum illius deliberandi, vel omittendi. Sic habitus corporis mediocriter laxus paratus est sudori, quem temperato calore ex facili fundit, nec exponitur incommodis vehementioris, quæ pati cogeretur habitus densior, si sudatorio tentaretur; in quo temperatus calor parum efficax esset ad effectum, intensior periculosus, & nihilominus fortassis non satis efficax. Hos vero habitus, quorum iudicium ab ulla sensibili qualitate non proditur, non melius aliunde cognoscimus, quam ex difficultate, aut proclivitate per sanitatem ad sudorem, qua cognita, quod expedit, consulto decernitur. Præter habitum corporis, sunt aliæ intimæ causæ ingeniæ, nostram effugientes cognitionem, & sudoris stimulos, utpote impossibilis, prohibentes; qualis est indicata a Plinio asserente, quosdam concretis ossibus, & sine medullis vivere, qui neque sitim sentiunt, neque sudorem emittunt; quibus sane non solum inutile, sed noxium quoque foret sudoris irritamentum.

Ætatis consideratio, quæ in phlebotomia, & purgatione deliberanda, omittenda non est, utilitate quoque non caret in consultatione de movendo sudore; qui tametsi minus frequenter hodie in usum vocetur, quam antea actis temporibus, tamen pro data occasione negligendus non est, neque caret optabili commodo, uti apparet ex usu frequenti balneorum apud Antiquos, hisce vel pulverem, for-

fordeſque abluentes, vel ſudorem evocantes: ex qua conſuetudine aliqua non ſuperflua colligam. Satis apertum eſt, pueros indigos humidi ad ſuum temperamentum ſervandum, non eſſe ſiccis inſtrumentis ad ſudorem cogendos illi ætati augmento caloris, & humiditatis abſumptione inſenſis: quas noxas non importans calor balnei, ſi ferat occaſio, vel pueris convenire poteſt; nec incongruum duxit Galenus^(a), qui vel infantes a balneis ſalubrium aquarum non arcuit. Quin etiam Avicenna^(b) pueros frequentius in balneum demittit ante ſextum annum, quam deinceps: & Celfus prius Galeno, & Avicenna in pueris calidam lavationem adprobavit. De Senibus vero hæc eſt animadverſio. Ultimum ſenium degentes non ſolum effæta vires laconico eximunt, ſed propenſio levi quacunque de cauſſa ad maximas mutationes; qua conſideratione Galenus aſſerit,^(c) difficillimum eſſe, frictions in ſenibus ſalubriter peragere; eodemque nomine longe periculoſiorem iudicat ingentem, ſiccumque calorem: imo ſenes raro in balneum demittit ob virium infirmitatem, etſi antiquitus reliquo vitæ excuſſu crebra foret illius adminiſtratio. Aliæ ſenectutis partes, viridis, & media multo paratiores ſunt ad ſudorem ſuſtinendum, eoque magis adprobatione Celfi^(d), ſi humido calore balnei ducatur; ſoletque de media ſenectute dici:

Ut lavit ſumpſitque cibum, det membra ſopori.

Hiſce offendiculis ætatis, ſive ſenilis, ſive puerilis minime obnoxia ſunt ſudorifera interna, quæ ſolent febricitantibus exhiberi ad promovendum ſudorem imperſecte motum a natura, vel ad movendum propendente.

Prægnatio ſudori eliciendo non obſcure repugnat, po-
tiffi.

Ff 2

(a) *Lib. 1. de Sanit. tuen. cap. 6.*

(b) *Lib. 1. ſen. 3. doc. 2. cap. 4.*

(c) *Lib. 5. de Sanit. tuen. cap. 4.*

(d) *Lib. 1. cap. 3.*

nausea
sub
artu
ijand
rida
cto
ui
on
 tiffimumque excitato calore, vel balnei, vel laconici, al-
 teriusque exterioris stimuli, & præ ceteris balnei; quod
 Avicenna in prægnantibus exsecratur tanquam effica-
 cissimum ad instigandum abortum, & calore, & mul-
 to magis humiditate laxando partes, attento, uti opi-
 nor, more Majorum, qui prope partum demittebant
 mulieres in balneum, quo citius, & felicius expediren-
 tur. Interna quoque calida, & acria periculo non va-
 cant, ut pote quæ, dum impetum in totum sanguinem
 faciunt, oraque vasorum, nequeunt, quin pariter vim
 inferant foetui, quasi cuidam matris parti. Non ideo
 omnem conatum ad sudorem in gravidis abduco tanquam
 necessario abortivum. Fateor periculosum esse, & so-
 lum ex forti occasione tentandum, sed abortionis cer-
 tum incitamentum non existimo, qui pluries vidi, agre-
 sses prægnantes ex villicis laboribus & insolatu, largo
 sudore sine abortione diffluere. Haud me latet disparem
 esse rationem de prægnante sana, atque morbo conflicta-
 ta, & hanc promptius offendi ab incurso causarum, qui-
 bus sana resistit; tamen ex sudore, quem uberem sana
 prægnans innoxie fert, haud temere colligitur, posse quo-
 que ægotantem ad sudorem perducere, si cetera consentiant,
 absque metu abortionis tam vehemente, ut tentamentum
 idoneis instrumentis peractum impediat. Revera Grego-
 rius Horstius asseverat, se foeminæ viginti quatuor anno-
 rum, quinto prægnationis mense decoctum Guaiaci sudoris
 promovendi gratia commode propinasse, quæ laborabat
 Rhagadibus, & fissuris ulceratis in partibus obscenis, cum
 maligna ulceratione oris, nocturnisque artuum doloribus.
 Pariter non refugerem ab aliquibus internis diaphoreticis in
 gravidarum acutis morbis ad motum naturæ cutem versus

inchoatum urgendum, animos fumens ex irritō sæpe conatu impudicarum mulierum ad foetum immaturum extrudendum usu acrium, & calidorum: quo tamen confugiendum non cenſeo, niſi ductu gravis conjecturæ de futura utilitate.

Hæc pauca res naturales apertiora ſudoris impedimenta ſuppeditant, nec plura non naturales. Aere impenſe calido, aut frigido ſudorem ducere tutum non eſt, alio tamen reſpectu contradicente frigiditate, alio caliditate. Summa hyeme ſæviente, omnia exterius denſa ſunt, conſtipata, humores frigidi craſſique, nec ad cutem vergentes: quo tempore, ſi ſudori movendo des operam, opus eſt ingenti calore, quo clauſa reſeres, craſſa, denſaque tenues, fluxa facias, atque e viſceribus contra naturæ propenſionem in corpus externum perducas, cum ingenti ægroti mutatione periculo non carente. Obſervat Hippocrates ad imperandam dejectionem, vomitionemque, quo ſingulis tempeſtatibus inclinent humores, & qua facilius expelli queant. Cur igitur hæc negligemus educaturi ſudorem? Anne inter ſyrios ardores ex arte ægrotus in laconicum ducetur? quo nempe tempore caloris vehementia ſanguini ſuarum qualitatum mediocritatem aufert, copioſoque ſpiritus virium fulcimentum diſſipat abſumitque vigorem ad ferendum impetum fervefacientis remedii. Licet autem quo calidior aer eſt, minus requiratur igneæ virtutis, tamen quodlibet ficci caloris additamentum magnæ ambientis aeris caliditati, & ſiccitati ſuſpectum eſt; provideque Venetiis non media æſtate, ſed vere gallica tabe pollutis publice hypocaustum paratur: imo ipſum balneum ex mente Galeni, aliorumque non ſumma æſtate, ſed incipiente balneum ipſum adminiſtratur. Verum neque hyeme, neque æſtate uti timerem internis ſtimulis ſudo-

sudoris in manifesto , nec perfecto afflictæ naturæ nisi ad eundem .

Ceterarum rerum non naturalium, quæ sunt, cibus, & potus, motus, & quies, somnus, & vigilia, excretio, & retentio, animi perturbationes, aliquæ in totum prohibere valent sudationem, aliquæ duntaxat retardare. Sic corpus recens cibatum, neque balneo, neque laconico agitandum est; ne coctio impediatur, cruda in venas rapiantur. Cum autem sudor educendus validas vires requirat, non recenti exercitio corporis fatigatas, post aliquot horarum quietem adhibendum est sudatorium, non tamen statim post somnum; quo tempore nondum humores totum corpus æquabiliter irrigant, nec ad exteriora delati sunt. In excretis, quantum huc attinet, tantummodo considero lunarem purgationem foeminarum, dum rite procedit; in retentis, alvi feces. Menstruis ex naturæ instituto erumpentibus balneum incommode administrari, liquet ex Sene docente, inde sanguinis fluxiones concitari: quare menstrualis mulier ex illius usu posset incurrere in immoderatum, difficilemque suppressu effluxum, additis naturæ intempestive calcaribus. Hoc nomine Senex balneum vetat, quibus sanguis e naribus ad indigentiam fluit; idemque imperat, quibus ex eodem loco pro indigentia non fluit. Sin autem effluvium lunare prohibet humidam sudationem propter metum illius ultra modum concitandi, quis idem absicca multo magis non metuet? Porro alvum præter morem sese non exonerantem prodest ante tentamentum eliciendi sudoris, clystere, vel glande ad suum munus provocare; quo nihil impuri e primis viis interiora subeat. Demum in animi perturbationibus, si vehementes sint, præstat motus componere, sedare tumultus, quam calore sudationis irritare.

C A P U T V.

De Impedimentis Sudoris ab affectionibus præter naturam acceptis.

Morborum complexus, in quo sæpe Medicus suspensus hæret, decreturus de aliis magnis remediis, non minorem difficultatem obtendere potest in administratione sudatorii, poscitque, ut summa capita affectuum prosequar illius usus oppositorum, uti executus sum agens de venæ sectione, & utraque purgatione. Galenus, unde tot salutaria documenta in Medicinam fluxerunt, plura enumerat balnei offendicula, omnem phlegmonem, vel huic similem affectionem, abundantiam ad vasa, vel ad vires, viscerum primæ notæ debilitatem, crudorumque humorum copiam in primis venis: quæ omnia non minus balneo, quam laconico adversari palam est. Quis prudenter cogitet in phlegmone, similique affectu a calore producto de movendo sudore validis auxiliis, quæ novum calorem accendunt, priorem non restinguunt? Hippocrates^(a) sane in quadam differentia Pleuritidis balneum præscribit, sed postquam abscessus ruptus est, neque magna febris urget: unde indicatur declinatio morbi, non principium, aut status. Multas quoque idem auctor proponit balnei utilitates in Peripneumonia, sed, uti cum Vallesio interpretor, usurpati in declinatione, uti dictum est in Pleuritide: ceterum administratio balnei in hisce morbis nostris temporibus desuevit, videlicet, uti reor, propter corpora illi non assueta.

Multitudo succorum non permittit sudationes, si magna

(a) Lib. 2. de morbis.

Phle
Ple
Cud
Jeb

gna est, ne calore incitati, nimiumque rarefacti, vel aliquod vas diffringant, vel alium morbum incutiant. Cum vero magna non est, ceteris consentientibus, sudore commode tollitur, eodem Galeno docente, balneum, corporis exercitationem, aliaque lente vacuantia inservire plenitudini non insigni adimendæ.

Imbecillitate partium principalium, cujusmodi est cerebrum, pulmo, cor, ventriculus, aliæque ad vitam tuendam maxime necessariae, non immerito Galenus balneum prohiberi sanxit, & multo magis laconicum prohiberi sentio. Utrumque commovens, liquansque excrementa, occasio est, ut commota liquataque decurrant ad partes paratiores ad recipiendum, cujusmodi sunt valde imbecillæ, promte ab incursum caussarum alterantium detrimentum capientes. Hinc collige, exceptione indigere præceptum Celsi^(*) jubentis, in Hydrope cujusque generis, si nondum nimis occupaverit, provocari sudorem arena calida, vel laconico, aliisque siccis sudationibus, quibus frequenter in hoc morbo Prisci utebantur. Comprehendit id præceptum omnes Hydropes incipientes, cujuscumque generis sint; quorum tamen curationem non semper sicco calore celebrandam esse, congruenter ad superiora existimem. Plurimi ex sententia Galeni pro certo tenuerunt, semper in eo morbo, primario, vel secundario jecur male habere, & imbecillum esse; de quo non disputo, sed tantum assumo, quod extra controversiam est, posse aliquando Hydropem ex obstructione jecoris, vel alio vitio originem trahere: quod si eo devenit, ut partem multum labefactaverit, etiam principio illius fortem sudationem non permittit propter expositam rationem. Sunt etiam quædam viscerum vitiositates, eo respectu impedi-

tes

[a] *Lib. 3. cap. 1.*

tes irritamentum sudoris, quod effusionem impossibilem efficiant. Ut enim doctissimus Fernelius animadvertit, jecore, vel liene, vi morbi, vel ætate admodum arefacto, vel magna obstructione, aut Scirrho impedito, nulla vi, ne per febres quidem sudor elici potest, etiam si reliquum corpus humore multo perfunditur, quemadmodum in Hydrope. Quotiescunque igitur hisce impedimentis ea viscera tenentur, quicquid sudorem ducere idoneum est, frustra admovebitur, nec plus humoris ex corpore, quam aquæ ex pumice eliciet; frustra que viscera, totumque corpus laceffet, percelletque.

Aliud obstaculum sudoris cum Galeno constituo crudorum copiam in venis circa primam regionem stagnantem; quæ, trahente sudatione humores ad cutem, in venas majores raperentur, sanguinem inquinarent, obstruerentque exiguos meatus, partemque debilem, si qua foret, magis infirmarent. Pauci vero ab ortu tantum roboris traxerunt, ut omnes partes ex æquo firmæ sint, nulla debiliior. Raro quisquam, inquit Celsus^(a), non aliquam corporis partem imbecillam habet. Crudorum ubertas in dictis venis subsistens nullo valido instrumento agitata est, non humido, non sicco calore, non vehementi corporis exercitatione, non calidis impense diaphoreticis: eidemque methodo subjicitur abundantia humoris aliter vitiiati easdem partes insidentis; e quibus cum possit per alvum, aut per vomitum compendiaro excerni, cur longiore via ad cutem traducetur? Hac ratione Hippocrates^(b) arcet balneo fastidiosos, nauseabundos, biliosumque vomentes tanquam crudos, aliove pravo humore prima regione scattente. Itidem si crudi succi, aut alia exotica qualitate nocentes toti sanguini intermixti copiose forent, fortia sudoris

G g

(a) *Lib. 1. cap. 3.* (b) *Lib. 3. Acut.*

*Crud
hum
in pu*

*H
pu*

doris irritamenta abdicanda sunt. Immaturos succos idoneos coctioni, & mutationi in probum sanguinem ad hunc statum quiete, tenuique victu redigere oportet, neque cum detrimento agitare. Alios vero humores, qui non cruditate tantum negotium facessunt, sed prorsus inutiles sunt, nec emendabiles, si copiosi sint, aliis vacationibus apte minuuntur ante sudorem excitandum. Magna vel probi sanguinis copia, ante laconicum, vel solium auferenda est, quo minus calore incitata perniciosum motum obeat; idemque procul dubio non minus metuendum est ab affluentia impuri, noxiique humoris. Cum igitur Hippocrates^(*) sumpturis Helleborum, balneum præscribit ad obtinendam commodiorem purgationem, intellige cum Vallesio in ejusdem loci expositione, nomine lavationis irrigationem, & fotum hypochondriorum, non usum balnei universalis ad sudorem usque. Si enim, quibus destinatur helleborum, pravis succis abundant, ut assumere licet, non convenit lavatio universalis effectrix sudoris.

Exposita trahendi sudoris offendicula non solum externis, sed etiam internis diaphoreticis opinor esse communia, si valida sunt, impenseque calida, non ea, quæ a Neotericis alchalia vocantur, nisi fallor, sola imaginatione ad sudorem apta. Tamen nonnulli Recentiores in curatione Pleuritidis, neglecta venæ punctione, propinant validos stimulos sudoris, illapsam, uti credunt, materiam cito discussuros, unoque velut ictu tam periculosum morbum obtruncaturos. Confidunt, sanguinem novo impetu a calore diaphoreticorum recepto non esse fluxurum copiosiore in partem inflammata cum augmento inflammationis, sed solum portionem illapsam attenuatum iri, perque cutem dissipatum. O spem quanto magis vanam, tan-

to

(a) Lib. 6. Epid. sect. 5.

to perniciosiorem ! Provoco ad experimentum factum in pauperibus ægrotis , consideratumque ab Sydenhamo . Quædam nobiles mulieres in Anglia , nulla præmissa sanguinis detractiōe , aut purgatione initio febrium pauperibus ægrotis porrigunt robusta medicamenta ad sudorem acciendum , quibus , ut se observasse Sydenhamus testatur , cruda materia , nec coctione subacta in membranas cerebri , vel costarum impellitur , novus , deteriorque morbus creatur . Quanto magis igitur timendum erit incrementum phlegmones ab eisdem medicamentis in principio fluxionis ante ullam revulsionem , derivationemque venæ apertione obitam propinatis ? Multo sane tutius curat Pleuritidem Vvillifius , aliique , qui omnia calida , acria , & aromatica , spirituque vinoso prædita interdiciunt , solaque permittunt blande sudorem , vel urinam provocantia .

Multas febres sponte sudoribus evocatis subigi , frequens docet experientia ; itemque multas ab Antiquis humido sudatorio , cui erant assueti , curatas fuisse accepimus , nimirum diarias , lentas , ipsasque inflammationes internas declinantes , uti supra ex Hippocrate vidimus . Alio etiam pacto in febribus Celsus sudorem urget , si videt paulum tempora , aliasque corporis partes madere , dans potui aquam calidam , ægrumque sub multa veste continens . De internis vero irritamentis sudoris in pluribus febribus porrigendis nulla est controversia , dummodo tempestive porrigantur , appositeque ad febris , ægrotique conditionem . Ceterum multo efficacior ratio est ducendi in febribus sudoris tradita ab Celso , quam lapis bezoardicus , Antimonium diaphoreticum , aliaque hujusmodi inventa ab Recentioribus , inanes plerumque voces . Sunt tamen aliquæ febres , nempe hæcticæ ; quæ sicuti alias vacuationes respuunt , item factam per sudorem absumentem humi-

dum, quo laborantes indigent, non redundant, & hoc nomine perducuntur ad balneum aquæ dulcis, sed citra sudorem. Porro febribus omnibus assas sudationes adversas esse inde liquet, quia novum calorem accendunt, veterem non restinguunt, adaugent siccitatem, quam solet parere febris, agitantque vehementius humores. Occurrit tamen novum febris genus Veteribus ignotum, post ortum morbi venerei excitatum, de quo pauca separatim agitanda censeo. Morbus gallicus sæviens in artubus, varias corporis partes exulcerans, affligensque, hypochausto sæpius edomitus invitat ad quærendum, utrum febris indidem orta idem remedium recuset, an petat. Febris non solet esse symptoma luis venereæ, imo ex animadversione Fernelii^(a), identidem eo viru interiores, exterioresque partes ita putrescunt, ut exesæ, quasi laceratæ decendant sine ullo febris indicio. Interdum tamen eum morbum lenta febris consequitur, eandemque habet originem; quo respectu hanc febrem novam vocavi: sed adverto, non omnem lentam, qua venereo viru perculsus aliquando corripitur, ab eodem accendi, affirmante Fernelio, se vidisse, non nunquam restinctam esse lentam febrem, permansisse gallicum affectum. Joannes Fortis lentam febrem, & ad vesperam ingravescentem, qua premebatur juvenis annorum circiter 21, ex morbo calidius sicciusque temperamentum adeptus, & catarrhis obnoxius, appellat hecticogallicam, asseritque produci magis ab occulta putredine, quam manifesta; clarius dixisset, ab ignorata causa. Quam igitur febrem gallicam vere appellabimus? Illam certe, quæ ex bubone gallico producitur, vel ex eodem humore venenoso sese altius in sanguinem insinuante, totum polluyente, praveque fermentante; de illo loquor humore, qui

(a) *Lib. 2. de abd. rerum caus. cap. 13.*

qui alias ad articulos devolutus acri dolore exercet, alias ad cutem effusus variis pustulis, & crustosis ulcusculis defœdat; aut certis partibus affixus eas exedit; aut in dura tubercula extollit. Assume igitur, febrem ab hac colluvione sola prognerari. Adversabitur ne sicco calori lœconici? Si lenta sit, neque vires admodum dejiciat, adversari non opinor, considerata ejusdem causa, quæ crassa oppido est, contumaxque; nec apta ad concipiendum celerem, vehementemque motum: & proinde Joannes Fortis in descripto juvene non timuit usum hypocausti quarto quoque die repetitum, tametsi ex morbo lapsus foret in temperamentum calidum, siccumque, & febricitaret. Veruntamen nihil præclarius meam opinionem confirmat, quam quod evenit in Xenodochio Insanabilium Venetiis, in quo mense Aprilis plures ex saniosa venere tabescentes committuntur hypocausto ad sudandum, & inter istos etiam ii, qui ex eodem morbo febricitant, dummodo febris lenta sit: observatumque pluries est, eam post aliquot dies effusi sudoris imminui. Interdum tamen oppositum evenit, febris invalescit, cogiturque ægrotus inceptum deferere: quod non uni causæ imputari potest, sed potest præsertim conditioni caloris hypocausti, quæ propter multitudinem ægrorum nequit accommodari singulorum temperaturis, & indigentia; sicque evenit, ut adhibito intensiore calore febricitanti, cujus temperaturæ remissior debebatur, inde febris incrementum capiat.

Paralyfis aliquando est impedimentum sudoris, indicans aliquando, & utrumque comprobat experientia, qua constat, eum affectum sudore in aliquibus superatum fuisse, in aliis confirmatum, adauctumque. Unde quæso tam diversi effectus ejusdem remedii in eodem morbo? Hanc diversitatem attribuit Vvillsius dissimili sanguinis naturæ.

No-

Cap
Xen
ven

Paral

Nocent , ut ait , sudationes , quibus insunt copiosæ particulæ efferæ , exoticæ , fixioresque , atque ad exhalandum inhábiles , quæ incitante calore efferatiores evadunt , ac subinde in cerebrum , nervosumque genus uberius delatæ obstructions veteres sæpe adaugent , & non raro novas producunt . Ex opposito conveniunt , quibus sanguis sale , & sulphure fixioribus minus refertus est , seroque lim-pido , infulsoque magis dilutus . Mihi tamen videntur esse clariores causæ , cur aliis paralyticis proffit sudor , noceat aliis . Paralysis interdum producitur sine prægressa cerebri offensa , & imbecillitate ; hac prægressa interdum oritur ; atque ab hisce initiis ortam si quis conetur sudatione curare , opponitur supra stabilitis , illam arcendam esse ab ægris , quorum pars aliqua principalis non levem noxam patitur , ne plus ingerat in partem affectam , quam inde excutiat , geminetque obstructionem : qui sinister eventus timendus est maxime in principio fluxionis ante necessarias revulsiones . Existimo quoque , paralyticis sudorem noxie interdum educi , quod parte humorum aquatior vacuata , crassior lentiorque remanens fit difficilior solutu ; idque contingere putem ex sanguine lentescere parato , qualis est melancholicus . Porro in Paralyti orta sine gravi cerebri læsione post cohibitum illapsum humoris , qui parti inhærescit , commode sudore discutitur , uti non infrequenti comprobatur experientia . Ita curatæ Paralyseos inter plura exempla tacite non præteribo , quod narrat Petrus Forestus^(a) . Quidam Juvenis , cum sudarium expectaret ab Arnasia in cella vinaria loco humido , membrorum resolutione affectus est : cui sanandæ cum alii Medici frustra adlaborassent , quidam ægrum prope furnum in lecto positum foliis nucum in furno calefactis , linteolisque

(a) *De Cere. Mor. Lib. 10.*

lisque inclusis cooperiens ad copiosum sudorem perduxit ; quo resoluta est causa morbi , restitutaque salus . Causa Paralyseos , uti par est credere , fuit & retenta insensilis perspiratio , cujus magna pars aquosus humor est , & imbibita nervis musculisque extranea humiditas , non capitis vitium , & prægressa imbecillitas : quare sicca sudatio tollens humidum extraneum non scatens ab affecto cerebro consulto adhibita fuit , & cum successu . Interdum causa resolutionis , ut advertit Avicenna^(a) , consistit in solis ramis nervorum , ibidemque generatur a pravo alimento partium , non a cerebro depluit : quæ pariter sudore recte curatur saltem excitato in ipsa parte affecta . Qualitas pariter humoris producentis Paralysem mutat sudoris effectum , efficitque , ut is aliis noceat , quem alii beneficum experti sunt . Contendit Rondeletius , humorem melancholicum , & biliosum esse non posse in causa Paralyseos , ut pote inhabiles ad tollendam naturalem constrictionem nervorum , & musculorum , cujus ablatio Paralysis est . Verum enim vero ejusdem morbi curatio facta in aliquibus ægrotis per humectantia evincit , ab opposita qualitate eum morbum progenerari posse , ideoque ab humoribus ea qualitate perfusis . Narrat Trallianus^(b) , quemdam in Paralysem ex mœrore incidisse , deinde sumpta hiera adeo læsum , ut totus immobilis fieret , & propemodum interiret , nisi in contrarium mutatus fuisset , & humectantibus omnibus tum potibus , tum cibis , & aliis , quæ temperatum ipsum redderent , usus fuisset , maxime vero balneis cum pluribus unctionibus ex hydræleo . Porro Fernelius^(c) habet pro certo sæpe a flava bile Paralysem infligi , cum sub finem intermittentium febrium in spinam dorsi , ac in nervorum origi-

(a) *Lib. 3. Fen. 2. tract. 1. cap. 13 , & 5.* (b) *Lib. 1. cap. 6.*

(c) *Lib. 5. cap. 3. de Part. mor. & symptom.*

origines illa effunditur. Itaque Paralyfim ortam a dictis causis præclare vides opponi sudationi præsertim siccæ, efficacissimæ ad morbi fomitem adaugendum, non minuendum.

Paralyfis, ut expositum est, aliquando recusat sudoris educationem, tremor semper; si stemus sententia Celsi^(a), qui neque humidam, neque siccam sudationem in eo affectu permittit. Hæc duo tamen symptomata adeo affinia sunt, aut creduntur a Riverio, aliisque nonnullis, ut eandem amborum curationem proponant, contra quam Celsus decrevit. Nequeo tamen, quin mirer, Riverium unam eandemque medicationem utriusque affectionis constituere, quasi utraque haberet unam eandemque effectricem causam, cum tamen ipse multiplices dissimilesque tremoris causas assignet. Celebris est, & communis sententia, Paralyfim progigni ab obstructione nervorum, sed tremoris multi multas diversasque causas producant, inter quas obstructionem partem aliquam influxus spirituum animalium, non omnem prohibentem; per quam tremor proludium, initiumque Paralyseos existimatur, eandemque istius medelam exposcere. Verumtamen Celsus sine ulla causarum distinctione petitam sudoris effusionem in tremore rejicit, minime in Paralyfi, lveritus, ut opinor, ne dissoluti, jactatique humores decumbant cum majori pernicie in partem imbecillam affectamque. Tutior etiam mihi videtur in eo morbo sudoris abstinencia, quod violentius eductio petat fortiora remedia, quam ut causa morbi requirat; quam proinde Celsus solis frictionibus, inunctionibus, & corporis varia exercitatione dissolvere conatur, non fortibus, quibus Paralyfim aggreditur oppugnare.

(a) Lib. 3. cap. 27. Al.

Alvi solutio, & compressio ab Hippocrate recensentur inter impedimenta balnei, & proinde sudoris quomodo-
cunque provocati. Alvi tamen suppressio potius retardat,
quam impedit nifum ad sudorem, ex facili amovenda cly-
stere, vel alio laxante, nisi prima regio multis sordibus
polluta longiorem operam exposcat. Pleno alimentis ven-
triculo, monitu Senis^(a) lavandum non est, multoque mi-
nus, si repletur excrementis. Sed hæc satis manifesta. Al-
vus vero fluens, quo nomine incommodat administratio-
ni balnei, sudorique movendo? Namque Celsus^(b), alvo
soluta permittit quidem unctiones antiquis familiares, sed
citra sudorem. Ratio non longe petenda est. Eodem tem-
pore oppositi motus concitandi non sunt, si alteruter sa-
lubrior creditur, quo minus utilior ab altero interpelletur:
ideoque natura se se utiliter exonerante per alvum, non est
admovenda sudatio, humores avocans a centro ad cutem.
Illud etiam incommodum, animadversione Vallesii, ve-
rendum est a balneo ventre fluente; quia, si copiosius
est excrementum, quam ut possit per cutem educi, liqua-
tis succis, laxatisque magis viis, spontaneæ vacuationis
modus pervertetur, perversoque inopinata incidere pos-
sunt, pariter metuenda, imo magis a sicco sudatorio in eis-
dem circumstantiis usurpato. Itidem materia fluxus non
a venis manante, sed sola prima regione, aperte cernis,
non esse movendum sudorem, nisi prius colluvio fluxum
pariens evacuata fuerit. Quamquam fluxus ventris incita-
tus a purgamentis primæ regionis, vel a toto corpore,
salubriter agente natura, obstat administrandis stimulis
sudoris; tamen ab aliis causis ortus, aliquando sudore cu-
ratur, abducta per cutem materia in ventrem delabente,
eumque insalubriter solvente. Plinius pluries mentionem
facit

H h

[a] *Lib. 3. de rat. vic. acut.*[b] *Lib. 1. cap. 3.*

facit de alvi fluore progenito a Rheumatismo, quem opera balnei curari jubet, exigentis per ambitum corporis causam fluxionis: idemque remedium egregie commendat Galenus^(*) ad eandem affectionem auferendam: sed utriusque consilium dirigo ad fluxum alvi non provocatum a quicquiliis primarum viarum, sed a causa morbofa late per corpus fusa, sine spe levaminis ex fluxu consecuturi. Admoneo insuper cum Galeno, non cuicunque ventris solutioni balneum opportunum esse, sed tantum lentæ, non celeri, & copiosæ, quam illud, fufis humoribus, laxatisque viis, impelleret: quæ tamen incommoda ab internis diaphoreticis minime impendent, vim laxandi non habentibus.

C A P U T VI.

An evacuanda per sudorem coqui debeant.

Communis est interpretatio, Hippocratem cocta medicari, & movere præcipientem, non cruda, nec in principiis, nisi turgeant, loqui de medicatione, & motione per pharmacum expurgans, non per phlebotomiam, quippe valde diversam ab expurgatione, tum ratione humoris, quem eduxit, tum modi educendi, ideoque illi præcepto exemptam. De sudore non eadem est ratio, atque phlebotomiæ, & jure dubitari potest, an ea lege sudorem moventia ante coctionem prohibeantur, generatim Sene vetante motionem, sine qua, eaque valida non potest sudor provocari. In hac quæstione prolixior non ero, finienda ex diversis usibus, & morbis, propter quos sudor elicitur. Quotiescunque animus est, excernere
mate-

[a] Lib. 1. ad Glauconem.


materialiam per corporis ambitum sparsam, vel etiam in aliqua parte conclusam, sed a reliquis secretam succis, nulla requiritur coctio ante sudorem; cujus solum indigentiam parere potest evacuandæ materiæ confusio cum utilibus retinendisque succis; ut post eam facta secretionem, faciliior, utiliorque evacuatio contingat. Si materia jam est separata, quid expectanda erit separatura concoctio? Sin autem in venis excernendus humor concluditur aliis permixtus, universe decerni non potest, utrum expediat, necne, coctionem opperiri; rectaque deliberatio colligenda est ex morbi natura. Ut enim in aliquibus morbis expurgamus infensos humores nulla coctione expectata, item licet in aliquibus sudorem movere. In aliquibus tamen non licet, in quibus & peculiaris humor educendus est per vias sudoris, & sanguini immiscetur. Quippe sudatio noxiam materialiam cum delectu non evacuat, sed paratiorem ad effluendum, & obviam venientem; neque nocentem excernere potest, nisi a natura præparatam, & ab innoxia sejunctam, in ejusdem ejectionem ipsa conspirante natura. Hanc methodum per sudorem evacuandi ab ipsa natura docemur in febribus: in quibus communis Medicorum consensus judicat, spontaneas excretionem salutare esse, quando concocta materia contingunt, sive per sudorem fiant, sive per urinam, vel per aliam viam. Ad has naturæ leges intentus Galenus^(a), febres ex putredine humorum curaturus balneo, hoc duntaxat utitur post evictos, dispositosque humores; eundemque morem alii Prisci servaverunt. Porro Galenus in febre ardente, & tertiana exquisita etiam ante coctionis indicia balneum non incommodum existimans, respicit ad vim humectandi corporis, corrigendæque siccitatis humoris,

(a) *De Tab.*

ris, effectus impetrabiles absque sudore : idemque Galenus docet, conducibilius esse humectatione siccitatem flavæ bilis temperare, quam alio quovis modo evacuare. Video quid opponi possit ad probandum, non esse necessariam coctionem, ut sudor utiliter proliciatur, videlicet ejus materiam fluidam esse, & aquosam, propterea aptam effluere per poros cutis sine ulla præparatione naturæ, vel artis. Etiam Vallesius, qui pugnaciter tuetur, non esse commovendam, purgandamque materiam ante coctionem, subducit ei præcepto humores sero similes, tanquam minime coctibiles. Cum igitur etiam succi per sudorem amandandi eandem naturam participant, tentari poterit ille, nulla præmissa coctione. Veruntamen, qui hæc opponunt, distinguant oportet materiam proximam sudoris ab remota. Voco materiam proximam sudoris illam, ex qua sudor constat, habentem fluorem instar aquæ, quamvis sæpe aliarum qualitatuum participem. Materia vero remota mihi est illa, quæ proxime non potest in formam sudoris erumpere, sed naturæ præparatu indiget, quo possit sub ea forma exire. Cum igitur non in omnibus morbis, quod effluxurum est in sudorem, sit ultimo paratum ad eum effluxum, sed a natura parandum sit, affirmo, non in omnibus morbis esse conducibilem artis nisum ad eruendum sudorem, nulla expectata coctione. Iterum me converto ad febres, id documentum plane declaraturus, in quibus sudor earum initio scatens reprobatur ab Hippocrate, quippe manans ex causa morbosa, non ex salutari naturæ conatu ad eliminanda infesta, qui proinde nihil confert ad solutionem febris; confert vero plurimum præcedentibus coctionibus fusus. Cum autem eadem sit materia sudoris spontanei, criticique, & ex arte provocati, si natura eum salutariter expulsa præmittit

coctionem , ejus imitator eundem fructuose ducturus coctionem expectare debet . Quotiescunque igitur requiritur coctio , tametsi materia tenuis foret & fluxa , propter suum fluorem , & tenuitatem excipienda non est , atque ab communi lege subtrahenda , uti supra pariter constitui . Ex Veteribus autem adeo sollicitis de coctione hanc multi in solis febribus accensis a putredine humorum requirebant ; quorum sententia commendatur ex observatione eorum , quæ accidunt in febribus , nec in aliis morbis observantur . Porro lex præstolandæ coctionis contracta ad solas febres firmiter fulcitur , & paucioribus patet difficultatibus . Bisariam vero in febribus coctio fortunat sudoris expulsionem , disponendo materiam ad separationem , ejusque quantitatem minuendo . Dum enim natura coquit materiam , adjuta parsimonia cibi in febribus servari solita , non parum copiae detrahit , quæ postea diaphoreticis , sive , ut latine loquar , dissolventibus , securius agitur . Etenim vidimus , quam luctuosa sit eorum propinatio pauperibus Anglis facta principio febrium a nobilibus mulieribus , antequam ulla vacuatione petita , vel excursu morbi materiæ quantitas imminuatur . Atque hæc ad febres pertinent , in quibus majore opus est diligentia ad sudorem quocunque instrumento ciendum ; & necessaria est humoris excernendi naturæ præparatio , & coctio ; qua sola plures febres sponte sanari , non raro aspicimus . Hanc porro ea quoque ratione necessariam puto , quod interna diaphoretica , quibus in præsens tantum utimur , sine auxilio naturæ eandem evacuationem conantis , parum , vel nihil proficerent , idque auxilium natura post coctionem præstare soleat . In aliis tamen morbis , in quibus purgamenta continentur in venis , nec ea solent per coctionem ut in febribus superari , si cognoscimus conducibilem ex-
cre-

cretionem per sudorem, nec aliud adesse impedimentum, statim licet executioni mandare remedium. Sic repletis venis aquoso humore Hydropem efficiente, si præmissa convenienti purgatione permaneat morbus, quis coctionem illius, quam natura non aggreditur, opperietur, ut sudationem admoveat? Item in morbo venereo, si venenum late per sanguinem fusum est, multasque illius partes corripit, quis sudorem, aut alias vacuationes procrastinet, donec vincatur a natura, & separetur? quod scimus crassum esse, viscosumque, aliaque qualitate incomperta imbutum, neque per coctionem vincibile. Prodest tamen præmittere præparationem attenuantem & incidentem, adversamque veneno, cujusmodi creditur esse decoctio ligni guajaci, & falsæ parillæ; qua humor attenuatus promptius elicitur, & remissiore vi caloris. Idem etiam præparatus commodus est in omni humore vertendo in sudorem, eliminandoque, ejus crassitudine vacuationi obstante. Accidit enim in aliquibus morbis, ut nulla sit expectanda coctio humoris, qualis fit in febribus, ad molendam vacuationem, sit tamen præponenda artis dispositio ad eam felicius obtinendam.



D E
R E G I M I N E
MAGNORUM AUXILIORUM
In Curationibus Morborum

DISSERTATIO QUARTA.

CAPUT PRIMUM.

De usu Hydrargyri ad excitandam salivam.



Ultra salivæ excretionem movent, primumque medicamenta, quæ græce Apophlegmatismi vocantur, apta, uti creditur, ad pituitam in salivam redactam ex capite, & thorace proliciendam: de quibus in præsentiarum non agitur, ut pote magnis re-

mediis, de quibus est sermo, non adnumeratis. Debiliter, & duntaxat ad breve spacium reliqua sputum provocant præter Hydrargyrum, sive argentum vivum, quo nomine nullum aliud ejus operibus congruentius est, ceterorum remediorum effecta superantibus. Artubus indutum cito sese quoquoeversum insinuat, obvia multa attenuat, solvit, & secum in sublime rapit: ubi ore, & faucibus undequaque occupatis, per glandulas maxillares, vasque salivalia sibi viam munit, & secum raptis humoribus, quos copiosos, rivo continuo, longoque tempore effluere videas, uti cecinit Fracastorius^(a)

Lique-

(a) Syphil. lib. 2.

Liquefacta mali excrementa videbis

Affiduo sputo immundo fluitare per ora,

Et largum ante pedes mirabere flumen.

Non solum autem quantitate, continuatione, evacuationisque modo magnum remedium est hydrargyrum, sed plusquam magnum, ex gravibus symptomatis, quæ incutere aptum est: de quo propterea mihi grandia remedia pensitanti tacendum non erat; & postremo loco tracto, quippe serius invento, neque Antiquitatis suffragiis donato, saltem Hippocratis, & Galeni, unde tot opes Medicina acquisivit. Non eo usus est Hippocrates, non Galenus aperte fassus, se nihil circa mercurium tentasse, vel intus propinatum, vel foris admotum, quamvis haberet exemplum Antonii Musæ felicissimi Octavii Cæsaris Augusti Medici, qui hydrargyrum contra vermes periclitatus erat. Avicenna illud admiscuit unguentis ad Scabiem; item Paulus affirmat, concrematum, & potui datum esse ab aliquibus ad sedandos dolores colicos, iliacosque: neuter tamen tanquam insigne irritamentum sputationis usurpavit. Prima ejus indicia saltem mihi comperta extant apud Theodoricum describentem unguentum sarracenicum, memoratum quoque ab Arnaldo de Villanova, atque tradentem modum inunctionis, cum remediis ad oris, gutturisque asperitatem factam abundantia sputorum. Itaque ante veneream contagionem observata vis est fugacis argenti ad ducendam copiose salivam: cui fini postea usum frequentiore invexit ea contagio cum ingenti Mortalium commodo, admirantibus Medicis ejus remedii effectus magnos, singulares, & sæpe utilissimos, domitoresque morbi, aliis conatibus invincibilis; quod Fallopius eadem admiratione prosequitur, atque Magnetem. Revera supra cetera auxilia mul-

multum emeretur, nisi salutem inter dolores, minasque reduceret; quibus præstantissimi viri exterriti tam grande remedium pro pessimo veneno habuerunt, judicaruntque universa medicina exterminandum esse: quibus subscripsit doctissimus Fernelius, persuasus, periculosum esse malum, non expugnatorem. Quam opinionem rationibus impetere opus non est, quotidianis luculentisque experimentis ita clare convictam, ut neminem, vel admodum paucos in ea persistere jure autumaverim. Itaque licet a multis de recto mercurii usu, & præstantia in multis morbis curandis actum fuerit, tamen mihi Tironum utilitati studentis supervacuum visum non est, idem argumentum eo ordine tractare, quo cetera magna auxilia persecutus sum; quo tradita discipulorum mentibus clarius insinuantur. Prius tamen indagabo, quantum meo captui permittitur, qua vi, quove pacto tantam salivæ quantitatem mercurius educat, ob id admirabile vacuantis genus; deinde quos humores ad fauces impellat, mutetque in salivam; ut inde proclivius sit indicantia ejusdem, & prohibentia invenire.

Morbus gallicus, ut in Italia vocatur, vel foedis ulceribus cutem erodens, & pustulis asperans vim prodigiosam argenti æternum liquidi ad sputum eliciendum, nisi patefecit, saltem in usum frequentiore, amplioremque vocavit, exhibita similitudine cum rebelli, & ulcerosa Scabie. Nempe cum primum sævire coepit ea calamitosa affectio impuræ voluptatis poena, non correctio, nullaque suppeteret ad curationem via ob ignoratam novitatis naturam, Chirurghi, uti notat Fallopius, hydrargyro foedata membra inunxerunt, permoti ex contumaci Scabie eodem pluries propulsata: Tibique primo, Jacobo Carpen-

bo celtico subigendo, favente tuæ sagacitati fortuna, contigit experiri. O felix faustumque experimentum! quorum domesticam rem oppido adauxisti, cum Medicinam maximo remedio, tuumque nomen tam insigni beneficio immortalitate donasti. Arte prodita per irrequietum metallum eruendæ salivæ, omnem posteritatem adversus ferociam celticæ agrotationis munivisti, facemque successoribus prætulisti ad tot alios a Celtico morbos expugnandos, ut tuum inventum frequentia, & felicitate eventum in dies celebretur, promeritumque sit amplissimum sectæ rationalis assensum. Hujus ego professor tanti remedii naturam, & qualitates, ut meæ partes sunt, scrutari incipio, agniturus, quantum conjectura permittit, illius agendi modum in effusione salivæ, aliaque ad ejusdem usum spectantia.

Non levis inter auctores vertitur controversia de duabus primis qualitatibus Hydrargyri, frigiditate, & caliditate, consentientibus omnibus de humiditate, multis tamen falsa conjectura inductis, affirmantibus, iccirco hydrargyrum humidum esse, propterea quod duros tumores emolliat, perinde ac si id opus esset humiditatis, non alterius qualitatis. Assentior ceteris mercurii humiditatem, non tamen inde suusus, quod duros tumores emolliat, animadvertens, eo plura humidiora esse, quæ tamen neque brevi, ut ille, neque multo longiore tempore duros scirrhusosque tumores molles efficiunt, resolvuntque. Aliunde igitur petenda est resolutio tumoris, non ab intrusa humiditate, videlicet petenda ab insigni partium tenuitate, celeri penetratione, motuque valido concutiente, & atterente obstantia. Difficilior est quæstio de frigiditate, aut illius caliditate, quod alii constituunt duobus numeris frigidum humidumque, alii quatuor calidum humidumque. Enim vero de hisce numeris, gradibusque
arbi-

arbitrio magis, quam ratione definitis non disceptabo, solum inquiram, utrum in eo excellat frigiditas, an caliditas. Multa sunt pro oppositis partibus rationum momenta, multique clari nominis oppositarum propugnatores, inter quos Palmarius credit, se litem diremisse, atque frigiditatem præpollentem evicisse, pluribus in id collatis argumentis, & observationibus, non tamen tantæ efficacæ, quantam ipse existimavit. Montes, inquit, locaque omnia, testimonio Scrutatorum fodinarum, ubi delitescit vivum metallum, crassis densisque nebulis, nec in altum præ gravitate sublatis circumdari, ab æstate ardentissima pene nunquam aquæ penuriam pati, herbis viridissimis, tardeque senescentibus abundare, vix unquam flores fructusque edentibus; omnia evidentia frigiditatis, copiosæque humiditatis argumenta. Anne tamen Palmarius omnes fodinas circumspexit? An ne omnium una eademque facies est, omnium herbosa, & viridissima opulentia? Etiam in sterili solo, ut Plinius affirmat^(a), utriusque argenti vena reperitur. Lustratis fodinis accedit Palmarius ad ægrotos hydrargyrum expertos. Anno 1557 in quodam milite ab illius usu semel iterumque repetito, exacto decennio, exorti sunt duri tophi in sincipite vehementer excruciantes, tandemque in abscessum conversi, sanie membranas, cranium, cerebrique substantiam putrefecerunt. Interim neque extabuit æger, neque decubuit, neque cibi cupiditatem amisit, donec ulcus ad cerebri ventriculos protensum Lethargum, & inde subitam mortem intulerit. Quin etiam in aliis se vidisse affirmat ulceratum caput integra cute, unde succrescunt capilli sine insigni febre, quando tamen ex minimo capitis ictu, in quo cranium fracto, orta putredo meninges ferit, illico partes in-

(a) *Lib. 33. cap. 6.*

flaminantur, morsque consequitur, nisi ope modiolii aperto cranio, exitus saniei paretur: ex quibus fugacis argenti frigiditatem concludit frigida excrementa cumulantem febris accensione obfistentia. Idem quoque inde arguit, quod pluries Hydrargyrum passi difficulter purgantur, exiguntque maiorem quantitatem cathartici propter frigida, uti putat, excrementa ea de causa succrescentia. Verius tamen quod Palmarius tribuit hydrargyro, videtur adjudicandum prægresso celtico morbo; in quo etiam absque præmissa hydrargyrosi gravis putredo sæpe nullam febrem accersit. In Elephantiasi, inquit Fernelius^(a), in lue venerea, tanta plerumque putredine corporis tum interiores, tum externæ partes obsidentur, ut exesæ quasi laceratæ excidant, idque nullo febris indicio. Sic ab eodem morbo alteratis humoribus videtur potius adscribenda difficultas purgationis, quam frigiditati Hydrargyri, sequente usu calidorum facile superabili. Quamvis igitur ipse pariter sentio, animatum argentum frigidum potius esse, quam calidum, id tamen aliunde decernendum judico. Mauroceni, uti narrat Agricola^(b), intensiore calore somnum prohibente, super utres aquoso argento repletos recumbunt, refrigeratique dormiunt; idemque auctor pro certo tenet, illud ad loca frigida tanquam ad suum centrum ferri. Quid quod Splessius affirmat, se coniecto in patinam staneam mercurio aquam affudisse, expositamque lunæ radiis vel æstivo tempore in glaciem concrevisse? Verum enim vero non desunt, qui eidem non modicam caliditatem affigunt; siquidem mobilis est, impatiens quietis; incidit, attenuat, solvit, corrodit, febres, & inflammationes accendit, atque medicamenta ex eo parata, cuiusmodi est sublimatum, & præcipitatum, calidissima sunt.

Ne-

(a) *Lib. 2. de abd. rerum caus. cap. 13.* (b) *Lib. 9. de re Metal.*

Neque sane inficias iverim, aliquando ex mercurio intemperanter usurpato affectiones, quæ intenso calori assignantur, genitas fuisse. Quidam Jurisconsultus ab audaci perunctore Hydrargyro delibutus, narrante Mangeto^(a), in alvi fluxum incidit, nullo secuto sputo; neque tamen cessatum est ab inunctione, dum supervenerit ardor faucium cum intensa febre, aliisque gravibus affectibus & lethaliibus. Cadavere dissecto istæc apparuerunt, ulcus lividum incipiens in cavis hepatis, vesicula fellea plena humore referente colorem, & crassitudinem vini rubri, ventriculi fundus inflammatione Gangrenæ simili affectus, intestina pariter inflammata, liventia, & Sphacelo tacta. Cetera prætermitto, quæ minus ad rem faciunt. Vidi & ego Patavii ante paucos annos in quodam viro florentis ætatis, sanguinei biliosique temperamenti obortam febrem, quatuor dies perseverantem ex inunctione permista tenui quantitate mercurii tribus solum vicibus facta. Hisce contrariis argumentis plures circumventi eo confugerunt, ut crederent, fluens argentum diversis partibus compingi, idoneis efficere contraria, aliasque esse tenues, puras, subtiles, & quasi spiritus, tot fomites caloris; fœculentas alias, crassas, terreasque, & hisce vim refrigerandi inesse. Quam sententiam ab Conciliatore indicatam Matthias Vvntzerus^(b) fuse prosequitur; nec inde multum recessit Andreas Cæsalpinus Aretinus, qui favens Geberis placito, opinatur, in mercurio retrusam esse ardentem caliditatem ob densitatem difficile in actum erumpentem, interimque refrigerari partes, quibus ille applicatur. Vvedelius quoque inter Juniores idem metallum arbitrato suo diversis partibus composuit, sulphureis, viscidis, rotundis intime conjunctis cum salinis volatilibus, acetosis, terreisque.

Ergo

(a) *Biblioth. Medic. tom. 3.* (b) *Lib. 1. Anat. Spag. cap. 12.*

Ergo tanta partium diversitas designatur in hoc metallo ad explicandos dissimiles, oppositosque, quos præstat, effectus, quasi illud solum contraria præstare posset: cum tamen hæc potestas ad contraria communis sit, asserente Galeno^(a), ab eodem medicamento alia corpora quidem excalefieri, alia refrigerari; quod pariter ante Galenum adnotavit Hippocrates, & experientia ostendit. Itaque, nec novum, nec mirum est, easdem partes & mercurii, aliorumque medicaminum pro diversitate corporum, & diversorum in eodem corpore accidentium vim acquirere ad contraria; unde emanavit tritum axioma: Quicquid recipitur, ad modum recipientis recipitur. Fac tamen inesse Hydrargyro totam illam imaginariam partium diversitatem; inde nihilominus non reddetur ratio oppositarum actionum, quæ elici nequeunt, nisi per separationem diversæ partes sui juris fiant. Veruntamen, respuente illo disciplinam ignis in fornacibus Chymicorum, neque suorum elementorum secretionem patiente, qui fiet, ut multo infirmissimus noster calor ea solvat, secernat, ducatque in actionem? Aliter igitur ratiocinandum est, & sensibus exterioribus, non sola imaginatione constituenda est indoles æternum liquidi argenti, cujus scilicet sub certa conditione frigiditatem, pondus, tenuitatem partium in infinitum dividuarum, mobilitatem, immutabilitatem, pernicitatem penetrationis, & sensus ipse, & inde deductæ rationes præclare ostendunt: ex quibus, & diversitate corporum ab eo patientium desumenda sunt contraria, quæ videmus, effecta. Itaque mercurius natura sua frigidus, donec certa mole simul cohæret, neque jactatur, corpora nostra refrigerare aptum est; quemadmodum experiuntur Mauroceni, substrato ardorem lenientes, fo-

(a) Lib. 5. de simpl. Med. fac.

somnumque conciliantes. Contra in minimas partes discerptus, atque a calore nostro, vel alio interno stimulo incitatus non victus, quoquo versus impetum faciens, omnes succos agitat, agitatione calefacit, præparatque ad calidos morbos creandos: id quod usuvenire opinor, cum exagitata excrementa copiosa sunt, nec facilem exitum habent; vel cum sanguis natura sua calidior est, tenuis, facileque solutilis: cujus naturali missione perversa, multæ fiunt infestæ partes, quæ naturaliter mistæ, temperatæque salubres erant: uti mihi contigit videre in bene valente, qui ex inani suspitione gallicæ contagionis, id genus remedii experiri voluit, sui que experimenti poenam luit feбри, aliisque affectionibus inde natis. Præditus erat calido biliosoque temperamento, quo magis acta argenti mobilitas, & iniques adaucta non exiguam vim calefaciendi acquisivit. Neminem autem latere potest, quantum robur ad agendum ex calore assumat Hydrargyrum, si ex eodem suffitum consideret; siquidem ab igne minutissime partitum, impulsuque tot turbas in corporibus ciet, ut Alexander Trajanus suffitionem tantum usurpandam decernat, cum afflictissimus æger parvi facit, pereat, an vivat; idemque admoneat sputatione defunctos, ut multa exercitatione, & sudore metalli reliquias exigere curent, antequam igni exponantur, periculose jactaturo, si quid illius forte superesset.

Ex præmissis fortassis arduum non erit explicare, quo pacto a portentoso argento intus assumpto crassi, & coacti humores liquefiant, si ve venis insint sanguini immisti, si ve secreti artus occupent, aliasque partes exteriores. Ut illud in minimas rotundasque partes, quibus constat, extritum est, impulsuque confestim se se quoquo versus in partes insinuat, concreta, & dura obstantia concutit, sem-

*Tro
mi*

semperque ad renovandos ictus paratum attenuat, solvitque, oppido adjuvante victoriam oppugnatoris ingenito pondere, & immutabilitate, nihil ab oppugnatis patiente. Iccirco vero principaliter noxios succos dissolvit, extruditque, quod natura sui servatrix, uti vocatur a Tullio, in salutis reparationem conspirat; ejusque vim manifeste deprehendimus in pluribus morbis salutare evacuationes absque subsidio externo molientem. Quid mirum igitur ab eadem dirigi virtutem fluentis metalli in succos nocentes? Sed de hoc plura in capite proximo. Si nunc quæras, quare commota, & dissoluta potius per os, quam alios aditus amendantur, certum videtur, succos uberius eo accurrere, quo concitantur ab impulsore, qui, ut vidimus ex Agricola, ad loca frigida tanquam ad suum centrum trahitur. Os vero faucesque ab aere externo continenter refrigeratæ illius propensioni accommodatiores præ ceteris videntur: quo pariter humores aquosi facilius adducuntur, tanquam ad solitas & natura paratas vias excretionis. Adde, si placet, Hydrargyrum allici ad fauces a motu linguæ, orisque: quippe observatum est, tarde erumpente sputo, moras tolli per frequentem screatum, linguam partesque conterminas agitantem. Hoc loco me monet Tullius, ne plura adjiciam, & operosior sim, ad discutendum problema, magis obscurum, quam necessarium, & multis aliis in Medicina occurrentibus æquale. Quam egena, quam infelix illa foret, si obscuritate, & ignorance qualitatum, & modi, quo medicamina suos effectus promunt, ab eorum usu abstineret! Longius laborandum non est in vestigando modo actionis, ubi constat de ipsa actione, ejusque utilitate. Quanquam autem hydrargyrum peculiari dote ad glandulas oris accurrit, ductusque salivales una cum humoribus agitatis solutisque,

tamen

tamen alias etiam vacuationes movet , & sæpe per alvum : imo non semel observavi pertinaciam gallici promptius subactam fuisse saliva simul , & alvo mota , quam sola saliva . Patavii anno 1717 sub finem Septembris Bartholomæus Adamus annor. 45 ob celticos dolores in toto corpore , & præsertim in utroque femore diu lecto affixus , meo hortatu , sumpsit Calomelanos Riverii ad sputum acciendum , quo large manante , semper alvus substitit . Inde dolor est imminutus , redditusque motus , sed imperfectus , & breve spatium habiturus . Morbus enim recruduit , & fere annum integrum permansit , tametsi aliorum suasu tentata fuerint valida purgantia , & postremo agri Patavini balnea sulphurea . Itaque mense Septembris anni 1718 , meo consilio iterum accepto calomelanos , copiosa dejectio secuta est , diesque decem perseveravit ; itemque sputum feliciter processit : quibus excretionibus intra quadraginta dies penitus dolores cessarunt , restitutus est motus , etiam in præsens cum integra sanitate perseverans . Animadvertendum tamen est Tironibus , tum in hoc ægroto , tum in aliis nonnullis a me curatis , post inchoatam salivationem , fluxisse quidem largius ventrem , sed sine torminibus , mucosisque vacuationibus , quales solent apparere in Dysenteria , & quibus apparentibus Sydenhamus ait , impediri curationem morbi , soliti tantummodo per salivationem profligari . In quadam fœmina salivante excretiones alvi erant liquidæ , copiosæ , & virides instar succi herbarum : in descripto nuper ægroto varii coloris erant , sed quoque sine torminibus . In aliis etiam vidi vacuationes biliosas supervenire , & inde symptomata imminuta , præcipueque capitis gravitatem .

C A P U T II.

*An peculiare humores per os Hydrargyrum
evacuet.*

EXtra controversiam, & dubitationem est, a mercurio non solum sub forma salivæ educi humores lege naturæ derivandos ad ductus oris, sed alios multos, qui vel intra corpus retenti forent, vel per alias vias excreti; & hac ratione extirpari morbos aliis remediis, vel nullo tempore, vel solum longiore superabiles. Quemadmodum igitur de purgantibus quæsitum est, utrum omnes sine delectu humores evacuent, an peculiare, id similiter de mercurio exquirere animum subiit: quo ejus vires magis elucescant, usus declaretur, comprobeturque. Comperta sæpius morbi celtici curatione per salivam aquoso argento elicitam, vestigari cœptum est, quo pacto venenum illud extrahatur; multique crediderunt, non generali ratione fieri, sed ob peculiarem convenientiam inter illud metallum, venereamque colluvionem: qui mihi videntur in eadem meta incidisse, in quæ vidimus lapsos auctores, purgantibus vim ad particulares humores exigendos, assignantes: Lemærius existimat, inguinis virus armari salibus acidis, & horum depulsione mitigari, subigique a mercurio tanquam alchali volatili, poris donato aptissimis ad involvendos acidos aculeos: quæ omnia arte sua sic explicat. Fit sublimatum, inquit, corrodens additamento salis, vitruli-que: cui mistioni igne supposito inquietum argentum vasis sublimiora, frigidioraque scandit, eodemque rapit sales acidos implicatos; similique modo arbitratur in nostris corporibus ab calore in caput, & fauces illud adigi, tanquam

quam ad partem sublimiorem frigidiorēque , secumque rapere acida Pudendagræ . Antea tamen , ut ait , Hydrargyrum rarefactum , & agitatum a calore nostri corporis per universum circumagitur , donec inveniat sale , abs quo quodammodo figitur , retineturque . Verum hac similitudine , Lemerii , mirum in modum meum captum illaqueas . Si enim a sale obviam facto illud figitur cohibeturque , qui fiet , ut ascendat in sublimiorem partem corporis una cum sale figente , & retinente ? Illud etiam peccat tua similitudo , quod assumit idem effici in mercurio a calore nostri corporis , atque ab igne in Chymicæ fornace , inter quorum actiones tanta diversitas intercedit . Lento igne prius resoluta humiditate mistionis paratæ ad conficiendum sublimatum , separat violentus ignis aculeos salis , & vitrioli a partibus terreis , & crassis , ingressosque inter capedines mercurii idem defert ad culmen vitri . Quid autem simile imaginari potes evenire ab eodem argento nostrum corpus pererrante ? Sales acidi venerei virus , si sint immisti sanguini , qua vi ab aliis partibus secernentur , ut possint se se expedite intrudere Hydrargyri poris ; sicuti in vitro Chymicæ secernuntur opera ignis impositi sales ? Vide porro quantum differant per ignem separati sales ab acidis venereis intermixtis humoribus . Quocunque Te veritas , nil simile invenies , sive compares calorem humani corporis cum igne effectore sublimati , sive permistos sales , multaque humiditate perfusos cum sejunctis sincerisque , nec humoribus innatantibus . Apage hæc monstra similitudinum , tamque instabili fundamento fultas ratiocinationes . Idem contra Lemerium tuetur Augustinus Bellostius^(a) inde ducta ratione , quod si acidum , & acre in nostris corporibus copularetur mercurio , anum , vesicam ,

K k 2

aut

(a) *Part. 2. Chirurg. Xenodochii pag. 73.*

(cu
fen

Con
acc
argu
Bell

aut penem ulceraret ; dum movet excretionem , aut per alvum , aut per vesicam , & transit cum excretis per easdem partes ; quas tamen intactas remanere experientia demonstrat . Inanes igitur , quantum possum , conjecturas evitans , in ea sum sententia , ut credam supremi dissolventis vires in acidos humores potissimum non intendi , nec istos vacuari , sed quoslibet , & primum quidem procliviores ad liquandum , magis obvios , & faucibus propinquiores , deinde reliquos , sive puri sint , sive impuri , uti Etmullero^(a) aliisque visum est . Ut sanguinem longe , lateque certa quantitate subiit , statim agit , concutit , solvit , turgere , & effervesce facit , uti declarant intumescentes carnes , venæ , arteriæque . Hac concitata procella tumultuque quis putet particularem potius humorem educi , quam paratiorem ad secedendum , accurrendumque ad reſeratas oris vias ? Scio aliquos opinari liquidum natura argentum statim associari lymphæ , nec unquam ab ea secedere , nisi nactus fuerit emunctoria : cum quibus tamen nullam suæ opinionis rationem afferentibus parum negotii habendum est . Oris ulcera ab alia causa inflicta sine opera Hydrargyri nonne liquidæ salivæ uberem effluxum excitant ? Quid mirum igitur copiosiores excitari , ab illo latius os ulcerante , & ulcerationem continuante ? Quid opus est imaginari conjunctionem inseparabilem hydrargyri cum lymphæ , donec illud emunctoria affecutum fuerit ? Si quis ingerat unciam unam mercurii crudi , licet ad alvum iste devolvatur , tamen aurum ore detentum , sicuti observatum est , dealbat , nullo sputo excitato . Nimirum pauca illius quantitas ad os delata , quia non valet irritare , & solvere , neque sputum provocat , tantum de more provocat ex copia ulceratione facta , non per conjunctionem

me-

(a) *Pyrot. Rat. Lib. 1.*

metalli cum aquoso humore . Itaque non minus Hydrargyrum evacuans generale existimo , quam Scammonium , Colocynthidem , idque genus alia : quæ sicuti ratione ingentæ facultatis omnes humores eliciunt , ex accidenti particulares , uti supra probabilius judicatum est ; item mercurius , tum venereum tabum , tum alios particulares humores ex accidenti , & generali virtute vacuandi eliminat , non propter specificam , ut ajunt , dotem . Veruntamen , inquires , si solvit ille , vacuatque indiscriminatum expeditiores succos , qui evenit , ut solvat , expellatque venereas impuritates , crassas viscosasque , & creantes in partibus externis duros , & gummosos tumores ? Cur magis liquida , quæ copiosa sunt , videlicet serum sanguinis , ipse sanguis , latexque lymphaticus prius non amandantur ? Cur crassiora attenuantur , fiuntque paratio-
ra ad expulsionem , si nulla adest peculiaris cognatio expellentis cum expellendis ? Ad hanc solvendam , quantum permittitur , difficultatem , & adimendam ambiguitatem , sic mihi libet opinari . Supervacua , & infesta interfusa sanguini minus arcte cum ipso sanguine copulantur , quam una pars sanguinis cum altera : & hinc accidit , ut commoto sanguine ab hydrargyro , excrementa promptius evehantur , evectaque magis sentiant vim , impulsumque medicaminis : quod pariter tanquam aliquid extraneum una cum excremento a natura in superficiem tollitur , semper nitente ad ejectionem extranei infensique . Itaque certum est , actionem mercurii , aliorumque vacuantium viciosos humores cum sanguine confusos , dirigi a natura , eumque motum ab illis cieri intra sanguinem , adjutrice natura , quem ipsa sola ciet in multis morbis separans purum ab impuro , & postea exturbans . Ad hanc directionem naturæ confugio , ut incertiora omittam , neque
meam,

Spec
hon

Obie

eye
clay
globul
hi

meam, aliorumque imaginationem frustra fatigem. Præsidet illa toti Animalis œconomix, ejusque agendi modus ex Hippocrate in eo consistit; ut attrahat quod bonum est, convenientisque unicuique speciei retineat, præparet, aut mutet; rejiciat vero quod superfluum est, aut nocuum, postquam illud ab utili separavit. Unde Hippocrates vocat naturam doctam, & justam, quasi mente prædita foret; quod licet ab Asclepiade derisui habitum sit, naturæ tamen regimen, quomodocunque fiat, certum apparet ex tot vacationibus sola ope naturali in ægrotationibus peractis. Verum quid in aliis vacationibus considerem operam naturæ sibi consulentis? Hæc ipsa in salivatione præclare elucet facta in Variolis confluentibus Adultorum, in quibus tam frequenter excitatur, ut affirmet Sydenhamus, se unum tantum vidisse illis variolis laborantem, cui nulla salivatio supervenit. Totum opus est naturæ hæc salivatio a morbo instigatæ, quam idem auctor asserit parum cedere Ptyalismo efficacia mercurii provocato, esse maximæ utilitatis, & præsidii ad tutandam salutem. Quemadmodum igitur motus naturalis, humorum concitatus a fomite Variolarum ita dirigitur a natura, ut pars fomitis per salivam utilissime exigatur; similiter dirigitur incitatus ab Hydrargyro: quæ directio mihi finem inquirendi imponit, ne videar plus sapere velle, quam oportet sapere. Vvedelius, qui animato metallo vim elasticam, præter alias indicatas qualitates assignat, existimat, etiam sero sanguinis eam communicari, inde turgere, ac credine salina imbutum concitatus fluere, exitumque per vias ordinarias quærere. Verum, si argentum gallici expugnator in solum serum vim faceret, adque os compelleret, sequeretur, venereum venenum soli sero admisteri; quod non convenit cum pertinacia morbi, multo prom-

ptius

ptius cessuri sudationibus, si fomitem in solo sero haberet. Porro fordes gallicæ, aliæque extra venas majores consistentes, utcunque crassæ, atque in dura tubercula elatæ, vi admirandi argenti late diffusa percussæ, attritæque resolutione potius, quam mutatione in salivam dissipantur, pariter auxiliante natura semper instigata ad extraneorum ejectionem, & reparationem pristini partium contactus. Nimirum dissoluto crassamento occupante exilia vasa, glandulasque in partibus externis, liberius eo accurrens spiritus caloris naturalis auctor una cum medicamento opus salutare disiectu conficit.

Scio apud Augustinum Bellostium^(a) Hydrargyrum in ea esse existimatione, & honore, ut persuasum habeat, ab eodem crudo præstito, admistoque purgantibus nihil sani attingi, & turbari, sola noxia una cum purgante detru-di. O stupendam, simulque incredibilem dotem! Etenim, nisi metallum eam acquirit ex admisto cathartico, quod sane nemo affirmaverit, sequitur, ut ingenitam habeat, quam propterea possidebit etiam, quando propinatur ad salivandum absque ullo mangonio. Id tamen apertum sic est confutationi, ut mihi prorsus supervacua sit, qui nuper indicavi, me vidisse notabilem salivæ copiam illinitio-ne mercurii e corpore sano, & sanguinei temperamenti effusam, cujus sane materia, vel erat humor innocuus, vel aliquis humor alteratus a mercurio, postea illuc raptus. Attamen non defuerunt vigilæ, erosio gingivarum, & oris, sputum gravedens, & aliquando cruentum, cum aliis molestiis consuetis comitari Hydrargyri actionem. Ex quibus propterea colligere non possumus singularem cognationem illius cum humoribus acidis, vel acribus, vel aliter infestis, quasi isti soli educerentur, & in causa forent

(a) *Par. 2. Chirurgi. Xenodochii pag. 34.*

rent ulcerationis, aliorumque symptomatum. Observavi tamen foetorem sputi multo graviores esse in iis, qui a longo tempore contagionem ex inguine perpessi fuerunt, ejusque virus in totum sanguinem serpsit, vitiavitque. Quanquam neque id perpetuum esse, declarat historia apud Bonetum^(a) de quadam Matrona egregie sana, excepto recenti pruritu, cujus gratia illito umbilico unguento ex pomis & mercurio dulci, tanta concitata est sputi copia, tamque foetens, ut nullus esset ferendo.

C A P U T III.

Ostenditur, Hydrargyrum ad salivandum remedium esse consentaneum Dogmaticæ Medicinæ.

USus Mercurii lapsus in manus imperitorum, tantum remedium summo in honore habendum pluribus suspectum reddidit, odiosum, metuendumque ex multis ægrotantibus ab insciis perunctoribus interemptis, affirmante Ulricho de Hutten^(a) Equite Germano, se vidisse multos in ejus curationis medio e vivis sublato, imo tres unico die. Verum id infortunium proprium, & peculiare liquoris argentei non est, sed aliis magnis remediis improvide usurpatis commune, tametsi aliquando minore celeritate effectus minus manifestum. Vereor etiam, ne peccata in ejus usu commissa difficilius sint emendabilia, quam aliorum: quo quidem monemur, diligentius cavendos esse lapsus, non esse usum rejiciendum tanquam alienum a Medico rationali. Evidentem parit evacuationem, ex qua per habita experimenta non arduum est con-

(a) *In Thesaur. Medic. Pract.*
gnam guaiacum.

(b) *De Curat. Morb. Gal. per li-*

stitueret, quid eam indicet, quid impediat, quemadmodum ejus noxæ succurratur: qua norma alia quoque violenta purgantia adhibentur. At enim usus mercurii plenus est terroris propter infesta symptomata, & plurium dierum afflictionem; prætereaque vel a Medicis peritis administratus interdum non bene vertit. Esto: verumtamen terribilior est non aspectu solum, sed cruciatu, vitæque periculo præcisio membri emortui putrefactique Veteribus usitata, factaque in parte sana: quæ tamen relicta non fuit, donec mitiorem Fabricius ab Aquapendente invenerit. Pone aliquem in ultimum vitæ discrimen adductum a morbi venerei vehementia, alterum a membro aliquo in Sphacelum corrupto. Utrique providendum est, alteri Hydrargyro, alteri obtruncatione membri. Si daretur optio, an non, cui recidenda pars est, mallet ferre molestiam salivationis? Enim vero vitam protrahere cupienti nullum remedium acerbum est, si unicum est, & unicum identidem esse pro subigenda gallicæ luis sævitia aliorum, & mea, me docent experimenta, quorum unum Tironibus propono. Anno 1717 uxor Mercatoris Patavini habitans in ampla via ad pontem moletrinarum, annum agens circiter quinquagesimum sextum, temperamenti melancholici, proceræ staturæ, gracilis corporis, capitisque male conformati, & fluxionibus obnoxii, sub fine Augusti correpta est febris continua non admodum intensa, in cujus declinatione universali intumuerunt malæ aurem versus, & in dextra parte magis. Gravis erat suspicio celticæ luis ob maritum eadem inquinatum, & leve ulcusculum prægressum in pudendo; quod tamen, aliquot mensibus antequam febriret, coaluerat absque remediis. Itaque levibus discutientibus adhibitis, genæ brevi detumuerunt, superveniente frequenti scretu, & copiosa

spuitione partim liquidæ, partim viscosæ pituitæ, noctu temporis uberiore. Rubebant per id tempus leviter fauces, tonsillæ, & columella, brevique tempore erosæ tonsillæ, & columella molestissimam deglutationem reddiderunt, nilque proficientibus internis, & localibus medicamentis ulcus dilatatum est, cum spuitione saniosa & graveolente, lenta febris, dolore capitis, & vigiliis. Hos angores vehementer onerabat deglutationis eo provecta difficultas, ut modicum cibi vix posset ingerere, idque non sine intenso dolore. Fractis itaque viribus tot cruciatibus, cibi paucitate ad extrema redacta erat; quæ indeclinabilia videbantur, nisi Hydrargyrum subsidio venisset, in hisce angustiis tam necessarium, quam in sphacelo ferrum, & ignis: quæ si numeras inter rationabilia remedia, non video, cur eisdem non accenseas argentum æternæ inquietis. Qua propter primo die mensis Novembris, post factum periculum aliorum remediorum præbui decem grana Calomelanos Riverii, mane quatuor horis ante cibum, totidemque ad vespertum. Postridie adjeci tria grana, eandemque quantitatem accepit duobus diebus consecutis. Die quarto incœpit spuitio, crevitque usque ad decimum, quo vires magis imminutæ sunt, cœptumque aliquantum cor affligi, alvus solvi, sed absque dolore. Quando decrescere spuitio visa est, viresque refici, instaurovi remedium, præscriptis triginta granis Calomelanos, in tres æquales portiones divisis, tribus continuis diebus sumendis. Iterum mediocriter intumuit lingua, quæ paulum detumuerat, sputumque moderate auctum. Die decimo sexto ab inchoato remedio ulcera tonsillarum, & columellæ in totum coalita apparuerunt, perseverante tamen capitis dolore, nihil imminuto ad diem usque vigesimum quintum, quo mitigari incœpit, & in dies magis

gis remittens, penitus post trigesimum secundum evanuit una cum scretu materiæ viscosæ, remanente sola & lenta spuitione liquidæ sine ulla graveolentia ad initium usque Februarii, citra tamen actionum offensam, imo cum insolito appetitu ciborum. Actum erat, ut apparebat, de fœmina, omniaque propinqua morte squallebant, nisi præsto fuisset medicamen inventum numine Divum, & quidem non majori quantitate, quam duarum circiter drachmarum, eaque aliquot dierum intervallo, uti narratum est, accepta. Scio tam exiguam quantitatē, nec in omnibus temperaturis, nec in omnibus regionibus, nec in omni conditione morbi sufficere, & minorem in aliquibus sufficere. Namque, ut mihi affirmavit egregius medicus Xenodochii Patavini, solis quatuor scrupulis confecit curationem fœminæ sordibus veneris inquinatæ. Cum autem perdifficile sit, ante experimentum noscere justam quantitatē porrigendam, provide inchoatur a tenuiore portione, ut securior fiat progressus ad largiorem. Porro descripta ægra, quamvis dolore, fluxione, vigiliis, febre, & coacta cibi parcitate ad vitandam acerbitatem doloris inter deglutendum admodum extenuata, nihil formidolosi in toto curationis excursu passa est, præter levem animi defectum: ex quo creditum est, me auspicato non assensum esse alteri Medico in consilium vocato ante propinationem mercurii, cogitanti de majori quantitate præbenda. Id autem notatu dignum est, quod vix metallum ad fauces appulit, cum earum rubor, tumor, erosio, dolorque in deglutitione mitescere incœperunt, sive id ab ejus qualitate contigerit, quam Bohnius sedativam, & narcoticam appellat, sive propter materiam, quæ ferebatur ad partes offensas ad alias traductam, mox erupturam per aditus recens paratos. Quocirca, si in extremo periculo ad id experimentum tanto

cum commodo deventum est, cur idem in minore fidentius non experiemur? Haud me latet, solum extremis morbis extrema remedia convenire, sed ejusdem prudentiæ est, quos extremos morbos futuros esse providemus, extrema medela prævenire, conceptumque impetum retinere. Nec enim morbum extremum solo proximo vitæ periculo metiri opus est, sed etiam post aliquod tempus futuro, & præterea metiri oportet ex diuturnitate plena molestiis. Quin etiam non facile concesserim hydrargyrum extremum esse remedium, si caute, si sobrie usurpatur, quippe a multis sine vehementi molestia, vitæque discrimine toleratum. Profecto si comparetur forte vomitorium a morbo contumaci postulatum, quod non extremum, sed tantummodo magnum remedium judicatur, cum hydrargyro, incutit illud brevius quidem tempore, sed plus terroris, & poenarum, nimirum languorem oris ventriculi, cordisque, quasi deliquium passuri, repetita irritamenta erupturæ materiæ, aliquando inania, sed non minus molesta, viscerum convulsionem, & propemodum egestionem, rejectorum ingratum asperumque saporem. Omnia magna magno constant, oppugnataque grandi ægrotatione salus exiguo pretio non redimitur. Recole alia multa, quæ medicina inter cruciatus molitur, dum ossa luxata reducit, lapidem e vesica extrahit, cranium perforat, aliasque partes incidit, vel comburit, & formidato mercurio terrorem detrahes: quem aliqui non solum minime metuunt, sed ea fiducia usurpant, ut quod Plinius omnium rerum venenum deprædicat, converti posse putent in communem omnium morborum medelam, si hanc hominibus concedere Superis placeret. Tam grandia, & præclara de Hydrargyro non meditor, non prædico, sed pro certo teneo, de remediis perpaucis æque atque de illo

illo gloriari licere, quo supra vidimus foeminam ab instante fato liberatam fuisse, & scimus tot alios difficillimos morbos tam evidenter domitos, ut ejus victoriæ laudem nihil in dubium vocare possit, nihil imminuere; quod de aliis magnis remediis multo rarius, si serio attendimus, observamus; post quorum usurpationem, vel morbus pergit sævire, vel tam cito manifesteque non mitigatur, expelliturque, ut expulsio soli remedio, vel ex majori parte adjudicari jure possit. Ulrichus de Hutten, de quo mentio nuper facta est, mira narrat de Guajaco comparato cum Mercurio; quæ referenda censui, ne videar partium studio occupatus. Contagione gallica affectus tam miseram vitam inter atroces cruciatus degebat ipsa morbi fœditate adauctos, ut nullum ex iis, qui tædio morborum, afflictique corporis sibi mortem consciverunt, tanta dolorum sævitia divexatum esse, crediderit. Novem annorum spatio undecies unguento ex mercurio illitus est, nec inde desideratissimum levamen reportatum, morbusque eo processit, ut pro conclamato haberetur. Prius tamen Medici, quam ipse, salutem desponderunt, jussus a suo bono Genio quiddam adhuc opperiri; nec eum spes fefellit. Haussit decoctionem Guajaci, & inde opem de Cœlo missam, ut ait, percepit, tot sedatis angoribus, qui nec hydrargyro, nec aliis remediis mitigari potuerant. Gratulor Ulricho suo bono Genio obsequenti de reparata salute, cui eadem fortuna contigit, atque Joanni Consalve de Oviedo, qui primus in Europa id remedium expertus est, eaque felicitate, ut non solum se ipsum a gallico veneno redemerit, sed alios multos in Hispaniis cum magno quæstu. Veruntamen tam facile perfugium non reliquissent Medentes, nisi tot eadem tabe polluti reclamassent, frustra guajacum, & laconicum periclitati, non fru-

frustra hydrargyrum, successuum frequentia inter remedia ad eam luem principatum adeptum. Quod si Guajacum aliquando efficacius fuit, favor Genii patrocিনatus est, videlicet rara proprietas singularis naturæ, & accidentium perpaucis idem beneficium allatura. Gratia tamen habendæ sunt providentiæ naturæ rerum omnium parentis, quæ cum singulos homines tanta temperaturæ diversitate asperferit, tam variam etiam remediorum suppellectilem suppeditavit, ut in pertinacibus morbis liceat, alia, atque alia experiri, ne spe cadens animus oneret desperatione gravitatem morbi, difficultatemque curationis. Sua tamen laude, & utilitate non caret potus guajaci, imo inde præmissis universalibus, licet auspicari curationem recentis affectus, postmodum gradum faciendo ad hydrargyrum, nisi experimentum guajaci respondeat. Postremo adnotandum est de mercurio ut molitore salivæ, esse quidem permagnum, & rationabile instrumentum salutis, sed temerario proximum, nisi cauta, & parca manu administretur; & peccatum in ejus usu commissum sæpe gravius esse, quam reliquorum, quæ magna vocantur, ut etiam supra animadversum est. Præditum est id genus argenti maxima mobilitate, quod quidem facile incitari potest a nostro calore, aliove stimulo, non facile compesci, incitatumque aptum est concipere motus perniciosos, etiamque lethales, duntaxat declinabiles sobria administratione, regenda diligenti meditatione corporis ad id remedium destinati, atque observatione effectus. Id ego pluries expertus sum, nunquam infeliciter, semperque timidiore, cautioreque imitatus, non animosiores, fidentioresque. Quoties post certam quantitatem pro ratione corporum præbitam vidi difficulter inchoari spiritum, nec faulste procedere, sed aliquos dubios eventus

apparere, geminando quantitatem acrius non profecutus sum, sed deserui tentamentum ob incompertam diversorum corporum naturam; & malui de me non multa laudabilia prædicari, quam unum aut miseratione, aut reprehensione dignum, sic & natura mea inductus, & aliorum exemplo admonitus. Unum afferam in Tironum documentum, quod anno 1731 notum est contigisse Patavii in Mercatore Patavino temperamenti sanguinei, & melancholici, boni corporis habitus, itemque quadrati, annorum circiter sexaginta. Ulcere venereo circa fauces dire vexatus jussu, & regimine Medici sumpsit mercurium dulcem mense Aprilis quatuor diebus continuis, & singulis diebus drachman unam, dimidiamque. Parum intumuerunt genæ, fere nihil salivæ effluxit, sed facta copiosa dejectione materiæ viridis, graviterque foetidæ, die quarto ab assumpto mercurio aliquot horas jacuit apoplecticus, posteroque die repetito ejusdem affectionis ictu mortalitatem explevit.

C A P U T IV.

De Indicante Salivationis per Hydrargyrum.

FActa collatione Hydrargyri ad salivandum cum aliis remediis, quæ Scholæ magna nuncupant, liquido apparet, & magnum esse, magnorumque principem, ejusque indicans a magnitudine morbi petendum esse, ut indicatum indicanti respondeat. Verum, quia magnum remedium unicum non est, neque unicus morbus magnus, ex hac multiplicitate grandium remediorum, morborumque, sequitur, ut comperta magnitudine morbi, protinus non appareat debiti auxilii magnitudo, quæque requi-
ratur,

ratur, investiganda remaneat. Cum autem instabilis argenti, de cujus indicante quæritur, non satis sit cognita, explorataque per causam natura, nulla superest alia via illius venandi, quam percurrere morbos, quos scimus provocatione salivæ identidem curatos fuisse; sicque per effectum provocatoris virtute detecta, & declarata, ejus indicans generale constitui poterit. Ergo inter morbos mercurio expugnatore subactos principem locum tenet ex saniosa venere contractus, deinde refractaria Scabies, quæ sua contumacia prætendit occasionem tanti remedii adversus gallicum inveniendi, secundum illam Impetigo, Lepra, aliique multi cutem insidentes. Facilius scabies, difficilius impetigo, & lepra curantur, lepræque tantum incipienti Nicolaus Massa ex sententia Theodorici, & Arnaldi Hydrargyrum admovet: quippe quæ, ubi partes late occupavit, curationem non recipit, obsistente humore impense crasso, lento, limosoque ejusdem effectore. Vix nata lepra occallescit, obluaturque remediis victrix remansura mature non usurpatis, atque in ipso morbi adventu. Nil mirum igitur, si Vvillsius duobus lepra affectis frustra inconstans metallum adhibuerit; qui inveteratam adortus est, vel nascentem non facile expugnabilem. Quidam ex cognatione humoris lepram, cancerumque producentis, ad naturam atræ bilis relati, idem remedium adversari judicarunt, tentarique in utroque haud temere posse. At in Cancro intus assumptum salivæ ducendæ gratia exitiabile experta est foemina a Boschetto relata, in qua pullulas celticas, tophos, foedaque ulcera sanavit, non cancerum in mamma ad pili magnitudinem: qui insuper recrudit, auctusque exulceratus est cum effusione nigræ saniei, tandemque miseram cum doloribus diu luctatam extinxit. Quamvis igitur lepræ causa particeps est

est atræ bilis, minus tamen parata est ferocire, propter admistionem crassæ pituitæ, temperantis focii humoris acrimoniam: qua temperatione caret Cancer, progenitus ab retorrido sanguine, exustaque bile. In quibusdam tamen ulceribus malignis dispar exitus est, quæ constat ope mercurii feliciter coaluisse. Regii vir nobilis, uti mihi narravit celeberrimus Antonius Vallisnerius, nostræ Academiæ, dum in vivis erat, primarius Professor, temperamenti calidi humidique sub annum vitæ 35 patiebatur ulcus in lingua cacoheteum, sive malignum, invictum pluribus remediis anni unius curriculo tentatis, multorumque consensu pro deplorato habitum, præcipue Pielæ celebris Professoris Chirurgiæ Bononiæ, qui Regio transiens, atque ad ægrotantem accersitus, nihil præter mitigantiæ proposuit, causatus morbum esse quasi insanabilem, eoque laborantium duntaxat centesimum restitui. Dum ita jactabatur æger, omni spe adempta, quidam Empiricus, nomine Rasponus montium regiensium incola, casu ad eum perductus spondit salutem, quasi in pera gereret. Nec mora. Traditus æger Promissori salutis, cujus clava erat inunctio ex Hydrargyro nigro colore infecta, ad speciem arcani comparandam, ad vesperum illitus est, & nocte adeo fauces cum lingua intumuerunt, ut non nisi difficulter ducere posset anhelitum. Non ideo expavit Empiricus mane visa circa fauces procella, imo lætabundus inde spes concepit, unde periculum impendere videbatur, jussitque, ut quo pacto posset, gargarizaret, osque ipse digito perfricuit. Ita instantem fluxum sputaminum acceleravit, qui viginti dies perseveravit, iterato tamen per id tempus non semel illinimento; idemque fuit salivationis terminus, & morbi radicitus evulsi. Idem Empiricus, ut fama fuit, etiam Strumas, Scirrhus, Coxendicem, alios-

que obstinatos dolores, affectusque eodem remedio fugavit. Ac sane, quod attinet ad duros tumores externarum partium, sive ab immundo concubitu, sive aliunde genitos, aliis emollientibus, resolventibusque invincibiles, virtute mirifici argenti dissipari non raro viderunt alii, nec semel ipse vidi. Pariter dolor ischiadicus ordinariis remediis diu obluctatus, etiam sine opera foedatae veneris productus, sæpe per idem remedium expulso mali fomite sedatus fuit. Quinimo Joannes Muys^(a) suo fultus experimento decernit, podagram, celticamque affectionem uno eodemque modo curari posse; atque Vvedelius refert podagricum ab illitu *mercuriali* tres annos cum singulari levamine transégisse. Est utraque affectio species Arthritidis, ut irrationabile non sit, comperto levamine in Coxendice, transferri posse remedium ad Podagram, habita tamen ratione humoris peccantis, temperamentique, vitando calida, tenuibusque humoribus feracia. Vidi Venetiis in Patricio magni nominis a quodam extero Medico usurpatum Hydrargyrum ad minuendam molestissimæ Podagræ frequentiam male vertisse; nec sine metu inchoatam curationem relictam fuisse. Erat æger calidi temperamenti, proceræ staturæ, affluensque tenuibus, calidisque humoribus, frequenter podagra conflictatus. Pergo breviter enumerare morbos aliquando salivatione ex mercurio subactos. Ejus facultatem ad tollendam suffusionem fortasse prius casus ostendit, quam hominum speculatio. Quidam, uti narrat Alexander Trajanus^(b) antequam morbo venereo afficeretur, altero oculo cæcus erat, densissima suffusione occupato, illituque fluxi argenti a cæcitate, & gallico evasit. Itaque docti viri in vitiis oculorum a crasso lentoque humore, vel nervos opticos, vel arterias retinæ

(a) In Præxi Chirurg. rat. (b) Lib. 5. de mor. Gal.

tinæ occupante, & obstruente, vel aliter visionem impedi-
pediente maturandam esse salivationem dijudicant; con-
firmantque judicium plura exempla per eam restitutæ vi-
sionis apud Boyle, Fonsecam, Riverium, aliosque. In
Paralyfi eodem remedio Vvillifius, Junchenius, aliique
utuntur, dummodo æger sit robusto temperamento, ne-
que doloribus capitis, neque vertigini obnoxio, scateat-
que crassis, & viscosis humoribus. Solent hi congeri oc-
casione gallici inquinamenti: ideoque in Paralyfi illud se-
cuta securior, feliciorque est usus Hydrargyri, prosperum
eventum non uno ostendente experimento. Dominicus
Brazza Patavinus, uti mihi narravit doctissimus Professor
nostræ Academiæ Jacobus Placentinus, ex viru venereo
laborans ingenti capitis dolore, gummosoque tuberculo
mense Aprilis anni 1724 post varios assultus Epilepsiæ
correptus est Hemiplegia, ex qua nil sensit imminutum
capitis dolorem, imo interdum ita adauctum sensit, ut
mente perturbaretur. Itaque præmissis venæ sectione, lar-
gisque potionibus præbita est spatium viginti circiter dierum
paulo plus uncia una aquosi argenti, effusaque inde ma-
gna quantitate salivæ, rediit motus resolutorum mem-
brorum, sedatus capitis dolor est, habitusque totius cor-
poris largiore nutritione refectus.

In morbo comitiali, uti videre est apud Bonetum, Ro-
linfium, Vvillifium, aliosque salivatio ex argento fu-
gaci salutaris apparuit: & experientissimus Rotarius mihi
testatus est, se Veronæ aliquot epilepticos eadem sputami-
num effusione curasse; contraque Trincavella asseverat, se
vidisse in patre, & filio ex inunctione *mercuriali* excitatam
Epilepsiam. Similiter Vvillifius adortus mederi Paralyfi in
juvene foemina ejusdem remedii opera vidit, inde oriri
gravem Cephalalgiam, vertiginem, motusque convulsi-

vos Epilepsiæ initia . Cur vero mercurius aliquando illam inflixerit , aliquando dispulerit , in solam diversitatem causæ , aliorumque concomitantium rejiciendum est . Propria Epilepsiæ causa profunde latet , & a Fernelio imputatur veneno intus genito , cujus natura , ut aliorum venenorum ignoratur . Attamen ex principali sede morbi , totiusque corporis statu lucem aliquam elicere possumus ad occasionem nanciscendam , vel utendi hydrargyro , vel abstinendi . Cadit in conjecturam , utrum Epilepsia fiat vitio primario capitis , an subjectarum partium , quove humoris genere corpus abundet ; quod crasso abundans sine vitiositate insigni capitis reddit probabilem usurpationem mercurij , & præsertim nisi æger sit egregie melancholicus .

Pro vero Hydrope , hoc est Ascite nonnulli commendant Hydrargyrum ad salivandum , antequam tamen ruptis vasis lymphaticis fusus est humor in cavitates , persuasum habentes , causam principem esse glandulas ventris obstructas , nec istas citius , & certius expediri , quam ope dissolventis argenti . Qui profecto , si Ascites ab ea causa primario semper produceretur , & claræ apparerent notæ , serum duntaxat tumefecisse vasa , non rupisse , invalide suam sententiam non sustinerent ; quando mercurius creditur efficax ad ipsos Scirrhos molliendos , dissipandosque . Verum cum certi sumus de Ascite , ex æquo certi esse non possumus de tumore ventris solum genito a tumentibus vasis absque effusione aquæ : & præterea mali origo variat pro diversitate offensorum viscerum ; imo interdum ipse sanguis effoetus , & spiritibus exhaustus , absque prægressa viscerum offensa in causa principali est . Qua posita sanguinis imbecillitate , & proclivitate ad solutionem time-rem operam maximi dissolventis , nec adhiberem nisi pos-
stu-

stulatum a materia crassa, & glutinosa obstruente, morbumque fovente.

In Scorbuto, uti placet Vvillisio, qui de eodem prolixè agit, duplex est sanguinis vitiositas, altera per quam sulphure præpollente sanguis inordinate effervesceat, requiritque temperata; altera, in qua sal evectum, sulphurique dominans sanguinem densat, veluti mucilaginosum efficit, tardique motus, & iccirco indigum attenuantium, & exsolventium, inter quæ Juniores numerant mercurium, & inde motum salivæ profluvium. Idem auctor etiam pro curatione quartanæ non dubitavit, levem sputationem ciere in Virgine perillustri vehementer optante salutem, quovis hæc modo reparari posset; affirmatque, inchoata salivatione statim cessasse paroxysmos; quibus tamen temporibus ingruere solebant, perturbatum fuisse totum corpus, cum cordis palpitatione, & Lipothymia metu. Opinor autem, id periclitatum esse Vvillisium in quartana, quæ censetur genita ab humore crasso, tardique motus, non tamen periclitaturum fuisse in tertiana, sobole tenuioris humoris. Ante Vvillisium Ballonius perhibuit, quartanam cum tiliarum ulceribus hydrargyrosi sanatam fuisse. Aliis morbis fluor oris incitatus ab Hydrargyro conducibilis existimatus, adhibitusque est, sed enumerati sufficiunt ad indicans ejusdem ut educentis salivam constituendum: quod esse decernò principaliter humorem, viscosum, glutinosum, difficile mobilem, concreescere paratum, non inflammari, qui morbum magnum contumacemque, solitisque remediis reluctantem creat, vel mox creaturus est. Possunt hercle diversi morbi a succis crassis, & viscosis generari, sed omnium unica est curationis ratio, incisio, & dissolutio, viam sternens ad evacuationem; quibus viribus pollet mercurius, si cetera ejus usurpatio-

pationem permittunt. Neque vero statutum indicans at-
tinet pluribus confirmare, vel solius gallici curatione sat
clare ostensum, cujus causa quam viscida, aptaque ad
concretionem sit, demonstrant dura inde nata tubera,
difficillima solutu, ipsaque cadaverum inspectio, affir-
mante Nicolao Massa^(a), se se in Nosocomiis profecuisse
cadavera multorum, qui laboraverant inguinis lue, & in
hiscæ reperisse venas plenas materia pituitosa alba, san-
guinis quantitatem superante: qua item loca excruciatu re-
pleta erant, imo in aliquibus etiam lacerti. Quid quod
Georgius Philippus Nenter^(b) decernit, ad curationem luis
venereæ recentis, & mitioris magis facere sudationem, &
vacuationem per urinas, quam salivationem per hydrar-
gyrum, & hanc utiliorem esse in inveterata, animadver-
tens ab illo non invadi venereas fordes, cum adhuc sub-
tiliores sunt, & teneriores? Etiam Archibaldus Pitcarnius
observat, in borealibus regionibus, ubi fordes den-
siores sunt, gravioreque, morbum venereum hydrargyro
expugnari, in australibus decocto Guajaci, falsæ Parillæ,
Oxylapathi, Bardanæ, & similium. Porro actionem mer-
curii dirigendam esse in crassa, & glutinosa purgamina
comprobat virus glutinosum lepræ, initio morbi per il-
lum expugnabile, similiterque comprobat non multum
absimilis humor obstinatæ scabiei eodem remedio solutilis;
comprobant etiam dura tubercula in partibus exterioribus
sine celtico inquinamento oborta, eoque in emplastris ap-
posito discussa. Reliquas circumspice enumeratas ægrota-
tiones, & in omnium causis aliquidpiam simile venerei
succu invenies, & si cum aliis qualitatibus conjunctum,
vel diversum intensione, aut remissione. Quamvis autem
vis hydrargyri sit opponenda primario humori viscoso,
cras-

(b) *Epist. Tom. 3.* (a) *Cap. 8. de Lue Vener.*

crasso, & pituitoso, tamen evenire potest, ut ejusdem operam petat succus non valde crassus, & viscidus, sed profunde retrusus, cujusmodi est humor Coxendicis effector, qui tametsi non valde crassus foret, ob loci profunditatem, nisi alio conatu abduci posset, liquidi argenti efficacitatem postularet. Scio multorum esse sententiam, vim Hydrargyri speciatim in humores acidos intendi, si ve hos venerea contagio comparaverit, si ve alia quæcunque causa. Quo tamen concessio, non mutatur indicans ejusdem a nobis constitutum, videlicet lentor, aut crassities humoris difficulter solutilis. Cum enim acidi proprium sit densare, & cogere, & inde contumaces morbi producantur, hos non alio pacto curat mercurius, quam dissolvendo densa, & coacta, suarum partium tenuitate, & impetu sibi viam per ea muniens, iteratisque ictibus frangens, conterensque acidi aculeos arcte invicem complicatos. Quamobrem contrarietas, quæ luculentior apparet inter hydrargyrum, causamque morbosam, versatur inter illud, qua solvens, humoremque, qua indigum solutionis: & hac indigentia proficiscente a crassitie, & lentore, inde depromptum est indicans generale tanti remedii.

Ex recensitis præcipuis affectibus, in quos hydrargyro pugnatur, apparet idem multiplex esse remedium, æque ac venæ sectionem, & purgationem, videlicet evacuans, revellens, derivansque. Adhibitum ischiadico dolori sedando per ablutionem causæ, evacuans simul est, revellensque; quatenus humorem ad coxam delabentem inde retrahit, perque superiora educit: in capitis vero affectibus, puta, tuberculis, doloribusque venereis usurpatum derivans est, evacuansque, per partem proximam mali fomitem detrahendo. Quod si humores educendi per universum corpus sparsi sunt, infliguntque morbum toti com-

mu-

aut
lent
ind

est
ven
eva
Der
ut q
mag
vel
hyp

munem, potissimum ut evacuans conducit. Cum autem has evacuationes efficit, semper vim suam attenuandi, liquandi, resolvendique exerit, neque tamen semper manifestis excretionibus declaratam. Hæc dissolvendi facultas non raro, sicuti observatum fuit, tanta est, ut sine sensibili excretionis alicubi excitata dura tubera demoliatur, eorum materia in minima, & invisibilia extenuata.

C A P U T V.

De impedimentis provocandæ salivæ per Hydrargyrum acceptis a rebus naturalibus, & non naturalibus.

EXcretio salivæ per instabile metallum ratione symptomatum, spatiique, quo solet perdurare, dum instituitur ad fortes, pertinacesque morbos profligandos, omnibus magnis supra descriptis evacuationibus anteferenda est, majoremque administrantis diligentiam requirit in explorandis viribus ægrotantis, & opportunitate ad remedium, discenda ex iisdem rebus, quibus vidimus, alias magnas vacuationes regi. Ut igitur aliarum commodam occasionem facilius inventuri percurramus impedimenta, quæ interponi possunt; sic eadem via pergemus ad inveniendam idoneam administrationem salivationis. Primum autem obicem omnium ingentium excretionum viribus infensarum certo certius est, ab imbecillis viribus occurrere, eumque tanto fortiolem esse, quanto major imbecillitas apparet. Deterremur accisis viribus ab incisione venæ, & purgatione; quanto magis deterrebimur a salivatione, quæ non sola continuatione excretionis, & copia lacertos quatit, sed pluribus aliis infestis symptomatis?

matiss? videlicet faucium, & gingivarum inflammatione, erosionem, erosarum dolore, vigiliis, cordis anxietate, missis aliis aliquando supervenientibus, fortioribusque ad vires perfringendas. Quare Sydenhamus eam vacuationem peracturus, neque phlebotomiam, neque purgationem præmittit, contra quam multi solent, quo corpus robustius valeat perferendæ medicaminis violentiæ. Prima igitur conditio est eam subituri firma virtus, principale impedimentum infirma; quod extra omnem controversiam positum est, supraque expositum, quemadmodum virium debilitas repugnans magnis vacuationibus considerata sit, noscendaque. Alias itaque res naturales, scoposque secundarios, ut Scholæ vocant, pensitemus, in quas disigendi sunt oculi quodlibet grande remedium usurpaturis, initio facto abs temperie naturali totius corporis, partiumque principum. Nicolaus Massa ita tutum judicat Hydrargyrum, ita omnibus temperaturis accommodatum, ut omnes citra periculum experiri possint. Dissentit Palmarius, melancholica, multoque magis pituitosa corpora id genus remedii sine noxa inemendabili pati non posse opinatus, eidemque aptiora esse corpora calida & sicca. Aliquas ego ex primis qualitatibus minus appositas esse ad luctandum cum mercurio existimo, nullam ita impari luctæ, ut illius usum plane vetet, donec intra sanitatis confinia subsistit, quæ habent certam amplitudinem, in temperatura naturali, quam quisque ab ortu sortitus est. Dic, quæso, quænam hujusmodi temperatura in totum prohibeat usum mercurii? An metues cum Palmario, ne partes laxiores in temperaturis pituitosis labefactentur a validissimo dissolvente, & irreparabilem perniciem incurrant? At multi cum Lemerio præparant corpora ad usum illius longo tempore præmisso balneo, quod

N n hu-

humectat, laxatque partes: imo Petrus Forestus (*) sentit pituitosos minus offendi ab suffitu, qui vehementior est inunctione. Occurrere insuper potes formidato periculo decocto ligni guaiaci, vel alio roborante. Mihi periculosior videtur mercurius in temperaturis calidis, siccisque, uti pariter visus est Petro Foresto loco citato, aliisque: nimirum quia calidiores siccioresque succi, & vehementius valent impellere mercurium, & perniciosam acrimoniam facilius contrahere. Palmarius timens in pituitosis temperaturis usum fluentis metalli, non timens in calidis siccisque, respexit ad frigiditatem, tanquam nocituram pituitosis, & profuturam biliosis. Quid autem attendetur illius frigiditas, negligentur aliæ qualitates magis activæ parabilesque a nostro calore ejusdem partes dividente, & mobilitatem incitante? Unde inopinati effectus adventitiæ caliditatis in salivantibus corporibus sæpe comparent, uti superius dictum est. De illis etiam corporibus metuo, uti ab aliis quoque animadversum fuit, quorum facies impen-
do se rubet, caput fervido, copiosoque sanguine irrigatur, promteque dolore afficitur.

Ætates, quæ in aliis insignibus vacuationibus molien-
lanky dis non leve momentum habent, non dispar habent etiam in motione salivæ. Infantiam, quam Galenus, aliique graves auctores venæ sectioni eximunt, vetiti copiosam continuamque puerorum substantiæ dissipationem, & inde sequentem virium infirmitatem, qua fiducia salivatione exercebimus? An poterunt tenella corpora, & levi quacunque de causa cum detrimento mutabilia afflictionem salivationis sustinere? Non posse, a pluribus judicatum fuit, non tamen a Nicolao Massa Unctorum strenuo patrono, & pene antesignano, nullam ætatem subducen-
te

(a) In Scholiis Observat. 20. de Lue Ven.

te sputationi ex mercurio, quæcunque illa fuerit: idemque non minus intrepide decrevit Leonardus Botallus^(a), hoc fretus experimento. Infans nondum bimus a foeda nutrice infectus torquebatur artuum dolore, ulceribusque verrucosis circa os, anumque; qui deinde sugendo lac a matre eandem polluit, istaque patrem. Cum autem parentes illinimento *mercuriali* curasset Botallus, forte fortuna quidpiam ex eo superfuit, præbuitque in ætate infantili grandis experimenti occasionem. Namque mater fletu puelli permota, qui communem calamitatem passus, solus præsidio destituebatur, eum alternis diebus residua unctione illevit, donec gingivæ rubere incœperint. Stillavit os non multum, neque longiore tempore, sed ex æquo natus, genitoresque firmam integramque salutem recuperarunt. Hinc animis sumptis Botallus affirmat, se idem in aliis pueris tentasse, eundemque successum impetrasse: quorum tamen curationem cum minime describat, non sufficit, quod satis est ad imitandum. Quantum ad me attinet in re tam lubrica ancipitique numerosa exempla cum omnibus circumstantiis sincere relata requiro, ut exciter ad imitationem: imo Epicarmus, qui ait, nervos esse prudentiæ, nemini credere, ad excutiendum omnem metum dubii experimenti ineundi, mallet uti suorum oculorum testimonio, quam aliorum. At enim præter Botallum, Amatus Lusitanus, Massa, Rudius, aliique asseverant, eandem sibi fortunam obtigisse, & pupulos hydrargyro a se auspicato tractatos fuisse. Quoniam autem multi decantant securitatem Hydrargyri in pueris provocando ad eventum Fabricii Hildani^(b), quæso, id pensitemus. Cum famulo luc venerea foedato Dominus peregre proficiscens dormire coactus, morbum contraxit, domumque

N n 2 rever-

(a) *De rat. curand. Luis Vene. cap. 20.* (b) *Centur. 3. Observat. 73.*

Botallus
ob
nota

animi
au

quæ
est

reversus communicavit uxori prægnanti, & lactanti infantem viginti circiter mensium, qui similiter infectus est. Curationem Hildanus orsus est Syrupo purgante magistrali, quo pariter infans lactens purgatus fuit, deinde profectus illinitione solius matris; nihilominus infans licet non illitus multum pituitæ fudit. Quo comperto Hildanus removit puerum ab uberibus matris, jussitque poni in alio lecto ad metalli vaporem evitandum, qui nihilominus una cum matre convaluit. Habes decantatam a pluribus curationem; sed non habes, mea sententia, cur Hydrargyrum in infantibus omni periculo vacuum prædices? Multum, uti narratur, expuit infans pituitæ; idque dono contigisse a vapore mercurii, tametsi infantes etiam absque eo stimulo interdum multum liquidæ pituitæ effundant, ut omnes nutrices norunt. Hildanus tamen non permisit ultra puerum apud matrem jacere, certe veritus ex longiore decubitu noxam. Sin autem timuit ille infanti vaporem mercurii a matre prodeuntem, cur inde suadeberis de illinitione, vel propinatione ejusdem ad salivandum? Apage, si logicus es, hæc exempla ad astruendam securitatem animati metalli in infantibus. Non ideo totam pueritiam huic remedio subtraho, sed grandiores pueros subjicio, dummodo restrictius administratur, accommodateque ad ætatem; nec alia ratione curari possint; videlicet per ipsum mercurium admistum purgantibus. At in senibus quid decernendum? Senectutis frigiditas, viresque debiliores ad resistendum fortibus mutationibus, cautiorem exigunt fortis remedii administrationem, sed ante extremum senium nihil est, quod in totum illud prohibeat; idemque fanciendum de robusto sene ad salivationem, quod constituit Celsus ad venæ sectionem.

In aliis rebus non naturalibus nihil superest examine dignum præter gravidationem, quam tametsi Nicolaus Massa^(a) nullum habere momentum credit ad interdicens salivationem, quicunque sit illius mensis; nihilque periculosi ab eadem metuit Hildanus, sine diligenti meditatione id negotium transigendum non judico: de quo mihi sollicitudinem non minuit Varandæus^(b), affirmans, se vidisse plures gravidas ab inguine immundas, salivationem provocante mercurio ab Empiricis præstito, restitutas. Non contemno, nec parvi facio experientiam, sed apud Medicum rationalem consilium præcedat oportet, quo asseritur ab infamia inopinati fortuitique eventus. Sæpe narrantur secunda, supprimuntur adversa, & licet concedam, aliquos ægrotos ab Empiricis audacter sanatos esse, constat etiam aliquos audacter, & sine controversia perditos. Hæc igitur medela ad consilium accuratissime exigenda est, non Empiricorum more considerata, usurpandaque, qui sæpe paucis exemplis neque solleter expensis in actionem ducuntur. Majores sane turbas parit excretio salivæ per mercurium, quam purgatio per alvum facta mediocri purgante, quod tamen non omnino tutum est matri, foetuique, præsertim isti juniore, vel seniore. Quanto igitur erit hisce temporibus provocatio salivæ periculosior? At, dejiciens pharmacum, inquires, propellit humores uterum versus, & hac pulsione efficacius est ad abortionem salivatione; quæ humores ab utero retrahit, adigitque ad superiora, suosque tumultus procul ab utero ciet. Rite concludis hoc solo motu humoris animadverso, sed aliunde redditur magis abortivum hydrargyrum, videlicet a magna vi dissolvente, & liquefaciente: quæ quoquo versus effusa, cur non metues, ne ad uterum, fœ-

(a) *De Mor. Gal. tract. 4. cap. 1.* (b) *Lib. 2. de mor. mulie. cap. 2.*

foetumque perveniat? Dum mater, evacuatione plures dies perseverante, vigiliis, doloribus, inedia, foetore, tristitia maceratur, ut saepe solet evenire ex Hydrargyro, nil foetui detrimenti timebis? Accedit, ut non raro impetus inquieti metalli ad alvum conversus, eam magis cathartico sollicitet, duplicique ratione periculum abortus inferat. Diarrhæa prægnanti superveniens saepe abortum peperit, uti notat Prosper Martianus^(a). Cur non poterit parere mercurius si, ut aliquando contingit, alvum copiose solvat? Quid quod Hydrargyrum foeminam inter inanes labores, cruciatusque difficilis partus expedit, exitumque accelerat? quod constat ex Obstetricibus Gorriciensibus, solitis in difficultate partus illius scrupulum, referente Mathiolo, propinare? An igitur si propinetur ante maturitatem foetus in majore quantitate nihil dubitandum de abortione? At enim vidimus aliquot mulieres gravidas prospere, & sine abortu salivationem tulisse; scimus etiam aliquas nequidquam ea usas fuisse ad excludendum foetum, timoremque subeundæ notæ impuditiæ. Ergo tutus prædicandus est illius usus, statuendaque generalis regula exhibendi prægnantibus absque metu, uti visum est Bartholomæo Boschetto, accusanti tanquam male sanum commentum, & inanem inde conceptum timorem abortionis? Id pernego. Retentus aliquando foetus in prægnantibus contra impetum vivi metalli evincit, non esse necessario abortivum, non tollit rationabilem abortionis suspicionem, neque illius propinationem eximit reprehensioni citra magnam necessitatem, qualis fuit descripta a Boschetto. Ulcus supra columellam, palatum exedens ita deglutationi adversabatur, ut ori ingesta, sive solida forent, sive fluida in nares insilirent, nec vires fati-

scen-

(a) *In com. sect. 5. Apho. 34. Hip.*

scientes ex continua consumptione sarcire possent. Vel igitur mater cum foetu in evidenti periculo deferenda erat, vel quod unicum supererat, periclitandum Hydrargyrum. Respondit exitus necessario consilio, quem tamen parem in quacunque prægnante sperare nequimus; quarum alias ex diverso corporis apparatu videmus levi de causa abortire, alias fortiora irritamenta abortionis innoxie pati. Hinc fit, ut aliis faventibus experimentis voto, aliis contradicentibus in ambiguo posita sit deliberatio, quam solum capefcendam cenfeo in magnis angustiis, nulloque aliunde suppetente effugio.

De rebus naturalibus satis. Expendamus impedimenta ab rebus non naturalibus interjecta, primumque ab aere, inter res non naturales primatum obtinente. Hujus intensum frigus, vel calor, sicut aliis fortibus commotionibus humorum, parum est opportunus; item agitationi concitatae a fugaci argento, quæ aliis vehementior esse solet. Hoc igitur primum ab æstate summa prohibetur, magno cum discrimine aucturum dissipationem spirituum, humorumque factam ab ingenti ambientis æstu. Vix sani tolerare valemus vehementiam canicularis ardoris, quo languemus appetitu, noctes inquietas, & propemodum insomnes transigimus, multisque indigemus præfidiis adversus rempestatis incommoda; quibus temere adderetur afflictio salivationis, interdum ad animi usque deliquium fatigantis. Huc adde animadversionem Georgii Nenter^(a) in salivatione omni modo præcavendos esse nimios sudores, quippe impulsuros altius hydrargyrum in partes nervosas, & tendinosas: unde tremores, paralyfes, ariduræ sua initia sumunt. Quomodo autem omnis diligentia adhiberi poterit ad evitandam noxiam copiam sudoris,

(a) *Cap. 8. de Lue venerea.*

doris, non evitato intenso calore æstatis in obeundo periculo mercurii? Botallus tam intrepidus est, ut etiam in vigore æstatis mercurio ad eliciendam salivam non absteat: quem tamen in calidioribus saltem regionibus non imitaretur ob longe intensiorem calorem, quam in temperatioribus. Verum si morbi, quibus debellandis ille destinatur, sint longi, cur in quacunque regione non opperiemur commodiorem tempestatem? Volunt humores eo adminiculo a partibus exterioribus ad interiores vocari, adque fauces contrudi; id quod indubitatum est facilius evenire, quo tempore calor ambientis humores ad exteriora non allicit: & hoc respectu creditur illius usus felicius esse in Germania, quam in Hispania, & in Gallia, quam in Italia, pariterque in hujus tractu temperatiore, quam calidior. Persistit tamen in opinione Botallus, negligens caliditatis aeris moturus salivam, causaturque morbum venereum temporis processu acutum fieri; sed non indicavit, quantum hic processus extendatur. Neque vero ipsi tam facile concesserim, aliquot dierum intervallo, dum remittat intensio caloris, eam litem in lethalem acutiem erupturam esse: quinimo Alexander Trajanus observat ab ea neminem sua natura internecari. Ingenti tamen obiecto periculo, nec alio remedio reparabili, quam salivatione, aeris fervor postponendus est ancipiti experimento, si unicum suppetit. Secundum vigentem ætatem vehementer incommodat sumpturis hydrargyrum hyems aspernari: & Theodoricus ex æquo perniciosum esse putat frigus puerperis, & salivantibus ex mercurio. Facilius quidem possumus tueri domicilium jacentis a frigoris vehementia, quam caloris; providentius tamen est, utrumque excessum declinare, & prætolari favorabile tempus veris, vel autumnii, vel aliarum tempestatum partem moderationem,

rem, nisi magnum vitæ periculum instaret, ut in muliere descripta a Bartholomæo Boschetto, & altera a me curata, de qua supra mentionem feci, violentia morbi dilationem non patiente. Ergo ne temere dixit Trajanus a celtico veneno neminem natura sua occidi? Id non pugno semper verum esse, sed esse plerumque numerosa experimenta ostendunt. Duæ vero narratæ mulieres, ut apparebat, certam citamque mortem oppetivissent, nisi mercurio subventum esset, ratione potius partis ulceratæ, quam causæ ulcerantis: quæ vim suam in alias partes minus vitæ necessarias exercens, lethalis non fuisset.

Inter res non naturales, prætermittis, quæ minoris momenti sunt, remanet excutiendum, an menstruæ purgationes præsentēs, vel imminentes inhi-beant usum hydrargyri. Inhiberi vero inde persuasum habeo, quod vacationem utilem, atque ex instituto naturæ factam potest interpellare supremum dissolvens, sine delectu succos liquefaciens, adducensque ad superas partes, proinde ab Alexandro Trajano non solum in mulieribus menstrualibus formidatum, sed in omnibus propter vim sanguinis menstrui resolvendi, pellendique ad superiora. Quamobrem oblata necessitate illius experiundi, statim post menstruam purgationem fiat experimentum, eaque fiat temperatione, ut majori ex parte confectum sit opus, ante reditum solitæ excretionis.

C A P U T VI.

*De impedimentis ducendæ salivæ per Hydrargyrum
acceptis a rebus præter naturam.*

EX rebus præter naturam primo considerata occurrit copia succi exotici fusi per venas, lateque corpus occupantis; quæ videtur non leviter usui liquidi argenti opponi, objecto periculo, ne humorum noxiorum quantitas soluta, & agitata in aliquam nobilem partem impetum pernicipialem faciat. Accidere quippe potest, ut aliquis scatens pravis humoribus contrahat affectionem flagitantem opem mirifici argenti: cujus propterea usurpatio multo securior erit, prius imminuta tutioribus auxiliis caco-chymia. Scio dissentire Sydenhamum, qui contagio venereo tactos, nulla facta exceptione subjicit hydrargyro, nullam præmittens purgationem, aut venæ sectionem, quominus viribus ulla ratione incommodet. De venæ sectione non diffideo a Sydenhamo, nisi subesset notabilis sanguinis copia celeriter adimenda per venæ apertionem: quam tamen in eo veneno percussis, transactis aliquot a contracta labe diebus, eoque late fuso, difficile reperiri posse opinor, sed potius aliorum humorum proventum. Quare tutius est consilium Hildani, Bohnii, aliorumque minuentium purgatione redundantiam pravorum succorum ante experimentum mercurii, ne copia exagitata, turgensque, neque commodum exitum inveniens alicubi perniciosas vires exerat; uti contigit ægroto a Riverio^(a) descripto, quem prava colluvio in ventriculo congesta inter salivandum perdidisset, nisi ope vomitorii a Riverio præstiti expulsa

(a) *Observat. 77. Centur. 1.*

pulsa fuisset. Et sane imminutis noxiis humoribus ante conflictum, nonne liquet minus negotii superesse naturæ in conflictu? quæ certe minus fatigatur resistendo debiliori hosti, quam fortiori, videlicet, ex. gr. tribus duntaxat materiæ partibus, quam quatuor. Hinc habes, quod respondeas Sydenhamo objicienti, per evacuantia vires extenuari, proinde minus esse valituras sustinendæ futuræ procellæ. Siquidem, per ea si quid virium detrahitur naturæ, minuitur etiam in materia vis nocendi per detractiōnem quantitatis; quæ propterea minus virium exigit, ut superetur in conflictu cum remedio. Itaque siue copia nocui succi venas occupet, siue primam regionem, manifestum est, indicari purgationem ante usurpationem magni exsolventis ad prosperanda salivationis initia, quæ turbari possunt ab redundantia infesti simul commoti. Porro expurgatio instituta ad removendam colluviem primæ regionis, vel ad minuendam in venis contentam, ea sit moderatione oportet, ut minime vires accidat; nempe quæ peragitur dumtaxat ad auferenda impedimenta, vel aliquam partem causæ morbosæ, non omnem, neque deteriorem, & contumaciorem. Quod si prava potius qualitas, quam quantitas vim morbosam crearet, observata per aliquot dies accurata victus ratione, & aliquo sumpto corrigente, liceret devenire ad grandem periclitationem, nullo præposito purgante.

Motus humoris cutem versus deterret Alexandrum Trajanum a ducenda saliva etiam in gravi morbo, in quo duci solet, puta, in sævitia veneræ luis; si venenosus humor ad cutem pellitur, fœdatque pustulis, ulceribusque. Cum enim mercurius trahat humores ab ambitu corporis ad interiora os versus, metuit Trajanus hos motus contrarios, atque mavult sinere, venenum ferri ad exterica,

ra, ibique ferocire, quam aleam vivi metalli periclitari, illud ab externis ad interna accientis. Ac sane fateri oportet, non invalidam esse gallici curandi rationem, urgere virulentum fomitem ad corporis ambitum, atque per sudorem abigere, uti abactum se vidisse testatur insignis Medicus, & Poeta Fracastorius^(*):

Rumpe moras, agita assiduis venatibus apros

Impiger, assiduis agita venatibus ursos.

Nec tibi sit labor aerei cursu ardua montis

Vincenti, rapidum in valles deflectere ceruum.

Vidi ego sæpe malum, qui jam sudoribus omne

Finisset, silvisque luem liquisset in altis.

Si tamen hisce conatibus morbus obsisteret, neque posset per cutem tota exigi materia, non refugerem ab Hydrargyro, tametsi viderem eruptiones ad cutem, quæ sæpe non liberant interna affligente veneno, sed tantum effusi inditia sunt, effectusque. Animos mihi addit ad id consilium capeffendum, quod non raro videmus, & duros tumores externos, ulcera, Scabiemque refractariam sine viscerum offensa, facta ex revocatione humoris ad interna, hydrargyro curari. Quidam Theologiæ lector ex ordine Divi Augustini Scabiei contumaciam contractæ post suppressas hæmorrhoides salivatione ex mercurio repetita pel- lere conatus est, nullam interim noxam patientibus visceribus. Funesta vero accidentia, aliquando illius usurpationem consecuta existimarem, potius evenisse ex portione intus superflite, quam ex regressu ad interiora portionis extra vergentis, proinde ex motu ad exteriora non dissuaderi usum instabilis argenti, si a morbo pertinaci postuletur. Fortassis humore ad cutem tendente utiliora forent irritamenta sudoris, sed hisce incassum tentatis, quid reliquum est, nisi periclitatio salivationis?

Ex-

(*) Syphil. Lib. 2.

Expensis vitiosis humoribus, tanquam causis morbosis, eorumque motu, transeo ad morbos totius corporis, vel partium, inde pariter supremi dissolventis impedimenta collecturus. Acuti affectus, febresque vehementia symptomata infligentes, viresque labefactantes apertius repugnant salivationi per Hydrargyrum, quam ut pluribus debeat ostendi. Solum patere quaestioni potest, an febres intermittentes repugnent, affirmante Ballonio, quemdam luis venereae suspectum, simulque quartana laborantem per litum *mercurialem* elicitio sputo, quartana redemptum esse. Vidimus etiam leni mota salivatione feeminam laborantem quartana, empturamque omni pretio salutem a Villisio curatam fuisse. Enim vero, nec ista, nec alia si qua sunt similia experimenta, mihi valent adimere timorem, ne hydrargyrum male verteret, si peteretur a morbo cum quartana conjuncto; censeoque cunctandum esse, donec extinguatur quartana, nisi aliunde certa mors objecta compelleret ad anceps & periculosum remedium. Sæviente frigore intenso quartanae, quo, uti placet Recentioribus, ita confunditur serum cum sanguine, aliisque humoribus, ut nequeat secerni a glandulis destinatis, nil ne metuendum erit a latice inquieto argento imbuto, violenter intus retento? Anne contra vim frigoris intensi secernetur humor, effundeturque per ductus salivæ? Quid plura? Sat apertum est periculum remedii apud quærentem securitatem medicationis.

Sunt qui toto corpore Scabie inquinato ea ratione credant dubiam sputationem ex hydrargyro, quod corpus affluit acribus, & falsis humoribus effectoribus Scabiei, qui ad os una cum metallo compulsi excitare valent ulcera cum vehementi dolore patientis tolerantiam superaturo. Verumtamen si aliquando id accidit, plerumque non accidere

non i
febris

an
feb.

an
scab
uni
corp

cidere extra dubitationem videtur ex modo agendi Hydrargyri, quod acres, acidosque humores ad os sinceros non advocat, sed aliis permistos, & præterea attritione obtusis eorum cuspidibus. Neque vero oppositum arguit erosio gingivarum, eandem patientibus a mercurio, uti supra adnotatum fuit, etiam corporibus sanis, nec acido abundantibus. Ubi ille in fauces illatus est, vel ibi retineatur oportet, quod ejus naturalis impetus non patitur, vel partes erodat, sibi que viam paret. Nuper etiam mentio facta est de Patre Augustiniano, qui ab iterata salivatione nil majus solita ulceratione oris tulit, licet totum corpus scabiosis pustulis interpunctum foret. Joannes Muys in praxi Chirurgico rationali jubet, hoc remedium declinari in ægroto ulceribus afflicto, quod legerit aliquando fero acri non per os, sed ulcus scatente, istuc asperatum esse, & deterius redditum. Quo particulari eventu non permoveor, tot experimentis contradicentibus de ulceribus salivatione ex mercurio prospere curatis.

Hydrargyrum capiti haud leviter officere inaurantes demonstrare videntur, qui operi suo vacantes illius fumis frequenter exceptis, tandem surdi, paralytici, epileptici, vel apoplectici pereunt. Verum non ignobiles Medici concedunt, id quidem evenire inaurantibus, non tamen iis, qui mercurio illiniuntur: immo Nuchius de saliva affirmat, eodem salivam movente aliquando dolores capitis, vertigines, Manias, Epilepsias esse sublatas; idemque experientissimus Rotarius, alique confirmant. Porro calamitosum eventum inaurantium ab eodem argento imputant illius fumis una cum aliis pravis habitibus inspiratione haustis; statuuntque magnum discrimen inter partes fumi separatas a substantia hydrargyri, easdemque implicatas substantiæ: quod tamen mihi tam clare non apparet.

paret. Cum enim diversæ partes Hydrargyri humano conatu separabiles non sint, & quælibet illius pars cuncta elementa comprehendat, non satis intelligo, quo sensu dicant, partes fumi esse divisas a substantia, perinde ac si alia esset substantia hydrargyri, alia fumi. Vincit illud efficacitatem ignis rerum omnium everforis, & in ludibrium vertit; quod scilicet flammarum violentiam passum pristinam illæsamque faciem recuperat, suamque victricem immutabilitatem, ut ita dicam, jactanter ostentat. Provocho ad experimentum narratum a Jacobo Sachs testante, Romæ dissectum esse cadaver cujusdam aurificis, ex summo capitis dolore extincti, atque in cerebro repertam esse plusquam libram mercurii ex ejus vapore hausto congelatam. Itaque fumus Hydrargyri nihil est aliud, nisi ejusdem pars non per separationem ab aliis elementis reddita tenuissima, sed per minutissimam continuitatis divisionem, itemque concitator ad motum, aptissima proinde ad se se insinuandam in penitissimam compagem partium cerebri, nervorumque inde manantium, & tandem frequenti repetitione laxandam, & pervertendam: atque hinc potissimum pendere opinor lapsum inaurantium in affectiones indicatas. Cum autem artubus affrictus mercurius intro subit, vel ore sumitur, non ita a calore nostro, aliove stimulo minutatim dividitur, ut opera flammarum; sed in partes crassiores, minusque ad motum incitatas, & paratas efficere, quod majori ab igne concitationi, & tenuitati adjudicavi. Verum enim vero non vindicatur id argentum corpus nostrum ingressum sine opera ignis a potestate nocendi, nisi certis quibusdam animadversionibus in usum vocetur. Minus quidem virium calor noster addere illi potest, quam igneus, sed tantas potest, ut incautus ejus præbitor graves offensas importet. Inest illi vis insignis

caput
gnis humores fundendi, trudendique ad superas partes; & inde traho causam timoris in illius usurpatione, si caput imbecillum est, & natura morbosum. Quandoquidem videmus non raro post exhibitum Hydrargyrum ad extrudendam veneream colluvionem, caput perturbari, interdum ad delirium usque, gravari, dolere, artus tremere; quæ tametsi desinunt facta copiosa excretionem sive salivæ, sive sudoris, urinæ, aut alvi, tamen declarant infestam capiti actionem, mihi persuadentem in eo debili, morbosoque dubium exitum salivationis esse, nec eam imperandam, nisi aliunde impenderet magnum vitæ periculum, aut ab ipso venereo affectu caput conflictaretur, facilius eo remedio expugnabili. Oneraret meam hanc persuasionem, si laborans esset temperaturæ calidioris, abundaretque tenuibus acribusque humoribus, paratis concipere motum ad superiora. Ceterum in aliquibus capitis affectibus genitis a crasso humore etiam non celtico absque temeritatis nota tentari potest, fuitque tentatum aliquando utiliter in Epilepsia, alterove capitis morbo; incidente, ut opinor, tentamento in humorem crassum, viscidumque effectorem ægrotationis. Magna tamen circumspectio semper requiritur, commendata ab sinistris eventibus inde interdum consecutis. Narratur a Villisio, in atroci inveterataque Cephalalgia citra ullam suspicionem venereæ luis, moto hydrargyri opera salivæ fluxu in foemina perillustri, morbum adauctum esse, alterique ægroto similiter tractato coecitatem illatam.

morbis
Tussim, dolorem pectoris, difficilem spirationem, aliaque indicantia pulmones affectos esse, venasque ex facili scissiles pro impedimento salivationis circumspectiores habent. Vidimus supra ex Lemerio quemdam robustissimum delibutum intra dimidiam horam spuisse duodecim

san-

sanguinis libras; mihiq̃ue pariter retulit Patritius Cremo-
nensis, se Parmæ multum sanguinis effudisse, ex illitu
mercurii pro Scabie. Quamquam autem credunt multi,
sanguinem occasione sumpti mercurii erumpentem semper
scatere ex vasis faucium, orisque, nunquam ex pulmoni-
bus; tamen non video, cur in natura paratis ad Hæmop-
tysem metuenda nihil sit apertio vasorum ipsius pulmonis,
ac multo magis in eam patientibus. Verum enim vero
non desunt adeo securi in usu ejus remedii, ut in fluxio-
nibus ad pectus cum sputo cruento copioso ad idem con-
fugiant. Abs quibus id unum peto, quemadmodum ma-
gna vis exsolventis incitatieque argenti fræno esse possit ela-
benti sanguini. An alio revocando humorem fluentem ad
pectus, sicque auferendo causam cruentæ effusionis? E-
nimvero totum sanguinem commovet illud, & commotio-
ne calefacit, præparatque ad largiorem effluxum per vias
jam reclusas. Vidi etiam Patavii virum annorum circiter
56 temperamenti melancholici ex mercurio phthisicum
factum occubuisse. Laborabat iste duris tumoribus in variis
partibus absque dolore excitatis, sumtoque Hydrargyro
plures menses solito copiosius sputavit; sed inde correptus
est febris lenta; qua reddita intensiore mense Januarii anni
1734 advocatus sum ad consultandum de remedio. Quo
die accessi febris erat lenta, continua tamen, cum pulsu
duro, & parvo, quæ dies quindecim fere in eodem statu
permansit. Postea cœpit inordinate exasperari, ut modo
intensior esset, modo remissior. Observavi in sputamini-
bus mane excretis aliquot similia loturæ carniū, asse-
ruitque æger, se semper ita permista sputa mane excrevisse
post usum mercurii ex gravi suspitione venerei inquin-
menti. Post dimidium Februarium omnia in pejus ruerunt.
Febris fortior, noctes frequenter insomnes, magna deje-

ctio appetentiæ, sputa faniosa, & initio Martii mors. Fallopius Asthma, & Marasmodum, quamvis ab impuritatibus venereis genitum soli præfagitioni relinquit, nullo magno medicamine amoliri conatur. Aliqui tamen oblinunt hæticos ab immundo concubitu; quos ratione non destitui opinor, si pro hæticis intelligunt, quos inveterata lues celtica emaciat, consumitque cum febris lenta, continuaque; nempe quæ fomitem habet in crassioribus, & tenacioribus succis, quam hætica aliunde suborta: qua consideratione, viriumque habita ratione hisce Hydrargyrum parca manu administrare non dubitarem, nisi pulmones male haberent.

Lienosi, in quibus, uti docet Cous, gingivæ graviter affectæ olent, & a dentibus discedunt, parum apti censentur ferendæ salivationi. Lienosi sunt Hippocrati, aliisque Antiquis, non quicumque aliquo lienis affectu impediuntur, sed diuturno tumore cum visceris imbecillitate: in quibus Hydrargyrum gingivas plane labefactaret, novas pareret ulcerationes, veteres non sanaret, quippe ab imbecillitate, & vitiositate lienis conservatas, eoque medicamenti genere irreparabiles. Inde pariter non sola clades gingivarum, orisque formidanda foret, sed deteriora, propter semicorruptos humores, promptequè solutiles impulsu hydrargyri. Lienosis addo affectione hypochondriaca detentos, quibus cum videamus esse vehementer noxia purgantia, non potest non esse suspectus usus irrequieti metalli, humores fortiter commoventis, molestaque symptomata infligentis, cum magna perturbatione spirituum, a pluribus Recentioribus habita pro causa primaria hypochondriacæ affectionis.

Alexander Trajanus^(a) Erysipelate frequenter tentatos

(a) De Mor. Galli. lib. 6.

difficulter pati mercurium existimans nullam subdit rationem, aliisque investigandam reliquit, quam ita colligo. Corpora obnoxia Erysipelati calidos, acres, tenuesque humores congerunt; hacque de causa minus parata sunt ad ferendam agitationem mercurii. Quemadmodum enim, sicuti observatum est, in regionibus calidioribus, in quibus tenuiores succi generantur minus prospere cedit illius usus, quam in frigidioribus acervantibus crassiora purgamenta; item corpora natura propensa ad similia creanda, gravius eundem ferunt. Censetur quidem instabile argentum frigidum, magis tamen nos alterat vi attenuante, & dissolvente, quam frigiditate, quæ postquam illud in tenuissimas partes divisum, impulsumque est, parum habet virium ad agendum.

Alvus moderate laxa minuit turbas jactati metalli, large fluens periculum adauget, usumque dissuadet propter exitiale incrementum fluxus timendum ex majore dissolutione, & commotione humorum inde secutura; quæ licet soleat concipere impetum ad superiora, tamen aliquando etiam ad inferiora prolabitur; tuncque proclivius, cum ex alio irritamento jam eo feruntur humores. Mense Maii anni 1732 Patavii cuidam honestæ fœminæ annorum circiter 44 laboranti ulcere intestini recti, quod ita perforaverat vaginam uteri, ut inde alvi excrementa exirent, multis præmissis remediis, tandem porrectum est Hydragyrum ad salivandum, quod cum non posset superare impetum humorum profluentium ad partes ulceratas, eodem totam vim suam convertit, nullo interim commoto sputo. Porro alvi contractio non favet quidem ei remedio, sed minus opponitur, quam laxitas; cui tam facile providere nequimus, uti contractioni clysteribus minuentibus copiam excrementorum, aucturam, si intus relinquatur,

afflictionem in partibus superioribus . Item urinæ difficultati obnoxius , quam immunda venus minime peperit , si mercurio utatur , periculum subit affectionis promovendæ ; quo constat eam interdum produci etiam in aliis nil hujusmodi antea passis .

Lemerius^(a) describit *Panaceam mercurialem* , quæ mediocriter os ferit , genas leviter tumefacit , nec valde impedit linguæ motum , labiorumque , tamque placide negotium conficit , ut quidam , sicuti testatur , post eam acceptam domo egrediantur , interque sputandum solitis muniis vacent . Actio tam placida Hydrargyri mansuefacti non patet superius omnibus propositis impedimentis , sed ea tantummodo , quæ difficillimos , aliisque remediis oblucentes morbos expugnat , exigitque diligentem intra cubiculum jacentis ægrotantis custodiam , quietem animi , corporisque , aliaque adjumenta ad superandos labores molestorum symptomatum . Panacea Lemerii quanto minoris est afflictionis , & periculi , tanto minoris est roboris ; idque probandum non est , ipso auctore idem testante . Nihil magni sine magno labore rebus in omnibus minime fortunæ subjectis impetrari solet , solo fortunæ favore magna interdum huic pretio eximuntur . Scio aliquos ita addictos esse , & confidere Hydrargyro , ut me nimis timidum sint habituri , parvique facturi multa ex propositis offendiculis , quibus vel interpositis , narrantur morbi eodem prospere profligati . Enimvero non inutile erit caute deliberaturis de tam grandi remedio , omnia præ oculis habere , aliqua ratione securiori illius usui adversantia ; quo vel experimentum declinent , vel circumspectius obeant ; & consultius profecto obibunt , si ante illud omnia dubitandi momenta providerint , & pensitarint .

CA-

(a) *In Cursu chymico* .

C A P U T VII.

*De præparatione corporis Hydrargyro perducendi
ad salivationem.*

PRæparatio corporis ad prospere salivandum opera liquidi argenti pertinere potest, vel ad quantitatem humoris minuendam, vel alterandam qualitatem. De quantitate sancitum jam est, hanc consultius minui ante usum remedii, si magna est, neque tam qualitas, quam quantitas negotium facessit. Quæ animadversio potissimum spectat ad curationem veneræ ægrotationis, eamque susceptam mercurio conficiendam, a pluribus inde inchoatam ceteris prætermiſſis evacuantibus. In aliis enim affectibus a viru libidinoso non illatis, antequam summum dissolvens porrigitur, alia tentari solent, alia ministrari detrahentia. In quocunque tamen morbo mens est illud adhibere, si primæ viæ impuræ sint, hæ detergendæ sunt, ne retentæ commotæque impuritates impediant fausta initia salivationis. Præparatio vero alterantibus faciendâ latius patet, extenditurque ad omnes morbos eo præsidii genere tractandos; abs quibus dixi indicari opem Hydrargyri, ut genitis ab humoribus viscosis, & solutu difficilibus: qui si indigent aliqua præparatione ante illius usum, ea maxime consistit in incisione, atque attenuatione. Propterea licet a diversis auctoribus diversa præmittantur ad præparandum, eo tamen cuncta tendunt, ut humores excernendi commoveantur, fluoremque acquirant. Palmarius propinat decoctum Guaiaci, quo venenum intus latens, sopitumque excitetur, propellatur, promptiusque subeat venturam actionem medicaminis. Plures præsertim extranei,

*Palm.
ubi
qu*

nei, cum Lemerio Hydrargyri operam experturum longo tempore in balneum demittunt, ad maceranda dura, & viscida, inde facilius cum medicamento conjungenda, & una cum ipso extrudenda. Bohnius, aliique addunt balneo vegetabilia emollientia, & resolventia ad efficacius corrigendos vitiosos succos. Alii sola humectantia propinant relicto balneo. Videtur autem primo aspectu omnis præparatio extenuandi, dissolvendique gratia prorsum superflua, posita deliberatione utendi mercurio contra vitium viscidorum humorum difficilium ad solvendum. Quid enim attinet, inquiet aliquis, decocta calida, vel balnea, aliaque debiliora attenuantia administrare fortissimum supremumque attenuans dissolvensque sumpturis? Hinc forsitan persuasus Sydenhamus, accersitus ad luem inguinis sanandam quælibet præparantia missa facit, solam adhibet famosam illinitionem. Utrum autem tutiorem partem sequatur, videndum est. Magna virtus, fateor, inest irrequieto metallo ad dissolvendum, majorque, quam ceteris ad id designatis, sed certum itidem est ad solutionem paratiora promptius, & cum minore molestia educi, nec supervacuum esse diligentiam educenda præparantium. Illud etiam emolumenti superest, quod dispositi succi minore quantitate argenti exiguntur, citius, & leviori perturbatione corporis; quemadmodum evenit etiam in evacuatione per cathartica agentia in apparatus succos, ultroque irritamentum sequentes. Probatissima pariter est sententia Hippocratis, corpora expurganda esse fluida facienda; quæ certe valet etiam in purgationem per Hydrargyrum exequendam, tantoque magis valet, quanto magis ista ceteras superat. Huc adde contagionem veneream interdum non unica salivatione abstergi, iteratamque requiri; quam iterationis indigentiam sperare potes

im-

impeditum iri, antea dispositis humoribus ad expulsi-
onem. Nolo porro corpus cum fortiore remedio luctatu-
rum extenuetur repetitis validis purgantibus, vel aliis ad-
miniculis, contendatque præperatio cum remedio, cuius
gratia præponitur. Detrahat aliquid copiae, limet aliquid
de qualitate obstante, ponatque tantum initia curationis
perficiendæ Hydrargyri efficacia. Quare mihi improbabi-
lis est praxis Joannis Fortis, qui Juveni viginti sex anno-
rum lue venerea confirmata polluto viginti dies sudorem
elicuit, deinde mirabile illinimentum adhibuit. Sudore
tot diebus continuis evocato necessario vires obteruntur,
præsidiumque adversus futuram pugnam debilitatur, resic-
catumque per copiosum sudorem corpus magis oblæditur
ab secuturo humoris copioso effluxu. Si valida purgantia
porrecturi ex Senis consilio corpus humectamus, quid re-
siccabimus ante sputationem uberiores humidi quantitatem
excreturam? Mallem igitur in simili morbo alte recondi-
tum, densatumque venenum decocto Guajaci, & Salsæ
parillæ convenienti tempore propinato commovere, & at-
tenuare, quam fortiore conatu sudorem provocare. Pro-
pterea decoctioni admiscenda est portio minor lignorum,
quam quæ admisceri solet sudoris ducendi causa. Vide-
tur etiam parum opportunum esse validis irritamentis su-
doris ad cutem urgere humores mox a mercurio compel-
lentos ad fauces. Ridebit hæc Botallus, qui pugnat, a
fluente argento nocuos succos sparsos per ambitum corpo-
ris non repelli, causatus, se non videre inde consequi pes-
simum symptoma repulsionem significans, scilicet aut cor-
dis, jecorisque, aliorumque viscerum rosionem, aut in-
flammationem, aut aliam labefactionem a repulso viru,
inque præcordiis collecto. Quare decernit, insitam esse
Hydrargyro vim coquendi, dissolvendi, explodendique
no-

nocuos succos externum corpus infestantes, sed humanæ menti omnino ignotum esse, quemadmodum id efficiat. Mihi tamen hac de re cogitanti primum succurrit animadvertere, observatum esse oblinitum unguento *mercuriali*, si affluat pluribus ulceribus in ambitu corporis, istaque ab inundatione citius justo siccentur, pluribus infensioribusque symptomatis exerceri circa fauces partesque superas, non infirmum argumentum, materiam noxiam a partibus exterioribus ad interiores secessisse, aut saltem quæ illuc ferebatur, ad interiores, superioresque conversam esse. Porro si fordes obsidens cutem vere ad interna revocatur, iccirco non importat visceribus noxas, quas importandas esse opinatur Botallus, propterea quod non consistit ibidem, sed ultra velox permeat ad fauces; & insuper in regressu a cute ad interna admiscetur aliis humoribus, & mistione minus est parata nocere, quam sincera, & nulla temperatione mitigata. Adde pariter ab Hydrargyro fieri modificationem quamdam, & correctionem ejus transitum per viscera innoxium reddentem. Si tamen probabilius judices, materiam fusam per externa vi metalli non intro reduci, sed resolvi, ideoque nova non appellente materia cutem defœcari, & ulcera siccare, dicas ideo majorem molestiam partibus superioribus inferri, quod medicamen intro permeans prohibet cursum materiæ ad corporis ambitum, totamque trudit ad partes, quas natura sua solet invadere, & vexare.

Præter attenuationem humorum nonnulli ante usurpationem aquosi argenti propinant decoctum Guajaci, tanquam antidotum quoddam in pravam illius qualitatem, roboraturum cerebrum, & jecur; hinc forsitan permoti, quod Guajacum creditur superfluam humiditatem absorbere, adstrictionisque particeps esse. Verum quocunque fine

præ-

præsumatur decoctio indicis ligni, siue tenuandi causa, siue roborandi, non habeo quid opponam; cum ex eo aliquid boni sperari possit, nihil mali timeri. Existimo tamen, parum inde muniri ea viscera adversus mercurium, qui non nocet potissimum mala qualitate antidoto Guajaci lenienda, sed humorum solutione, & impulsione; quæ tamen & salutis instrumentum est, si regitur a natura, & detrimenti, si regimen excedit. Excessus porro antidoto cohiberi non potest, sed in primis accuratissima administratione, videlicet delectu justæ quantitatis, morborum id medicamen poscentium, & corporum ad ferendum idoneorum, deinde impetum præter opinionem conceptum aliis adminiculis infra exponendis cohibentibus. Inventa quidem a Chymica ars est ita temperandi Hydrargyrum, ut inde humorum ad fauces fiat lentior accursio, levior commotio, multoque mitior vis affligendi: sed hæc ipsa moderatio vires ejusdem delumbat, imparesque reddit pertinaci morbo propulsando.

C A P U T VIII.

De indicationibus generalibus occurrendi Hydrargyri noxis.

Non iniquo animo feremus, remedium plusquam magnum, & morborum pertinacia extremorum expugnatorem per summam quietem, & securitatem opus suum absolvere non posse; si animadvertemus cetera remedia, minusque contumacibus morbis destinata undecunque non esse innocentia. Minus tamen aliqua laboriosa sunt, & molesta, neque novas vexationes afferunt, uti mercurius; cujus usui non raro superveniunt affectus pe-

culiarem opem requirentes ; qui tamen sæpe compensantur expugnatione morbi aliorum opera insuperabilis . Omnia magna magno Mortalibus constant , eodemque pretio redimenda salus est graviter , & pertinaciter oppressa . Cum igitur mercurius etiam in exitu felici , nova vulnera identidem infligat , (quod in usu aliorum grandium auxiliorum observari non solet) mearum partium resse duxi , elicere indicationes generales ad illius ictus repellendos , & vulnera sananda : quæ tamen ut ut molesta , non semper æqualis periculi sunt . Aliquando vero valde sævit id genus remedii , & periculosas affectiones creat , vel inflammationis faucibus , viaque sibi obstructa , vel gravitate capitis , & dolore , vel copioso sanguine profuso , vel præcipiti humorum liquatorum in ventrem impulsione , ut alios graves affectus taceam , quos interdum inde partos accepimus : quibus licet sæpe liberentur ægroti , tamen aliquando succumbunt . Itaque , sive laborantis errore , sive medici , sive assidentium , sive alio ignorato causarum concursu mortem aliquos in usurpatione Hydrargyri oppetiisse certum cum sit , ut incipienti morbo subvenire possimus , & incrementum capturo opponi , autumo , indicationes curatorias ex duplici capite desumendas esse , nimirum a morbo recens orto , morbique causa , idest hydrargyro . Atque ut isthinc ordiar , petit illud tanquam morbosa causa sui depulsionem : & ideo si per unctionem cuti induratum esset , inde minaci morbo exorto , & vestigio linteis , indusiis , ceterisque integumentis mutatis , absterfisque oblinitis partibus lixivio , vel decoctione Hormini , aut vino , portio nondum in intimum corpus illapsa adimenda est ; illapsam vero aliis adminiculis educere studebimus , aut motum ejus immoderatum cohibere , nisi sit educendi potestas , habita ratione morbi inde producti in electione reme-

remediorum. Ergo impetu fluentis argenti ad ventrem ,
 alvumque converſo cum torminibus , atque exitiali excre-
 tione , præſentaneum foret remedium , quod Aetius , &
 Dioſcorides illud potis adminiſtrant , videlicet lac , paulo
 poſt provocato vomitu rejiciendum : quo retraherentur ,
 aut ſaltem compellerentur deorſum concitata , uti viſum
 eſt Hippocrati^(a) , aliisque pluribus ejus veſtigia prementi-
 bus , qui in Dyſenteria aliis etiam de cauſis genita vom-
 itum præcipiunt ; aliaque præterea in uſum adducenda in
 eo morbo conſueta , & præſertim clyſteres ex oleo amig-
 dalarum dulcium cum vitellis ovorum . Porro vim ſuam
 jaculante Hydrargyro ad fauces , palatum , aliasque oris
 partes , ſolutosque humores eodem uberius adducente , ab
 ſolito revulſionis , & derivationis præſidio ſuppætiæ peten-
 dæ ſunt , pertuſa vena brachii , ſi fauces tumore obſtrue-
 rentur , impedita deglutitione ; uti contigit juveni memo-
 rato in Ephemerid. Germ.^(b) a cingulo *mercuriali* propter
 Scabiem admoto : quo in eas anguſtias conjeſtus , ut neque
 loqui , neque cibum , aut potum capere , nec reſpirare
 poſſet , non tenue levamen ex reſignata vena tulit . Item
 omittenda non erit revulſio in violentia morbi per expur-
 gantia , iſtaque non languida , ſolaque vi laxandi prædi-
 ta , ſed purgandi , ut ajunt , cum electione , cujuſmodi
 foret ſerapium roſatum ſolutivum cum ellectuario de ſuc-
 co roſarum , quo uſus eſt Botallus ejusdem cautionis ad-
 monitor . Niſi vero purgans in propoſito caſu indigen-
 tiæ ſatiſfaceret , urgendum opus eſſet aliis conſuetis revel-
 lentibus . Porro detrufa portione humorum deorſum , ſic-
 que diviſo agitatorum impetu , ſperare licet , naturam le-
 vatum iri , nec impeditum ſalivationem , imo cum mino-
 re moleſtia proceſſuram eſſe ; obſervavique non ſemel , eo-

Qq 2 dem

(a) *Apho. 16. Sect. 6.* (b) *Decad. 2. anni 6 , pag. 204.*

*form
flu*

*cl
enol
ut
o*

*in
re*

dem impulsu Hydrargyri, & alvum sine excessu laxari, & os congrua salivæ copia rigari. Magna vero partium superiorum afflictione perseverante, orta ex morbis, qui calori tribuuntur, post ea usurpata præsidia, ad alia confugiendum est. Arguit illa magnam attenuationem metalli, jactationemque inde perniciales vires acquirentis; vel humores indole sua calidos acresque, promptosque ad solutionem, motumque. Hisce procul dubio opponuntur refrigerantia, & densantia, proinde apta correctioni: quas dotes obtinent emulsiones paratæ ex seminibus frigidorum majorum, papaveris albi, gelatinæ, corallia rubra, idque genus alia, immiscendo mirabile præsidium Dioscoridis, auri ramentum quam tenuissimum, vel pulverem crysalli, quem Anselmus Boethius, Valleriola, alique præstantissimum deprædicant etiam contra mercurium sublimatum. Cum autem nihil efficacius sit ad compescendos tenues, commotosque succos soporiferis, hæc quoque in vitæ discrimine suppetias veniant oportet. Facit ad idem tenuis mediocriter victus ratio cum abstinentia vini, quo magis incitatum argentum fortius evadit ad nocendum; testaturque Botallus^(a), quod etiam ab aliis observatum est, minus affligari salivatione cibo parce utentes, quam liberaliter, & aqua pro potu, quam vino, nisi copiosa aqua diluatur. Quinimo Sydenhamus præbet carnem vituli, & pullorum duntaxat postquam subsidit tumor gingivarum. Haud me latet victum tenuem multis non approbari, sed largiorem, itemque potionem vini generosi ad vires sustinendas, licet os pituita, ulceribus, atque inflammatione prematur, sic assentiente Fracastorio

Tempore non alio generosi pocula Bacchi

An-

(a) Cap. 9.

Annuerim sumenda Tibi, purumque Falernum

Et Chia, & pateris spumantia Rethica largis.

Enim vero labentibus viribus non propter copiam excretionis, sed afflictionem ex vehementia symptomatum, autumo, illas fortius sustineri eorum mitigatione, sedatoque impetu nimio argenti, quam uberiore victu, plenifque pateris Falerno. Tantum cibi dandum est, quantum vires a morbo exercitæ conficere valent, non oneri sit, modicum Falerni adjiciendo in magna cordis anxietate cum periculo Syncopes. Utrum vinum quadam singulari dote opponatur mercurio incertum est, certum tamen, ejus vim motumque a calidis incitari; abs quibus sane præstat temperare, nisi a forti causa postulentur. Porro vereor, ne Fracastorius laudans largis pateris purum falernum magis indulserit Musæ & carminum concentui, quam veritati; quod pariter Seneca ^(a) animadvertit de Virgilio, quem ait in Georgicis aspexisse, non quid verissime, sed quid decenter diceretur. Quod de vino sancitum est, multo magis de ejusdem spiritu ratum firmumque habeto; quem aliquando fuisse lethalem salivanti luculenter testatur eventum a Bohnio narratum ^(b) de quodam nobili viro, qui in medio salivationis recte procedentis spiritu vini clam aliquoties poto, inopinato magnis cordis anxietatibus, & strangulationis aggressibus correptus, sudoremque frigidum fundens expiravit. Convenienti victus ratione, internisque remediis inquieti argenti immoderatum impetum obtundere conati, non prætermitemus etiam externa idonea tenuiorem partem indomitamque ad cutem allicere; atque si adhibita fuerit inunctio, illitas partes, & insuper extremas fricando, & lavando decoctione laxantium herbarum, vel solius Hormini, efficacis, auctore Dioscori-

de,

(a) *Epist. 8.* (b) *Cap. 15. de salivar.*

an
vin
ing

Horn
Deo

de, ad aculeos e corpore extrahendos. Multimodis potest celebrari revulsio obstatura molestiis Hydrargyri, sed facta a partibus internis ad externas præstantior est, prorsumque opposita motui humorum ab eo concitato interiora versus: quam non solum conari potes dicta frictione, & lotione, sed urgere vesicatoriis admotis brachiis, tibiisque, vel unctione ex candente ferro, observante Alexandro Trajano, aliisque usum mercurii esse solere minus infestum, quibus, vel fistula in ano est, vel pluribus in locis ulcerata cutis, per hos aditus attenuato argento, atque in spiritum verso erumpente. Quin etiam hunc exitum adjuvarem, cuti, vel ex morbo, vel arte ulceratæ auri brachæam apponendo, ad cuius amplexum, ut ferrum Magnetis, Hydrargyrum accurrit, hac de re mihi facem præferente quodam Medico Veneto, de quo memorat Bartholomæus Bolchettus^(a), qui salutem ægrotantis delibuti, & vita periclitantis sic expedivit. Assidens ille laboranti venerea lue, cum vidisset post quartam inunctionem nondum uberiore saliva os madere, destitit inungere. Advocatus alter in consultationem animo fortior iussit, illi nimentum iterari, & septies iterato incidit æger in febrem ardentem cum summo animi angore, mentisque alienatione: quibus prior, cautiorque Medicus variis ingeniis obstetit purgantibus, auroque in minutissimum pollinem intus sumpto; sed omnibus incassum. In hac rerum desperatione coepit consilium admovendi externo corpori auri folia; tantumque mercurii ad ea accurrit, ut omnia argenteum colorem contraxerint: quo pacto imminuta, uti fas est opinari, perturbante & opprimente copia, subinde saliva feliciter copioseque erupit, salus rediit. Ceterum sæviente præter modum intus metallo, generale & robustius

(a) De salivat. artific. cap. 3. art. 3. (d) .5.3.3.3. (.)

Itius remedium creditur lac asininum copiose potum, donec purget; quemadmodum porrigebatur ab Hippocrate ad evacuandos, simulque corrigendos humores acres, rodentisque. Quod si tanta copia lactis asinini non suppetere, posset aliud genus lactis substitui, dejiciensque reddi addito Sirupo rosato solutivo, vel Ellectuario de succo rosarum.

Morbis, quos vidimus aliquando ab animato argento suscitari, ut cautius consulamus, observandum est, quo tempore contingunt. Interdum prius quam sputum emanat, suboriuntur varia, nec levia symptomata, quæ manans sputum adimit, vel mitigat: quod propterea blande incitandum est frequenti scretu, leni frictione oris, ut festinemus symptomatum lenitionem, neque aliis adminiculis turbemus futurum opus. Hydrargyro duntaxat resistendum valenter est, ubi apparet non regi a natura, vehementer, præterque morem infestum esse, puta, magnæ oris erosioni, putrefactioni, tumore suffocante, sanguinis copiosa effusione, aliisque similiter periculosis affectibus.

Interdum contingit, ut nullo gravi morbo excitato a præstito Hydrargyro copiosius, quam par est, saliva effundatur, superetque multum mediocrem quantitatem, obiecto periculo, ne perseverans ægrotum ad tabem perducat; cui sane occurrendum est. Solet incipere salivatio tertio, vel quarto, aliquando quinto a propinatione mercurii die; atque sicuti fluxiones ab causa morbosa sua habent tempora, principium, augmentum, statum, & declinationem; item eadem percurrit artificiosa salivæ fluxio, non tamen in omnibus ægrotis eadem celeritate, & temporis spatio, sed breviori, vel longiore, ut major, vel minor erit exhibiti medicaminis quantitas, ægrorumque paratus. Si scateat æger exoticis humoribus proclivibusque

ad

cop
sali
xuy

ad solutionem, ad longius spatium extendetur salivatio; tardiusque statum assequetur; brevior autem erit, si minus abundet æger excrementis, succisque solutu facilibus. Cognoscuntur quatuor dicta tempora facta comparatione inter quantitatem sputi effluentis primis diebus cum quantitate posteris manante. Sydenhamus inquit^(a), Ptyalismum statum esse, cum eo creverit, ut æger intra viginti quatuor horas libras quatuor exspuat. Cum tamen diversitas corporum, & alia accidentia immutent quantitatem sputaminum, certum satis inditium inde nequit trahi, sed ex comparatione elapsæ salivæ cum labente, & remissione symptomatum; quæ tribus, vel quatuor diebus post majorem effluxus impetum contingere solet. Ut autem observatum est in hisce regionibus, totum salivationis spatium plurimum est quadraginta circiter dierum, concitatoris plus minus decem. Ergo si copiosior, ultraque modum saliva effundatur, redigenda est ad convenientem mensuram facta revulsione ad alvum per laxantia; si longiore tempore fiat effusio cum periculo tabis, compefcenda est crassantibus, & nutrientibus, & lacte etiam, si tabes immineret.

Satis de indicationibus acceptis ab Hydrargyro, quibus expletis consulitur etiam morbis inde natis; siquidem istorum indicationes docent diversos modos, quibus amovenda est causa ab illo impulsæ. Tota vero curatio in eo consistit, ut nimium impetum humorum a partibus gravius affectis avocemus, atque inhibeamus, impulsoremque, quo ad possumus, extrahamus indicatis auxiliis, aliisque a cujusque sollertia inveniendis. Pauca solum dicenda speciatim remanent de linguæ, faucium, orisque ulceratione, quæ plerumque contingit etiam salivatione recte proceden-

(a) In Epist. 2. responsoria.

cedente, solam tamen mitigationem petit, si vehementer cruciet, non sanationem, ne retardato materiæ eruptionis exitu deterior affectio sequatur. Tantum igitur leniendus dolor est, cavendumque, ne latius serpat erosio: ad quæ impetranda videntur antecellere vinum album tepidum, decoctio feminum cidoniorum, & urgente dolore lac bubulum tepidum, quibus colluendum os frequenter est, idemque aurea moneta muniendum festinante exitum vexatoris. Quidam etiam Medicus apud Riverium^(a) asserit, in oris inflammatione ex hydrargyrosi eo progressa, ut salutem propemodum desponderet, irrita cetera remedia, unice percommodum comperisse jusculum ex solo pullo absque herbis comparatum. Perseverante tamen oris afflictione gravi, nisi alvus sponte flueret nil fortassis utilius esset, quam eam aut clysteribus sollicitare, aut intus acceptis solventibus; iisque cum Nicolao Massa repugno, qui alvi dejectionem insalubrem judicant in salivatione; supraque indicavi, eos feliciter sanatos fuisse, quibus non immodice alvus commota fuit. Quinimo^(b) Pitcarnius hydrargyro ita utitur, ut simul ac dolere os cœperit, eo relicto purgationem alternis diebus instituat ad cessationem usque doloris, redeatque ad mercurium renovantem dolorem, eademque methodo ad purgationem.

Bohnius, ^(c) aliique nonnulli in declinatione salivationis suadent leviora purgantia ad educendos humores ab Hydrargyro commotos, nec in totum evacuatos; quæ tamen ego in meis ægrotis prætermisi, neque necessaria censeo, nec fructuosa lasso ægroto post toleratum majorem impetum, & graviora incommoda salivationis. Quicquid a supremo dissolvente commotum est, perque os majori

R r ex

(a) *In observat. communi.* 29. (b) *De ingressu luis venerea.*

(c) *De salivat. cap.* 15.

vin
dec
cid
lac

Pitcar
meth

ex parte extrusum, & adhuc extruditur, ex inita via deducere commodum non est. Remanentibus autem aliquot vestigiis morbi sub finem sputationis, vel post hanc peractam, protinus conjiciendus æger non est in novas afflictiones medicationis, more quorundam Chirurgorum, de quibus memorat Dionysius Pomaret^(a), qui vel ex aliquo tumore penitus non discusso, vel ulcere non coalito persuasi, morbum non esse perfecte curatum, ægrotos novis cruciatibus vexant, atque in atrophiam, vel tabem generalibus evacuantibus præcipitant; quando solis remediis parti affectæ apposis negotium confecerint. Eandem animadversionem subjicit dolor in aliqua parte fixus post rite obitam salivationem permanens; ex quo concludendum non est, sanguinem pristino viru temeratum remansisse, sed os ea parte, uti observatum fuit, cariem pati, remediis chirurgicis auferendam absque interiore humorum commotione. Sin autem interior morbi fomes penitus extinctus non appareret in ægro salivatione defuncto, relictis prius viribus, curarem, ut residuam causam dejiciente hydrargyro, vel alia vacuatione pro illius conditione plane eliminarem, vel conveniente posito intervallo, præparatoque corpore primum experimentum iterarem. Ceteroqui præsentibus indiciis, una cum saliva effluxisse fomitem morbi, mitissime agendum est cum ægroto, diu passo molestiam, jactationemque irrequieti argenti, ut belle Fracastorius:

Sed jam age, vicine victor gratare saluti,

Ultima adest Tibi cura, eadem & placidissima corpus.

Abluere, Amaricinisque comis, & bene dentibus Heracleis.

Hanc tamen expiationem omittit Sydenhamus, vetatque post illitum *mercuriatum* purgationes, decoctaque ad illius

in-

(a) Observat. 16.

intrusas reliquias extrahendas, vel pravam qualitatem corrigendam; affirmatque, se per aliquot menses semel in hebdomada aliquando exhibuisse mercurium dulcem, ut provocaret salivationem etiam in iis, qui omnino convaluerant, subque diu versabantur: quem tamen nec imitatus sum in meis ægrotis curandis, nec imitandi causam video in sanitatem integram adeptis. Porro balneum medicatum, quod Fracastorius præparat delibutis, salutaris munditiæ gratia conducibile existimo exacta salivatione; non tamen eo repetito lassum laxumque corpus, & balneis insuetum fatigarem. Quantum vero attinet ad decoctum Guajaci, reprobandum non videtur, si propinetur sine regimine ad ciendum sudorem ægroto non amplius salivanti, in quo metuendum non est, ne quod effluere paratum erat, exiccatum subsistat. Id fortasse timeri potest sub finem sputationis, uti timendum visum est Sydenhamo, sed ea absoluta desinit causa timoris; prætereaque eo decocto præcavetur renovatio morbi gallici, uti animadversum est a Daniele Sennerto ^(a). Quinimo Antonius Gallus de ligno sancto non permiscendo nil eo commodius judicat post pugnam cum mercurio, opinatus inde omnia tanquam igne expiari, nullumque stigma remanere usurpati metalli: de quo si certiores esse possemus, quis sanæ mentis guajaci usurpationem rejiceret post illius usurpationem? Enim vero cum alia multa, quæ sine ulla probatione decantantur remedia specifica virtute prædita, in usum medicum adducta sint, neque lignum sanctum ex eo numero expungendum videtur: existimoque, fructuosum futurum esse post sputationem, nisi tanquam occultæ dotis antidotum, saltem ut exiccans roboransque ob laxatam san-

R r 2

gui-

(a) *Lib. 6. Pract. part. 4. cap. 2.*

guinis compagem, ipsasque partes solidas debilitatas. Ita invicem, ut aliqui arbitrantur, hæc duo medicamina opponuntur, ut alterum alterius antidotum sit, hydrargyrum sua frigidityte, & humiditate guajaci, istuc sua caliditate, & siccitate hydrargyri. Arbos est Guajacum proceritate, virentibus semper foliis, texturæque firmitate quidam excellentis præferens, sacraque incolis insulæ hispanæ, ubi nascitur, qui ea utentes ad pellendam vernaculam pestem, per integrum mensem vix tantum cibi capiunt, quantum sufficit sustinendæ vitæ, vires interim fulciete ejus ligni decocto, ut eleganter Fracastorius (a):

..... Sacer illicet haustus

Ille modo ambrosiæ vires reficitque, fovetque

Inque occulta gerit jejunis pabula membris.

Si tamen æger post largam humoris effusionem ex usu hydrargyri contraxisset siccitatem tabis minacem, loco decocti ligni sancti, quod ad nos valde resiccatum defertur cassumque occulto alimento indicato a Fracastorio, porrigenda juscula ex avena, & radice Cynæ, aliaque id genus corrigentia morbosam siccitatem.

Quandoquidem supra constitui, non esse propinandum decoctum ligni sancti cum regimine ad evocandum sudorem post absolutam sputationem, meorum partium esse video, ut id contra Bohnium, aliosque nonnullos probem, qui duplici ratione suadentur de sudore educendo, videlicet ut morbi reliquias, itemque hydrargyri extrudant; quarum nulla convincor. Fateor, non semel observatum esse, post mercurii opus confectum non exiguam portionem intra corpus remansisse. Sic narrat Gabriel Fallopius (b) in aliquibus, qui ante triennium illiti fuerant, supervenientibus gummatis in tibiis, nudatoque osse ibi

se

(a) Syphil. 3.

(b) de Morb. gal. cap. 76.

se liquidum argentum vidisse. Testatur itidem Levinus Lemnius, ^(a) ex incisa vena aliquot illius drachmas effluxisse; extantque alia exempla de eo in corpore superstite: quibus tamen non adducor, ut censeam movendum esse sudorem post salivationem ad extrahendum, si quid metalli remansit. Primum enim incertum est, utrum aliquid remanserit, nullis apparentibus certis notis remansionis, cum omnia circa os pristinum statum recuperarunt; similiterque incertum est, an per sudorem quod remansit, dissipabile sit. Affeverat Lister ^(b) se se perspexisse aliquando triginta annos conclusum in corpore Hydrargyrum superfuisse, nil proficientibus ad extractionem tot corporis alterationibus, ex motu, aliisque fortibus causis multorum annorum excursu admotis. Et hercle, cum appareat tanta propensio illius metalli ad tentandas vias oris, cur, si qua portio remanserit impetu transacto effusæ salivæ, ita fidenter sperabimus per sudorem extractum iri, ut maceratum longa salivatione ægrotum, variisque symptomatis afflictum, & nondum resectum sudatione vexemus? Huc adde, quod observatum est a Capivacceo, Saxonia, Fallopio, Listero, aliisque, nullum identidem detrimentum importatum fuisse corporibus, in quibus diu pars aliqua illius asservata est. Pariter sudor parum efficax videtur ad morbi reliquias amoliendas, quæ viribus fortissimi attenuantis minime cesserunt. Cum igitur ex copioso salivæ effluxu, infestorumque accidentium comitatu plerique valde debilitentur, mitissime, ut ait Fracastorius, cum hisce agendum est, fatigatæque vires farciendæ optimis, & coctis facilibus cibis, animi, corporisque quiete.

CA-

(a) *De occult. stat. mirac.* (b) *Exercit. 4. de Luc Vene.*

CAPUT IX.

Utum præstet præbere Hydrargyrum ad provocandam salivam, an alvum mixtura purgantium.

Vetustior usus est Hydrargyri saltem in lue venerea ad ducendam salivam, quam alvum, ejusque inventor Jacobus Carpenfis multo illustrior celebratioque est, quam qui primus eundem admiscuit purgantibus: qua sola animadversione declarari videtur major illius efficacia ad morborum contumaciam edomandam, concitatione salivæ copiosæ, quam ventris. Verum enim vero Augustinus Bellostius celebris Chirurgus Joannæ Mariæ Baptistæ Ducissæ Sabaudiaë, qui anno 1725 suas edidit lingua gallica utiles lucubrationes de Mercurii usu, una cum multis aliis, gloriatur se se invenisse illius mixturam, & purgantium tam convenienti efficacique proportionem comparatam, ut eosdem morbos expugnet, quos salivatio, non easdem afferat perturbationes, angores, & pericula, sed leniter rem conficiat. Non a præceptoribus, ut ait, abs quibus viderit adhibitum grande remedium, vel legerit, sed experiundo, experimentorumque successibus eam didicit temperationem, qua ferum remedium mansuefecit, noxam abstulit, non virtutem, & salutares effectus solum mutata vacuationis via. Principio suum arcanum periclitatus est Taurini in Juvenē Ab., faulsteque vertente periculo, idem eadem in urbe iteravit, deinde in aliis locis, diversisque ægrotationibus parili semper effectu. Quis nesciat quam difficulter duri, & scirrhusi tumores, strumæque dissolvantur? Cesserunt hæc duritiæ arcana Bellostii. Cessit tumor in pectore cujusdam Matronæ, qui bre-

officiis
ad
invenire

vi tempore insigniter creverat, tendebatque ad naturam Carcinomatis. Cessit difficultas urinæ ex materia viscosa, & arenosa, ut taceam Ischiadem, Scorbutum, Podagram incipientem, morbos cutaneos fere omnes, aliosque, quos ait eodem præsidio fugatos feliciter esse. Tot tamque prosperi narrati successus animati argenti purgante permisti in pluribus, variis, arduisque affectibus subjugandis me invitarent ad pensitandum, utilius ne exhibeatur, ut salivæ incitamentum, an ventris. Et sane, si admistum purgantibus eodem morbos æqualiter expugnaret, atque sine eorum permissione, extra controversiam foret, quemadmodum porrigi oporteret, constaret aperte, semper dejiciens porrigendum esse, attenta minore molestia, periculoque curationis obitæ per naturalem, solitamque dejectionis viam: quæ nec capitis affectiones, nec oris erosiones, nec longas vigilias incutit, cor non angit, nec alia infesta metuendaque symptomata creat. Cum tamen multo ante Bellostium a pluribus, ut habemus apud Rondeletium, aliosque, Hydrargyrum ut purgatorium præstitum fuerit, nec eadem comperta efficacia in contumaces ægrotationes, impulsæ est Medicina ad salivæ excretionem per idem molientiam quamvis molestam. Quantum ad me attinet, citius, uberius, & cum levamine constantiore profui meis ægrotis effusione salivæ, quam alvi solutione, idemque ab aliis Medentibus accepi, qui pariter observarunt sæpe imminutum, lenitumque eo pacto morbum esse, non radicatus evulsus, citraque periculum recidivi. Ante aliquot annos vetita fuit in Xenodochio Patavino propinatio Hydrargyri ad salivandum, substitutæ sunt ad purificandos colluvie venerea pollutos pilulæ Marchetti ex Aloe, trocischis Alhandal, & Diagridio sulphurato, adjecto Mercurio dulci; sed multo debiliores compertæ saliva-

*Bellostium
cent.*

livatione. Mercurius ingentis viribus ad os fertur, tantamque habet cum eo loco familiaritatem, & conjunctionem, ut quemadmodum observatum fuit, si quis digitum ei admoveat, admotumque certo tempore teneat, & in ore auream monetam, hæc dealbetur. Ejus itaque genuinus agendi modus est excretio salivæ, ideoque hac ipsa vincuntur morbi, qui purgatione per inferiora non potuerunt. Cujus majoris efficaciae ratio inde promenda est, quod liquidum argentum associatum purgantibus brevi tempore in corpore remanet, nec idoneo ad se suasque vires quoquoeversum effundendas. Nisi in minimas partes dividatur, suo pondere ductum sequitur deorsum incitatos a cathartico humores; neque minutatim a nostro calore dividi potest, nisi justo tempore in corpore moretur. Imaginatus est Bellostius, solum partem aliquam mercurii mistam cum crassioribus succis a purgante instigari ad exeundum per alvum, subtiliorem suctam ab vasis lacteis spargi in omnes humores eisdemque corrigere. An ita contingat, mihi non levem dubitationem conflat, quod testatur Bellostius, se curationes confecisse dissimilium morborum in diversis temperaturis hydrargyro deiciente, eoque aliquando sex menses præstito, atque in sola uxore Dom. Resson Bibliopolæ Taurini excitatum esse fluxum sputorum duntaxat dies octo perseverantem, citraque vehementem calorem oris. Cum enim mercurius in tot curationibus, unica excepta, suum naturalem effectum non præstiterit os feriendi, probabilius videtur, sua partium rotunditate, & pondere deorsum cum purgante tractum, expulsumque fuisse, quam ejus notabilem partem per sanguinem late diffusam, & retentam. Neque vero hanc sanguini intermistam remansisse, probant tot refractarii morbi, quos narrat Bellostius

eo remedio per inferiora vacuante subactos fuisse. Siquidem jure dubitari potest, utrum curatio peracta fuerit peculiarem vim suppeditante hydrargyro, an solum generali ratione crebro repetitæ vacuationis, quam Bellostius alternis diebus iterabat. Vidi affectum venereum inveteratum cum vehementi capitis dolore, decoctione, quam stibiatam vocant, & additis foliis Sennæ deiciente, vintiquinque circiter dies hausta depulsum fuisse; occurruntque passim apud auctores exempla de eodem affectu discussio decoctione Salsæ parillæ, vel Guajaci, foliis Sennæ, vel Hermodactilis, seminibus Carthami, aliisque purgantibus adjectis. Eadem porro iteratio lentæ dejectionis non solum ægrotationi venerea contagione inflictæ, uti compertum est, remedio fuit, sed aliis pluribus aliunde natis. Non tamen inficias eo, fructuosam, & laudabilem esse admistionem Hydrargyri cum purgantibus, quod dissolvendo, impellendoque auget vim purgantis, aliaque præterea commoda parit pro diversitate morborum. Quinimo aliquibus in morbis utilius illud adhiberi videtur ad ciendam inferam vacuationem, quam salivæ. Sunt qui, uti dixi supra, Epilepsiæ, morbi æqualiter foedi, difficilisque curatu, reconditam causam salivatione ex animato argento, cui nulla pars corporis inaccessa est, extrudere conantur. Alii idem præsidium adhibent in scirrhosos tumores, vel fortes obstructions imi ventris, Hydropem, & Scorbutum, in quibus omnibus affectibus, præsertim nihil venerei olentibus mercurium deicientem prius experirer, quam ad salivam ducendam. Nonnulli etiam aggressi sunt curare quartanam provocando salivæ fluxionem: quos sane non imitarer, non tamen dubitarem, si foveretur obstructione lienis, vel alterius visceris in eadem regione uti purgante mercurio, quem eruditissimus Bernardinus Ramazzini ali-

quidpiam febrifugi habere censuit ; imo non solum in quartana , sed pariter in aliis quibusdam febribus lentis in pauca quantitate crudum immiscui levibus purgantibus , utpote aptum attenuare , & solvere citra calorem , efficacitate alii nulli remedio concessa . Similiter pueris , antequam corpus firmatum sit , redditumque par tolerandis incommodis salivationis accommodatior videtur usurpatio liquidi argenti ad ventrem purgante instigati , quam ad os suapte instinctu adducti : quo pacto puer triginta mensium curatus fuit a Riverio ,^(a) exhibendo decoctum ligni Guajaci , & pro purgante gr. sex Diagridii , Calomelanos gr. quinque per mensem quinto quoque die repetitis , augendo in repetitione utriusque quantitatem . Ad sedandam item Dysenteriam utile compertum est Hydrargyrum admistum Rheobarbaro , narrante Boyle ,^(b) a quodam Chirurgo ea mistura curatos esse aliquot centenos militum Dysenteria conflictatos : unde arguit Boyle , vim inesse mercurio acrimoniæ humorum mitigandæ . Plures etiam mercurio per Chymicorum mangonium deiciente reddito , videlicet præcipitato albo , cui Beguinus solam vim purgatoriam per inferiora tribuit , pueros sordibus venereis immundos deterferunt . Samuel Formius narrat , se curasse puerum quinque annorum propinatis quotidie spatio viginti dierum granis sex albi præcipitati , quod absque ullo ptyalismo tantummodo deorsum purgabat . Eundem effectum albi præcipitati comperit^(c) Simon Jacozius in duabus Puellis ; quarum major vix attigerat quintum ætatis annum , minor tertium . Utraque laborabat multis venereis ulceribus in ore , & pudendis , nec non pustulis , foædaque Scabie universum corpus occupante .

Puel-

(a) *Centur. 2. Observat. 93.* (b) *In tractatu de usu simplicium medic.*

(c) *Observat. 6.*

Puella major singulis diebus sumebat grana sex albi præcipitati, minor quatuor: quæ quantitas aucta fuit in utraque juxta operationem, ita procedentem, ut in utraque bis, aut ter alvus exoneraretur, nunquam vomitu excitato, vel salivæ fluxu. Tutior tamen eris a periculo excitandi vomitus, vel salivæ fluxus, vel alius gravis symptomatis, si exemplo Riverii misceas mercurium cum purgante, quam præstito albo præcipitato.

Si Tirones a me quærant rationem temperandi hydrargyri cum purgantibus, respondeo, mihi nihil peculiare suppetere tanquam secretum in omnibus ægrotis usurpandum, quale contigit Bellostio nancisci ad domestica infortunia reparanda, nulli propterea, præter suos, communicatum. Illud solum mihi animadvertendum occurrit, pro pertinacibus morbis, in quibus vis mercurii peculiariter expetitur, consultius esse, illum admiscere lenibus purgantibus, quam fortibus, ut diutius in corpore retentus fortius agat in succum alterandum, eliminandumque, atque ex brevibus intervallis iterari possit. Revera Bellostius, qui tot refert egregias curationes opera illius deicientis confectas, tametsi non indicat, quodnam admiscuerit purgans, indicat tamen generatim illud mite fuisse, apparetque ex frequenti iteratione facta, quæ fieri non potuisset, nisi purgans mite fuisset, aut natura sua, aut minuta quantitate. Sit porro hujusmodi, ut alvum solvat, sicque immistum metallum eodem ducens obstet, quo minus ascendat. Vetus est usus ejusdem remedii cum mistura purgantium, extatque descriptio pilula: Barbarossæ compositarum ex Rheibar. Agaric. drach. ij., Aloes unc. i., Argenti vivi extincti in succo rosar. drach. iij., Cinnamonomi, Ambrae an. sc. i., Mirrhæ, Maltichis an. dr. i., & Therebintina omnia excipiente. Hanc misturam expen-

Bar
ro
pil

dens doctissimus Rondeletius^(a) iccirco commendat, & præfert alteri paratæ ex Hydrargyro, Diagridio, Colocynthide, aliisque vehementibus purgantibus, ab aliis adhibitæ, propterea quod nimis cito extruditur, celerique expulsiōe impeditur, quo minus virtus assumpti argenti eliciatur. Hoc, ut opinor, scopo Bellostius suas Pilulas exhibere solebat, vel cœnanti, vel dormitum eunti; cum catharticum diutius intra viscera permaneat dormientis, quam vigilantis.

Expositæ considerationi de miscendo fluente argento, aliam adnecto inquirentem, utrum præstet illud propinare sincerum, an personatum, crudum, an in fornacibus Chymicorum præparatum, dulcemque, uti ajunt, redditum; de quo video inter auctores non convenire. Plerique dulcem porrigunt, sive solitarium exhibeant ad ducendam salivam, sive associatum purgantibus ad sollicitandam alvum. Nonnulli tamen omni mangonio rejecto, nativo Hydrargyro, crudoque utuntur, vertuntque infortunia aliquando ægrotis importata in ipsam præparationem opera ignis factam, sic immutantis naturalem figuram partium, motumque, ut inde possit conjungi cum acido humorum, futuro effectore supervenientium affectionum. Quos tamen redarguunt eadem infesta symptomata ab hydrargyro foris admoto, nec ignem passo progenita; quæ parum apte alteri causæ Bellostius^(b) adjudicavit. Affirmat ab eo per frictiones introducto, quamvis crudo, ideo multas molestias importari, quod repellat ab exterioribus partibus interiores versus cursum humorum, sicque interturbet. Enim vero particulæ mercurii intro subeuntes per poros cutis adeo tenues exilesque sunt, atque ex facili dividuæ, ut nequeant mole sua instar aggeris repellere natura-

(a) De Mor. Gal. (b) Pag. 64.

turalem motum humorum ad interiora, sicque interturbare. In salivatione ab eo excitata certe humores ad os ulceratum tamquam ad partem instigantem accurrunt, sicque ad interiora moventur per os exituri, non tamen quia eorum motui obsistat mole sua Hydrargyrum per cutem venas ingrediens: quo scilicet etiam per os ingresso eadem contingunt. Alii vero præparationem animati argenti, conversionemque, ut ajunt, in dulce rejiciunt, quasi particeps veneni corrodentis, & causam afflictionis salivantium. Nihil tamen habent, unde id affirmant, multa ipse habeo, unde illi convincantur. Habeo testem locupletem experientiam, qua liquet etiam Hydrargyrum crudum per inunctionem, frictionemque intrusum inflammationem oris, erosionem gingivarum, aliaque molesta symptomata, sæpe etiam majora infligere; qua, inquam, liquet per eas præparationes, exaltationesque pluries repetitas ita leniri, ut mitissime sputum eliciat, & sine molestia perturbante solita vitæ officia, sicuti Lemerius, alique asseverant. Hinc inunctiones apud Medicos nostrates fere exoluerunt, frequentatur usus mercurii dulcis ad instigandam salivam, nec unquam cum noxa difficile emendabili, si sobrie, accommodateque usurpetur ad varia temperamenta, conditionesque morborum, citraque constantiam repugnantis operis urgendi. Quomodocunque tamen mirabile argentum adhibeatur, sive crudum, sive igne subactum, quotiescunque adhibetur ad superandum fortem morbum salivatione, victoria non reportabitur absque pugnae labore, modo majore, modo minore, ut variat ægrotantium natura, si mota colluvio per os, non per aliam viam exigatur, uti non raro contingit, affirmante Lemerio ^(a), aliisque,

(a) Pag. 131.

que, se vidisse plures in pristinum restitutos, exeunte per spiramenta cutis una cum remedio viru venereo.

Quamquam mihi cum aliis bene multis adprobatur usus mercurii dulcis salivæ proliciendæ causâ, causâ tamen purgationis facio cum Bellostio, existimoque crudum admiscendum esse catharticiis, & tale fere semper admiscui. Quid enim opus est in hunc finem Chymicorum præparatione? Additur purgantibus ut obstantium succorum crassitudinem attenuet, dissolvat, augeat vim eorum, suppleatque, quod aliis purgantibus deest: idque præstat mercurius sua naturali partium tenuitate, mobilitate, pondere, quæ propterea ab igne immutandæ non sunt, debilitandæque. Admixtus catharticiis brevi tempore in corpore permanet, totaque ejus efficacia nullo modo retardata requiritur: ex qua timendum non est, quod timeri forsan potest ex eodem solitario exhibito, longiores moras intus trahente. Neque vero opus est Chymicorum opificio, quasi directuro illius vires, atque instructuro ad securiorem operationem, hunc citra periculum ad alvum traducente purgante. Si tamen placet adhibere aliquam præparationem, esto contentus illa simplici usurpata a Petro Pena, qui Hydrargyrum prius decoctum vino, & aceto per alutam trajiciebat.

Hæc scripseram, antequam Venetiis tantopere percrebresceret fama de Bellostio, ususque mercurii crudi induceretur, quem ibi clarissimi Medici non solum æmuli Bellostii admiscunt purgantibus, sed Thomæ Dovarii Angli etiam sine illis, purum putumque propinant. Strepente igitur hac novitate adhibendi remedii, de quo superiora exaravi, consentaneum erat, ut de eadem Tirones, quibus scribo, instruerem, quæque extant experimenta producerem. Celeberrimus Medicus Venetiis Andreas Rossetti,

atio

y Giovanni
gluy
punti

fetti, qui primus, ut accepi, mercurium crudum, & impermixtum in ea celeberrima urbe periclitatus est, rogatus per epistolam, ut me de eodem certiores faceret, humanissime respondit, & liberaliter a se in usum vocata, & observata mihi communicavit, quæ latine reddo. Porrigo, inquit, mane jejuno stomacho unciam unam currentis argenti, & nihil injungo subinde bibendum. Solet per intestina extra ferri, nullo modo in transitu molestum; in aliquibus tamen non exiguam ejus partem vidi urinæ admixtam. Nescio, an etiam exeat per cutis meatus; mihi tamen certo constat, aliquibus illud fumentibus horologium aureum argenteo colore infectum esse. Excreta per alvum sunt viscosa, mucosaeque; urinæ principio turbatae cum viscoso sedimento, quæ post quindecim, aut sexdecim dies, modo tardius, modo citius clarescunt, alvusque cessat a prioris excretionis, ægroto, quasi per prodigium admirante, se se bene habere. Vidi miros effectus pugnans hoc remedio in varias pluresque ægritudines, videlicet in affectiones hypocondriacas antiquas, hæmorrhoides nimium fluentes, hystericos affectus sustentatos menstruorum suppressione, dolores ischiadicos, febres diuturnas accensas ab obstructione hepatis, aut lienis, vomitum inveteratum, similesque afflictiones. Eandem quantitatem mercurii utrique sexui præbui, variis temperaturis, ætate ultra 15 annum: præbui fortibus, & debilibus, extenuatisque a diuturnitate morbi, & multiplicitate remediorum, sincereque testor, nihil inde perversi contigisse. Porro ægrotationes gallicas confirmatas, associatas tumoribus gummosis, febrique pertinaci eo remedio radicitus avellere non potui; potui tamen pilulis confectis ex liquidi argenti scrupulis 2, Cinnab. aurifici Antim scrupulo 1, resinæ salappæ

Andr
Bys
mi
mon
of e
lat
dig

lappæ granis 10, & Saccharo rosato, quas quotidie sumi jubeo, augens, vel minuens pro indigentia quantitatem purgantis. Hisce administratis affirmo, me plus quam viginti ægros in miserandam valetudinis conditionem adductos in pristinum vindicasse, qui recuperatam salutem testantur, deprædicantque. Verum enim vero nec istud remedium universale est, omnes sanans, quod Medicinæ fortunam superat, ut Tibi fatis notum est. Non defunt etiam irrita hujus medicaminis tentamina, licet per plures dies, exquisitaque diligentia præbitum fuerit. In aliquibus pariter ægris coactus fui illud relinquere, ob sensum ponderis, quem in ventriculo se percipere querebantur. Illud tamen verum est, inde nullam noxam importari, ut a me observatum fuit. Hactenus vir experientissimus, qui pariter altera epistola mihi petenti asseruit, se unciam unam crudi hydrargyri aliis dies triginta continuos exhibuisse, aliis etiam quadraginta, nullo interjecto purgante, in aliquibus tamen tres, vel quatuor dies eandem quantitatem argenti dedisse, postea pilulas ex eodem, adjecto purgante, deinde illud, ut antea, solitarium, hac methodo, si opus esset, continuando curationem. Ergo in Hydrargyro damnato a Plinio, tanquam rerum omnium pestis foret, maxime elucet naturæ providentia adversus ferociiores, & contumaciores Mortalium ægrotationes: cui si multum debemus, non minus certe debemus industriis viris, qui primi illius usum in nostram provinciam invexerunt, eumque varium efficacemque in multiplex genus morborum. Post tot Chymicæ labores, & conatus circa id metallum, nihil deerat ad amplam perfectamque ejusdem adhibitionem, nisi ut sincerum suæque tantum naturali dote insignitum porrigeretur. Hæc tamen accessio facta feliciter est; constatque

que experientia, unciam crudi impermixtique cum magna utilitate identidem sumptam esse, aliquando quidem cum frustratione spei, nunquam tamen, quod hactenus sciverim, nocenter. Et sane, narrante Bellostio^(a), se cuidam Duci inter cruciatus iliaci doloris duas libras mercurii propinasse, sex dies intra viscera innocenter permansisse, satis erat rationabile, nullam offensionem ab uncia timendam esse, qua quantitate in præsens a multis præbetur.

Rumor quidem emanavit, aliquos Venetiis ab assumpto crudo Hydrargyro graviter offensos fuisse, agitarique de illius usu interdicens; de quo hinc inde certa inditia perquirens nulla inveni, imo non paucos ejusdem commendatores ex accepto beneficio inveni, atque inter reliquos ducem Illyricum temperamenti calidi sicci que, qui mihi asseruit, se eo remedio longas vigilias, quibus affligebatur, abegisse, somnum recuperasse. Itaque tot prælucentibus experimentis ab ingenuis viris relatis de insigni utilitate inde reportata, nullo prælucente de noxa inflicta, hæc nova ratio usurpandi mercurii medicam suppellectilem percommode apud peritos adaugere potest. Bellostius mehercle, licet asseveret ad percipienda hydrargyri commoda oportere exhiberi, quale providens natura elargita fuit, aut levi cathartico conjunctum, nusquam tamen mentionem fecit, se dedisse separatum. Quinimo, quia Bellostius narrans de illius metalli libris duabus intra corpus sex dies retentis, nec indicans ullam excretionem earum opera promotam, cum primum audivi decantari multiplices curationes unius unciae repetitione peractas, hæsi, sustinuique assensionem, donec plane compererim, de quo dubitabam. Neque porro existimem per occultatam missionem, qua Bellostius deprædicat tot,

T t

tam-

(a) Pag. 51. edit. italica.

tamque varias ægrotationes expugnatas fuisse, obtineri posse quicquid sine illa potest, obtentumque revera fuit. Egit nobiscum munifice natura largitione animati argenti tot admirandis effectibus feracis, quorum alios sola vis ingenita, purumque naturale munus præstet, alios addito artificii adjumento. Quamobrem ut in pluribus morbis præstabiliorem judico administrationem Hydrargyri facta additione purgantis; item in multis solitarii, iisque, qui petunt lentam expiationem, nec viribus infestam, crasforum attenuationem, obstructorum apertionem, actionemque ratione inexplicabilem, soloque sensu per habita experimenta deprehensam; qualis a pluribus aliis manat, quamvis minus foecundis, quorum agendi modum ignoramus, effecta perspicimus.



DISSERTATIO

DE OFFENSIONIBUS MEDICI OPEROSI.

CAPUT PRIMUM.

De internis occasionibus errandi in Medicina.



Ostquam exposui Tironum gratia, quæ per-
tinent ad rectam administrationem gran-
dium auxiliorum, mecum ipse reputans,
quam propensa incitataque sit rebus in om-
nibus ad agendum juvenilis ætas, me non
minus eidem profuturum judicavi, instituendo examen de
liberali frequentique usu contrariorum comparato cum
rariore, & parciori, qui Francisco Vallesio locupletissi-
mo auctori salubrior, optabiliorque visus est frequentio-
re, & liberaliore. O gravissimam sententiam omnium
Medentium meditatione, & suffragiis dignissimam! pro
qua tanquam pro aris, & focis neminem esse crediderim,
si serio attendit, quin pugnandum esse censeat. Utroque
sane modo peccari potest copia, & parsimonia, longius-
que abest ab errore qui extrema declinat, si, ut inquit
Horatius:

Virtus est medium vitiorum, & utrinque reductum.

eisdemque cancellis Medicinæ præstantia continetur. Enim
vero, nisi tenendi medii præsto sint certa vestigia, eo
flectere oportet, unde minor incidit noxa; minorque cre-

ditur incidere ex Medico omittente, quam committente, quiescente, quam agente. Ex omnium consensu tanto quis felicius Medicinam facit, omnium artium judicio Fuchsii difficillimam, quanto magis prudentia præstat ex sententia Juvenalis Deorum omnium compendio: *Nul- lum Numen abest, si sit prudentia*: cujus primæ partes sunt, devitare incertas vias, occasioneque ab recta ratione, & actione recedendi; quas incitati celeresque ad agendum difficillime declinant, tardiores non facile; adeo tot ambigua, involutaque in arte nostra occurrunt. In tanta vero difficultate sui muneris actione explendi, certamque viam insistendi an non prudentis erit ab actionum frequentia temperare multiplicibus erroribus exposita? quos providere, & præcavere non solum perarduum est, sed identidem supra humanum captum, & vires, effecitque, ut invaluerit, & emanaverit in vulgum opinio, Medicum fortunatum esse oportere. Fortuna tamen securius præsidium est medentibus solers prudentia, qua præditi omnia artis offendicula accurate circumspicientes cautum induent animum constantemque adversus vulgarem proclivitatem ad opus; qua plures instrumenta salutis vertunt in perniciem, ejusque reparandæ curam in negotium opprimendæ. Agens ergo, consideremus impedimenta tutioris medicationis interna, externaque, quæ omnia interponi doleo, susceptamque provinciam tot salebris asperari; sed ea diligenter exponenda sunt evitandi gratia, initio facto ab internis, quorum alia communia sunt cum omnibus disciplinis, alia particularia Medicinæ, de quibus disseram, postquam communia breviter attigero. Ergo liquido constat, in qualibet arte esse non posse certum instrumentum operis moliendi, cujus non est certa cognitio, similiterque in Medicina morbum certo curari non posse

posse, ambiguum duntaxat sui notitiam exhibentem. At quam paucae sunt ægrotationes, earumque mutationes cum causis, symptomatisque, quorum cognitio indubitata, remotaque ab omni periculo erroris effulgeat! Medicus, inquit Hippocrates, ^(a) siquidem suffecerit ad cognoscendum, sufficiet etiam ad sanandum. At vero quam pauca, quantum satis est, cognoscuntur? Secum ipse cogitet Medicus humanæ mentis imbecillitatem, rerum se se necessario consequentium scopulosam investigationem, & imperscrutabilem fortuitarum concursum, nec difficulter intelliget, quam pauca perspicua cognitione complecti possit, quam pauca sine formidine lapsus moliri. De mentis humanæ infirmitate ad verum comprehendendum tot dicta inculcataque sunt ab Academicis, & Pirronicis, ut hisce præstito assensu, qui vel integris sensibus fidem detrahunt, necesse foret medicinæ renuntiare sensuum ministerio, & auctoritati innixæ. Non diffiteor, mentis nostræ vires languidas esse, atque in perquisitione veri nutare, & identidem labi, itemque sensus nostros interdum falli impares superandis impedimentis obiectis ex ipsa rerum natura; sed pernego, nos in tanta rerum ignorance versari, quanta tot Philosophi, ut cum Seneca loquar, subtiliter delirantes, aut crediderunt, aut se credere simularunt. Nimium confusus est sensibus Epicurus, tribuitque; nimium ademit Arcesilas, & diffusus est; & cum uterque peccaverit, illius error tolerabilior est, qui emendationi locum reliquit, alterius plane impatibilis, qui studio reddendi hominem cautiorem oculatioremque excoecavit. Aliquo quidem sensu aliquando decipimur, sed alio corrigimur, quemadmodum accidit in præsentatione remi fracti in aqua, quem tactu fractum

non

(a) *De Arte;*

non esse deprehendimus, oculique deceptionem detegimus: eademque opera sensuum alias repræsentationes, quæ videntur falsum obtendere, ab errore vindicamus. Mutuam opem sibi sensus præstant, alterque nobis præsto est ad testimonium veri, si altero decipimur. Admodum tamen paucae sunt eorum dolosæ, & personatæ repræsentationes, multoque plures sinceræ, certæ, nilque falsi præferentes; de quibus nemo dubitavit præter Academicos, hosque tantum in schola differentes, non in foro communem vitam degentes. Sic nemo unquam dubitavit de colore cæruleo Cœli, viridi herbarum, albo nivis, idque genus aliis, de quibus convenit inter homines sanis sensibus, & mente præditos, qualiscunque sit natura coloris, siue sit in rebus ipsis perfecta, siue tantum inchoata, & lumine modificato perficienda. Affirmavit quidem Anaxagora, auctore Tullio^(a), nivem nigram esse, non tamen ex errore oculorum, sed mentis laborantis sophismate. Ecce quale, & quam ridiculum. Opinabatur, nivem ex aqua, quam sciebat esse nigram, compactam esse, eundemque colorem sua imaginatione nivi affigebat. Correxissent oculi errorem mentis, si permisisset Anaxagora, ut suo munere fungerentur, amoto impedimento suæ imaginationis illis antepositæ. Licet igitur oculi varient pro diversitate hominum, & nervi optici, spirituumque motionis, tamen Daniel Huetius^(b) ea varietate parum considerate adducitur, ut illis tollat verum iudicium. Fruamur liberaliter muneribus naturæ, eaque prædicemus; neque propter errorem aliquem facile emendabilem sensibus obtredecimus; quorum plurimas perceptiones illustres, nec in controversiam vocatas habemus, veri scaturigines, vitæque moderatrices. Noli, Hueti, humanæ mentis infirmitatem

tan-

(a) *Acad. Quest. 4.* (b) *De debil. sp. hum.*

tanquam inefficacis ad verum iudicium inde inculcare, quod ignorat naturam suam, & quemadmodum sua opera perficiat . Ut oculus, loquitur Tullius ^(a), sic animus se se non videns alia cernit . Ceteri quoque sensus suas recte actiones edunt, licet ignorent, quemadmodum edant; ad quas scilicet non cognitione, sed natura docta sine doctore, ut ait Hippocrates, instructæ sunt . Mens similiter nostra suas, qualescunque sint, functiones elicit non ex cognitione modi agendi, & notione suæ naturæ, sed instinctu, instructuque naturali: quo solo multis in rebus æque recte ratiocinantur illiterati, doctique; quemadmodum æque bona visione fruuntur, si sani sunt oculi, Opticæ gnari, rudesque . Quid plura de hisce ratiunculis Huetii? Integrum est Academicis, citraque periculum notæ subeundæ de re quolibet quodlibet sentire, & dicere, imo sibi contradicere; uti apparet in oratione Socratis, qua Plato eum jam morte mulctatum apud iudices usum facit . Sic incipit: *Magna me spes tenet, Iudices, bene mihi evenire, quod mittor ad mortem* . Sic vero definit: *sed tempus est jam hinc abire me, ut moriar, vos ut vitam agatis . Vtrum autem sit melius, Dii immortales sciunt: hominem quidem scire arbitror neminem* . Ait igitur postremo se nescire, quod ante, uti animadvertit Tullius ^(b), dixit se scire, constatque ex ejus oratione . Sic Socrates lapsus est sibi contradicens, sic labi parati sunt ceteri Academici, quibus scilicet pudori esse nequit ex facili convinci posse, & redargui; quando omnis eorum nifus eo tendit, ut mentis debilitatem, egestatemque ostentent . Si enim sui placiti solidas certasque rationes afferrent, secum ipsi pugnarent, scirentque se nescire, quod Arcesilas sciri non posse affirmavit . Utilis est, & laudabilis differendi subtilitas ad veri inquisitionem,

nisi

(a) Lib. I. Tuscul. (b) Ibid.

nisi modum excedat, vimque inferat naturæ, uti infertur ab Academicis sensuum iudicio, ipsique veritati, ut ait Lucretius, inde proficiscenti infestis, vitæque rationis turbatoribus. Hoc primum, inquit Seneca (a), Philosophia promittit, sensum communem, humanitatem, congregationem; quam Academica subtilitas amoveret, si ludo egrederetur, forum intraret. Quid nos infra cetera animalia dejicimus? quæ certos habent sensus, quibus suam vitam regunt, tuenturque; imo aliqua quasdam nostras actiones sic æmulantur, ut præter vitæ tuitionem etiam a nobis delicias impetrent, nobisque in delitiis sint. Fidos & nos sensus possidemus, errorque in cognoscendo vero non ab eorum falso iudicio manat, sed ab receptis rerum vestigiis vario modo in cerebro dispositis, & inde facto progressu ad ea, quæ sub sensum non cadunt. Agilitas igitur nostræ mentis, libera motio circa multiplices visas imagines, itemque potestas se se facile avocandi a crassioribus sensibus efficit quidem, ut multo plura intelligamus brutis animantibus, sed plura etiam cum errore; optabiliorque foret minor fecunditas mentis, sed tutior a fallaciis, a se ipsa structis, quibus tam frequenter irretitur. Sunt etiam quædam sensibilibus differentiæ minus manifestæ ad percipiendum; ex quibus si alia inferre volumus, & longius inde decedimus, in vanas imaginationes incidimus, & vigilantes sæpe somniamus. Item animo alte infidens præoccupata opinio sensibus externis aliquando imponit, nosque optantes errorem e recta via detrudit; sicuti luculenter apparet ex multis experimentis inter se se contrariis, quæ tamen a sensu iudicata evulgantur. Negat hic se vidisse, quod alter affirmat; neque dissidium componi potest, nisi vel fide alterutri denegata, vel alteru-

(a) *Epist.* 5.

terutius imaginatione exteriori sensui prælata , tanquam
 deceptrice . Quot insuper futilia , falsa , & perniciofa non
 induxerunt varii pro varietate hominum mentis conceptus ,
 orti ab ejusdem celeri motu , nullisque legibus astricto , quem
 rationem appellamus ? Tot profecto pepererunt , ut Cot-
 ta apud Tullium^(a) , rationem adeo in pravos usus facile
 flexibilem pro pessimo munere Deorum habuerit , imo plu-
 res gravissimi Viri non dubitaverint affirmare , omnium in-
 sapientissimum animal hominem esse . Unica est , & indi-
 vidua singularum rerum natura , unamque tantummodo
 subicere potest veritatem , veramque cognitionem . Un-
 de igitur multiplices , discrepantesque sententiæ una eadem-
 que de re fluxerunt ? Ab sapientia , an insipientia ? Una cer-
 te earum tantummodo circa veritatem versari potest , reli-
 quæ extra feruntur , imo aliquando nulla verum attingit ,
 ut sentit Vellejus apud Tullium^(b) , qui enarratis opinatio-
 nibus Philosophorum de natura Deorum , iisque numero-
 sis , hanc clausulam imponit : *Exposui fere non philosopho-
 rum judicia , sed delirantium somnia* . Obscurissima est quæ-
 stio de natura Deorum a Priscis instituta , & Plato^(c) , quid
 sit omnino Deus , inquire oportere non censet ; sed etiam
 de rebus minoris ponderis , & obscuritatis plures discor-
 desque quæstiones , & sententiæ in præsentia strepunt ;
 quæ , meo arbitrato , non commodo , sed impedimento
 sunt , quo minus expedite verum inveniamus ; fere tan-
 quam evenit viatori , cum in trivium , aut quadrivium
 pervenerit , qui ex multiplicitate viarum , & oppositione
 nutat , & hæret , ignarus quam eligat , quæque ad sco-
 pum perducatur . Neque vero opiner , in veritatis indagatione
 tot vias tentatas fuisse , totque excitatas discrepantes opi-
 niones , si solus illius amor speculantium animos cœpif-

[a] Lib. 3. de Nat. Deo. [b] Lib. 1. de Nat. Deo. [c] In Legibus .

set, non libido ostentandi ingenii, alios convincendi, supraque eminendi, & novas sectas condendi. Sancta igitur veri cupiditas ignobilioribus cupiditatibus permista, & incitata novum iniecit mentibus nostris impedimentum, & veritatem tanta cogitationum varietate, aut profundius retrusit, aut fucavit, non genuinum illius colorem in conspectum dedit. Ex confesso raræ sunt, & difficillimæ legitimæ demonstrationes, & admodum pauca per veram scientiam comprehensa. Cujus igitur utilitatis spe tanta urget sollicitudo de novis imaginationibus emittendis? quæ nec satis declarari possunt, nec solide probari, ceduntque potius in detrimentum scientiarum, quam incrementum, & discentium incommodum. An id eveniat in aliis facultatibus, alii viderint; id sane mihi compertum exploratumque est in Medicina, quæ tot recentium opinionum in dies gliscente ubertate, non evasit felicior ad inveniendâ remedia, neque instructior ad usurpanda; doluitque jam pridem Leonardus Jacchinus, plura generosa remedia Priscis prospere usitata, & cum magno artis decore, defuevisse. Unde, quæso, eorum usus exaruit? Non alia sane de causa, uti fas est opinari, nisi propter ignoratas opportunitates rectæ administrationis, & inde incussum metum amittendæ quæstuosæ existimationis, si male vertunt adhibita. Quorsum igitur tot labores de speculandis inauditis nil profuturis ad finem artis consequendum? Post Galenum magnum Medicinæ amplificatorem duobus illa insignibus remediis aucta est, Hydrargyro, & cortice Peruviano, illo efficaci ad extraneum, & aliquos vernaculos difficillimos morbos subigendos, isto ad sedandas febres cum frigore, & horrore invadentes, quæ duo tamen nobis attulit non diuturnus labor exantlatus in novitatum meditatione, sed

corticem peruvianum indicavit exemplum populi Americani; eademque regio occidentis transmissa in Europam foeda lue similis rebellis scabiei obtulit occasionem fugacis argenti ad salivam ciendam in ea experiundi; comperoque prospero successu in novo morbo, haud difficile fuit, ejus usurpationem dilatare, & veteribus accommodare. Quod autem emolumentum pro feliciore praxi, & levamine ægrotantium reportatum est, aut reportandum esse sperare licet ex nuperis excogitatis, plurimum animosius, quam doctius exaratis? quæ multiplicitate, varietate, atque inter se discrepatione Tirones fatigant, perturbantque, exhibentque negotium etiam arte provectis. Liceat mihi quod in corpore experimur ad animum traducere, inter quæ tanta intercedit consensio atque communio. Ut ventriculus ex multo vario discordique cibo debilitatur, morbosasque causas congerit; item credo menti nostræ tot, tam diversas, discordesque opiniones oneri esse, atque occasione errorum propter ejus distractionem in tantam varietatem imaginationum. Agesis profer, si potes, aliquam utilitatem ad clarius intelligendas, & felicius curandas febres allatam ex tam differentibus sententiis de earum natura evulgatis. Eam alii collocant cum Antiquis in calore præternaturam, alii in accelerata sanguinis circuitione, quidam in retardata, plures in aucta sanguinis fermentatione, vel perversa & perturbata diversarum sanguinis partium missione, nonnulli in depravato ignis motu vitalis. Nulli ex hisce placitis acquiescens Alphonsus Borellus, & novitatis sitiens ab sanguine abduxit causam primariam febrium, posuitque in succo nervoso, de quo non pauci merito dubitant, utrum sit naturæ opus, an solius imaginationis. Post ista an credis exhaustam esse

se cupiditatem, & potestatem novandi? Non sane; sed Hecquetus, & Rega, aliique, ut quam longissime recederent ab aliorum inventis, nihilque in humoribus immutandum pro febris efficientia speculati, eam ad solida spasmus affecta transtulerunt. Si tamen excogitatum istuc admiraris, & tanquam novum revereris, scias Erasistratum, uti notat Daniel Clercus ^(a), sensisse causas morborum, non in humoribus, non in spiritibus, sed tantum in partibus solidis quærendam esse. Prodierunt etiam in scenam, qui conati sunt instaurare sectam spiritalem, auctore Atheneo, uti narrat idem Clercus, constitutam, plerisque morbos non in humorum, & partium, sed spirituum vitium rejicientem. Sic Richardus Morton asserit, morbos omnes universales sive primarios, sive secundarios immediate a spiritibus male affectis oriri, atque mediate etiam morbos partium. Miror autem Recentiores, quos tanta libido mutandarum opinionum incessit, & obsoletas renovandi, suam operam non contulisse ad extollendam, confirmandamque Methodicorum sectam, qua nulla magis consentit cum Physica Epicuri hodie adeo celebrata. Themison enim ejus sectæ conditor duo tantum principalia genera morborum admittit, alterum in relaxatione meatuum, alterum in constrictione: & Galenus agens de differentiis morborum animadvertit, constitutis elementis impassibilibus, qualia sunt atomi simplices, & incompressibiles, quibus Medici recentiores utuntur ad rem suam explicandam, nullas esse morborum differentias nisi in compositione, videlicet in ampliatione meatuum, & coarctatione. Enim vero, quod attinet ad numerosas, & dissentientes de febrium essentia opiniones Daniel Taury ^(b), qui de earum natura gallico sermone scri-

(a) *Hist. Medic. part. 2. l. 1. cap. 11.* (b) *In nova praxi morborum acut. cap. 15.*

scripsit, illis percurtis non dubitavit affirmare, omnes in errore versari, nihilque generatim decerni posse de natura, & causa febrium; tantum discriminis inter earum species intercedit. Quocirca aliorum opinionibus relictis de febrium essentia generatim traditis, singulas expendendas assumit, aliquid probabilius inventurus proprium unicuique. Quisquis igitur sitit recentia, & inaudita, quicquid de febribus novi editum est, undecunque conquirit, & apprime teneat. An ne hoc instructu præditus citius tutius & jucundius febricitantem morbo levabit, quam priscorum doctrina contentus, & ea sola imbutus sententia, febris essentiam in calore extraneo positam esse? Quinimmo jure ac merito verendum est, ne tot diversis, & pugnantibus rerum novarum ideis mente onerata, & involuta imparatior sit ad necessaria perdiscenda, & observanda a laboribus antiquitatis profecta. Univerſa quippe felicitas curandarum febrium manat primum ex cognita febris specie, & causa, atque exploratis inditiis diversorum temporum, quæ illa percurrit, & mutationum, quas obit; manat ex perspecto symptomatum momento, & propensione naturæ ad vias, per quas nititur se se molestis, & superfluis exonerare; manat ex cognitione eorum, quæ necessario, vel fortuito superveniunt: ex quibus providentes futura, recte temperamus præsentia, & nanciscimur opportunitatem remedium, victusque rationis. Porro hæc omnia nobis liberaliter tradidit antiquitatis diligentia, adornavitque viam ad securam faustamque praxim: qua Majores nostri primas in civitatibus regnisque tenebant, regibus principibusque imperabant, erantque cum magna laude ægrotis, sibi quæ æqualiter utiles: atque utinam post dominatum novarum opinionum, & relictæ Priscorum vestigia

gia remansisset eadem ratiocinandi, medendique sollertia: adeo existimatione Medicina non cecidisset. Quocirca & de febribus, aliisque morbis commodum foret, tot novitates proditas non fuisse, aut saltem negligi ab iis, qui animum ad Medicinam appulerunt, non fallendi temporis causa, sed opitulandi ægrotis; liquidem pleræque arbitrariæ sunt, non solidæ ratiocinationis consecutiones, neque aptæ dirigendæ menti ad veri inventionem. Si ex repetito monitu Galeni rejiciendæ sunt e Medicina logicæ quæstiones, utpote ad praxim minime appositæ, quanto magis rejiciendæ erunt tot cogitationes novæ propemodum fabulosæ? Sapientius est quædam nescire, quam scire, ut ait Melchior Canus^(a), animadvertens in eos præceptores, qui discipulorum mentes importunis, & inutilibus quæstionibus frustra fatigant, agitantque. Valet quidem hæc animadversio in omnium facultatum professores, sed maxime Medicinæ tantummodo ad speculandum minime conditæ, tractandumque solius imaginationis luxuriantis negotium, sed gravissimum humanæ vitæ in discrimen adductæ. Hinc arcendæ sunt considerationes plane infructuosæ, itemque a scientia alienæ, cujus votum, & opus est, inquit Hippocrates^(b), aliquid eorum invenire, quæ nondum inventa sunt, quod ipsum notum, quam ignotum esse præstet. Ad hanc legem si sua elaborassent Recentiores, quam bene de arte, de ægrotantibus, de successoribus meriti fuissent; quos nempe copia scriptorum non fatigassent, sed recreassent delectu, & vetera illustrando, exornandoque, impedimenta citæ consecutionis artis abstulissent, non geminassent. Questus est olim Hippocrates de vitæ brevitate, artisque longitudine, sed in præsens hæc natura longior sua, illa brevior a pluribus de

No-

(a) *Lib. 9. Cap. 7.* (b) *De Arte.*

Nostri intemperanti inutilium novitatum conquisitione efficitur. Annon vitæ spatium contrahunt, producant artis, qui tempus insumendum ad necessaria, erogant in superflua, & inania? Est enim vitæ contractio temporis jactura necessariis impendendi, si vitam cum Seneca (a) actionum utilitate, non tempore metimur. Quis item non videat quantum exporrecta sit artis longitudo per tot additamenta imaginationis, potestatis ad fingendum nullis terminis circumscriptæ? Ut autem hæc offendicula rerum novarum cupidine nobis ipsi injicimus; earumque inventores aliis etiam obtrudunt; sic nostra sub potestate est evitare: alia tamen supersunt ex rebus ipsis orta, difficillime, vel nullo pacto declinabilia, quæ ingredior exponere.

Quanquam omnis error in cognoscendo vero originem ducit ab imperfectione nostræ mentis, non ideo mens eodem modo se habet ad omnia meditanda, nec in omnibus meditationis eadem obstacula incurrit. Hinc aliæ disciplinæ brevius, & facilius acquiruntur, aliæ longiore tempore, & labore; utque singulæ pluribus, aut paucioribus difficultatibus obstruuntur, item plures, vel pauciores errandi occasiones obtendunt. Sic Medicina, Hippocratis judicio, omnium artium præclarissima æqualem habet præstantiæ difficultatem adeptionis, & quamvis possideat certa principia, & stabilia præcepta, nec multiplices ejus partes æqualiter sint scopulosæ dubiæque, aliquæ tamen in magna ambiguitate versantur. Physiologia omnium pars prima, non plus habet difficultatis, quam Physica universalis, imo minus, si attendimus, quæ in hac traduntur de principiis rerum, de qualitatibus, de continuo, ejusque divisione, de infinito, aliisque id genus.

Illud

(a) *Epist. 93.*

Illud vero perarduum, quod habet in explicandis actionibus facultatum animæ, commune cum Physica particulari est: neque tamen inde Medicus minus prospere suo fungitur munere, si sciat quibus instrumentis sanæ facultates servantur, læsæ in pristinum vindicentur. Plus negotii facessit Pathalogia, pars altera, secunda & specialis Medicinæ agitans de morbis, eorumque causis, symptomatisque, quorum multa densa caligine obteguntur, frustranturque laborem, & sollicitiam speculantium. Quis inter Antiquos, Recentioresque adeo perspicaci lucidoque ingenio fuit, ut tenebras dissipare potuerit, quibus circumfunduntur causæ affectuum, qui soporosi vocantur? Multiplices sunt isti, Apoplexia, Lethargus, Carus, Coma Vigil, Catalepsis, & omnium unica assignari solet causa, obstructio cerebri, sed in singulis morbis accidentium diversitas est tanta, ut omnes ad unum idemque principium relati magis obscurentur. Accusata quidem est ad eam diversitatem planam faciendam obstructio facta in diversis cerebri partibus, atque a dissimilibus humoribus; remanent tamen multa confusa, & involuta, neque ex rei natura explicabilia, sed solo imaginantium arbitrio. Alia multa occurrunt in hac Medicinæ parte adeo retrusa, & implicata, ut præstet ea tacite præterire, quam indagare velle, & evolvere, fateri difficultatem explicationis, quam figmentis velare, industriamque nostram convertere ad ea, quæ probabiliorem differendi rationem subjiciunt. Provoco ad Galenum acutissimo, & feracissimo ingenio ornatum, & plurium scientiarum luce perfuso, totque voluminum auctorem, qui de causa accessionis febrilis quotidie redeuntis, vel tertio, aut quarto quoque die, nihil prorsus dixit prudens insuperabilis difficultatis. Hanc tam arduam

non

non judicavit animosior posteritas, pluraque conata est ad evolvendum quod latuit Galenum, sed infra votum conatu, nihilque, nisi fallor, proferente anteponendum Galeni silentio, finemque imponente inquisitioni, & mentis inquieti. Hinc monemur, in hisce arcanis ne quicquam tempus teri, si praxis cordi est, sæpe moderabilis vel ignoratis secretioribus quibusdam causis, quales sunt statim circuitus quotidianæ, tertianæ, quartanæ; quorum ignoratio obstaculo non fuit, quo minus earum febrium curandarum methodus constitueretur. Ex hisce igitur, similibusque obscuritatibus non metior potissimum Medicinæ faciendæ operosam rationem, sed inde metior, unde redditur dubia cognitio morborum, incertusque usus medicaminum, tum ratione, tum experientia inventorum: nimirum in ea parte Medicinæ periculosior difficultas est, quæ Semeiotica vocatur, agitque de signis, sed adeo imperfecte, ut teste Celso ^(a), jure magni nominis Democritus ne finitæ quidem vitæ certas esse notas judicaverit: quibus proinde mirum non est, vulgares medicos interdum falsos esse, oblatamque occasionem Asclepiadi funeri obvio inclamandi, eum vivere, qui efferebatur. Et hercle Galeno Semeiotica media visa est inter exactam notitiam absolutamque ignorantiam, suo etiam experimento persuasus, qui dolorem colicum ab vitrea pituita, quo torquebatur, credidit inflictum esse a lapide in alterutro ureterum impacto, donec errorem excretio conspecta vitreæ pituitæ detexerit, & admonuerit, hanc fuisse doloris effectricem, non calculum; quamvis exhiberet sensum terebræ perforantis eo præcipue spatio, per quod a renibus ad vesicam ureteres extenduntur; unde Paciens deceptus est. Post tanti

X x viri

(a) Lib. 2. cap. 6.

viri lapsum, quo præceptore tot sæculis floruit Medicina, quis se se tutum ab erroribus credat, nec de operibus ineundis dubitet? Annon quoque hallucinati sunt Medici in curatione imperatoris omnium maximi, cum de cavenda deceptione summum in modum satagerent? Quantum frigidum opponatur calido, silente ratione, sensus estimat, nec dubitari potest de discordia inter has qualitates sensu patefacta, tam evidenti & insigni, ut ex notis ab auctoribus traditis, usuque collectis de qualitate humoris in corpore dominantis, nihil videatur facilius distingui posse, quam morbus calidus a frigido. Hinc tamen luculentius apparet, quam fallax sit inditiorum conspectus, qui Medicis curantibus Octavium Cæsarem Augustum laborantem jecore distillationibus affecto non aperuit, id vitium a causa calida contractum esse. Itaque usi sunt calidis medicamentis, donec magnitudo morbi, & principis vita periclitantis mutationem calidi in frigidum remedium Antonio Musæ suaserit. Respondit eventus, declaravitque felix frigidorum usus, calidorum infelix ex caliditate præcedentibus notis non patefacta, morbum esse. In proclivi fuit Medicis nosse jecur affectum esse, sed non causam affectionis; quam sola mutatio curationis, & animadversio lædentium & juvantium, lege contrarietatis inter morbum, & remedium, declaravit. Hæc eadem difficultas causæ deprehendendæ morbis pluribus interponitur, quodve errorum scaturigo esse possit inter medendum, præclare ob oculos ponit indicata medicatio Octavii Augusti. Si enim tanto imperatori jugiter assidens advigilansque Medicus haud leviter decipi potuit, quanto facilius labetur, qui tractans obscuram ægrotationem, semel, aut bis in die ægrotum convenit, nec ea diligentia, & animi contentione qua-

qualem exigebat summa Cæsaris dignitas, & sperabile præmium dignum Cæsare? In describendis morbis fere singulorum plures enumerantur differentiæ ductæ ab diversis proprietatibus essentiæ, a dissimilibus causis, consensuque variarum partium, aliisque adjunctis, quæ pro assignata diversitate diversam item curationem requirunt. At quo indice petitam curationis rationem exequemur, si signa ad eas differentias internoscendas in multis morbis parum distincte tradita sunt, in multis nulla, ut tot differentiarum & causarum consideratio sit sola doctrinæ ostentatio, inutilis ad medendum? Apoplexiæ, exempli gratia, tres Prosper Martianus ^(a) differentias ex Hippocrate recenset ratione causæ, omnes tamen in essentia convenientes, videlicet in statione sanguinis, venarumque interceptione collo, pectorique distributarum, quam constituit Apoplexiæ essentiam, & probat ex effectibus interceptionis maxime in illis partibus apparentibus, idest difficultate, & angustia respirationis, communibus Apoplexiæ symptomatis. Enim vero illa ipsa symptomata pluries observata sunt etiam citra coagulationem sanguinis in vasis colli pectorisque, sed solum genita Apoplexia ab humore cerebri comprimente, aut meatus obstruente, testimonio dissectorum post mortem cadaverum. Una igitur est facies Attoniti, sive ex sanguine in vasis coagulato in morbum lapsus sit, sive ex alio humore cerebrum opprimente; una tamen curationis ratio non est. Sanguis intra vasa subsistens, & concretus petit apertius venæ sectionem ab Hippocrate imperatam. Contra valde dubium est, an in Apoplexia genita ab humore cerebrum obstruente utilis esse possit sanguinis effusio; siquidem summa curationis posita est in resolutione

X x 2

tione

(a) *Lib. 2. Mer.*

tione materiæ cerebrum occupantis, quæ adjuvari quidem medicamentis potest, sed primario a natura efficienda est suum robur in sanguine habente; quo permanente docta sine doctore modum victoriæ invenire potest. Vvillisius (*) quoque plures tradit causas Apoplexiæ subito adorientis, existimatque, aliquando a cerebri obstructione una cum contactu, quasi afflatu materiæ malignæ spiritus profligante progigni, aliquando a solutione continui majore, aut propter sanguinem effusum, aut copiosum serosum humorem inundantem. Veruntamen omnibus hisce causis admissis, quibus signis singulæ deprehendentur ad instituendam medicationem? Credit Vvillisius, non posse Apoplexiam repente factam ab sola obstructione cerebri infligi, sed requiri contactum materiæ malignæ spiritus dissipante. Verum hanc materiam qua signorum luce detegemus? An ex repentina morbi aggressionem, ut sentit Vvillisius? Sed frustra id sentit, convinciturque ex repentinis ictibus ejusdem affectus incussis ab effuso repente sanguine in cerebri gyros, & anfractus, vel alterius humoris in eadem loca illapsu, & præsertim serosi, abs quo credit Carolus Piso (b) omnem Apoplexiam produci desinentem in Paralysem; quæ identidem subitanea invadit, uti constat ex narratis a Petro Foresto, aliisque. Itaque subitus casus Apoplectici non arguit necessario venenosam materiam e vestigio spiritus extinguentem, qui a tot aliis causis produci potest, aliæque desiderantur notæ ad eam deprehendendam. Porro in tanta signorum ambiguitate, & evidentium defectu vide, quam procliviter graviterque peccari possit, & peccetur in curatione Attonitorum, solita peragi non semel effuso sanguine, nulla facta inquisitione, habita-

que

(a) Cap. 8. de Apoplexia. (b) De Colluvie seros. pag. 87.

que cognitione peculiaris causæ effectricis. Si sit in causa morbi, uti esse frequenter credit Vvillisius, plerumque Helmontius, aura virulenta poscens antidota, nonne professor venæ parat, acceleratque exitium? Uberes igitur sunt Medici ad assignandas multiplices causas morborum, variasque differentias, sed identidem inopes ad recensenda, enucleandaque singularum inditia, hisque tutandam medelam. Non diffiteor, plurium morborum proditas esse a majoribus claras planasque notas, quæ si in ægrotantibus apparerent, quales descriptæ fuerunt ab auctoribus, curationem non dubie dirigerent. Tamen cum pro varietate ægrotantium ipsa varient accidentia, modo intensiora, modo remissiora, modo plura, modo pauciora, interdum etiam cum insolitis copulata, sæpissime locum dubitandi relinquunt, non raro fallunt. Quid quod Helmontius animadvertit, in præsens non respondere morbos ad nomina Avorum? adeo magnam ceperunt mutationem ex causis eorum effectricibus mutatis, videlicet ab aeris diverso statu, diversis moribus, dissimilique vivendi ratione.

C A P U T . II.

Expenduntur signa dominantis in corpore humoris morbofi, tradita ab Sanctorio tamquam demonstrativa.

Sanctorius sua Statica de arte nostra egregie meritis, cogitans de condenda methodo vitandorum errorum omnium, qui solent in medicationibus committi, animum appulit ad colligenda signa, quibus studiosi certiores fierent de ideis morborum, causarumque varietate, atque con-

confusus est ^(a), se suo labore munivisse semitam adeo planam certamque, ut hac pergentes citra omnem errorem pervenire possent ad veram notitiam idearum, formarumque morbosarum. Commendo docti, industriique viri conatum, utilem excitandis discentium ingeniis ad diligentiores indagationem, notitiamque signorum; non tamen approbo præsumptam fiduciam de suis animadversionibus, tanquam efficacissimis ad impetrandam indubitatam cognitionem morborum, causarumque, explanandamque sine periculo offensionis quamcunque salebram scrutandæ veritatis. Plus autem optasse, quam obtinuisse Sanctorium ostendam, expendendo notas, quas proponit, causarum morbosarum. Tres primum assignat fontes, unde hauriamus inditia dominantis in corpore humoris, effectorisque morbi, saporem, colorem, ipsumque morbi motum, seu periodum humoris. Quod attinet ad sapes, hos non aliunde cognoscere possumus, quam ex palato ægrotantium, vel nostro, si quis vellet effusum sanguinem, vel alia non fordida excreta degustare. Porro licet ægrotantes non raro percipiant ingratos sapes, & frequentius amarum, falsum, aut acidum, sæpe tamen nullum molestum percipiunt, sæpe quoque affirmant, se molestum persentire, sed nescire percepti qualitatem explicare, ut inde nullum trahi possit inditium superfluentis humoris. Cum vero percipitur distincte qualitas saporis, & indicatur, est ne firmum argumentum humoris late diffusi, prævalentisque? An non congeri potest in ventriculo pituita sapore acido, vel falso palatum afficiens, eodem tempore copia biliosi humoris per vasa fluctuante? An non toto corpore humore pituitoso redundante acervari potest in ventriculo bilio-

(a) *Lib. 15. de Morb. ideis perquirendis.*

biliosus, & ori amarorem aspergere? Accepimus ab Hippocrate Cleonactidem laborantem febre erratica continua vomuisse biliosa circa vigesimum quartum diem: & tamen inde Galenus non collegit exuperantiam humoris biliosi, sed ex aliis signis pituitosi, nempe animadvertens febricitantem neque abhorreere a cibo, neque sitire, neque infomnem esse. Quocunque me verto in considerandis saporibus, offendicula invenio, & dubitandi momenta. Idem enim sapor, ipso Sanctorio docente, a pluribus humoribus expromitur, diversasque causas habet, cujusmodi est ponticus, pituitæ vitreæ, fecisque melancholicæ communis, quem ait modo introduci a frigido cogelante, & resolvente humidum, modo a calore urente, & resolvente. Quod autem duorum commune est, neutrius proprium est, certumque inditium. Notet, si placet, ponticus sapor siccitatem; materiam tamen, quæ dicitur sicca, non notat, quæque aliarum qualitatum comitatum habet peculiarem considerationem exigentem. Quod si sapor in aliquibus morbis exhiberet illustrem notam causæ morbosæ, in pluribus certe non exhiberet, quorum effector humor in latibulis corporis latet, neque in palatum repit. Enim vero Medici bene multi non indigent hisce inditiis ab sapore depromptis, qui passim accusant in morbis acrimoniam, falsitudinem, aciditatem sanguinis, aliasque illarum permissione obortas qualitates, licet nullum earum vestigium os ægrotantis habeat. Satis est ignaro vulgo eas qualitates obtrudere, tanquam invitamenta ad decoctiones pulveresque, ut ajunt, dulcificantes sumendos; qualiscunque fuerit vera causa morbi nec quæsitæ, nec inventæ.

Exposita de ambiguitatibus occurrentibus in exploratione saporum pertinent quidem ad simplices, sincerosque,

que, atque ad permistos, sed isti videntur aptiores ad confundenda inditia affluentium succorum, quam clare exprimenda. Quemadmodum autem in aliis rebus gustu exploratis, ut animadvertit doctissimus Fernelius (a), raro admodum simplex, & solitarius profertur sapor propter partium diversitatem, quibus compinguntur; raro item humores nostri corporis variis mixtionibus obnoxii solitarium saporem fidum sui interpretem ad os transmittunt. Quid plura? Hæc generatim attigi de inefficacitate saporum ad denuntiandam redundantiam morborum succi, nec operæ pretium esse reor ire per singulos ab Sanctorio recensitos; qui tamen duos etiam prætermisit, acrem, & pinguem, ut alios aliquando gustui occurrentes.

Quandoquidem, ni fallor, ostendi, multo minus findendum esse saporum considerationi, quam opinatus est Sanctorius, eundem eventum timeo de examine colorum. Fatetur ille, ex colore faciei, aliarumque partium non posse significari humorem alias partes insidentem, sed duntaxat proxime subter cutem fusum, cujusmodi est in Anasarca humor pituitosus. Enim vero, cum in arte facienda sæpe indigeamus vestigiis humoris visum effugientis, corpusque profundum occupantis, non tantum ejus, qui sub aspectum cadit, cutem, proximamque partes inficiens, liquido constat, plures causas morbosas inditio coloris, si quid posset ad eas declarandas, destitui. Nunc consideremus colorum varietatem in ipsis excretis, primoque in rejectis per vomitum, aut deturbatis per alvum. Si videro evomi flavum humorem, aut dejici, inde ne legitime ducam, vasa bilioso humore affluere? Tamen vidimus supra a Cleonactide rejecta fuisse vomitu

(a) *Lib. 4. Meth. cap. 3.*

tu biliosa , reliquo corpore ex sententia Galeni pituitosis onerato . Aspicimus etiam in Cholera morbo copiam bilis varie coloratæ , aliosque pariter humores per superiora inferioraque amandari , interdum caussa non diffusa per venam , uti placet Fernelio , sed in prima regione subsistente , videlicet cumulata bile circum pancreas , vel intestina , circumque stomachum ; qua , meo opinatu , irritante membranas viscerum , eo quoque diversi humores alliciuntur , corruptique vi pravi fermenti varios induunt colores . Apparet igitur , non satis caute fidem adjungi colori rejectorum per vomitum , dejectorumque per alvum , nec inde decerni tuto posse de conditione humoris venarum , imo eorum , in quibus cernitur ; sanctique Sydenhamus adeo lubricam , evanidamque colorum speculationem esse , ut nihil certi ex illis , de corporum , in quibus apparent , natura deprehendi queat . Quicquid coloris est , totum in superficiem corporis colorati extenditur , nihil intimum attingit , variasque patitur vicissitudines ex diverso luminis appulsu , posituque intuentis . Hinc patet , quid etiam de colore urinæ æstimandum sit : quinimo Sanctorius fatetur , quod tot alii propugnant , judicium urinarum stabili fundamento carere , sive ex illius colore , sive ex habitu , contentisque desumatur , neque ex urinæ speculatione posse innotescere dominantem infestumque humorem . Sin autem Sanctorius ex colore urinæ despondet cognitionem præpollentis humoris , quæso , ex cujus excreti colore eandem sibi spondere poterit ? Profluens illa abs toto sanguine secreta ejus potissimum conditionem testari creditur , cujus propterea color , si eam fallaciter indicat , qualis excreti color certior erit ad eandem designandam ? Quis porro nesciat multiplices esse qualitates instigantes humores ad nocendum,

dum, effetricesque plurium morborum, quæ nullo colore pictæ aspectui offeruntur? Plures item aciem intendunt in colorem emissi sanguinis, tanquam indicem ejusdem qualitatis ægrotanti, & assidentibus declarandæ ad commendationem extractionis. Ceterum, uti Franciscus Bayle, Bohnius, alique multi animadvertunt, tot causæ internæ, externæque concurrunt ad immutandum colorem effluentis sanguinis, & postea coagulati, ut solertiores nullum certum inde judicium qualitatis excellentis faciant, ab aliis factum negligent. Provoco ad Helmontium (*) non solum irrisorem intuentium effusi sanguinis colorem, sed quicquid in eo concreto aspicitur, capta occasione ab explorato cruore ducentorum rusticorum bene valentium eodem mane extracto: in quo pro diversitate temperaturæ singulorum rusticorum aderant omnes notæ aspectabiles, solitæ cerni in sanguine febricitantium, & considerari a Medicis ad colligendam ejusdem vitiositatem. Hujus experimenti opportunitatem nactus est auctor ex more villicorum in Belgio, qui altero Pentecostes die curant, ut sibi sanguis educatur liberalius indulgendi causâ potui cerevisiæ. Hisce adjicio, quod nuperrime observavi de colore nigro linguæ cum siccitate, qui in febricitantibus solet haberi malum omen, inditiumque, aut urentis caloris, aut pravi succi. In viro quadraginta sex plus minus annorum laborante febris continua, quotidie manifeste crescente, & decrecente absque ullo sensu frigoris, secundo die apparuit medium linguæ asperæ, & siccæ; attamen nihil mali portendit, neque morbum magna postulantem, cujus curationem unico clystere peregi, videlicet post quartum diem penitus extincti.

Ter-

(*) De Feb.

Tertium fontem signorum, quæ Sanctorius propria vocat cujuslibet humoris, ponit in periodo, motuque humoris, sive morbi, opinaturque hisce duobus suppleri inditia ægrotationis, nisi ex coloribus, saporibusque sup-
peditentur. Veruntamen si circuitus morbi valet infestum succum patefacere, certe valet potissimum in febribus, non in aliis plerisque affectibus; in quibus tametsi pugnat Sanctorius reperiri periodos, hæ sunt sæpe inconstantes incertæque, neque dubia confirmare possunt, claraque luce obscura perfundere. In febribus autem, loquendo de continuis, tertiana continua est valde frequens, nec ista fortassis minus frequens continua inordinata, inordinatione nullam certam præbens significationem peccantis humoris. Porro tertiana continua non unum eundemque semper aspectum habet, nec eorundem symptomatum comitatum, nec ejusdem humoris noxii probationem: eandemque varietatem videmus etiam in tertiana intermittente, quæ licet adjudicetur bili, tamen habet misturam aliorum humorum. Unde alia sincera constituitur, alia non sincera, istaque vario modo, varioque intervallo recedit ab sincera pro diversa commistione, & alteratione humorum non comprehensibili ex circuitu febrili. Tertianæ circuitus non quidem semper eadem hora incipit, eadem desinit, sed semper tertio quoque die, aut renovatur, aut exasperatur; itemque quotidiana quotidie, & quartana quarto quoque die, hora tamen non semper eadem, suas inferunt aggressiones. Quid inde? Anne hoc cognito circuitu intimam hauriemus cognitionem fomitis febrilis? Denotat, uti vulgatum est apud plerosque Priscos, ambitus quotidianæ pituitam, tertianæ bilem, quartanæ melancholiam. Hippocrates ^(a) tamen summus præceptor definite

Y y 2

ita-

(a) *De Nat. huma.*

statuens plurimas febres a bile fieri, & nomina ipsarum esse, continentem, quotidianam, tertianam, quartanam, abstulit inditia singularium humorum ab earum periodo sumenda. Hanc tamen peculiarem Senis opinionem missam facio, & vulgatam recipio de illis tribus diversis humoribus dissimilium febrium effectoribus. Unde tamen tanta est symptomatum diversitas febris in eadem specie collocatae? Unde tam dispar exitus? ut in altero ægrotante brevis sit, facilisque superatu, in altero longior, difficiliorque; in altero calor, sitis, dolor capitis, aliaque symptomata intensiora sint, in altero remissiora; alterum plura, alterum pauciora exercent. Hæc sane tam insignis variatio maxime oritur ab causa proxima, videlicet humore febris effettore, qui si unus & idem est in singulis febribus ejusdem speciei, in singulis adeo dissimilium effectuum ferax esse nequit. Ferax est: igitur diversus, diversitate inexplicabili a periodo febrili, quæ in ejusdem speciei febre ratione dierum, quos designat, & complectitur, eadem est. Multiplices statuuntur differentiae bilis, pituitæ, & melancholiæ, variantque non una de causa, uti docet ipse Sanctorius, eidemque varietati etiam indicata febrilis diversitas vertenda potissimum est. Quis autem eas differentias humorum a periodo se doceri posse cum ratione speret? Imo quis non desperet? Plura cupis de hujus indicii tenuitate? Considera quam longo intervallo inter se se distent febres habentes idem curriculum tertianum cum intermissione; quarum pleræque, uti satis notum est, benignæ sunt, vacuæque periculo; aliquæ tamen malignæ exitiosæque, quarum periculum primus teste Heredia (a), Lodovicus Mercatus detexit, certe non indicatum a circui-

(a) *Quæst. 1. de Feb. intermit. pernici.*

cuitu tertiano, imo potius velatum. Uno insuper ictu idem Heredia diruit fundamentum cognoscendi ex periodo præpollentem humorem; qui ^(a) probat, a quolibet humore quemlibet febrilem circuitum produci posse, quotidianum, tertianum, & quartanum. Satis de stata periodo febrili; videamus de motu: ex quo si quid duci potest ad notionem dominantis humoris, id maxime ex ejus celeritate, & tarditate. Esto igitur; arguatur ex celeri motu febris tenuitas humoris, ex tardo crassitudo. Numquid hisce deprehensis qualitatibus ceteræ nocentis humoris internoscantur, utiles, si cognoscantur, moderandæ curationi? Quot aliæ copulantur cum tenuitate, vel crassitudine ex motu veloci, vel lento minime conjectabiles? quibus tamen febres pari celeritate, vel tarditate eundem numerum dierum metientes, non unum fortiuntur discrimen, non unum eundemque interiorem habent fomitem, imo tam dissimilem, ut aliæ salutari-ter, aliæ lethaliter terminentur. Quid longius hæc contra Sanctorium persequar? Optarem vehementer, ut certa signa nancisci possem, & omni dubitatione liberari in cognoscendo humore ex triplici capite ab Sanctorio producto; sed ipsemet, dum totus est in adornanda via perveniendi ad indubiam notitiam causæ morbosæ, in multiplices difficilesque incidit anfractus, salebrasque sparsas dumetis. Postquam enim eos tres fontes inditiorum designavit, quæ propria appellat dignoscendi dominantis humoris, hisce penitus non confusus fatetur, revera non posse semper per sapores, colores, morbi-que periodum, vel motum, venire in apertum humores penitissimas nostri corporis partes insidentes: ideo-que se se convertit ad inquirendam aliam methodum
per

(a) *De Feb. Putr. Quæst. 8.*

per concursum signorum communium, eodem tuto perducentem; quam ducit ex antecedentibus, necessariis, & consequentibus, sexque inde locos signorum recenset. Primus continet omnes res non naturales disponentes viscera; secundus omnes viscerum dispositiones generantes infestos humores; tertius circa morbum versatur; quartus circa symptomata; quintum pars affecta; postremum juvantia, & lædencia constituunt. Ergo agitet quispiam res non naturales, primam inditiorum scaturiginem, ut inde sciat, utrum peccet humor calidus, an frigidus. Multæ sunt causæ calefacientes, quas quia Sanctorius cum Galeno ad tres redigit positas in numero rerum non naturalium, videlicet ad motum, ad vicinitatem corporis calidi, atque ad alimentum, hoc numero contenti sumus. Causæ vero refrigerantes ex eodem auctore in numero rerum non naturalium, sunt rei frigidaæ adhæsus, alimentum, quies, motusque immodicus; quas omnes oportet opifex coram ægrotante ante oculos habeat & perpendat, prætereaque quid singulæ causæ refrigerantes, aut calefacientes per se efficere possint ingenita virtute, aut ex accidenti acquisita; per quam idem naturaliter aptum ad calefaciendum, vel refrigerandum, id non præstat, sed oppositum suæ naturæ, quasi eam exuisset. Omnis motus corporis agitando spiritus, humoresque primario calefacit; idemque postea refrigerabit, siue occasio erit refrigerationis certis positis conditionibus, si eo deveniat, ut notabilem tenuium, calidorumque succorum copiam exhauriat: eundemque effectum parere possunt aliæ calefacientes causæ supra modum evectæ cum direptione spirituum, nec subsequente reparatione. Ut igitur cognoscam ex motu genitos esse calidos succos nec refrigeratos

tos per dissipationem eorum tenuioris partis , opus est , ut vestigem usquequo processerit motus , aliaque considerem , atque in primis conditionem corporis moti . Alia enim corpora ab eisdem caussis aliter afficiuntur , alia aliter , ut est singulorum diversa conditio innata , vel accersita ; docetque experientia quotidiana , alia corpora leviori motu incallescere , & sudare ; alia citra molestum calorem , & sudorem valide exerceri . In alias causas mentem sparge in diversa corpora vim suam exerentes , eandemque effectuum varietatem ab una eademque profectam comperies , & veritatem effati , ad modum recipientis recipi , quaecumque recipiuntur . Sic videmus aliqua uno ictu venereo prosterni ; aliqua uno adjuvari , & repetitis non valde offendi ; aliqua ex eadem repetitione in tabem incidere ; aliqua in febrem vehementem : ut evenit Adolescenti in Melibea ab Hippocrate descripto . Quapropter , adeo variantibus effectibus ejusdem causæ pro varietate occasionum , scienter Sanctorius concursionem signorum abs tot fontibus manantium requirit ad obtinendam certam cognitionem infesti humoris . Verum enim vero , cum quilibet fons in tot rivos diffundatur per salebrosas obliquasque vias decurrentes , horum cursum inlequi , metasque assequi sperabile non est . Vix promptissimum ingenium , & instructissimum multo longiore tempore , quam quod solet erogari in ægrotantem invisendum , potest exacte perpendere numerosa signa causarum ab Sanctorio proposita , & inde elicere quæsitæ notitiam ; tantum abest , perpendere posse brevissimo tempore visitandi . O magnam Sanctorii fiduciam de viribus humani ingenii , & opificis accuratione ! Galeni vestigia premens septem enumerat differentias bilis , quatuor pituitæ , tres Melancholiæ , præ-

præter quas monet, esse considerandam multitudinem sanguinis, flatusque, ut impetretur certa cognitio fomitis morbofi. Hæc tamen omnia, ut ut in umbra, & otio, & procul ab ægroto meditata forent, hoc opus, hic labor permagnus est Medico in arenam profecto, & pugnanti cum morbo singulatim in ægroto dispicere, recteque æstimare, citra errorem aut sensus, aut mentis, aut utriusque. An fugax intuitus & consideratio Visitantis plures in die laborantes singula brevi comprehendet? Non fatigabor expendendo difficultatem obeundi examinis ex placito Sanctorii tot differentium humorum, signorumque: illa satis declarabitur ex sola consideratione differentiarum bilis. Ergo ex Sanctorio, ut ex rebus non naturalibus eruatur cognitio genitæ bilis, necessum est ponderare causas omnes calefacientes prægressas, aliasque aptas calori obtundendo, & inde metiri caloris gradum, qui majore, vel minore intensione diversam quoque bilis conditionem generat. Moderatus, sed major naturali pallidam bilem, uti credit, producit; immoderatus flavam, adaucta immoderatio vitellinam: sed facile percipis, per arduum esse hos gradus internoscere; & difficultas augetur ex aliis inditiis judicandis, elicitis ex conditione corporis, morbo, loco affecto, symptomatisque. Quippe inter signa exposita ad efficiendum concursum ab Sanctorio demonstrativum appellatum, si unum omittitur, vel in uno perfunctorie lustrato erratur, demonstratio procul dubio non tenet, conficienda ex totius concursus perspecta veritate. Quid autem proclivius est menti humanæ imbecillæ, & fastidiosæ laboris, quam in tanta multitudine signorum agitanda explorandaque unum prætermittere, vel minus sollerter excutere? Fac tamen assidentem Clinicum sollertem esse, accuratum, neque fugacem

gacem laboris, nullamque prætermittere notam; nihilo tamen fecius naturali infirmitati in proclivi non est, de singulis tam certo evidenterque judicare, & multo minus de omnibus, ut inde probatio ex omni dubitatione emergat. Cum multa ex signis ab ipso ægroto interrogato depromenda sint, sciet ne ille morbo conflictatus omnia, quæ necessaria sunt, significare, & quemadmodum oportet? Non raro ægrotantes, imo etiam affidentes domestici ignari, quæ sint momenta causarum, leviores commemorant, graviores tacent, quas aliquando Medicus ipse suspicari nequit, esse prægressas, atque interrogando elicere. Ex iis porro, quæ apparent, alia magnitudine conspicua sunt, fortiaque ad sensum feriendum, alia exiguitate languide feriunt, & parum intentum animum subterfugiunt; sed tanto facilius in errorem inducunt, quanto facilius negliguntur. Sæpe minima, ut videntur, inditia, æquale momentum habent ad significandum, atque magna, sed ista in conspectu tota sunt, illa non obvia, & parata, sed sensuum, & mentis contentione discriminanda. Utrorumque perceptio reddit Medentem cautiorem, atque paratiorem ad actionem, non tamen undequaque tutum ab errore, tot istius occasiones circumstant, in quas, qui minus dubitant, frequentius incidunt, nec innoxie. Non convenit advigilanti humanæ valetudinis custodiæ, & reparationi perplexitas academica, sed neque vulgaris fiducia, & proclivitas ad agendum perniciosior laborantibus, quam hæsitatio, cunctatioque. Quot ardore pugnandi victoriæ occasionem hostibus obtulerunt, quam Fabii cunctatio ademisset? Quæ identidem tantæ utilitatis est in medicationibus, ut Sydenhamus ^(a) tempus tanquam Coryphæum

Z z

Me-

(a) *Oper. Medic. pag. 49.*

Medicorum admiretur, eventu nobilissimæ matronæ statim post partum hysterice agressionibus, defectuque lochiorum afflictæ. Post tentata remedia ad provocanda retenta, ingravescente hysterico affectu, nihil moliri statuit, tempus, & quietem in auxilium vocare: quæ duo colligit ex consecutis benigne adfutura fuisse, nisi tandem Maritus impulsu muliercularum adstantium sanguinem ex pede hauriri permisisset, & non multo post cum sanguine vitam. Nil tamen miror, in hoc ægrotantis statu detractum fuisse sanguinem impulsu muliercularum, quando plures Medici in similibus angustiis idem suasissent, muliercularum potius, quam naturæ voci auscultantes, ut earum querelas effugerent, si contra quam optaretur, evenisset.

Scio in præsens apud permultos utentes principiis Chymicorum ad explicandos diversos humores in nobis genitos, exolevisse doctrinam galenicam, & studium tot differentiarum bilis, aliorumque humorum. Nunquam tamen apud Medicum rationalem de suo munere sollicitum exolescere debet studium investigandi varietatem nocentium succorum, unde generentur, quemadmodum significantur. Quæ tamen investigatio, sive referatur ad varias differentias bilis, aliorumque humorum aspectabilium, sive ad dissimiles mixtiones principiorum Chymicorum sanguinem componentium, eorumque uti vocant, exaltationem, aut depressionem, iisdem semper dumetis involvitur. Mutatur materia difficultatum, non difficultas, mutantur voces, mens agitur in diversa, non tamen facilia, & certiora. Indicavit plurima Sanctorius agitata ex priscis monumentis paritura cognitionem infecti, dominantisque humoris; neque improbo totam indicatam copiam cognoscendorum; tantum doleo, eidem ex destina-

stinatis circumstantiis humanas vires impares esse, nec inde conflare posse scientiam, uti arbitratur, sed duntaxat opinionem. Aliter contigit, atque opinatus est, qui obnixè conatus amovere omne periculum erroris a medico speculatore in actionem exituro, difficultatem amovendi ostendit, non superavit.

Novissimum promptuarium signorum ab Sanctorio productum, & quotidiano sermone celebratum in juvenibus, lædentibusque positum est, idque magis sensui, minus deceptioni expositum videtur, quam alia multa inditia; eoque pariter nomine acceptius est, quod laboriosa speculatione, uti creditur, non indiget. Utrum vero ita expeditum sit, efficaxque ad denuntiandum, quod in morbis negotium facessit, dirigendamque curationem intra veri cancellos, perquirendum est. Principio animadverto, nec in omnibus morbis, nec quocunque tempore morbi in usum venire posse juvenum, & nocentium observationem, videlicet nec in novis morbis, nec eorum initiis, in quibus adhuc nihil tentatum est. Postquam autem compertum est, aliqua prodesse, vel obesse, ita clare, firmiterque inde colligere nequimus, quæ deinceps facienda sint, ut absque ambiguitate, & omni periculo erroris curationem profequi liceat. *Medicina*, inquit Senex ^(a), & nunc, & statim non idem facit, & ad eandem contraria facit, & hæc etiam contraria sibi ipsis: id quod probat, declaratque exemplo medicamenti alvum subducentis. Si quæris, unde proveniat tanta varietas actionum ejusdem medicaminis, mentem potissimum converte ad mutationem occasionis, ut ait Hippocrates, præcipiti velocitate delabentis, lapsum concitante alteratione æque velociter facta in corpore medi-

Z z 2

cami-

(a) *De Loc. in hom.*

caminis vim, & actionem recipiente, ac modificante. Ut enim fani celeres mutationes subimus, & omne momentum, ut inquit Seneca ^(a), mors est prioris habitus, item ægroti, & nobiscum ipse morbus mutatur, modo tamen clarius, modo obscurius, neque procliviter ad captum Medentis. Nemo hodie est, qui pridie fuit, licet sæpissime mutatio non appareat aliis, imo ipsi patienti mutatio occultetur. Quocirca ex continua nostrorum corporum alteratione, si bene valemus, si ægrotamus, præsertim usuvenit, ut idem medicamentum vel modico interjecto temporis spatio non semper idem præstare queat, possit etiam contrarium pro facta mutatione corporis ejus actionem recipientis. Hisce animadversis confide, si potes, inditiis suppeditatis ab nocentibus, & juvantibus; quæ profecto non plus habent firmitatis, & constantiæ, quam habent nostra corpora tot de causis ex facili mutabilia. Decerne, si potes, cras absque dubio profuturum esse, de quo hodie, vel pridie favorabile experimentum habuisti. Decerne immemor tantæ mutabilitatis ex fausta periclitatione ante plures dies, vel paucos, ante plures horas, vel paucas habita futuram prosperitatem ejusdem iteratæ. Quam sæpe falleris! Morbi occupantis partes solidas tam cita mutatio non contingit, sed tanto citior producti ab solis humoribus, cui propterea curando apparet, quam parum faveat protritum illud Medicorum. *Quæ semel juvant, repetita sanant.* An sanabunt repetita, quod idem non permanet, idem non subit actionem, nec eodem comitatu accidentium? Spes repetitione sanandi firma foret eodem perseverante affectu, & concursu accidentium, quorum tamen vicissitudines etiam concepta spes patitur, nutatque, ut nequeat ex actione præterita reme-

(a) Epist. 56.

remedii sponderi utilitas futuræ . Ecce hac de re testimonium Hippocratis sapienter admonentis , nunquam a Medico promittendam esse usurpatione experti remedii curationem ægrotationis , quippe ex facili mutabilis ; eodemque nomine hortatur ^(a) , ut frequenter , naviterque ægrotum visitemus ; exequendæque adhortationis rationem non aliam produxit , quam instabilitatem humorum , abs quibus plurimi morbi generantur , foveanturque ; eadem instabilitate requirente , ut identidem consilium mutetur . Quo tamen ductu prudenter , & novitati accommodate mutabitur consilium , nisi frequenter , accurateque ægrotantem conveniat , cui mutationis onus incumbit ? Consilium de re mobili , & jactata , ut cum Seneca ^(b) loquar , sub die nasci debet , & hoc quoque tardum est nimis , sub manu , quod ajunt , sub manu noscatur oportet . Ob eandem liquidorum inconstantiam , & inde nascentium affectionum non licet ex signis omnibus vel sollerter perpensis elicere stabilem in plures dies veritatem , curationemque destinare carituram periculo erroris . Neque vero hæc offendicula instabilium humorum latuerunt Sanctorium , proinde Tirones admonentem , ut quotidie animadvertant eorum mutationes : siquidem bilis , quæ pridie flava erat , hodie evadere potest in æruginosam , cras deinde permisceri pituita , atque in porraceam degenerare . Post admonitionem docet , quemadmodum innotescere possint mutationes humorum , sed arduam , salebrofam , sparsamque viis ambagiosis provinciam ingressus est auguri relinquendam , non a Phisico lustrandam . Plures cum Galeno constituit bilis , melancholiæ , pituitæque , ut etiam supra dictum est , differentias , totidemque ichores cujuslibet humoris , & omnes

holce

(a) *De decenti ornatu .*

(b) *Epist. 71 .*

hosce humores una cum sanguine plurimis variationibus obnoxios esse, comparandis per commistionem diverforum, actionemque multiplicium caussarum alterantium; quas nifus est ad certum numerum redigere, eumque 80084. Inditia porro tot mutationum in humoribus refert ad varias differentias saporum, & colorum, eosque dividit in falsum, dulcem, acidum, ponticum, sive austerum: colores potissimum in album, flavum, vitellinum, porraceum, nigrumque; quibus pro certo tenet, internosci posse omnes commistiones humorum, sive ex duobus fiant, sive tribus, sive pluribus; sive fiant extrinsecus, sive intrinsecus. Verumtamen, cum adeo obscurum controversumque sit, quibus elementis varii sapor, coloresque efformentur; cum penitus ignotum sit, qua quantitate dissimiles succi miscendi sint ad varietatem saporum, & colorum creandam; cumque soli Sanctorio pateat ingens certusque numerus possibilium mistionum ex differentibus humoribus, traditæ speculationes distractæ in tot res dubias, obscurasque explorandas egregie faciunt ad mentem impediendam inanibus conjecturis, non expediendam, augendamque cita, & prompta notione retinendi, & corrigendi, vel ablegandi humoris. Cælius Aurelianus definitiones petitas ab essentia rei difficili ad intelligendum, aliaque tenebricosa, & recondita declinabat, sola evidentia in morbis confectabatur: quem tamen Medico rationali imitandum non propono, tantummodo memoro, ut inde admoneatur, in Medicina prudenter abstinere a laboriosis meditationibus æqualiter luce vacuis, atque utilitate: cujusmodi sunt plura signa meditata ab Sanctorio ad percipiendos vitiosos humores, eorumque numerosas mistiones. Mens nostra imbecilla, refu-

refugienſque a labore, ubi tot inditia, eaque non obvia, & parata penſitare debet, & ſine certa ſpe inveſtigatæ veritatis inveniendæ, vix fieri poteſt, quin aliqua prætermittat, alia languide ponderet, alia cum aliis confundat. Quid quod ex variis miſturis humorum, cauſſiſque fortuitis jugiter incurſantibus ſæpe ſingulares qualitates excitantur morborum effectrices, nulliſque notis ſignificatæ, quas cognoscere, ut ait Galenus ^(a), ſoli Æſculapio conceſſum eſt? Ut inde liquido conſtet, quam arduum ſit ſemper recto tramite incedere, nunquam aberrare, quæcunque adhibeatur induſtria, & ſollertia.

Non ſolum indicata humorum mutabilitas reddit dubiam conſequentiam ductam ex adjuvantibus, & offendentibus pro conſicienda curatione, ſed incertum iudicium, unde vel detrimentum inſiſtum ſit, vel collatum beneficium. Alia enim ex accidenti profunt, aut nocent, forſitan ex natura ſua aliter actura; peculiaria tamen accidentia illis vim opitulandi, iſtis officiendi impertita ſunt. Sæpe etiam opus medicamenti adjudicatur, quod ſolius naturæ fuit ſalutariter tempore utentis, unde ſuccevit adagium: Beata Vetula quæ in fine morbi venit, quæ ſcilicet remedio nullius pretii, & operæ, & de trivio accepto creditur morbum expugnafſe ſponte ceſſaturum. Non ſemel etiam obſervavi poſt acceptum in alium finem remedium, naturam molitam eſſe vacuationem, eaque levatum ægrotum, nec iſti, ſed remedio reportatum levamen aſcriptum fuiſſe. Itaque poſt præbitum remedium, ſi boni ſucceſſus conſpiciantur, de hiſce more Empiricorum ſolo ſenſu iudicandum non eſt, ſed ratione perquirenda germana cauſſa, qua non inven-

(a) *Lib. 3. Meth. cap. 3.*

inventā, neque effectus index esse potest agendorum: Neque vero de causa certiores reddi possumus ex eo, quod tantum sensibus obtruditur, & omnibus manifestum est, sed intelligentia secernendo fortuita a necessariis, externa adjumenta ab internis; prætereaque considerando, quod spatium inter propinationem remedii, & consecutum levamen intercesserit, utrum id sit insigne, attuleritque cessationem omnium symptomatum, an tantum aliquorum; utrum contigerit nil sponte agente natura, neque ad agendum parata, an cum ejusdem actione: quibus neglectis animadversionibus, aliisque similibus ex juvantibus, lædentibusque infirme ducitur indicatio curandi. Quanti vero moliminis sit id examen obire, rectumque judicium ferre, audi ex Hippocrate, qui postquam enuntiavit, experimentum periculosum esse, proponit judicii difficultatem, idest difficile esse, postquam aliquid experti sumus in ægroto, si quid inde evenerit, recte de causa eventus æstimare. Quanto autem hæc difficilior cognitu (loquor cum Vallesio doctissimo interpretante difficultatem judicii ab Hippocrate indicatam) videtur peritis, tanto facilior imperitis apparet. Mirum est, inquit ille, quam facile, & incunctanter vulgares Medici de causa valetudinis rogati respondeant, hinc hoc, hinc illud initium cepit. Certe, uti subdit, facilius affirmant, quæ nesciunt, quam quæ sciunt. Permitto igitur cum fiducia utaris decantato axioma, ex juvantibus, & lædentibus indicationes desumi; permitto juvantia repetas dummodo auxilii causa Tibi explorata compertaque sit: de qua sane ex imperitia, & cum turba judicando, ex facili certus esse Tibi videberis, difficulter si emerfus e turba cum peritis deliberes. Hinc consentiente vulgo cum falsis Medentium judiciis

tot

tot errores in Medicinam irrepserunt, inductaque est consuetudo popularis medendi, & quædam remedia fere in omnibus morbis administrandi, tam amplo assensu comprobata, ut si quis doctior aliquando ea prætermittere velit, ita morbi natura exigente, incurrat multitudinis querelas, accuseturque, vel de retardata salute, vel de permissa morte. Quare animis ita occupatis evenit, ut in præsens magnæ sit constantiæ, & probitatis ex conscientia mederi, famæ remediorum ab insciis celebratæ obistere, nihil supervacui, aut nocentis committere. Philosophia, inquit Cicero, (*) paucis iudiciis contenta est, multitudinem consulto fugiens: quam conditionem si sortita foret Medicina, & minime vulgari iudicio exposita; longe minus negotii faceretur ipsis Medentibus ægrotisque, illis ademptum esset incitamentum imponendi, istis inde manans detrimentum.

Satis indicavi, quam operosum sit, qualitatem dominantis noxiique humoris ex multiplici signorum fonte ab Sanctorio designato scrutari; quamque parum feliciter ille laboraverit ad perscrutatorem ab omni lapsu asserendum. Nunc accipe difficultates vestigandæ quantitatis, quibus perterritus Galenus (b) hæc habet: *Siquidem, ut sæpius diximus, nulla est in arte medica nec res, nec medela, quæ specie dicibilis non sit, sed quod nec dici, nec scribi potest, nec omnino præcipi, id quantitatis in quoque est.* Atque hinc maiorem partem oriuntur angustiae, & dubitationes in administratione remediorum, quorum determinata recte specie, oppido arduum est figere vestigium ad determinandam quantitatem. Hanc facile fecimus in parvam, mediocrem, magnam, & summam extremamque, qualem concipiens Hippocrates in summe bono habitu

A a a

exer-

(a) Lib. 2. Tuscul. Quest.

(b) Lib. 3. Meth. cap. 3.

exercitatorum iussit festinanter minuendam esse; sed tanto laboriosius est eas mensuras in nostris corporibus discipere, & inde æqualem quantitatem auxiliorum destinare, nec infra, vel supra ferri. Sanctorius, qui, ut vidimus, omnem lapidem movit, ut promeret notas dominantis humoris, etiam conatus est assignare pertinentes ad quantitatem, easque in paucas contrahens dubiis obscurisque Lectorem minus oneravit, fatigavitque; eademque proinde utar brevitate in earum examine. Principio pugnat Sanctorius, ut demonstret, quomodo ex concursu inditiorum aperiente qualitate redundantis humoris, queat similiter quantitas redundantie colligi, exemplo sumpto a bile, cuius quantitatem ait patefieri, si præcesserint omnes, vel plurimæ causæ calefacientes; si patiens ortus est ex parentibus biliosis; si morbi motus velox fuerit, & tertio quoque die recurrens cum vigiliis, siti intensa, ciborum inappetentia, excrementis flavis, præstinis, vel eruginosis; si colore citrino oculi cum reliquo corpore inficiantur; demum si membrana læsæ fuerint, gravateque æger in mediam ferat. Nolo hæc signa singillatim exequere, & quamvis plura ex hisce intensiorem potius bilis pravam qualitatem, quam quantitatem denotare valeant, concedo ex eorum acervo manifeste significari humorem biliosum, eumque copiosum: ceterum non assentior copiam, quæ late extenditur, nec intra certos limites continetur, ita definiri posse, ut ejusdem statæ quantitas constet. Porro difficultas inveniendæ quantitatis, quæ, sententia Galeni, nec dici, nec scribi, nec præcipi potest, in eo non consistit, ut superet humanam mentem cognitio majoris, vel minoris quantitatis, nulla singulari mensura assignata. Ut videro multa præcessisse bilem generantia, flavere alvi excrementa, & vesicæ, os ama-

resce-

rescere, aliaque hujusmodi vestigia, non dubitabo affirmare, multum bilis adesse. Petenti tamen, ut eam copiam ad singulare pondus redigam, & certo limite ejus extensionem circumscribam, hærebo, satisfacere non poterò, nec indicare, parilem quantitatem auferendam esse.

Aliam methodum, qua credit Sanctorius pernosci multitudinem humorum, trahit ex affectionibus posterioribus, nimirum ex corporis gravitate cum contusione, lassitudine tensiva, tumore, duritie, ruptura vasorum, & rigore sine caloris consecutione: quibus persuasum habet, nimiam succorum copiam denuntiari. Id verum sit. Ergo ne Galenus immerito quantitati insuperabilem difficultatem subjiçendi sui notitiam affixit, eamque supra captum humanum collocavit? At Sanctorius asserit quidem, illis notis significari nimietatem succorum, ceterum non definivit, quot portionibus nimietas naturalem quantitatem excedat; in quo consistit difficultas invincibilis a Galeno credita. Addo, quodlibet ex dictis signis posse a diversis causis proficisci, uti non inficiatur Sanctorius, nec omnia convenire posse. Causarum vero distinctio, a quibus singula fluere possunt, ita aperta non est, facilisque ad comprehendendum, ut certam rationem sufficiat omnes scopulos evitandi. Sic lassitudo tensiva habita pro argumento uberioris sanguinis, potest originem ducere a flatu, & siccitate, & materia ex labore in partes prolapsa, ibique superstite. Itaque ea lassitudo constitui nequit certum inditium ubertatis sanguineæ, nisi aliis convenientibus notis, in quibus discernendis nemo in se recipiet; omnem fallaciam ex facili declinari posse, manaturam, tum ex Medico cogitante, tum ex ipsis ægrotis, quorum plures nesciunt, aut negligunt explicare, quid vere percipiunt, ut inde duci possit cla-

rum iudicium de tentione, aliisque sensu perceptis. Hæc ipsa tamen vel sincere prodita variam, & ambiguam habent interpretationem. Sic gravitas corporis in febribus, ex qua plures capiunt occasionem detrahendi sanguinis tanquam onerosi, Prospero Martiano argumento est purgandi, tanquam signum bilis in venas, articulosque incumbentis. Quid dicam de duritie corporis, de tumore, ruptura vasorum, rigore sine consequente calore? Si singula enumerata ab sola redundantia humoris produci possent, hisce præsentibus confecta foret illius solida probatio; sed varietas causarum, unde queunt oriri, non levem ingerit dubitationem. Sit corpus durum. Cur inde inferam potius multitudinem, quam siccitatem? Rumpantur vasa. Cur rupturam potius tribuam copię, quam acrimonię? Si tumet corpus, tumorem efficere potest plenitudo vasorum, potest etiam sine plenitudine vasorum humor effusus in corporis habitum præter naturę leges, occupansque loca non sua, vel adaucta moles carniū. Si riget corpus, neque rigori febris succedit, ab Sanctorio Galeni opinionem secuto verba facientis de Epicratis uxore, accusatur multitudo crudorum succorum. Ceterum etiam sine hac copia rigere potest corpus a pravo cibo, vel alia mordaci materia stomachum pervellente, vel alteram partem. Vidit Fernelius ingentem rigorem ex intervallis supra vicies quotidie excitatum absque febre superveniente, a bile sincera, eaque prassina in membranis circa jecoris cava coercita. Non igitur ita in promptu est, uti speravit Sanctorius, ex productis signis arripere indubitatum argumentum affluentię vel generatim consideratę. Siquidem semper plura expendenda occurrunt menti nostrę negotium exhibentia sua naturali infirmitate, & tædio laboris in errorem propensę.

penſæ . Multo magis confuſus eſt Sanctorius , quam Galenus ſignis , pluraque conatus ad ea colligenda , explanandaque ; tamen Medicinam facturis tam clarum lumen non prætulit , ut ſcientiæ perſpicuitatem æquet , ſatis indigentiae faciat , & Medicinæ partem , quæ maxime conjectrix eſt , & dubitationibus jactata , in portu ab ſcopulis , & tempeſtatibus ſecuram colloceat . Paſſim tradita inditia morborum , cauſſarumque demonſtrativa vocat , nec dubitat , quin eorum ductu pede inoffenſo ſalebræ præxeos ſuperentur ; ſed ipſe paſſim offendit in ſuis ſpeculationibus , aſſumens pro demonſtratione puram putamque conjecturam , & rationem vix probabilem . Verum enim vero cum in re quacunque , & præcipue in Semiologia ægerime impetrentur legitimæ demonſtrationes , vixque ſperabiles ſint , retro habendum non eſt opus Sanctorii , multa continens ingenioſa , & probabilia ad quosdam frequentiores , gravioreſque errores præcavendos . Iter faſcienti noctu per vias anguſtas obliquaſque vel exiguum lumen optatiſſimum eſt . Et ſane ſemel , iterum , & ſæpius fateri oportet , Medicinam quoquo verſus indeclinabilibus ſcopulis patere , non ſolum ex difficultate intima morborum cognoscendi , & inde monſtratas occaſiones remediorum , ſed ex iſtarum , ut ait Hippocrates , præcipiti fuga ; ex quibus tamen , ejuſdem auctoris ſententia , Medicina conſtat . O calamitoſam occaſionis mobilitatem , & inconstantiam ! quæ velocitate labendi ſæpe noſtrum effugit intuitum , ſæpe incertum relinquit , nec uſum ſui permittit , prius elapſa , quam ſatis explorata . Quis igitur in tanto occaſionis diſpiciendæ , arripiendæque negotio ſe ſe ita tectum , munitumque putet , ut ſine metu offenſionis munus ſuum obire poſſe confidat ? Aptiſſima ad varios ſalubreſque effectus medicamen-

ta intempestive præbita suam indolem dediscunt, quodque efficere nata sunt, aut non præstant, aut imperfecte, aut, Hippocrate monitore, contrarium. Si Hydropticum celeriter feces, uti mandat idem auctor (2), antequam viscera labefactentur, juvabis; si tardius, uti mos est, hisce temporibus, citius rapies ad interitum. Mira, & varia est in omnibus rebus humanis occasionis efficacia, eorumque, quæ fato, fortunæ, & casui adjudicari solent, dominam esse occasionem existimo: quam veteres Romani tanquam Deam coluerunt, & Sophocles apud Svidam in quocunque negotio hominum maximam magistram appellat. Hujus efficientiam obnixè perpende, eaque apprimè cognita defines suspicere, & admirari, quæ ita vulgi mentes percellunt, ut a sublimioribus causis torta existiment. Veruntamen identidem inutilis magistra est, si nempe post irrevocabilem rerum exitum duntaxat deprehenditur; & licet mentem ad futura erudiat, nihil confert ad præterita, solumque relinquit poenitentiam aut commissorum, aut omissorum. Hæc ipsa, quæcunque sit Medicinæ vis adversus ægrotationes, universam fovet, & gubernat, ejusque Provifores tollit humos, & abs turba secernit. Quippe quanto cognitum difficilius est, remotiorque a vulgi captu; tanto præstantiora parit, & magis extollit auctorem operis, adeo interdum ut divinis honoribus, sicuti Hippocratem, affecerit. Medenti laborem exhibet non solum spinosa opportunitatis cognitio, atque pernix fuga, sed illud quoque, quod vel ea probe cognita, & arrepta præsto non est instrumentum, quo voti compos certo fiat, & actionem mente conceptam executioni mandet periculo erroris exemplaribus.

ptæ. Demus enim, ver. gr. præclare apparere adesse
copiam purgandi humoris, nilque purgationem impedi-
re, remanet adhuc consultandum de qualitate, & quan-
titate pharmaci, quod inito consilio respondeat, neque
modum egrediatur. Ut enim definita quantitas super-
flui excernendi comprehendere nequit; similiter in ambi-
guo positum est, quam quantitatem purgans excretu-
rum sit, optatamne, an supra, an infra votum. Am-
biguitatem iniicit etiam laborantis ineffabilis diversitas, &
aliorum accidentium coitio subducta nostræ intelligentiæ;
ideoque imperata purgatio semper nos sollicitos habet
metur, ne vel supra indigentiam, vel infra contingat,
gnaros multiplici experimento, quantum variet per idem
pharmacum, & in eadem quantitate propinatum excre-
tio, modo uberior, modo parcior expectatione, sem-
perque fortuita, si plane illi respondeat. Quod secum
ipse reputans Galenus asserit, non aliunde magis ar-
tem conjecturalem reddi, quam ex quantitate cuiusque re-
medii; eodemque respectu reliquis evacuantibus (a) præ-
ponit venæ sectionem; qua utens ex suo arbitrio me-
tiri potest quantitatem eliciendi sanguinis, contra quam
accidit in aliis evacuantibus, quibus ingestis secutura
vacuatio extra nostram potestatem est, regimenque. An
ideo Phlebotomia undecunque expedita est? Regi potest,
fateor, sanguinis effusio, caditque sub nostrum arbitrium,
octo, vel decem uncias, plures, vel pauciores effundere,
clausa vena ad intuitum destinatæ quantitatis extractæ.
Sciri tamen non potest, an par copia redundet, si dun-
taxat vacuationem redundantis moliri mens est; an
par copia sufficiat derivationi, vel propositæ revulsio-
ni; redditque hujus notitiæ vacuitas incertum reme-
dium,

(a) *De Arte Cura per Sang. miss. cap. 12.*

p. 11. (a)

dium, quantum spectat ad quantitatem, ad quam accedere licet, pervenire non licet, nisi casu, & fortuna.

C A P U T III.

De causis externis errandi in Medicina

QUamvis plura expositis superessent addenda de causis internis errandi in Medicina facienda, objectis ex difficultate cognoscendorum, non exhibente certam rationem agendi, atque ex infidis instrumentis actionum, addere superfedeo, ne longius producam perceptam molestiam artis meae ulcera tractando, & insanabilia detegendo. Pauca tamen subjicio de causis extrinsecus advenientibus, & profectis ab ipso artifice, artisque exercendae consuetudine: quæ licet pluribus de Nostreis forte minus accepta futura sint, tamen prætermittenda non censui amantior publici boni, & veritatis, quam sollicitus de eorum offensionibus declinandis. Videant, quam parati sint lapsus inter medendum, & quibus de causis, eosque caveant, si erga munus suum in commune spectans bene affecti sint.

Medicus assidens graviter ægrotanti, in quo error commissus exitialis esse potest, tranquilla mente sit oportet, nec in plura negotia sparsa, non ab corporis motu spiritibus exhausta, non animi, quo, uti ait Seneca^(a), permiscetur, turbatione agitata. Nempe brevissimo tempore, interque dubia, & obscura deliberare debet de capite laborantis, neque prudenter deliberare potest, nisi sensuum sincero ministerio uti valeat, repræsentante fideliter quicquid circa faciem ægroti, totumque corpus, cubitum, sermonem, & reli-

(a) Epist. 114.

& reliqua apparet. Is quippe nexus est, hæcque communio inter sensum externum, internumque, ut neuter sine utriusque conspirante virtute, & actione rite suo munere fungi paratus sit. Revera enim non duo sensu sunt, & origine distincti, sed unus idemque ab cerebro mediis nervis universo corpori distributus, diversa quidem in diversis partibus efficiens, sed unica potestate ab eodem fonte recepta; qui quacunque parte læsionem patiatur, totus eandem sentit, neque suum pensum integre explere potest. Porro neque mens a sensuum noxa tuta est, idemque patiens impedimentum nequit inter angustias Jacentis idoneum consilium inire, nisi opera sensuum transferentium vestigia sensibilibus inviolata sit, & omnis expers deceptionis. Raro autem accidit, ut Medicus ad opus accedat cum imperturbata sensuum contentione, tem mentis, animique apprime, uti dictum est cum Seneca, commistorum, tranquilla attentione, sed utrumque identidem gerit, aut in domestica negotia distractum, aut de sua existimatione, suaque opinione tuenda plus satis sollicitum, aut consuetudini populari deditum, aut pronum ad obsequendum domesticis ad hoc, vel illud remedium propensis, aut aliter affectum, & præoccupatum. Comprime has affectiones quisquis Medicinam facturum es pro dignitate, & documento Hippocratis, qui providens obviam, facilemque artis, cujus ipse maximus Magister est, depravationem, requisivit in Opifice mores generosos, excellentemque naturam, non aliam habituram scopum, quam veri cognitionem, & opem ægrotorum, non metuens vulgi falso persuasi querelas, non famæ, lucrique detrimentum, neque ad placitum Collegarum, vel contra judicantem pro varia in ipsos affectione. Si de rebus dubiis consulturi, ut ait Cæsar apud Sallustium, ab omni

animi perturbatione vacui esse debent, qui fiet ut de re medica oppido ancipiti sapienter decernatur, alienis a proposito cupiditatibus animo laborante? *Ubi intenderis ingenium*, idem Cæsar inquit, *valet*; *si libido possidet, ea dominatur, animus nihil valet*. Quare si animus primario ad indigentiam ægrotantium intenditur, uti debet, regendus est ad præcepta Philosophiæ moralis, qua destitutus, iudicio Galeni^(a) Hippocratis imitator esse nequit, salutaris, & optabilis artis suæ minister. Non solum autem mentis, animique æstus potestatem consultandi turbat, sed ipsius corporis jactatio, sine cuius consortio, auxilioque ratio suas vires exerere nequit, & quidquam moliri. De rebus gravibus consilium capturi trivia fugimus, secessum quærimus ad quietem animi, corporisque tuendam, cuius vehementior motus agitat, dissipatque spiritus nostrarum operationum instrumenta, ex jactura, & agitatione infirme suum munus executura; ut ab Seneca^(b) admoniti sumus asserente, exercitationum labore spiritum exhauriri, inhabilemque intentioni, & studiis acrioribus reddi. Apparet igitur, quam imparata mente, animoque sint, qui quotidie tota urbe percurstantes ad ægrotos multiplices perveniunt defatigati, æstuantisque vix satis mentis refeito corpore. Hoc quippe lassato, & labore perculso, mentis quoque robur minuitur ad complicata symptomata ponderanda, singula ad sua principia revocanda, ad statuendum de morbi essentia, ministrandisque remediis. Quæ omnia brevi tempore agitanda, & tractanda magna indigent mentis intentione, nequaquam sperabili socii, & adjutoris corporis languentibus viribus. Alterutrum itaque necessum est, aut hosce Medicos præditos esse mente Stoicorum a virtute adversus incommoda corporis, jactura

(a) *Lib. si quis sit Medicus.* (b) *In Epistolis.*

stationesque firmata ; aut esse fortitos animos corpori non congruentes ; aut solummodo uti populari consuetudine , & communibus in omni curatione remediis , non propriis , & singulis ægrotationibus idoneis : quorum seduli vestigatores lucro inhiare nequeunt , nec esse solliciti de pluribus ægrotis quotidie visitandis , & ad omnes æqualiter parati : *Sed qui , inquit Celsus ^(a) , servit quæstui , libenter amplectitur ex præceptis , quæ sedulitatem non exigunt :* qualia sunt universalia , nec accommodata ægrotis temperatura dissimilibus , ætate , vitæ institutione , morbo , causis , aliisque accidentibus . Propria , & singularis medicatio requirit laboriosam mentis contentionem , præsentium intuitum repetitum , constantemque præteritorum memoriam ; quæ tamen cito elabitur , si retinenda plura sunt , & diversorum laborantium ; hacque de causa frequenter evenit , ut medentes ægrotis suam oblivionem , velint , nolint , patefaciant , non raro immemores eorum , quæ pridie viderant , aut audiverant , aut deliberaverant . Itaque ceteris silentio præteritis offendiculis , sola ægrorum invisendorum copia motu incommoda corpori , mentique distractione in plura , repugnat , quo minus provida , accurataque consultatio de singulis habeatur . Deus bone ! Aliis momenti negotiis regendis præfici solent , qui vacui sunt , nec aliis curis distenti , quo attentius , & perfectius sibi commissum opus peragant : cum ex ipso naturæ lumine innotescat , pluribus intentum sensum ad singula minorem esse . Sola salutis procuratio penes eos securior creditur , qui multorum ægrotantium quotidianam curam gerunt ; nec in hisce timetur mentis dissipatio per applicationem ad plura , qualiscunque illa sit ; quasi mentis vigor , uti aliorum sensuum in plura diffusæ non minuere-

tur.

tur. Tritum est adagium: Cave ab homine unius negotii, quippe nimis attento: oppositaque ratione non minus cavendum est ab homine multorum, si singulorum diligens confectio requiritur. Quod si medentis fatigatum corpus, lassumque, & animus perturbatus non multum obstat sapienti deliberationi, an parum obstat brevis temporis, quod solet infumi in affectionis considerationem, mutationum ejusdem, aliorumque accidentium, quæ in horas, non modo in dies contingunt? Quoties versantes in quæstione tantum probabili, postquam eandem rem diu multumque mente revolvimus, mutamus sententiam, rejicimusque, quod verum, aut simile veri visum erat, nostroque dignum assensu? Nobis autem sedentibus ad pulvinar ægroti, dubiis, non evidentibus intimi morbi signis repræsentatis, qui fiet, ut eorum celer intuitus, parque consideratio occulta detegant, ambiguitatem tollant, & satis sint ad rectam sententiam ferendam, neque mutationi obnoxiam? Eo devenit usus, ut fere pudeat coram ægrotante parumper cunctari, rem dubiam esse fateri, sumere tempus ad meditandum, nihil subito administrare; qua præcipiti festinatione nihil exitius esse cum Sydenhamo (*) existimo. Baconum quoque de Verulamio appello, qui tanquam maximum vitium in studiis reprehendit dubitandi impatientiam, & decidendi celeritatem; cum scilicet in otio, & umbra sedentes objecta veri momenta nobiscum agitarimus, nec nostras meditationes ad opus dirigimus, sed folius scientiæ consecutionem. Quanto igitur gravius delinquet, qui de ægrotante in vehemens discrimen conjecto non tantum impatienti celeritate meditationis deliberat, sed deliberata executioni mandat, incertus, quo sint casura?

Non

(a) Pag. 293.

Non inficior, incidere quosdam repentinos, gravissimosque affectus subitam opem efflagitantes; in quibus tamen tantum temporis non concedentibus, quantum opus est ad excutiendam opportunitatem auxilii, mallet nihil grande experiri, quam temere experiri; mallet esse interitus spectator, quam impulsor, festinatorque. Verum enim vero minus ægre ferenda foret destinatio remedii subita, nec satis meditata, si tantum in præcipiti morbo fieret: quod autem acrius redarguendum est, eadem pernecitate a pluribus etiam in affectu dilationem patiente destinatur remedium, imo sæpe non alia de causa, quam ad ostentandum celere ingenium, & paratam copiam. Decessit in urbe celeberrima ante annos non multos Medicus multiplicitate curandorum laborantium clarus, qui discipulis suis, ut ab eisdem accepi, id inculcabat, ut accersiti ad ægros semper aliquod medicamen proponerent, sicque se medicos esse probarent, & quidem, si Diis placet, insignes. O perniciosum documentum, uberimum errorum fontem, & scaturiginem! O impatibilem artis corruptionem! Ut nihil Mortalibus deesset ad cumulum miseriarum, mos obtinuit, ut pene nihil negligentius, aut fucatiùs agatur, quam negotium reparandæ salutis. Siquis æger dives forti, atque exitiali morbo premitur, non uni Medico confiditur, plures seliguntur, advocanturque. Accedunt, neque fortassis frustra, si justum peterent consultandi tempus, si omnibus ægritudinis notis naviter exploratis, non alium finem sibi constituerent, quam utilitatem auxiliumque afflicti, dubiæque vitæ. Enim vero non pauci properi sententiæ ferendæ, jactatique, aut cupiditate singularis laudis, aut perculsi metu, ne frustra advocati videantur, nihil addendo, vel detrahendo, aut occupati studio non dissenti-

tiendi ab Collegis spe compensationis, itemque a celebri-
tate vulgari alicujus usitati remedii, sibi impedimento sunt,
quo minus apte de morbo dijudicent, agendaque præ-
cipiant. Quam porro salutare, & benefici sunt ægro-
tis, qui postquam ad dicendum in collegiis confederunt,
totum animum intendunt ad plausum captandum novi-
tate opinionum, vel concinnitate, & copia sermonis
expedite fluentis! Quo studio ad generalia, sæpiusque
repetita compulsi abripiuntur a consideratione, & col-
latione apparentium in ægroto: qua unice, non inani
facundia prodesse possunt ad errores, uti animadvertit
Hippocrates ^(a), propensa. *Fallax, inquit, est, & ad
errorem proclivis affirmatio, quæ fit cum garrulitate: & proin-
de breviloquentiam præcipit ^(b)*. Fructuosum tamen ipsis
est, si minus ægrotanti multiloquium, trahendo imperi-
torum assensum, admirationemque, & inde famæ, o-
pumque incrementum. Id enim semper Medentium fa-
tum fuit, admonitione Plinii ^(c), ut qui dicendo præ-
pollet, statim fiat dominus vitæ necisque, ideoque cru-
menæ. Solet conjungi velocitas loquendi cum velocita-
te judicandi, & utraque cum proclivitate ad errorem
tanta, ut Seneca proponat Lucilio necessitatem tardi ser-
monis tanquam maximum documentorum: *Hæc est summa
summarum, tardiloquum esse jubeo ^(d)*. Quod præceptum si
salutare cunctis est, tanto magis Medentibus de rebus
obscuris, & ancipitibus differentibus, sed tantî momen-
ti, quanti vita æstimatur: quæ propterea attentam co-
gnitionem exigunt, non velox, & longum eloquium
raro ab initio ad finem usque sibi consentaneum. Ci-
cero affirmat ^(e) in Curione nihil fuisse ex illis, quæ Ora-

(a) *In Præcept.*(b) *De decent. ornat.*(c) *Lib. 29. cap. 1.*(d) *Epist. 40.*(e) *De Oratore ad Brutum.*

torem efficiant , præter bonitatem verborum , & expeditam profluentemque quodammodo celeritatem , neque tamen caruisse Oratoris laude . Eadem fortuna imo maiore , & ab eadem affluentia sermonis nata plures Medici fruuntur , qui nihil singularis , nihil excellentis ex arte possidentes , populari fama verticem attigisse creduntur , longeque a turba recessisse . Nominis vero celebritati , suæque facundiæ confisi sæpe minus de rebus ipsis solliciti sunt , sæpe minus considerate deliberant , uti non semel observavi , deliberataque exemplo sunt , & præsidio aliis fama minoribus ad errandum sine obrectatore . Cornelius Tacitus ^(a) secum ipse versans præterita , & præsentia comperit , eam esse rerum humanarum conditionem , ut omnes fucis , ludibriis , inanitatibus pateant , intermistæque sint : quibus tamen præ ceteris autumno medicas onerari , & inde Medicinam , quæ , testimonio Hippocratis ^(b) , omnium artium præclarissima est , ut idem queritur , infra omnes dejectam esse . Quamquam autem in arte facienda ea declinari possunt offendicula , quæ artis propria non sunt , sed artificis , tamen tot nos circumstant in deteriorem partem prona , ut stare in vestigio , atque a lapsu cavere maxime operosum sit , nisi præstantem illam indolem ab Hippocrate designatam , generoso cultu , probisque moribus adornatam nacti fuerimus . Non tamen ex sola consuetudine populari , aliisque indicatis internis obstaculis instant errandi occasiones , sed interdum ex ipsis ægrotis , qui nonnunquam quanto impensius opem petunt , tanto minus ingenue cum nobilissimæ artis Professoribus agentes id committunt , quod aptum est eorum animos , mentesque alienare ab accurata morbi meditatione , auxiliique , nisi sa-

*(a) Lib. 3.**(b) In Lege.*

si sapientia præsto sit, retineatque attentionem; sine qua ceteris compressis cupiditatibus, mens in solam honestatem defigi nequit, & reliqua despicere. Bonum gratis esse oportere, inquit Seneca, sed gratuitam bonitatem congruo præmio adempto, sola sapientia comparare potest. O divinum Hippocratis ingenium! quod omnes expositas offensiones complexum, eisdem obviam iturum Sapientiam, & Medicinam comites individuas fecit, monuitque^(a), omnia inesse debere Medicinæ, quæ insunt Sapientiæ, atque in primis argenti contemptum. Ut enim ejus cupiditas honestis moribus infestissima, animorumque dominatrix

..... *Quid non mortalia pectora cogis*

Auri sacra fames?

tot fucos, tot superflua, imo etiam perniciofa in medicam artem invexit; ita contemptus ea omnia amovere, & arcere potest, pravos usus corrigere, utiles probosque inducere. Non diffiteor, alias etiam cupiditates utilitati, & honestati medicæ praxeos officere, sed edomita, quæ inhiat opibus augendis, reliquæ proclivius subiguntur, uti visum est Hippocrati, qui primo loco inter dotes Sapientiæ, & Medicinæ argenti despiciatum collocavit: quam, si rerum humanarum conditio animis medentium insidere pateretur, quam brevi tempore Medicina pristinum dignitatis fastigium, unde deturbata est repeteret, & facultas Philosophorum evaderet, qualis fuit apud Pythagoram, Empedoclem, & Democritum, antequam a Sapientiæ studio separaretur.

CA-

(a) De Decenti ornato:

CAPUT IV.

*Ostenditur, quam in lubrico versetur frequentator
Venæ sectionis in febribus.*

Quemadmodum medici officii est, morbum diligen-
ter intimeque explorare, non solius cognitionis gra-
tia, sed inveniendi remedii, item in eundem utilem fi-
nem ostendi, quam infidæ sint, paratæque ad fallaciam
plurimæ morborum notæ; quotve aliis de causis interpo-
nantur difficultates, medicæ provinciæ inoffenso pede ob-
eundæ. Ex quibus sane deiciendus animus non est, sed
erigendus, non alienanda mens ab arte, sed fortius in-
tendenda in superanda, quantum licet, offendicula, om-
nium, quæ apparent in morbis, sollertissima circumspe-
ctione, & consultissima operis destinatione. Argumenta
dubitandi de prosperitate actionum medicarum satis aper-
te declarantur ex sola consideratione, eas prodire ab arte
conjectatoria, eamque, qua parte conjectrix est, fulciri
opinionem, non scientiam, quæ, uti definit Hippocrates^(a),
scire facit, altera ignorare. Tamen plura ex illis singilla-
tim indicare volui, indicabo, & plana faciam, quo lu-
culentius appareat, & ob oculos Tironum ponatur, ma-
nifestas certasque remediorum occasiones rariores esse,
quam ut vulgo existimetur, incertumque pariter esse
auxilium ab illis sperandum: unde scatet consecutio uti-
lissima adversus multiplices paratos lapsus, tutiorem esse
rariorem remediorum administrationem frequentiore, si
generatim utraque spectetur, sejunctaque abs quibusdam
circumstantiis, quæ aliquando singularia comitantur, de-

Ccc

du-

(a) In Lege,

ducuntque generalia, ut a Medicis efferri solent, ad exceptiones. Addidit animos ad hanc disputationem Vallesius, qui commentans sententiam Hippocratis^(a): *Ex adhibitione contraria adhibere, & quiescere*: pronunciat, hac brevi dictione duas medicæ praxeos partes contineri, adhibitionem contrariorum, & quietem, sed hanc præstantiorem esse actione, magisque periculosum esse incidere in Medicum, qui nesciat contraria usurpare, quam quiescere nesciat. Quapropter, si ex duabus partibus praxeos, tanti viri animadversione, præstabiliior est quies actione; non alia fane de causa illa præstat, nisi quia caret actionis periculo, & offensione: quod obiter a Vallesio indicatum, & ferax uberrimi fructus pro viribus declarare, & probare obnitar, perpenſa obſcuritate indicantium, incertaque opera instrumentorum adhibitorum indicantibus ſatisfaciendi gratia. Cum tamen non æque graviter in uſu diverſorum remedium delinqui poſſit, nec omnia ſint in uſu pariter frequenti, uſitatoria duntaxat perſequar, importune uſurpata gravius nocitura, cujuſmodi ſunt venæ incifio, & purgatio.

Ars rationalis medendi, quam cum Hippocrate, Galeno, aliisque doctiſſimis viris profiteſcemur, methodo innititur, proceditque ex cognita morborum natura, ſupeditante indicationes auxiliorum adeo in Scholis decantatas. Hæ profectæ ex natura morbi apprime comprehenſa, citraque dubitationem Medentem quoque tuto dirigunt, perducuntque ad ſcopum; modo ſuppetat congruens efficaxque indicatorum exequendorum materia. Cum vero derivantur ex probabili tantum ægrotationis notitia, nec omni libera dubitatione, uti frequentius accidit, duntaxat dubiam rationem voto potiendi ſufficiunt. Scientia certi eſt, & indubitati, opinio incerti, controverſique,

tot.

(a) Lib. Epid. 6.

totque proinde diffensionum fons , & origo , quæ fervent in scholis Philosophorum , Medicorumque , sed inter Medicos cum majore detrimento , propterea a Plinio miseræ vocatæ , ut pote cedentes in perniciem ægroti , non tantummodo in victoriam , aut jacturam litigantium , qualis est exitus concertantium Philosophorum . Quocirca in tanta rei medicæ difficultate , & opinionum discrepantia de natura morbi , causâ , accidentibus , de facultate medicaminum , de opportunitate præbendorum , non temere judicem , eorum frequentatorem sæpius ab scopo recedere , quam appropinquare , sæpius nocere , quam prodesse , aut saltem sæpius in id periculum incidere ; quo perspecto Hippocrates ^(a) nos admonuit , ut duo circa morbos exerceamus , ut juvemus , aut minime noceamus . Quorsum hæc præcepit Senex , si alio fine prudens artifex ad ægrum non accedit , quam suppetias laturus , deperditamque sanitatem instauraturus ? Novit Sapientia Senis , quot Medentem circumstant decipulæ , atque usuvenire ex facili , ut porrigens manum ad sustinendum ruentem impellat ; eumque monitum voluit de cavenda noxa proclivi , & obvia in ipso conatu auxiliandi .

Omniū consensu tres sunt constitutæ curationis conditiones , securitas , celeritas , jucunditasque , inter quas absque dubio securitas optabilior est ; ejusdemque nomine intelligo curationem peractam adminiculis certum beneficium citra periculum allaturis . Etenim ea , de quibus ambiguum est , utrum majus incommodum , quam commodum importatura sint , intuta vocantur , & sunt , iisdemque inita curatio lubrica , & anceps . Enim vero quam paucæ occasiones offeruntur , in quibus apparet clara , certa , & fructuosa remediorum administratio ? Frequentissimi

mus

Ccc 2

(a) *Lib. 1. Morb. populi. sect. 2.*

mus est usus phlebotomi; ut hinc propositum aggrediar, nullusque dies præterit incruentus, omnis madet plurimum ægrotantium sanguine. Ut autem innoxie, & cum indubitata utilitate madeat, noscat oportet artifex evidenter inde secuturum fructum; nullumque detrimentum, vel saltem multo levius fructu. Verumtamen quomodo evidenter providebit fructum remedii, de quo tot extant controversiæ, quodve ab gravibus auctoribus explosum fuit, redeuntque in dies qui explodunt? Quoniam confugiet ad hanc evidentiam venandam? Ad rationem ne, an experientiam? Si ad rationem, opus est, ut per istam constet, inter effusionem sanguinis, morbumque, cujus gratia funditur, reperiri apertam contrarietatem; ex qua sola potest demonstrari certa utilitas effundendi. Age igitur, Medice operose, & phlebotomiæ frequentator, profer morbum, in quo dilucide hæc contrarietas innotescat. Profer febres continuas, acutas, putridasque, ut vocant Majores, aliisque frequentiores, in quibus iterato venam feris, & ostende manifestam repugnantiam morbum inter, & remedium: quam ostensurus, oportet, ut præclare teneas naturam febris, ductique sanguinis effectum. Utrumque vero dubium vehementer est. De febris essentia nemo est, quin dubitet, & fateatur reconditam esse; & fateri necessum est animadvertenti tot tamque varias, discrepantesque de eadem sententias Recentiorum supra indicatas: ex cujus propterea obscuritate nequit patefieri certa contrarietas cum sanguinis detractione. Sin autem cum Præcis judices, febrem in augmento caloris præter naturam consistere; etiamnum hærebis, nec poteris demonstrare evidentem oppositionem inter eam, atque remedium. Calidum frigido aperte opponitur, sed venæ sectio tantummodo ex accidenti refrigerans, non per productionem

con-

contrariæ qualitatis, qualis reperitur in rebus natura frigidis, etiam idonea est pro variis circumstantiis calefacere. Sic Prosper Martianus^(a) ex sanguinis effusione in febricitantibus metuit augmentum caloris, bile ceteris humoribus prævalente, sui que timoris causam inde ducit, quod observatum fuit, ex immodica sanguinis emissionem febres accendi, & plurimum urentes, faces præbente commotabile; ut etiam supra adnotatum fuit agendo de effectibus phlebotomiæ: de qua propterea certiores reddi minime possumus, nisi multa, & oppido difficilia cognitu explorata habeamus. Quoniam igitur ex essentia febris in calore posita non elucet certa contrarietas cum vena incisa, expendamus, an eluceat inter eam, proximamque febris causam. Cum venæ punctio sit sanguinis evacuatio, solum directo opponi potest, & mederi ejusdem redundantia, si hæc causa proxima constituitur: quæ tamen a Galeno celebri suo phlebotomiæ in putridis, constituta non fuit; qui Synochi putris cum sanguinis affluentia curationem ex professo^(b) tradens, jubet sanguinem educi, non tamen quantum superabundat, sed minus abundantia, ut aliquid amplius remaneat pro spatio a febre percurrento. Nec enim sanguinis extractio tota febris medela est, ut post extractionem statim extinguatur, sed perseverans alia poscit remedia, iisque sustinendis vires pares, ideo totius redundantis quantitatis ablatione minime debilitandas. Totum profecto redundans eximendum foret, si post exemptum absque aliis remediis desineret febris; uti desinere deberet, si superflua copia foret proxima causa: perseverans tamen aliis adminiculis subjuganda est, videlicet superstitem causam expugnando, vel adjuvando naturam ad expugnandam.

Cum

(a) *Lib. 2. de Mor. Mul. Hip.*

(b) *Lib. 11. Meth. cap. 14.*

Cum igitur detractio sanguinis soli copiae recta adverte-
tur, nisi ab ea febris proxime accenditur, uti non ac-
cendi constat, sequitur, venae sectionem etiam confide-
ratione causae proximae non habere requisitam contrarie-
tatem cum febre. Unde igitur ostendetur contrarietas in-
ter febrem, & sanguinis effusionem, quae ratione non
potest ostendi? An experientia, effectoque? At haec ipsa
repugnant, non favent. Quot enim febres numerantur
post sanguinem eductum subito, vel paulo post imini-
nutae extinctaeque? Certe admodum paucae; pleraeque,
si putridae, continuaeque sint, palam est perseverare, sua
tempora, quae Plato fatalia vocat, percurrere incremen-
ti, & vigoris, semel, bis, atque etiam pluries elicitio san-
guine: quo tantum eventu considerato, remanet dubium,
utrum scalpellum juvet, an noceat. Nihil habes, ut sen-
tio, Medice operose, quod hisce rationibus opponas;
solumque pugnare potes, ut in febre putrida conjuncta
cum quantitate sanguinis modum egressa, profit venae
incisio, videlicet ad tollenda impedimenta curationis, &
copiam minuendam tanquam causam intermediam, fomi-
temque futurum vehementioris augmenti. Esto igitur:
sit phlebotomia pars curationis in concursu febris, &
uberioris sanguinis. Nec enim illius usum rejicio, sed
parciorem volo, concedoque postposita academica in-
quisitione, & partium studio, plenitudinem venarum
cum febre putrida esse indubium praclarumque argu-
mentum adimendae scalpro affluentiae. At quandiu du-
rat haec copia in acute febricitante? Hanc cito amoli-
tur ipsa febris, vigiliae, aliaeque afflictiones; amolitur
laesa nutritio, tenuisque victus impar reparandae copio-
sae continuaeque dissipationi. Quam cito igitur tolletur
copia, simulque occasio remedii minuentis, ejusdemque,

ut multi solent, repetendi? Non tamen affirmare aſim, nunquam in febre offerri opportunitatem iterandæ ſanguinis educationis, tametſi arbitror, plerique melius proviſum iri toties non iterata. Illud pariter adnotandum eſt, in febricitantibus acute notas plenitudinis vaſorum incertas eſſe ob intenſum calorem late corpus occupantem cum tenſione, & tumore vaſorum; quæ duo, monitu Horatii Augenii (a), ſanciuntur quidem indubitatum argumentum affluentiae ſanguineæ, dummodo tamen corpus univerſum vehementer non æſtuet; quo æſtuante, uti contingere in acutis ſolet, ea duo ſigna ſuam ſignificandi certam efficaciam amittunt. Hoc autem conſeſſo, in aliquibus febricitantibus non obſcure dubieque apparere ſuperfluam ſanguinis ubertatem, poſcentem venæ apertionem, iſti quam pauci ſunt facta comparatione cum aliis, in quibus nihil ſolidi repræſentatur ad copiam colligendam? Quamobrem ſector venæ in fortibus putridis ob plenitudinem relatam ad vaſa, ſi nanciſci poteſt firmam illius notitiam, hanc certe raro poteſt, nec toties, quoties hoc nomine ſanguis effunditur. Citra vero plenitudinem vaſorum, quæcunque arripitur cauſa venæ cruentandæ, minoris claritatis eſt, atque firmitatis, quam ex ea plenitudine depromta. Nonnullas & ego agendo de indicante phlebotomiæ in medium produxi rationes hauriendi ſanguinis abſque quantitate vaſa nimium replente, eamque præcipue, quod in febribus vehementer fervidis multæ attolluntur ignitæ, ut cum Priſcis loquar, fuligines; quibus erumpentibus ex vena grandi recluſa liberior perſpiratio, aliaque commoda ſperantur; ſperantur, inquam, eventura tamen eſſe, pro certo tenere non licet. Cum enim præ ceteris partibus ſanguinis tenuior calidiorque, bilioſa

(a) *Lib. 2. cap. 10. de ſang. miſ.*

liosa vocata, aptior sit ad accensionem, nequit fieri, quin in vehementi febre plurimum bilis conflagret, uti liquet ex doctrina Hippocratis, & amplo Prosperi Martiani consensu; item nequit fieri, quin remedia sint suspecta, idonea præparare sanguinem ad induendam naturam bilis, cujusmodi ab Hippocrate, aliisque Antiquis credita fuit venæ sectura, proinde tempore æstivo bile feraci ab eisdem non usurpata, ut sanguinis mutationem in eum humorem caverent. Vigente calore æstivo sanguis valde tenuis est, & quam proximus naturæ bilis, qui magis attenuatus per venæ incisionem timuerunt Antiqui, ne promptius uberiusque in bilem converteretur; eoque metu per æstatem ab scalpro temperarunt. Neque porro videtur sanguis minus præparandus esse ad conditionem bilis a fervore febrili, quam æstivo, neque minus timenda ejus mutatio in bilem febris tempore, quam æstatis, accedente præsertim alia causa ad eundem effectum apposita, qualis apertio venæ existimatur. Hac rerum convenientia perspecta, Hippocrates utrumque calorem æstivum, & febrilem, sive conjunctim, sive separatim habet pro obstaculo sanguinis eliciendi, uti variis ejus textibus collatis Prosper Martianus ^(a) comprobavit. Nisi tamen Hippocratis vestigia presse sequi placet, quod non pugno, incide venam in febre valde æstuosa ad viam fervidæ exhalationi, sicuti dictum est, muniendam. Numquid igitur in Te recipies fore, quod animo concepisti? Vereri hercle debes, ne sanguis per emissionem magis attenuatus, & biliosus redditus calidiores uberioresque fundat halitus, quam quibus foramen venæ aditum patefecit. Fortassis res aliter cadet, nec in eventum, quod timendum esse innui; sed dubium est; neque præsto sunt

inda-

(a) Coaca. Præno. Sect. 3.

indubitata signa ad prænoscendum. Veruntamen ratio ducta ex attenuatione sanguinis, & præparatione ad contrahendas bilis qualitates facta per venæ punctiōem, huic obstat multo apertius, si repetatur in progressu febris, quam tantummodo facta in principio universali. Plures enim dies perseverante febre, & crescente ad statum usque, plus sanguinis convertitur in bilem, postea separandam, perque alias vias, non per apertam venam exigendam. Utrum igitur consulte, cauteque suos habeant ægrotos, qui pluries in ferventibus febribus ictum scalpelli renovant Cultores veritatis, non vulgaris consuetudinis dijudicent.

Ab exposita sententia Majorum, vetante usum phlebotomi inter ardores æstivos, quippe bilis proventum urgentem, venit in mentem, ut excutiam vulgarem opinionem apud Nostrates de largius fundendo sanguine, oborta febre, postquam corpus laborioso validoque motu incauit. Imaginemur igitur aliquem sese plures dies vehementer exercuisse, & subinde in febrem fortem sine interna inflammatione incidisse. An huic febricitanti sit mittendus sanguis, non disputo; tantum contendo, uberiores mittendum non esse propter calorem a motu conceptum; meæque opinioni patrocinator vetusta praxis, quæ potius venæ scissuram dissuadet, quam hortatur, ea causa febris prægressa. Si enim fervor dierum æstivorum, ut promovens generationem bilis, opponitur effusioni sanguinis ad eandem conducibili, cur non opponetur calor ab motu accensus, similiter idoneus corrumpere sanguinem in biliosum succum? Si corporis igitur valida exercitatio, vel alia quæcunque causa ejusdem efficacis febrem antecesserit, vel parcius adimendus sanguis est, vel non adimendus, præsertim aliis convenientibus notis congestæ bilis. Ita me gessi, curans Bartholomæum Zanchetam mercatorem pata-

vinum annorum plus minus quadraginta, temperamenti sanguinei, post laboriosum corporis motum duos menses obitum, correptum tertiana simplici impura, mense Septembris anni 1732, quo ista exarabam. Evasis illa post tertiam accessionem duplex, & continua cum ingenti siti, infestissimo palato, dolore capitis; & aliquando levi delirio; non tamen manifesta declinatione carebat. Orabant domestici, & amici, ut sanguinem educi juberem, causando illius æstum a præterita laboriosa corporis exercitatione; quæ tamen mihi erat argumento non educendi, una cum aliis inditiis. Itaque cum æger mihi constanter confideret, nec alterius medici consilio vellet uti, nihil aliud impetraverunt, nisi ut apponerentur cucurbitulæ tergo scarificatæ in toto morbi curriculo plures dies dimenso, venas grandes intactas reliqui; nisus hoc spatio clysteribus, & laxantibus intus assumptis ad evacuationem bilis, hujus copiam variis in locis mihi testante, & motu tertiano febris, validoque corporis præmissio, & tristi sensu amaroris, os summum in modum affligente. Exitus respondit consilio; & post plures excretiones biliofas partim spontaneas, partim petitas, febris continuationem amisit, symptomata intensiorem. Residua vero tertiani circuitus vestigia cortice peruviano dissipata fuerunt. Satis de hac opinione, quæ Patavii apud multos invaluit. Revertor ad propositum. Dixi agendo de indicante phlebotomiæ, non incongruam rationem exhiberi distringendi scalpri, si cernuntur initio inditia corruptionis sanguinis, ut aliqua portione detracta, minor supersit corruptioni. Quam utilitatem si opineris verisimiliter reportandam esse, approbo opinionem; & sub hac conditione eam proposui; si pro indubitato credas, non commendo tam firmum assensum. Forsitan enim soluto per extractionem
fan-

sanguinis partium componentium contextu, mutatoque contactu, promptius latiusque serpet putredo, sive corruptio; imo, quia corruptio nihil est aliud, nisi dissolutio naturalis conjunctionis inter partes, si venæ punctio eas laxet, ad causæ corrumpentis actionem easdem præparat. Alias, Amice assiduæ actioni intentus, excogita rationes referendæ venæ. Dic, si placet, cum multis Recentioribus, eam referendam esse ad obtundendam, deprimendamque fermentationis vehementiam; sed animadvertite, venæ sectionem nullam habere contrarietatem cum causâ fermentante, neque hanc cum delectu evacuare; & idcirco nihil inde beneficii obtineri posse, nisi ex accidenti, sed timendum pariter esse, ne attenuato sanguine magis emergat fermentum febrile, & fortius agat. Altrue quoque, si placet, plenitudinem ad vires ab Antiquis celebratam; sed memento ipsis fatentibus, plenam esse ambiguitatis, & difficultatis ejus notitiam, proinde ex ea argui non posse certam usurpationem phlebotomi. Donemus tamen eam præclare cognosci, quod ipse Galenus negat^(a), asserens per scientiam esse incomprehensibilem; anne ex ejus cognita præsentia constaret, venam esse resignandam? Nihil minus. Quandoquidem, ut ait ipse Galenus^(b), plenitudo ad virtutem relata, nec sic obstruit venarum ora, ut refrigerationem prohibeat, nec tunicas vasorum distendit, nec ruborem, aut tumorem invehit, multoque minus, vel carnis, vel cutis transpirationem moratur. Hac igitur, ut dono, comperta plenitudine in febribus, quid ex dictis colliges, solidam exhibens probationem sanguineæ vacationis moliendæ? Aliter ego, atque Antiqui, explicui plenitudinem ex comparatione virium, asseruique, commodam sanguinis quantitatem ex morbo fieri posse incom-

D d d 2

mo-

(a) *In Lib. de Plenit.*(b) *Lib. 9. Meth. cap. 5.*

modam, gravemque. Cur igitur, inquires, hæc phlebotomo tollenda non erit? Tolle, si vis; tamen si recolas superiora, ex facili deprehendes, valde dubiam esse in febribus ablationis utilitatem, imo inde alia incommoda incidere posse, superatura beneficium sperabile a detractio-
ne ejus partis sanguinis, quæ creditur per febrem esse red-
dita superflua, & onerosa; certum tamen non est. Enim
vero Joannes Baptista Verna, qui celebrandam suscepit,
& supra cetera remedia extollendam phlebotomiam, item
excogitavit causam febrium ejusdem celebrationi oppido
favorabilem, contendens *liquida quantitate semper, &
mole, etiam si vitio laborent, febrem immediate proximius,
& primario parere*. Qua causa constituta sequitur, venæ
incisionem primarium esse febrium remedium; qua scilicet
nullum citius, & commodius succorum redundantiam
minuit. Sic Verna magnum comparat patrocinium venam
in febribus etiam iterato ferientibus, omnemque adimit
solicitudinem de illius indicante pervestigando ex sola
præsentia febris luculenter declarato; quam ait, proxime
a quantitate, & mole produci. Porro ita Verna^(a) explicat,
quemadmodum ab copia producat febris, inquires eam
non produci, nisi sanguis aliqua ratione multus vasorum
tunicas, fibrasque convexam partem respicientes, alveum-
que formantes premat, ac distendat, & in iis cespitet,
titubet, patiaturque circuitus sui turbationem, & impe-
dimentum. Quippe compressione ex repletionem facta, fi-
bra, spiritusque ejus hospites conturbantur, unde febris.
Utrum autem hoc irritamentum inflictum a plenitudine
tunicis, & fibris vasorum in parte descripta, sit semper
causa febris primaria, & proxima, Tu Verna, iudex
esto, qui asseris in eadem parte libri, in aliquibus
febri-

(a) De Phlebot. cap. 7. part. 1.

febris curam dirigendam non esse ad plethoram, sed ad causam primariam valentio-rem, quæque magis urget, quemadmodum obtingit in ephemera ex frigore, vel ab cruditatibus, corruptis cibis, a vermibus, ab fermento hostili corruptelæ ciborum irritatis, irritantibusque. Te affirmante, in aliquibus febribus fomitem primarium, & proximum non esse copiam, nec ad eam convertendam manum Medici, quomodo id convenire potest cum tua conclusione^(a) antea stabilita, semper causam primariam, proximamque febris esse multum, qua multum, tametsi vitio laborat? Ergo quoniam constat ex tuis documentis, plenitudinem non semper esse primarium incitamentum febris, nunc pensitemus, an sit frequentissimum. Tres enumeras universalis plenitudinis differentias, propriam, minus propriam, & impropriam. Propria, quam etiam Erasistrateam libenter appellas, & ais conflare ex copia sanguinis supra vasorum capacitatem debitam, consuetamque absque eorundem culpa, propter alimentum supra-mensuram succenturiatum; propria, inquam, plenitudo solum generari potest in temperaturis qualitatatum mediocritate ornatis, robustis, idoneisque convertere copiosum ultra modum cibum in bonum sanguinem, non pravum succum, qui copiosus cachochymiam generat, non veram plenitudinem; quam comparabant Athletæ, de quibus loquitur Hippocrates, multo cibo, exercitatione multa, frictione, & inunctione; in quibus & erat ubertas optimi succi, & proba omnium partium temperies: unde Senex habitus Athletarum summe bonos vocat. Cum autem corpora ita probe temperata, ut valeant redundans alimentum sine corruptione conficere, & boni sanguinis natura donare, perpauca sint, etiam redundantia inde genita

(a) *De Phlebot. part. 1. cap. 9.*

nita raro erit in causa februm . Altera plethora , quam apparentem vocas , est sanguinis plenitudo febrili , vel simili effervescentia , ut ais , turgescens , quæ vasa distendit , frequenti , celeri , magnoque pulsu rapide movetur . Verbo me expedio ab hac plenitudine , quæ speciem habet plethoræ , nec proprie talis est ; siquidem sanguis calore febrili rarefcit , intumescitque ; & iccirco febris effectus est , non effectrix , produciturque irritamento febrili sanguinem agitante , turbante , & in tumorem attollente . Remanet , ut tertiam plenitudinem expendam , quam impropiam nuncupas , asserisque adesse solidi culpa , vasorum scilicet quacunque de causa contractorum , & capacitatem constringentium : qua restricta sanguis superfluus , multusque habetur . Doles hanc male declinari a Medentibus , aut nesciri , cum tamen plerumque contingat . Alibi vero doces, ^(a) ab sanguinis massa , quamvis depravata , & vitiosa cum quibusdam partibus acetosis , & acutis , quæ in fibras adigantur , easque constringant , aliquam quidem læsionem fieri , non tamen febrem , nisi cruoris , succorumque moles circa easdem fibras , & in vasis colligatur , & plethora conflatur . Abs quo tamen vate , & hariolo id scivisti , Verna , scilicet non posse accendi febrem ab exoticis humoribus sanguini admistis , eumque inquinantibus , nisi inde plenitudo comparetur arctatis vasis ? Videmus vinum , quod similitudinem tantam habet cum sanguine , ut a Plinio sanguis terræ vocetur , adigi in vitiosam fermentationem , & corrumpi aliqua de causa exaltata fece , vel aliquo exotico liquido intruso , vel portione minus sana vini . Cur igitur ipse sanguis non poterit concipere febrilem fermentationem , sive motum , &urbationem partium , si displicet nomen fermentationis , ab inter-

(a) *De Phlebot. cap. 9. par. 1.*

termistis purgamentis , absque interventu constrictionis vasorum , & hanc sequentis plenitudinis ? Si tibi negem , sanguinem colligi circa fibras , & in vasis , neque in iis cespitare , ut ais , a motu suo , circuituque præpediri , ut necessarium esse pugnas , qua ratione hæc probabis ? Namque acceleratus pulsus in febribus liberiores , & velociorem testatur circuitionem , ut loquar cum Recentioribus , non impeditam saltem in vasis majoribus . Sin autem irritamentum , & sanguinis collectio intra vasa solum febrem proxime antecedit , non comitatur , hac oborta cessat argumentum ob plenitudinem ducendi sanguinis . Hujus porro acervationem in vasis febrientium , nisi fallor , aliunde probare nequis , quam ex tumore vasorum in febribus elato ; qui tamen ipsius caloris effectus est , non causa ; eundemque parit quilibet alius calor , iræ , laboris , & similium nulla præsentente febre . Vasa multum distendi apta sunt absque molestia , absque impedimento Circuitionis , & productione febris ; multique ob id , licet quotidie laboriosa corporis exercitatione incallescant , calorque vasa tumefaciat , longam tamen ætatem absque febre degunt . At quoque dolebas partam plenitudinem solidi culpa , vasorumque quacunque de causa contrictorum a Medentibus , aut male declinari , aut nesciri : quam tamen etiam Antiquis video ignotam non fuisse , animadvertente Vallesio ,^(a) ex certis occasionibus corpore crassiore reddito , item vasorum tunicas crassiores evadere , & inde earum cavitatem contrahi , quo tempore redundantibus ex multo cibo succis majori amplitudine opus erat ; qua deficiente crescit repletio vasorum , non crescente copia contenti .

Hæc habui , quæ pro data occasione dicerem de causa
con-

(a) Sect. 1. Aphor. 3.

continente febrium ab Vena excogitata, relataque ad plenitudinem, ut Tirones perspicerent, nihil inde certi erui posse ad commendandam usurpationem phlebotomiæ in febribus, multoque minus ejus frequentiam ex sola generali ratione assumptæ ex arbitrio plenitudinis. Itaque ambiguum identidem est, utrum venæ profectioni adjutus sit, an læsurus febrientem, & multo magis, si frequentet sectionem: certum tamen est in hac ambiguitate, securam non esse curationem, pene toties errori expositam, quoties vena cruentatur. An non igitur præstat in plurimum accidentium ignorata copulatione rarius fortunæ, ignotique casus favorem tentare, quam frequentare dubium experimentum? Si conferatur sperabile levamen ab vena etiam opportune resignata cum noxa inde timenda, si resignetur intempestive, in proclivi est colligere, detrimentum esse majus sperabili levamine. Venæ apertio, uti superiora probant, proxime, & per se non opponitur causæ febrili, quæ communiter existimatur materia extranea repugnantque naturali missioni sanguini interjecta, sui separationem, excretionemque petens; quam detractio sanguinis non præstat, nec aliud commodum præstare potest citra plenitudinem valorum, nisi ex accidenti. Alia proinde in curatione febrium requiruntur remedia promotura operam naturæ secernentis, excernentisque humorem turbatorem naturalis, & intestini motus sanguinis, & permissionis. Hanc autem ipsam naturam, quam Hippocrates prædicat morborum medicatricem, & primas partes in curatione gerentem, effusio sanguinis apta est imminuere, & labefactare. Ille ille, qui per venas fluctuat paucus humor Mortalium vitam regit, & sustentat, instigatorque est rerum omnium, quas ab orbe condito humana industria molita fuit, inque posterum

+
ator est
magis

mo-

molietur. Miramur cælestia, supraque nos posita, nec sine ratione ex nostri captus infirmitate miramur. Videntur autem non minus admiranda prodigia pauci sanguinis, abs quo homo tot rerum inventor, machinatorque vim totam, & efficaciam mutuatur. Quid quod similis liquor infusus diversis instrumentis ceterorum animalium tot edit operationes, multiplicitate, varietate, & sagacitate stupendas, & ineffabiles? Vide, quam multa ad mansuetudinem, lenitatemque componat, quam multa incitet ad audaciam, furoremque. Aliis ingerit docile, parensque humanis jussibus ingenium; aliis obtusum, & intractabile; pluribus miram sollertiam, manifestam ex variis industriisque modis, quibus vitam suam tuentur, suisque indulgent affectionibus; quos admiratus Plinius^(a), non aliunde ortos putat, quam ex spectaculo naturæ sibi paria componentis. Universa tamen eorum opera ex simili liquido dissimilem fabricam impellente suspice, eoque unico impulsu tot, tamque varia prodire. Quicquid Hippocrates, Zeno Stoicus, Plato, aliique Philosophi de caloris efficientia tam ample dixerunt, in sanguine adumbratum cerne, ignis vitalis foco, & promptuario. Nil mirum igitur Antiquitatem tanti sanguinem fecisse, ut cæsarum victimarum sparsum crediderit, ut loquar cum Plinio, lautissimam Deorum placationem. Quamobrem, si providendum quam maxime est, ne frustra, & perperam vitæ fulcimentum minuatur, quæ superest in ancipiti consilio tutior ratio providendi, quam venis parcendo? Exhibito morbo, in quo dubitas, sisne scalpello profuturus, an contra, pone Te malle errare non misso sanguine, quam misso. Quod tandem peccatum committes? Quod detrimentum importabis? Levius sane, quam commissum,

E e e

(a) *Lib. 8. Cap. 12.*

*Alia
lebotomia*

missum, importatumque per intempestivam missionem; quod scilicet natura non mutilata per effusionem corrigere potest, vel spontanea manifesta vacuatione, vel occulta, vel fortius ferendo morbum suum cursum conficientem. Docta est sine Doctore, suæque conservationi attenta sciet invenire vias inopinatas ignoratasque, si opus, cujus principalis effectrix est, ipsi fidenter permittetur. Ex opposito citra occasionem detractus sanguis non unam noxam infligere aptus est, & præcipue virium infirmitatem non facile reparabilem. Solus cibus sarcians spiritum, & sanguinem eas reparare potest, isque debita quantitate sumtus, coctus, & distributus. Repugnat autem citæ nutritioni vires febricitanti restituturæ, victus tenuitas a morbo postulata, atque imbecillitas ventriculi partem aliquam accepti cibi corrumpentis. Multiplices sunt viæ, per quas natura potest exturbare superfluum, unica, per quam potest sarcire deperditum; utque cetera solent facilius dirui, quam refici, eandem difficultatem virium resectio patitur: quamquam Verna^(a) effusissimus in celebrationem phlebotomiæ asseveret, virium jacturam inde consecutam momentaneam esse, parum nihilque considerandam. Quæ sententia generatim accepta, neque in peculiare circumstantias contracta, tanto magis perniciofa est, quanto magis tutari venæ sectionem, ejusque celebratores videtur. Nullum est absurdum, ut Tullius animadvertit, quod ab aliquo Philosophorum dictum non sit; an idem vero de Medentibus affirmari possit, alii dijudicent. Nemo mihi sanguinis dotes ita extenuabit, ut concedam momento temporis fluere detrimentum illatum viribus ab ejus effusione, & sine consideratione prætereundum esse, nulla habita animadversione temperaturæ ægrotantis,

(a) *De Phlebot. par. 2. cap. 23.*

tis , & ipsius ægritudinis , sexus , ætatis , anni temporis , aliorumque accidentium . Annon sani homines , qui sese tempore verno , scalpello subjiciunt præservationis gratia , inde aliquando contrahunt virium infirmitatem , salutis- que turbationem plures menses permanentem ? Appello Lodovicum a Ripa celeberrimum Astronomiæ , & Meteororum Professore , qui sub fine Aprilis anni 1728 , post aliquot excreta sputa sanguinea , quorum tamen credebat caput dicendo percalefactum in causa fuisse , de salute sollicitus consilio Medici decreverat mense Maii , sanguinem præcautionis nomine ex brachio , deinde ex talo sibi educi . Dum hæc agitabat , mihi forte in via obvi- us factus , narrat deliberationem , hortationemque alterius Medici ad venæ brachii , talique vulnerationem . Dolui mecum ipse , amicum citra indigentiam bis esse passurum phlebotomum , & si videbatur propter ætatem florentem , temperaturam , firmumque corporis habitum sine notabili offensa perferre posse , hortatusque sum , ut saltem parceret brachio , solum talum permetteret fauciari ; cum a pluribus diebus jam nihil sanguinei in sputis appareret , nec ullam capitis noxam pateretur . Paruit , & postridie mane detractis plus minus sanguinis uncis octo , proximam noctem egit inquietam , & propemodum insomnem : consecuta est imminutio virium , & appetentiæ , tristitia , pallor , & attenuatio faciei , perinde ac si plures dies febricitasset , sensitque ex bonæ valetudinis statu , quo perfruebatur , recessum tantum , ut vix post plures menses in pristinum restitutus fuerit . Quod accidit juveni sanguineo , integraque valetudine prædito , annon accidere poterit febricitanti ? Quod uni , annon pluribus ? Viget robur optime valentis a sanguine , & spiritibus , iisdemque vires , quæ supersunt in febricitante contra morbum sustinentur :

quo fulcro debilitato in me certe non recipiam, nullius momenti, & fugacissimum detrimentum vires inde capturas duntaxat esse. Quis ignoret, quantum temporis requiratur, ut vires a forti febre attritæ recolligantur, & sanguis pristinum vigorem recuperet convenienti facta adjectione? Ipsa vero præsens febris permittet ne celem pro indigentia reparationem scalp pro roboris imminuti? Observavi equidem pluries, utque alii observarent auctor fui, febricitantes post extinctam febrem citius in pristinam conditionem vindicatos fuisse, parciores, quam largiorem effusionem sanguinis passos. Quid multa? Admonemur a natura, ex cujus anticipatione aspectu scaten- tis e vena sanguinis turbamur, illius jacturam levem, & contemnendam non esse, sed esse redimendæ vitæ pretium, non levibus causis impendendum. Porro in omnibus putridis, sola causa earum proxima spectata, nisi intersint certa inditia affluentia sanguineæ, si probabilis ratio sup- peditari queat pro utilitate phlebotomi, indubitatam ta- men non posse existimo; cum ea utilitas ab imperscruta- bili sanguinis statu, aliorumque accidentium concursu nocenter impediri queat. Hisce vero ignoratis nequit in totum caute, & secure decerni sanguinis detractio, mul- toque minus detractio iteratio frequens: cui permulti ita sunt addicti, ut etiam in statu febrium hirudines hæ- morrhoidibus appositas scalpello substituant, nil commo- ti a Prospero Martiano^(a) hunc usum acriter infectante. Enimvero, inquires, si quædam accidentia sunt, quæ præ- noscere nequimus, redditura inutilem noxiamque phleboto- miam, possunt etiam alia incurrere, quæ fructuosam effi- ciant. Quod effectum incertum habet, mutabilemque ex accidentium varietate, potest tam bene, quam male exire,

nec

(a) *In Com. Coac. Hippoc. sect. 2.*

nec plus habet momenti in alterutram partem. Cur igitur apparente verisimili argumento venæ tundendæ executionem relinquemus, metu obscuro damni, quod fortasse non eveniet? Rationem quæsitæ habes ex lege secure medendi, atque natura opinionis, quam sequeris, securitatem non pollicentis; & quod potius est, quia in majus discrimen conjicitur æger, si erratur executione, quam prætermissione, & gravioris errati periculum adeundum non est, nisi solidioris rationis patrocinio, sæpius inter medendum optato, quam impetrato. Nunc, si placet, Medice operose, qui in febribus putridis continuis, sive sint simpliciter putridæ, sive maligna qualitate infestæ, primum in tergo ferrum cruentas præmissis cucurbitulis, deinde venam brachii feris, postea tali, repetis ictum in manu, vel brachio, postremo saturas hirudines sanguine hæmorrhoidali; si placet, inquam, confer Te cum Medico, qui nec in omnibus putridis continuis venam pungit, nec toties renovat punctiōem, atque ex facili cognosces, uter providentius sese gerat cum ægroto; si animadvertas ex probatis, raro in febricitantibus offerri perspicuam rationem feriendæ venæ, plerumque tantum probabilem occurrere, eamque non magni ponderis, imo necessario conjunctam cum timore recessus a veritate parituri nocentioris lapsum. Et sane raro, si verum profiteris, effectum respondere vides, & cum levamen aliquod consequi vides ad pertusam venam, huic certo adjudicare identidem nequis, & inde tui operis commendationem capere. Sæpe etiam usuvenit, ut post sanguinem extractum febris mitescere videatur, brevi vires recolligat, fluxoque decremento quasi credulitati illudat. In ceteris rebus effectuum crebritatem naturali instructione attendimus ad eorum instrumenta adprobanda, & continuanda. In febribus ve-

ro undenam frequens phlebotomia, quod pretiosius est in ægroto, exhausti commendatur? quæ plurimum in irritum cedit, frustraturque liquidi vitalis expensam, perseverante febris ante suum naturalem terminum non intercepta. Scio responderi posse, vulneratam venam obstare, quo minus febris in deterius ruat, interea præparari opportunitatem aliorum remedium, & spatium naturæ concedi ad sese levandam. Hæc tamen facilius excogitasti, quam ut probare possis. Si enim reposuero, per eductum sanguinem ejus missionem turbari posse adjuturam separationem, expulsionemque extraneæ materiæ, minui vires adhibendas aliis remediis sustinendis, morbiq; vigori, unde, quæso, convinci potero? Unde Tibi præclara ratio in oppositum præsto erit, ut cum certo emolumento venam ferias? Non ideo velim opineris, me contendere in Medicina perspicuam tantum rationem, & demonstrationem amplectendam esse, rejiciendam probabilem, & opinionem. Nimium anguste agerem cum Medente, eumque cautiorem volens, otiosum sæpissime redderem, & majorem partem artis funditus convellerem conjecturis innixam. Unica est invidua ratio sanguinis hauriendi in febribus, vasorum plenitudo luculenter apparens; reliquæ sunt probabiles, non indubitatae, ex iis tamen aliquæ fortiores, aliquæ languidiores, aliquæ adiutæ favorabilibus accidentibus, puta, florente ætate, verna tempestate, amplis venis laborantis, idque genus aliis, aliquæ hoc concursu destituntur. Fas est igitur, non inficior, Rationali uti conjecturis, & probabilibus speculationibus ad reconditas indagandas morborum causas, & remedia quæcunque nanciscenda, contra quam Methodicis præfinitum erat, dummodo tamen, ut in aliis negotiis tractandis mos est, eligantur notæ graviores, illu-

illustrioresque, raro suppetentibus ita perspicuis futuri eventus, ut ad tutam omnino actionem Clinicus perducat. Ex artis nostræ conditione, atque humani ingenii infirmitate nequit ille suum pensum obire, quin sit expositus errori, & aliquando erret, fere solum certus pauciora peccandi, cum administrat pauciora. Nisi tamen adhibitæ diligentia, & rationis præsidio omnes errores vitari possunt, possunt certe graviores, aliorumque pariter frequentia. Itaque, dum inculco infrequenter cadere occasionem evidentem minuendi sanguinis, atque ea sola oblata tuto imminui, non id laboro, ut solam evidentiam Nostris ad agendum præfigam, conjecturam quamcumque removeam, operamque perturbem. Occurrit in dies observare, sæpius delinqui in curationibus nimia fiducia remedium, quam dubia fide, frequentia, quam raritate, celeritate agendi, quam cunctatione: atque expositis dubitandi momentis, exponendisque existimavi, me de ægrotantibus bene meritum, si nimia fiducia aliquid detraherem, frequentiam minuerem, celeritatem quadantenus retardarem. Ergo nil aliud contendo a Medico operoso, nisi ut advertat, sese in ancipiti versari, aleamque jacere, quoties in febribus absque apertis vestigiis repletorum vasorum, hæc incidit, & incisionis frequentiam temperet, ac pernitem deliberationem: quas hercle temperabit, si tantummodo operis ineundi firmioribus stet inditiis, paret Hippocrati commendanti circa ægrotantem œconomiam, & observet celebrem regulam prudentia, quantum permittitur, non esse obviam eundem fortuitis, creperisque eventibus. Delinqui quidem potest in prima sanguinis detractione, sed nocentius, si sæpius ea renovetur, pro qua renovanda multo gravior conjectura requiritur, raro tamen impetrabilis in putrida,
sola

sola febre considerata. Quid quod in decursu febris vires acciduntur, & ante venæ punctiōem iterandam judicandum est, an pares illi ferendæ futuræ sint? Quam operosum vero sit hoc iudicium, & proclive ad errorem, dolendum potius est, quam probandum. Quamquam autem extant plura exempla febrium putridarum acutarum, quæ curatæ vulgantur terque, quaterque, & pluries elicitō sanguine, mihi tamen argumento non sunt ad imitandum, scienti narrari fausta, & voto scribentis faventia, reticeri contraria, & infauista. Neque vero prosperi casus cum ignoratione causæ, unde prosperitatem sortiti fuerint, sufficiunt stabiliendo iudicio Rationalis, non sola experientia instar Empirici contenti, sed causæ scrutatoris. Febrem, in qua sanguis educitur, & alia usurpantur remedia, quis plane sibi persuadeat, sectura vasis esse subactam? si constat, vel ea prætermissa ab Erasistrateis medicis passim depelli, constat in pauperibus ob paupertatem tutis ab usu remediorum. Secto tamen vase, quam raro accidit, ut artis periti aperte cognoscant, inde, vel allatam esse salutem febricitanti, vel saltem præparatam! imo sæpe, si veritatem celare nolumus, dubitari potest, utrum vulneratio venæ, & præsertim repetita sanitatis reditum maturaverit, an retardaverit, & in dubium vocaverit. Multum habet illa fortuiti, incertique, & rarius expectatione facit ad febres sedandas; nihilo tamen secius consuetudine celebratur, credita salutaris, nisi noxam subito manifestam infligit. Quamquam autem ipse contendendo, tam frequentem usum phlebotomiæ in febribus, & sine earum delectu, periculosum esse; nullum tamen apud Hippocratem invenio solitarias febres, quantumvis fortes, pravasque curantem; quem scilicet in febricitantibus descriptis lib. primo, & tertio Epid. non apparet,

paret , venam resignasse , præter quam in Anaxione ; cui die octavo dolore lateris fomentis non sedato , sanguinem detraxit . Diligenter enarrat , quicquid singulis laborantibus toto ægrotationis curriculo accidit , aliaque curationis gratia peracta ; sed in solo Anaxione mentionem facit de sanguinis effusione . Quare , tametsi plures cum Galeno arbitrentur , Hippocratem in narrationibus tacuisse venæ punctiōnem , non omisisse in curationibus , quod eam generatim in aphorismis , & alibi adprobaverit , gravissimam tamen constat suspiciōnem , de illa siluisse , cetera , & quidem minoris ponderis referentem ; cum præsertim , uti advertit ^(a) Daniel Clercus , febres sine inflammatione vel acutas non recensuerit Hippocrates inter morbos scalpellum postulantes . Quin etiam eidem eruditissimo viro argumento sunt , ab Hippocrate non esse ictam venam in dictis ægrotantibus , tot evacuationes sponte , & salutariter factæ , quas pro certo credit minime futuras fuisse , si primis diebus , sicuti Galenus autumat , large sanguis eductus fuisset . Fortasse tamen propenderem in arbitrium Galeni , si in Anaxione , in quo Senex ait , se vulnerasse venam , non interfuisset peculiaris causa vulnerandæ , nempe dolor pleuriticus fomentis non mitigatus ; unde elucet ratio , cur in aliis non vulneraverit . Tantum vero abest Seni febrem fuisse indicem detractionis sanguineæ , ut obstaculum fuerit , quo minus ea uteretur , locuplete testimonio Martiani ^(b) id ostendente , ut etiam supra indicatum est , in expositione Coacorum prænotionum , inde sumto argumento reprehendendi audaciam Medicorum , febrem habentium pro præcipuo indicante hauriendi sanguinis , quæ Hippocrati Medicorum supremo summum prohibens fuit . Videtur igitur ,

F f f

Prof.

(a) *Lib. 3. cap. 19. de Hist. medi.* (b) *Lib. 3. pag. 411.*

Prospero Martiano tam fido & docto Hippocratis interprete ita sentiente, nullus remanere dubitandi locus, utrum venam aperuerit febricitantibus, quibus se aperuisse non memorat. Non ego tamen cum Martiano redarguo Medicos eam in febribus recludentes, perinde ac si relicto Coi placito apertionem vetante, semper perniciose, nunquam utiliter panderetur. Duo nobis splendidissima Medicinæ lumina largita est Antiquitas, Hippocratem, & Galenum, alterum scientiæ conditorem, alterum exemplum amplificatorem exornatoremque, alterum in foliariis febribus ferro parcentem, alterum utentem, sapientius tamen, quam ut plurimi in præsentia soleant. Quem mavis sequi? Summa est divini Senis auctoritas, magna Galeni, vel pluribus Novatoribus invitis; & si sobrie scalprium adhibebis, tua praxis non erit laude indigna, non vacua ratione, & patrocinio, licet Hippocratico careret. Utraque sententia generatim elata opinio est, & solum ex diversitate ægrotantium, & accidentium alterutra firmitatem majorem acquirere potest. Tironibus aperiam, quemadmodum me gesserim erga me, meosque. Bis passus sum febrem continuam stigmaticam, ut alii vocant, puncticularem, primam annum agens circiter trigessimum, deinde aliam quinquagesimum quintum, in mea methodo medendi descriptam, nec in utraque admisi sectionem venæ grandis, vel minorum sub cucurbitulis, nec ullum ex Nostri in consilium advocavi; cum mihi praxis Hippocratica hac in re instar omnium esset, non tamen ejus sola auctoritate ductus, sed etiam alia peculiari ratione accedente, videlicet inclinatione humorum ad alvum, excrementorumque redundantia, non sanguinis, qua præsentente non refugissem a scalpello. Ita mecum egi, nec aliter cum meo filio natu majore, annum vigesimum pri-

primum agente , temperamenti biliosi sanguineo affinis , gracilis corporis habitus , qui sub fine Aprilis an. 1733 incoepit affligi capitis dolore , non tamen impediēte , quo minus solita munia obiret . Ideo pulsum non exploravi , sed arbitratus causam doloris esse ventriculum cruditate biliosa impeditum , porrexi bolum ex electuarii lenitivi drachmis sex . Dejecit ita copiose , & supra vires pharmaci , ut in suspicionem venerim , febrem adesse , nec omnino mala qualitate carentem : & inde excitatus ad explorandum pulsum , quod suspicatus eram , comperi , jussique decumbere . Postridie quater excrevit biliosa liquida , perseverante tamen dolore capitis , & febre invalescente . Tribus consecutis diebus totidem habuit similes dejectiones cum aliquanto decremento capitis doloris , non tamen febris . Hæc in adolescente continua , acuta cum capitis dolore , pulsu duro , & oppido frequenti videbatur phlebotomum clamare , uti mos est regionis ; cum præsertim antea valida corporis exercitatione , & ambulatione ad Solem incaluisse . Mihi tamen , præter Hippocratis mentem , egestionēs biliosæ , liquidæque argumento fuerunt ad resistendum consuetudini , venæque incisionem omittendam , contento propinatione nitri defæcati , aliorumque refrigerantium . Die quarto decubitus incoepit pati vigilias , turbataque somnia , si brevis somnus obreperet , imo die sexto etiam interdium aliquidpiam absurdi loqui , ex raris tamen intervallis . Hoc ipso die emicuerunt puncta rubra in tergo , & pectore raritate , & distinctione æqualiter , atque colore non ominosa . Cum autem die septimo doleret , pondus stragulorum esse sibi impedimento , quo minus libere per lectum devolveretur , detractum est quod oneri erat , obstabatque commodæ volutationi , mihi nullum timorem incutiente , quo minus id

permitterem, eruptione macularum: quæ post duos dies a pondere operimentorum detracta penitus evanuerunt, nullo tamen novo molesto symptomate oborto, nec ad-
auctis prægressis. Quinimo congruenter ad Sydenhami animadversionem in schedula monitoria de novo febris ingressu, peticulas sæpius efflarefcere ab intempestivo cardiacorum usu, & regimine paulo calidiore, suspicatus sum in juvene calidi temperamenti veris tempore acute febricitante idem contigisse a calore stragulorum. Quare juxta superius stabilita in Regimine magnorum auxiliorum nihil egi ad instigandam rubram eruptionem inchoatam ad cutem, nec ad revocandam, quæ videbatur suppressa. Revera die nono remissa aliquantum febris est, frequentia pulsus, & durities, multoque magis die decimo tertio, præsagium integræ futuræ salutis consecutæ die decimo septimo. Natura in hac febre duas vacuationes molita est, primis sex diebus per alvum, deinde tribus noctibus per sudorem. Ipse vero universam curationem absolvi electuario lenitivo ante exploratum pulsum, ut dixi, præstito; deinceps in decursu morbi, ventre restricto, semel uncia dimidia cassiæ cum pulpa thamarindorum; refrigerandi causa, nitro defœcato, & decoctione folior. acetosæ, cichorii, & borraginis; occurrendi vigiliis, uno grano laudani nepentes semel tantum exhibito, & tribus vicibus modico confectionis hyacintinæ, cum mihi vires id exigere viderentur. Neque sane in curationibus aliorum extra domum meam obeundis, oblato simili morbi genere, & accidentium comitatu, operosior essem; si, vel per domesticos, vel alios medicos in consultationem accersitos, vel consuetudinem dominam multitudinis jure meo agere liceret: sed difficillimum esse non inficior, hisce omnibus obsistere, & aliquando etiam in-

vitos,

bitos, averfosque a fucis trahi in obsequium, impellique ad imperanda, vel permittenda, quæ vel superflua, aut dubia judicantur. Semper tamen, testor Deum, in gravi controversia sententiam meam patefeci, & patefactam defendi, quantum permisit cognitio judicaturi conventus, incertique morborum eventus, expositi variis vulgi interpretationibus fœventibus artis imperitiam. Ob hæc neque multiloquio, neque assentatione, neque dejecta observantia, neque amicorum ope, alia nec arte multorum gratiam aucupatus sum, qui operam meam postularent. Malui paucis ægrotis prodesse, quam multos visitare, morum honestati, animique tranquillitati vacare, quam lucro.

C A P U T V.

*Expenduntur argumenta venæ secandæ in febris
proposita ab Joanne Freind tanquam
evidentia.*

QUamquam Hippocrates, uti nuper adnotatum est, in ægrotis relatis lib. 1 & 3, qui soli genuini auctoris creduntur, nullam mentionem fecit de celebrata sanguinis missione, & inter doctos auctores controversum est, utrum operis mentionem prætermiserit, an opus, tamen eruditissimus Joannes Freind^(a) tanquam invicta ratione probasset ab Sene fusum esse sanguinem, ex ejusdem narrationibus quatuor colligit conjunctiones signorum: quibus apparentibus in simili morbi genere confidit, possideri evidens, & invincibile argumentum proptinus venæ aperiendæ, dummodo vires permittant. *Quatuor,*

(a) Cam. 2. Hip. de Feb.

tuor, inquit, ægrotos sponte facta sanguinis eruptione sanari scribit Hippocrates: quorum quidem historia ita ab eo contextæ sunt, ut si quando inciderit simile morbi genus, clarissima inde luce patefiant sanguinis mittendi indicia. In prima quippe signata sunt hæc: Febris vehementis, lumborum gravitas, & dolor, delirium. In secunda: Febris ardens, inquietudo, rubor, surditas, vigiliæ, delirium. In tertia: Febris, inquietudo, vigiliæ, convulsiones, dolor, coma, delirium. In quarta: Febris ardens acuta, vigiliæ, capitis gravitas, dolor, faciei rubor, delirium. Antequam instituo examen de signatis inditiorum conjunctionibus, moneo, me non esse expensurum, utrum illis exhibitis sit, nec ne tundenda vena, sed duntaxat, an ex illis eluceat evidens tundendæ ratio, omnemque tollens dubitationem de opportunitate remedii, & securitate medicationis, uti opinatur Freind. Miror autem Hippocratem ita contexuisse eas historias, ut præferrent evidentes notas educendi sanguinis ab aliis discendas, ipsum autem de educto nullum verbum fecisse, cetera minoris ponderis indicasse, quod erat majoris, suppressisse. Mehercle mihi viderer Hippocratis diligentiae, & prudentiæ esse aperte injuriosus, si sentirem in omnibus febricitantibus narratis venam esse dissectam, qui video in nullo esse memoratam. Nihil igitur certi habet Freind ex praxi Hippocratica, uti describitur; quo comprobet, tradita copulata symptomata nitidissima luce fulgere, demonstrante apertissimas occasiones elicendi sanguinis. Nisi porro Senis praxis incruenta favet Freind, producat ex illis narrationibus rationem ostendentem in illo complexu signorum manifestam opportunitatem venæ apertionis. An illam inde trahet, quod singuli febrientes, ex quibus ea signa collegit, morbo redempti spontaneam sanguinis excretionem habuerunt, arf-

arsque debet imitari naturam? Expendamus historias.

Metoni, uti ordiar a prima, die quarto bis ex dextra nare paulatim sanguis effluxit, sed proxima nox laboriosa fuit; quinto ex nare sinistra liberaliter effluxit sincerus sanguis; subditque Hippocrates, sudore oborto judicatum esse. Quid, rogo, ex Metone suppetit arti ad imitandum? Quinto die, idest in vigore morbi sanguis e sinistra nare copiosus scatuit, quo exemplo si quis velit in similis febris vigore sanguinem emittere, perspicue contradicet Hippocrati, eo tempore quietem præcipienti, & negotium naturæ credi tunc fortius cum morbo pugnanti, conantique victoriam. Neque hercle id animo agitasse judicem Freind proponentem Metonis historiam tanquam complectentem lucidissima signa adhibendi scalpri. Ceterum neque ex copioso sanguinis fluxu die quinto facto potest elici solida probatio, in principio similis morbi vas resignandum esse, similiter ac si idem sperare liceret ex spontanea sanguinis excretionem, si salutaris fuisset, atque ferro extorta; & quasi quædam imitatio, vel admonitio naturæ foret, quia ipsa quinto die fudit sanguinem e naribus, oportere in principio morbi ex brachio fundere. Nihil verius prædicatur in Medicina, quam ingrediendum esse naturæ vestigiis, eamque imitandam. Quam tamen difficilis est imitatio? Ignoramus opportunitates, quas natura absque doctrina intelligit, arripitque citra periculum erroris: caremus instrumentis, quibus utitur ad agendum, ciendosque salubres motus: itaque inanibus occasionibus agendi, quas captamus, cum naturæ imitationem prætendimus, sæpe diversa, & aliena molimur, ignari legitimæ tempestivitatis, defectique idoneis instrumentis actionum. Hinc petenda est causa, cur ab eadem quantitate humoris excreti, siue fuerit sanguis

guis ipse, siue humor alius, soleant vires magis labi, si excretio fiat artis impulsu, quam naturæ. Porro in Metone febris extinctio consecuta est ad sudoris eruptionem, non solius sanguinis; meritoque postremæ evacuationi primæ partes restitutæ salutis adjudicantur. Erant præterea in Metone febris vehemens, dolor, gravitasque lumborum, & delirium: e quibus pro certo credit Freind suffici clarissimam rationem phlebotomiæ usurpandæ, licet nulla spontanea sanguinis ejectio contigisset. Mihi tamen tam perspicua indicatio hauriendi sanguinis ex illis affectibus non offertur; idque ostensurus prius animadverto, Metonem delirasse solum post judicationem, febrisque cessationem, Cum delirio compescendo non adhibuisse scalprum, sed balneum capiti ad vias sanguini laxandas; id quod se impetrasse scribit. Viderat Hippocrates die quinto e sinistra nare sanguinem largiter erupisse; neque tamen inde persuasus est de sectione venæ, neque ad istam prægresso effluvio se invitari a natura credidit, contra quam plures de Nostreis sapientiores, si Diis placet, Hippocrate, in præsens sentirent, plus nimio proplices ad sanguinis detractiones. Ergo Meto tantummodo soluta febre deliravit, quod propterea delirium conjungendum non erat a Freind cum febre, & aliis symptomatis, quæ tempore febris acciderunt, tanquam signum cum ceteris evidenter petens apertionem venæ, si velit stare narratis ab Hippocrate. Die tertio in Metone oborta est gravitas capitis, quam tamen Freind non reposuit inter dicta signa. Cur igitur reposuit delirium post febrem excitatum, atque ex sententia Vallesii melancholicum, propter quod Hippocrates venam non pupugit? Quod vero attinet ad febrem vehementem, gravitatem, & lumborum dolorem, ut ut possent ista hortari ad venam vulne-

ran-

randam probabili ratione, manifesta sane non possunt, secus quam sentit auctor. Nullum enim indicium vim habet evidentem ad phlebotomiam designandam in febre, nisi quod præclare ostendit plenitudinem vasorum, tamen ex illis tribus non ostensam. Non ab febris vehementia, quæ ex sententia Hippocratis indicat magnam separationem humorum, efferatamque bilem, non copiam sanguinis, abs qua proxime non producitur; atque indicatæ causæ certum est recta non adversari venæ sectionem, nec alteri, nisi adjungitur copia vasis incommoda, uti supra probatum fuit. Adde vehementi feбри gravitatem, doloremque lumborum. An iccirco hic comitatus prælucidam occasionem venæ feriendæ interesse demonstrat? Demonstraret sane, nisi ea symptomata a variis causis incuti possent absque vera redundantia sanguinis; sed certe possunt, videlicet a sanguinis fervore in vena cava lumbis adjacente contenti, & a forti febre rarefacti, aut copia excrementorum in intestinis: quam in Metone fuisse conjectare licet ex alvo postridie large soluta, post aquam uberius haustam, aut naturali impulsu, aut Medici suasionem. Harum vero causarum altera rationem demonstrativam pro phlebotomia non exhibet, altera nullam, imo potius contrariam. Age sis, si placet, adjuuge feбри, lumborum gravitati, & dolori delirium, quod ex historia liquet solum post judicationem evenisse. An hocce una cum aliis luculenter ostendet certam indigentiam sanguineæ detractionis? Excepta Phrenitide, me latet, quomodo delirium ex doctrina Hippocratis possit onerare pondus rationis pro venæ punctura, docentis^(a), ita illud provocari: Cum igitur bilis commota ad venas, & sanguinem ingressa fuerit, sanguinem ex consueta compage, & motione dimovet,

G g g

& se-

(a) Lib. 1. de Mor.

& serosum facit, & calefacit. Calefactus autem etiam reliquum corpus, totum percalefacit, & desipit homo, & non sibi constat præ febris copia, ad serositatem transmutatione, & motione non solita contingente. Si annuis Hippocrati ita sentienti de delirii productione, hujus curationem instituas oportet evacuatione bilis illapsæ in sanguinem, non sanguinis, quæ non sedat commotionem, sed auget, ejusque compagem laxat, non confirmat. Et sane Hippocrates Anaxioni febricitanti, cui die sexto supervenit deliratio, venam non aperuit, & solum aperuit die octavo propter febris incrementum, laterisque dolorem a fomentis non mitigatum. Quinimo Montanus refutans Galenum asserit, ab Hippocrate die sexto sanguinem elicatum non fuisse, quod eodem die superadditum sit delirium cum aliis sævis symptomatis. Tantum abest, a delirio augeri robur indicantis fauciandæ venæ.

Singillatim alias tres copulationes inditiorum a Freind adnotatas ex Hippocratis historiis examine non persequar; quæ præter jam discussas notas nil aliud continent præseferens momentum aliquod ad deposcendam venæ incisionem, quam faciei ruborem, capitisque gravitatem, quæ propterea duo sola considerabo. Per sanitatem facies, quæ rubere non solet, si rubet ex febre cum gravitate capitis, ex Priscorum placitis præbet argumentum non contemnendum tundendæ venæ revulsionis gratia, non tamen omnino tutum, & ab omni dubitatione assertum. Ut enim ea symptomata, sicuti rebantur Antiqui ante inventum sanguinis circuitum, produci possunt ab collectione sanguinis intra vasa capitis, exigente revulsionis, & derivationis nomine scalpellum; ita possunt aliunde cieri absque assumpta collectione, sed tantummodo a fervore sanguinis, vi materiæ biliosæ attenuati, diffusique, & com-

comprimendis adjacentes partes . Cui causæ auferendæ bilis evacuatio, vel correctio opportunior est sanguinis effusione, apta pro certis circumstantiis, uti supra animadvertum est, ad augendam biliosam partem sanguinis . Vidi non semel capitis notabilem gravitatem in febre continua biliosa cum rubore faciei, non sanguinea e naribus excretionem, sed ex alvo copiosa, biliosaque magna ex parte sublatam; indicavitque levamen causam symptomatis . Porro admissio sanguinis circumductu adeo ab Recentioribus celebrato, cessat occasio revulsionis, & derivationis stagnantis, cumulatque sanguinis in vasis capitis, impediens stagnationem perpetuo impulsu motus circularis universam animalis œconomiam moderantis, & sustinentis .

Postremo de animadversionibus Freind illud mihi excutiendum remanet, utrum quatuor febricitantium, e quibus inditia, ut putat, clarissima phlebotomiæ adhibendæ depromit, quasi febris per spontaneam sanguinis eruptionem soluta fuerit, huic potissimum excretioni febris solutio debeatur, an alteri, dubitationem hac de re Hippocratis narratione conflante . Febricitantes, de quibus Freind narrat, sunt, Meto, Virgo Abderæ decumbens ad viam sacram, Mulier in Thalo austerâ, Virgo Larissæ . Quinto die ait Cous Metoni, de quo supra dictum est, sanguinem ex sinistra nare abunde defluxisse, & postea sudore oborto judicatum esse . Virgo, quæ Abderæ decumbebat ad viam sacram, copiosum habuit ex naribus sanguinis effluxum die decimo septimo, post quem surditas non nihil imminuta est, sed proximis diebus cibi fastidium, & surditas aderant, præterea delirium . Vigesimo paucus sanguis e naribus emanavit, & sudoribus inquit Senex, febre liberatam fuisse . Vigesimo quarto febris reversa est, & vige-

simo septimo copiosis sudoribus extincta. Mulieri in Thaso austeræ & asperæ ita sanatio contigit. Die tertio noctu sudor calidus ex universo corpore largiter effusus est, & cum febre cuncta molesta symptomata deliverunt. Subjungit autem Senex in fine historiæ, sub judicationem muliebria copiosa profluxisse. Postremo Virgini Larissæ acuta, & ardente febre vexatæ sexto die e naribus multus abunde sanguis effluxit, atque ubi inhorruisset, sudore copioso calido per totum corpus diffluente, ut refert, ex febre immunis judicatione liberata est. Ergo ita loquitur Hippocrates, ut febricitantium descriptiones consideranti multo proclivius sit, expulsionem morbi sudoris, quam sanguinis effluvio tribuere, in Virgine vero decumbente ad viam sacram necessarium. Die decimo septimo ei abunde sanguis e naribus fluxit. Quod, precor, inde levamen reportatum est? Parum imminuta fuit surditas, sed proximis diebus surditati accesserunt cibi fastidium, & delirium. Quoties autem sudavit, febris desiit, scilicet vigesimo, & vigesimo septimo, & hoc die, quo narrat Hippocrates sudores uberes fuisse, non reditura desiit; quæ rediverat post vigesimum, forsitan ob sudorem impari indigentia, nil memorante auctore de abundantia sudoris hoc die extrusi, quam expressit referens vigesimi septimi sudorem. Quocirca, si sponte, & prolixè sanguis effusus absque sudore nil profuit, profuit cum sudore, quare Freind inde stabilivit judicium de sanguine eliciendo, quasi crisis acta per eum foret? Quare ex aliis tribus ægrotis sanguineum, & spontaneum effluxum passis, & suæ sententiæ a Freind destinatis? Ecce quemadmodum scribit Hippocrates: *Quinto die Metoni ex nare sinistra liberaliter sanguis sincerus effluxit, sudore oborto judicatus est Mulieri in Thaso austeræ, & asperæ, eadem nocte, hoc est diei*

diei tertii, sudor copiosus, calidus toto corpore dimanavit, a febre immunis fuit. Postea in fine narrationis hæc habet: Sub iudicium autem muliebria copiosa profluxerunt. Virgini Larissæ sexto die ex naribus sanguis abunde multus effluxit, atque ubi inhorruisset, sudore copioso calido per totum corpus disfluente ex febre immunis iudicatione liberata est. Igitur Hippocrates loquitur de sanguineo effluvio in hisce ægrotis facto tanquam de conjuncto cum iudicatione, vel ei propinquo, non tanquam de vacuatione iudicatoria, cujus nomine intelligitur a Medicis expulsio morbidæ causæ a natura victrice peractæ, quam Senis sermo refert proxime ad sudorem. Hisce animadversis, constituo spontaneam sanguinis eruptionem non fuisse principale molimentum naturæ nitentis ad ejectionem fomitis febrilis, sed potius effectum intimæ commotionis sanguinis, stimuli que provocantis, aut mox provocaturi sudorem. Ut calidus sudor ex universo corpore liberaliter efferatur, totum corpus æstuarè oportet, æstuque facile accidere potest, ut tenuati ferventisque sanguinis portio sibi aditum per aliquam partem muniat, ad id tamen concurrente peculiari sanguinis qualitate, & quantitate, atque ad certa loca propensione: quæ quoniam non in omnibus conveniunt, non omnes, quibus febres sudore finiuntur, sanguinis effusionem patiuntur. Mihi ita opinanti argumento est perseverantia febris a sanguine delapso, nisi consecutus sit sudor, isque prolixus; itemque consideratio de febricitantibus ab Hippocrate lib. 1, & 3 relatis, quorum multis accidit iudicatio per sudorem absque sanguinis excretionem, nulli sine sudore, cui copiosus sanguis emanaverit. Enim vero Joannes Freind^(a), ut animum intenderat ad colligendas notas evidentes educendi sanguinis arbitrat^{ur},

(a) Comment. 3. de sud.

tur, in quatuor illis febricitantibus febrem magis esse finitam sanguinis profluvio, quam sudoris; subditque ad suæ sententiæ fulcimentum, Hippocratem perpetuo proponere sudorem ut presagii inditium, non ut instrumentum curandi. Quomodocunque tamen Senex consideraverit sudorem, de quo non est, quare disputem, quid frequenti experientia notius, quam a natura victricæ materiam febrilem attenuatam in sudorem amandari? Paucis quidem in febribus proponit Hippocrates pro remedio sudorem, & solum in illis, uti notat Daniel Clericus^(a), quæ neque a bile, neque a pituita generantur; de quo forsan mirarer, nisi omnium remediorum in febribus parcissimus fuisset, fere sola diæta contentus. In sudore tamen sæpe salutariter, uti naturam pugnantem in morbos acutos, expresse docet inquiens^(b), sudores optimos esse in omnibus acutis, qui in diebus judicatoriis fiunt, & febrem perfecte summovent. Est etiam celeberrima sententia Hippocratis^(c), vel alterius gravissimi Medici, nisi liber ille detur Hippocrati, reliquas evacuationes singularibus tantum morbis convenire, solum sudorem omnibus, aut omnium solutionem æqualiter esse: quem tamen puto venæ repetitis sectionibus inhiberi, sanguinis vigorem enervantibus debitum vertendæ materiæ febrili in sudorem, extrudendæque.

(a) *Hist. Medic. Part. 1. Cap. 20.*

(b) *Lib. 1. Prænot.*

(c) *De Rat. vic. Acut. Lib. 4.*

CAPUT VI.

Expenditur frequentia venæ sectionis in inflammationibus internis.

LUculentius in inflammationibus interiorum partium peti phlebotomiam, quam in solitariis febribus, de quibus hætenus egi, apud eos manifestum est, extraque controversiam positum, qui cum Chrysippo Cnedio, hujusque fautoribus sententiæ de tundenda vena bellum universim non indixerunt. Utrum autem liberalis creberque usus ducendi sanguinis in eis affectibus, qualis apud multos Recentiores invaluit, sit omni dubitatione, & erroris periculo liber, plenusque fiducia, excutere instituo. Cum inflammationum materia sit sanguis, aut extra sua conceptacula pulsus, occupansque solidi intercapedines, aut vasa extendens in varices, sicut multis placet, si adest sanguinea copia incipientibus inflammationibus, certo certius est scalpello protinus detrahendam esse, quæ pariter extra morbos suspicione non caret. Non sola tamen redundantia habenda præ oculis est, sed motus morbidus sanguinis; quem & copia urgere potest, non tamen sola excitare. Alia insunt sanguini incitamenta; quibus extemplo amotis, si præsto forent instrumenta subito amoventia, vitiosus motus, atque inflammationis incrementum cohiberentur. At paupertas medicinæ tam opportunis carens instrumentis necessum est, ut confugiat ad venæ incisionem oppositam motui præter naturam inchoato, atque revellendo, derivandoque paupertati quadantenus succursuram. Itaque admissa cum Priscis revulsione, & derivatione per venæ punctiorem obtinendis, triplici utilitate commendatur

datur ista in phlegmonis , detractioe redundantiae , si adest , impeditioe fluentis sanguinis extra suas vias , ejusque , qui fluxit , derivatione , quæ tollit copiam partis affectæ , & adjacentium . At quandiu permanet occasio revellendi , derivandique ? Qua claritate signorum proditur ? Ut autem lucidior , utiliorque hæc tractatio evadat , quæ communia sunt omnium phlegmonarum , considerabo in Pleuritide usque adeo frequenti , & perniciofa , ut a Verna nuncupetur acutorum morborum princeps ; quamque multi curare solent pluries infixo scalpello ; imo vidi non semel Patavii septies infixum esse , non tamen morte redemptum laborantem . Ergo oborta Pleuritide cum redundantia sanguinis universali subito auferenda est , vel totam semel quantitatem adimendo permittentibus viribus , vel ex intervallis iterando venæ apertionem , quod tutius est , dummodo inter initia iteretur . Nulla vero præfente universali sanguinis copia , illius præcipuum commodum expectandum est ab revulsione , & derivatione , opportuno tempore peractis . Docent Inventores revulsio- nis per Phlebotomiam tempus revellendi esse principium universale inflammationis , quod latitudinem habet , variasque partes ; quarum ultimam Horatius Augenius inde designat , quod tota materia in locum affectum confluerit , & in hac ipsa parte principii dijudicat cessare indicationem revellendi . Hæc tamen latitudo principii universalis in plures partes divisa , quam mente non difficulter concipimus , manifesta signa non habet , claramque distinctionem , ut inde doceamur de opportunitate moliendæ revulsio- nis , vel prætermittendæ . Quandoquidem Pleuritides , ut insistam proposito , aliæ sunt tardioris cursus , aliæ velocioris , in aliis citius , in aliis tardius accurrit humor ad locum affectionis , desinitque accurrere : Pleu-
ritidis

ritidis exquisitæ constitutio , uti statuit Vallesius^(a) est quatuordecim dierum : sæpe tamen ejusdem auctoris , & experientiæ documento eadem affectio intra septem dies suum curriculum absolvit . Benignæ spatium novem & undecim dierum Hippocrates designat^(b) : *Bilioſæ ſimul , & ſanguineæ Pleuritides plerumque nona , & undecima die judicantur , & maxime ſanantur* . Extant etiam narrationes ; ſed pau- cæ de Pleuritide extenſa ultra vigefimum diem , imo etiam ultra trigefimum , uti contigit Anaxioni ; quocirca , cum pro varia conſtitutione Pleuritidis variet etiam tempus ac- curſus humoris ad partem affectam , redditur incerta prin- cipii ſecundum omnes ſui partes cognitio , & ſimul tem- peſtivitatis revulſionis , nullis objectis perſpicuis inditiis ex varia ætate morbi , vel ex alio fonte . Vallesius^(c) in hiſto- ria Anaxionis quatuor tempora Pleuritidis circumſcribit , ſingulorum adjectis veſtigiis . *Eſt , inquit , Pleuritidis prin- cipium cum neque multa , neque concocta excreantur ; ſtatus , & declinatio cum multa , & concocta ; incrementum cum aut multa , non cocta , aut pauca , & cocta* . Quæ ſane inditia negligenda non ſunt , ſed conveniunt ſoli humidæ Pleu- ritidi bonum exitum habituræ , non conveniunt ſiccæ me- moratæ ab Hippocrate^(d) , non conveniunt lethali frequen- ter incurrenti , in qua non peragitur concoctio ſputami- num , opus naturæ ſibi conſulentis . Magna inſuper va- rietas ſputorum in diverſis pleuriticis eſt , conſiderata ab Hippocrate^(e) , & inde duntaxat denuntiante morbi condi- tionem , vel ſalutem pollicentem , vel minitantem exi- tium . Nimium igitur conſideret ſputis , ſive iſtorum co- lorem ſpectaret , ſive materiæ modum , ſive quantitatem , qui crederet , ſe ſe ex illis certo agniturum diverſa tempora

H h h

Pleu-

(a) Sect. 5. Apho. 8. (b) In Coac. Præn. (c) Lib. 3. Epid. ſect. 3.

(d) Lib. 1. de Morb. (e) In Progn.

Pleuritidis , præsertim principii extensionem , & incrementi : affirmatque Galenus , non posse haberi exquisitam principii notitiam , antequam incipiat incrementum , neque incrementi ante adventum status . Sin autem tota extensio principii non subicit certam sui cognitionem ante incrementum , incertum pariter est tempus iterandæ revulsionis per phlebotomiam ; eademque ambiguitate , & difficultate involvitur occasio derivationis , quæ documento Horatii Augenii^(a) solummodo in ultima parte principii universalis , aut in aliis parum inde distantibus incidit , antequam materia incipit suppurare , vel tenaciter loco affecto inhæret . Hac porro vel suppurare incipiente , vel constanter loco affecto inhærente , incrementum , vel statum adesse judicat Augenius , & utrumque tempus inopportunum derivationi , quippe invalidæ ad dimovendam , alioque deducendam materiam infixam , coactamque . Utrum ita metienda sint tempora inflammationum non est , quare disputem . Illud enim ex omnium sententia pro certo tenetur , veram revulsionem soli labenti humori deberi , derivationem humori , qui partem affectam vel obsidet , vel proxime obsessurus est , dummodo neuter e vasis exiverit , & concreverit inhabilis ad refluendum . Quis autem sibi plane persuadeat , se post certum tempus genitæ inflammationis exploratum habere posse , adhuc labi humorem in partem afflictam , vel lapsum ita coactum nondum esse , ut queat cum firma spe instaurare venæ incisionem , vel revulsionis , vel derivationis nomine , vel utriusque ? Existimo non posse fieri , quin venæ frequens profector in Pleuritide revellendi , derivandique causa extra opportunitatem phlebotomum adhibeat , ægrotumque lædat , vel saltem solida suæ actionis ratione careat , nisi igno-

(a) *De Sang. mis. cap. 6.*

ignoto favore noceret. Dempta in hoc morbo sanguinis ubertate, si adest, transactoque tempore revulsionis, & derivationis, & humore in parte affecta, vel densato, vel suppurante, scissuræ venæ fidendum non est, sed naturæ robori, quæ, vel densatum humorem dissolveret, vel genitum pus nisi per asperam arteriam excernere poterit, poterit alias vias sibi adornare, atque observatum est aliquando per alvum, aliquando per vesicam adornasse. Mira est hercle naturæ vis ad superandas vias inaccessas, atque impenetrabiles, uti nobis videntur, si vera sunt quæ narrantur. Prægnantem, referente Helmontio^(a), libido invasit edendi conchyliis nigra, & aliquot præcipitanter edit, ut etiam testas crudas bis terve concisas devoraret. Postea infra horam foetum peperit sanum, & adultum cum semimanfis testis, vulneratumque in abdomine; atque nihil obstitit naturæ, quo minus celeriter truderet semimanfas testas in uterum contra insuperabilem nostro captui viarum difficultatem. Multo autem proclivius est naturæ parare puri Pleuritidis vias ad alvum, & vesicam; & ipse vidi, nisi hallucinatus sum, paratas in robusto adolescente ad alvum. Neque vero reprobo venæ sectionis iterationem in morbi decursu, si nova concitetur fluxio, concitatæque gravis eluceat conjectura. Id unum inculco, etiam in hoc morbi genere dubias nimis esse notas, quibus plures utuntur ad renovandam sanguinis expensam, & me malle delinquere semel tantum, vel bis pertuso vase, quam toties ex more multorum, nisi sanguinis ingens redundantia interesset plures iterationes punctationis suadens. Quo tempore maxime suppurat materia, ut adnotavit Hippocrates, febres, & dolores augentur; quibus, si adduceri, ut sanguinem elicias, non nisi per-

H h h 2

nicio-

(a) De inject. mater.

niciose id facies, & attenuabis exiguam spem salutis pro-
pemodum in solis viribus naturæ superstitem. Plures ta-
men inde, ut sæpius adverti, ad id adducuntur, præter-
missaque consideratione Hippocratis de causâ febris au-
ctæ, dolorisque, habent pro argumento renovandæ incisio-
nis, quod ei opponitur. Ac sane Antiqui, quantum ad
sanguinis emissionem, methodo longe diversa in curatio-
ne Pleuritidis procedunt, qui duobus, vel tribus primis
diebus venam feriunt, neque in reliquo morbi curriculo
amplius mentionem faciunt de repetendo vulnere, aut
de superventu novæ fluxionis repetitionem exigente, qui
frequens est in ore Recentiorum pro repetitione, nulla tem-
porum universalium considerata diversitate. Sic Aretæus
in Pleuritide metuens acervatam, & semel factam edu-
ctionem, primo die ad justam sanguinis quantita-
tem hauriendam bis venam vulnerat, spatio aliquo in-
terjecto, quo æger recreetur, neque satis recreato, differt
vulnerationem in diem tertium, nec ultra vulnerat.
Non aliter se gerit Aetius^(a) in curatione ejusdem affectio-
nis, qui primo die bis modicum sanguinis aufert, si viri-
bus fudit; sin aliter, die sequente repetit ablationem, de
qua amplius non loquitur. Quod si Hippocrates Anaxio-
ni octavo die scalprum admovit, in causâ fuit cruditas
morbi tanta, ut Vallesius arbitretur, primam partem prin-
cipii in eum diem incidisse. Nunc videamus, quemad-
modum Prisci reliquum curationis absolverint. Avicen-
nas^(b) post phlebotomiam, nisi sedentur accidentia, vetat
eam renovari, ne congeletur materia, collectionem habi-
tura. Aetius post diem septimum, & remedia lateri do-
lenti admota, persistente eodem modo dolore, affigit ei-
dem cucurbitulam, cutemque scarificat cum certa spe ma-
nife-

(a) *Serm. 8. cap. 60.* (b) *Lib. 3. cap. 1. de cura. Pleur.*

nifestissimæ utilitatis ; idemque remedium eodem tempore Aretæus usurpat : quos auctores Vallesius , Riverius , aliique aliquando imitati sunt .

Sydenhamus clari nominis neotericus præstituens curationem Pleuritidis , totus est in sanguine effundendo , neglecta consideratione temporum universalium inflammationis , quæ dux erat Antiquis ad eam ægrotationem curandam , sic opportunitatem revulsione , & derivationis venantibus . Opinatus oriri Pleuritidem ex propria sanguinis inflammatione , atque a natura materiam peccantem in pleuram contrudente , pene universam medelam collocat in repetita venæ apertione , ejus orificium , ut ait , substituens in locum tracheæ , per quam communiter creditur morbi fomes amandari . Ergo Sydenhamus unice phlebotomo confusus , primis quatuor diebus continuis quater sanguinem ducit , si perseverent sævire symptomata , & vires constare : quibus dejectis nihilominus iterat detractionem uno tamen , vel altero die interjecto ; testaturque se raro observasse confirmatam pleuritidem in adultis minore sumptu , quam quadraginta circiter unciarum sanguinis sanatam fuisse , & nondum sibi innotuisse minimum damni abs tam largo sanguinis dispendio importatum , fretusque sua sententia , & observatione pollicetur hac ratione facilem brevemque expugnationem morbi plurimum lethalis . Et sane jure Sydenhamus ostentat , hanc viam medendi pleuritidi facilem esse ; quæ videlicet detrahit sollicitudinem de explorandis inditiis diversorum temporum ad nanciscendam opportunitatem phlebotomiæ , in qua Majores maximam hujus morbi curandi partem posuerunt . Veruntamen quanto facilius est hæc medela Sydenhami , expeditiorque a laboriosa attentione , tanto magis artificio caret . In ægroto , qui nequit perferre quatuor venæ

sectio-

sectiones quatuor diebus continuis factas, unum, vel alterum diem interponit, qua mora usuveniet, ut alia incisio fiat quinto, alia sexto, aut posterioribus diebus, ideoque præter artem, & præsertim si materia inflammationis suppuret. Non diffiteor plures pleuritides non mutari in apostema, sed indubitatum est, plures etiam mutari, & omnes, ut observat Galenus^(a), quæ magnæ sunt. Materia vero proxime parata ad subeundam puris conditionem, & subire incipiente, stagnat, affigiturque parti inflammatae. Si venam hoc tempore perfores, quid efficies? Quid commodi afferes? Nisi omnino impedies, saltem retardabis maturationem coactæ materiæ, non hanc attenuabis, non dissolves, ut, vel possit extussiri, vel in venas remeare, partemque apostemate inchoato liberare; præterea faciles grave periculum, ne vires renovata sanguinis detractio magis accisæ, valeant sufficere spatio requisito ad confectionem expulsionemque puris, vel alterius materiæ. Ob hæc Majores, diligentes exploratores diversorum temporum inflammationis, præsentientes fieri suppurationem, imponebant loco affecto cataplasmata ex pyretro, sinapi, aliisque calidis parata, fovebantque calorem cataplasmatum vesica bubula super imposita ad adjuvandam, festinandamque apostematis maturitatem. Ita porro venæ scissura maturationi adversatur, ut Vallescus^(b) innixus auctoritati Rhasis, Avicennæ, aliorumque, post diem quartum temperet a scalpello, sollicitus de evitando periculo inhibendæ puris confectionis, & adimendæ spei curationis. Tamen Sydenhamus^(b) inquit, liberali, & repetita sanguinis extractione prohiberi inflammationem, & suppurationem, comparari facilem brevemque medicationem. Omnes igitur, opinor, Sydenhamus pleuriticos

(a) *Lib. 3. cap. 8. de Pleur.* (b) *Sect. 6. cap. 3. de Pleur.*

redemit etiam morbo progresso, & inde animos sumit ad afferendam præstantiam, felicitatemque sui scalpri plane singularem. Singularem inquam; quippe plures Medici nostrates utentes eadem methodo resignandæ venæ contrarium pluries experiuntur, nec veteri famæ fidem abstulerunt, magnam pleuritidem plurimum exitialem esse. Si quis in aggreſſione fortis doloris lateris primo die venam ter aperiret, deinde reliquis diebus ad octavum usque partitim sexies, nonne tantum sanguinis effudisset, quantum sufficit inhibendæ inflammationi? Ante quatuor plus minus annos ea curatio obita fuit in nobili Patavina sexaginta sex circiter annorum, pleuritide vexata; quæ tamen a sanguine novies detracto, ut accepi ab affinibus, nihil adiuta octavo ægrotationis die mortalitatem explevit; usque eo processit animositas sanguinis in hoc morbo profundendi etiam contra clamores, & lamentationes senectutis. Quid autem suavit illi medico, ut novies in muliere sexagenaria majore venam vulneraret? Quoties extrahatur sanguis, durus erat; hincque argumentum capiebat renovandæ extractionis, perinde ac si per solam extractionem redigi posset ille ad priorem habitum; itaque solum cessavit ab vulneranda vena ex conspectu mortis, sed aspexit vitam mutatam, minime sanguinem. Vidi nuper ex pleuritico ductum prima, & secunda vice sanguinem durum, duraque materia flavescere obductum, nihilominus sponte moto propemodum tres dies continuo sudore restitutum ægrotantem. Enim vero, quibus mens est Sydenhamum imitari effusum in emissionem sanguinis pleuriticorum ad ejus inflammationem compescendam, saltem etiam in reliqua curatione imitentur extinctionem quoque molientem aqua florum papaveris Rheados cum sale prunellæ, & emulsis. Multi porro incitati ad sangu-

guinem sæpius etiam eliciendum, quam Sydenhamus, postea præbent pleuriticis succum densatum cardui benedicti amarissimi, calidi, sicci que, addito potu ejusdem aquæ, & scabiosæ, quibus contendunt cum reprimenda inflammatione, & a praxi Sydenhami recedunt. Audiant præterea Medici nostrates, qui maximam spem vincendæ pleuritidis collocant in repetitis toties sanguinis effusionibus, Hollerii animadversionem asserentis^(a) ex diversitate regionum variam item esse ejusdem morbi curandi rationem, nimirum juvari pleuriticos phlebotomia in locis perflatis ab Aquilonibus, lædi in regionibus, quæ obvertuntur Austris. Hic ergo, ut subdit, vel purgatione utendum est, temperanda sanguinis detractio.

Excitantur interdum dolores lateris etiam vehementes non una ex causa cum febre acuta, absque tamen inflammatione, & collectione stagnantis materiæ, minus illa periculosi, faciliusque curabiles; quales mihi tractandi non semel obtigerunt, & præsertim in Aromatario Patavino ad insigne Rosæ in Platea Nobilium. Quamvis primis diebus dolor fuerit valde acutus cum æquali febre, nihil tamen effatu dignum excreavit, nec signa veræ inflammationis prodidit, iisdemque caruit bis eductus sanguis. Post septem, vel octo dies multum remissa febre incoepit copiosa sputatio, sed incruenta, alba, & majori ex parte liquida, qualis solet apparere in benigno catarrho. Idem Aromatarius mense Januarii anni 1730, quo Rheuma Italiam longe lateque vexavit, eodem correptus est, cum dolore lateris, & difficultate spirandi, & febre. Pleraque sputa erant crassa, & viscosa, aliqua tamen minus crassa, sed leviter sanguine sparsa. Sub die 12 ægritudinis noctu ita crevit difficultas spirandi, ut solum sedens in lecto ducere pos-

(a) *Lib. 1. de Inter. Morb. cap. 24.*

posset anhelitum . Cum tamen febris mihi gravem suspicionem inflammationis non injiceret , nolui venam aperire ne frangerem vires debitas excretioni difficilium sputorum ; meamque deliberationem brevi consecuta salus comprobavit . Item in lateris doloribus pluries observavi , post unum , vel alterum diem extrudi sputa aliquantum flavida , leviterque sanguine conspersa , qui felicem exitum habere solent , & curari unica sanguinis detractio , aliquando nulla , uti contigit in viro sexaginta annorum Logicæ Professore , initio similis doloris scalprum recusante , qui , cum in morbi decursu extussiendo valde fatigaretur , gratias agebat Deo de refutata phlebotomia a Medico proposita ; abs qua , ut opinabatur , majus sensisset virium detrimentum , excreationem fortassis impediturum . Ipse quoque ante biennium incurantem curationem peregi in foemina sexaginta annorum , plenioris corporis habitus , detenta dolore lateris cum febre non acuta , & sputis leviter ambigueque sanguine coloratis . Ceterum vetus est observatio , leves pleuritides solius opera naturæ sanari ; reprobaturque Celsus venæ incisionem ut supervacuum ; quamvis in præsens vix latus dolore afficitur , levi comite febre , cum de phlebotomia decernitur . Illud tamen multo magis a Majorum praxi , & ratione abhorret , quod etiam in morbo plurium dierum , jam sputis exeuntibus , ab scalpro non abstinetur . Sauciavit venam octavo die Anaxioni Hippocrates , sed nondum apparuerant sputa , & licet febris solum die undecimo imminuta fuerit , sputaque solum die decimo septimo inceperint , sanguinis impendium non instauravit . Quis vero ex Medicis operosis , quibus hodie abundamus , octo dies temperasset a scalpro in pleuritico , nec saltem vulnerasset salvatellam ? Vulneratur etiam pene animam agentibus . Anno 1731

Nobilis Patavinus annor. circiter 60 temperamenti sanguinei biliosique, mense Januarii incidit in lethalem Pleuritidem, quæ primis duobus diebus mitis videbatur ob remissum lateris dolorem, facilem respirationem, vacuitatem tussis. Advocatus secundo die ad ineundum consilium cum aliis duobus Medicis, qui curationi præerant, imperavi cum collegis sanguinis emissionem; sed dilata est in proximum mane, persuaso ægroto ab incremento doloris, qui pridie eam recusaverat. Ab effuso sanguine pulsus hebetior redditus est, & quarto quoque ictu subsistens, similisque perseveravit tres, si bene recordor, dies. Toto morbi curriculo pauca excreavit, eaque biliosa, non cruenta. Quinto die deterior fuit morbi aspectus, sed multo peior sexto, ut mihi parum extrema distare viderentur. Tum cœperunt collegæ agitare de apponendis vesicantibus, aut aliqua ratione ducendo sanguine, quibus nihil annui, certus de infelicitate experimenti. Junior Medicus una cum domesticis ad me venit hora tertia circiter noctis, ut meum impetraret suffragium pro aperienda salvatela, quod ab altero seniore Medico jam impetraverat. Repugnaui deliberationi causatus, nihil spei remanere, neque esse in desperatione salutis remedia dehonestanda, nihil aliud præstitura, nisi mortis festinationem; sed persistenti in proposito cum favore domesticorum meum assensum, neque concessi, neque negavi. Aperta igitur est salvatela eadem nocte, vulnereque impositus obulus, animo iterandæ detractionis mane, si noctu facta aliquid boni attulisset; sed post detractionem oborto sudore lethali reliquum noctis transegit infomnis, & vehementer inquietus, ac proxima nocte æternum quievit. Dii boni! Quam facile labimur! Primis diebus elicium sanguinem sequente pulsus depressione, & inter-

mis-

missione, nemo ex collegis cogitavit de nova effusione, licet Verna^(a) non dubitet vel pulsu intermittente bis, terve sanguinem effundere; cujus tamen securitatem non doleo neglectam fuisse. Solum miror, postquam progressus morbi vires confecit, cetera lapsa sunt in deterius, mors erat in conspectu, aliquid commodi sperasse collegas ab venæ apertione, quam inter initia suspectam habuerant, propter inde ortam pulsus humilitatem, & intermissionem. Verumtamen, sicuti post primam punctiōnem dejectus est pulsus, coepitque intermittere, ita multo magis intermisit post secundam. Cogita serio tecum ipse, Medice operose, quam Te transversum agat proclivitas ad agendum, quam periculosum sit experimentum, ut admoneris ab Hippocrate, & quotidiani eventus ostendunt. Quamobrem, si velimus stare in priscis vestigiis a ratione designatis, siue Pleuritis abeat in apostema, siue excretionē sputorum dissolvitur, extra methodum est, sine accidentium, & temporum universalium consideratione cruentos ictus renovare. Illud etiam animadvertant, qui sæpe repetunt sanguinis ablationem in decursu pleuritidis, per inflammationes eum biliosum reddi, ideoque minus aptum ex Priscorum mente effusioni. Opinor igitur, præceptum illud generale Sydenhami de iteranda fidenter phlebotomia valde periculosum esse, multisque præbuisse ansam errandi, & præbiturum, ob auctoris celebritatem, nostramque propensionem ad fugiendum laborem. Facile trahimur fama clari viri ad imitandum, quod minore constet opera sequi auctoritatem, quam rationem, credere, quam scire, & subire laboriosum examen indicationum ductarum ab explorata rerum natura. Enim vero, quoniam Sydenhamus intendit animum ad stabiliendam uti-

(a) *De Pleurit. progno. par. 1. cap. 5.*

liorem legem curandæ pleuritidis frequentatione sanguineæ detractiōis , fungente munere asperæ arteriæ , sibi multis exemplis comperta , & explorata , nobis gratum fecisset , & prolixius consulisset posteritati , si restitutos pleuriticos descripsisset , quemadmodum Hippocrates Anaxionem .

Haftenus ostendi ex Methodo Majorum , quæ sæpius repetitæ phlebotomiæ in pleuriticis more Sydenhami ad-versantur . Nunc ejus sententiæ ratio breviter pensitan-da , in eo posita , quod credat Pleuritidem produci a pro-pria sanguinis inflammatione , & natura pellente noxiam materiam in pleuram . Hoc constituto , opto intelligere a Sydenhamo , quemadmodum incisio venæ inhibeat in-flammationem , gerat vices trachææ , & sine sputo salutem expediat . Etenim , si infestus humor , quem natura trans-mittit ad pleuram , differt a reliquo sanguine pleuritici , ut per hujus emissionem inhibeatur inflammatio , imaginari oportet , vitiosum humorem a natura separari , trudique ad venæ foramen , quæ tamen imaginatio plus satis fidu-ciæ plena est . Sin autem minime differt , non alia ratio-ne phlebotomia impedire valet inflammationem a fluente sanguine instantem , quam ablatione copię universalis , si adest , prætereaque tempestive revellendo , derivandoque . Porro ab Sydenhamo peto , quo pacto in Pleuritide con-firmata , de qua pariter loquitur , materia peccans a natu-ra traducta ad pleuram per venæ sectionem inde recedat . Antequam ista colligitur , & cogitur in parte affecta , vi-deo quid possit conferre phlebotomia ad ejus remotionem , quid possit non video , postquam collecta coactaque est ; imo video quomodo possit obstare ejus excretioni . Solet illa præparata a natura vincente per scretum extrudi , qui transacta tempestivitate revulsioni , & derivationis , im-pediri potest , non adjuvari venæ sectione , ut pote retar-dante .

dante coctionem materiæ, & imminuente vires, quo tempore vegetiores requiruntur adversus conatum extusliendi. Enim vero etiam Sydenhamus confidit, sanatum iri Pleuritidem, effuso abunde sanguine, effusione revellente particulas ejusdem accensas, *quæ in membranam costas succingentem vim fecerunt, & incendio collabefactarunt omnia.* Egregie, Sydenhame. Verum ut revulsionem, & derivationem tempestive utiliterque peragas, necessum est cum Priscis naviter observare diversa tempora inflammationis factæ ab illapso sanguine in pleuram; sine quorum animadversione tradidisti generale documentum de sanguine largiter educendo repetitis vulnerationibus.

Ut negotium cum Sydenhamo absolvam, superat duntaxat respondendum ad ejus experientiam, qui affirmat, se raro observasse confectam curationem Pleuritidis confirmatæ in Adultis quantitate ducti sanguinis minore unciiis circiter quadraginta, & nunquam inde minimum damni ægrotos sensisse. Quid? Ergone ita erit præfinienda methodus curandæ Pleuritidis? Si hæc ab eventu sancienda est, nulla sanciri potest, propter numerosam eventuum varietatem, parem ægrotantium varietati. Si Sydenhamo bene vertit prolixa sanguinis extractio, aliis multo parcior eundem exitum tulit. Plures & ego sanavi Pleuritides, leviores sine ulla sanguinis expensa, multas semel, aut bis eo elicitio, aliquas ter, nullas pluribus vicibus. Sed mea prætermittantur. Quot alii multo minus sanguinis detraxerunt in eodem morbi genere, quam Sydenhamus sine dispari medicationis eventu? Ceteros prætermitto, unum produco. Petrus Forestus ^(a) suis observationibus bene de re nostra meritis, plures describit Pleuriticos, alios levius, alios gravius conflictatos, omnesque, uno
exce-

(a) *Lib. 16. de Pest. & Pul. Mer.*

excepto restitutos, in quorum nullo jussu suo phlebotomia iterata est, quamvis dolor aliquando duos, tresve dies non mitigatus perseveraret; sed iteratis levibus deicientibus curationem confecit. Et sane, quamvis Hippocrates^(a) asseruerit, malum esse Pleuritide, aut Peripneumonia detentis alvi fluxum supervenire, aliquando observatum est, utilem fuisse: ideoque Vallesius sententiam Senis interpretatur solum de ægrotis, in quibus affectio eo usque progressa est, ut tabidi facti sint. Revera narrantur a variis Auctoribus saluberrimæ excretiones factæ in pleuriticis per alvi fluxum, quales etiam ego vidi, narrantur etiam crises factæ per Ictericam, alvi fluxu prægresso. Multi pariter gravi Pleuritide pressi absque ulla sanguinis missione solis sudatoriis convaluerunt; testaturque Vallesius^(b) Idiotas, qui Empiricorum more quorundam Pleuritico- rum curationem suscipiunt, sudatoriis cum optimo successu usos esse, atque inter reliquos unum servatum, qui, cum septimus jam esset dies, & nihil cœpisset excreare, propemodum jam præ respirandi difficultate suffocabatur. Quin etiam Prosper Martianus^(c) ex Hippocratis doctrina animadvertit, non unam esse Pleuritidis speciem, nec omnes venæ sectione, aliisque in præsens usitatis remediis curari. Tamen Sydenhamus sola excepta Pleuritide maligna, nulla adhibita distinctione in reliquis, nulla multorum praxeos consideratione, constanter asserit, sua methodo servata de copiosa, & repetita sanguinis extractione brevi, & facile profligari morbum, qui solet esse vehementer periculosus, perinde ac quemlibet alium: siquidem quod erat per tracheam cum gravi periculo extrudendum, per reclusam venam nullo negotio edu-

(a) *Aphor. 16. sect. 6.* (b) *Lib. 4. de rat. vic. in mor. acut.*

(c) *De Mor. Lib. 2. sect. 2.*

educit . Enim vero id fortasse reciperem , si tantam felicitatem medelæ de Pleuritide imminente , & incipiente spondidisset , non de confirmata ; quam , quia minime explicuit , esse concipio , cum sanguis hæret pleuræ , itagnatque collectus , & coactus , mutationem in pus suscepturus , quo tempore certe nihil commodi a vena aperta sperarem . Itaque si operosum est , recte determinare repetitionem phlebotomiæ etiam observatis diversis illius temporibus , propter istorum dubias notas , quanto proclivior lapsus erit in repetitione , nulla servata rerum , temporumque diversitate ?

Ex perpensis de phlebotomia in febribus , & inflammationibus satis habent Medici illius frequentatores , unde etiam in aliis morbis temperatiores sint in ejusdem remedii usu , si velint amplecti securiora , & cum suis ægrotis consultius agere . Namque , si animo revolvant varios fortuitosque venæ sectionis effectus , dubias identidem esse indicationes ejusdem , per eam naturæ medicatricis partem detrahi , levius , & facilius emendabile esse peccatum abstinentis scalpro , quam abutentis , procul dubio tam promti non erunt ad illud cruentandum , nec indulgebunt populari consuetudini , pessimæ magistræ . Communis prudentiæ lex est , oportere , in obscuris dubiisque lucem querere , & tutamen , atque hisce non inventis , gradum continendum esse , si tutius est subsistere , quam progredi . Nisi detraxero sanguinem , morbo postulante non adjuvabo ægrotum ; sinam naturam morbumque suis viribus uti ; si detraxero non postulante , naturæ molestus ero , impetum morbi augebo , & potentiam resistendi minuam . Utrum autem præstet , non est difficile cautioribus ad deliberandum .

Expositis de sorte ducendi sanguinis in propositis morbis ,

bis, finem huic disputationi imponebam, sed notabili, & recentissimo eventu adducor, ut pauca adjiciam. In curatione vehementium dolorum, & præcipue capitis, celebratur venæ incisio fiducia tanta, ut exceptis Erasistratis, fere nullum invenias, quin ad eandem confugiat. Ergo foemina quinquaginta circiter annorum, temperamenti calidi humidique uxor Aromatarii, de quo supra mentionem feci, ante tres annos vulnerata in oculo sinistro ab aculeo aloes cum visus amissione, ingentem in ea parte capitis, ipsoque oculo dolorem contraxit, caloremque; qui solum excursu temporis ita leniri potuit, ut laborans ad solita vitæ munia rediret. Hoc anno 1733, quo hæc scribo, sub fine Junii dolore, qui nunquam omnino conquieverat, consueto fortius affligente, me impense rogavit, ut sibi sanguinem educi permitterem. Obstiti, quo ad potui, causatus, nihil profuisse in recenti dolore iteratam emissionem, & insuper in præsens opponi aeris ferorem. More foeminarum non acquievit, donec quod animo conceperat, executioni mandatum fuerit. Pertusa igitur est vena brachii, deinde more regionis tali. Ecce qualis fuerit exitus. Post ultimam sectionem adeo sæviit dolor, ut in animi deliquium inciderit, & necessitatem quindecim dies jacendi præ vehementia doloris, intensiorem, uti fas opinari, adepti tantam propter attenuatum detractione sanguinem, emersasque biliosas particulas acrius partem offensam ferientes.

C A P U T VII.

*Ostenditur quam in lubrico versetur purgationis
frequentator in febribus.*

EXponens moderamen magnorum auxiliorum, separatim egi de alvi ductione, & vomitione: quam distinctionem non servabo in hac tractatione, nec de utraque vacuatione differam, sed tantum de dejectione, omissa vomitione, quippe multo rarius saltem in nostris regionibus usurpata, & idcirco considerationi peccantis frequentationis exempta.

Hippocrates aggrediens ad tractationem medicamenti purgantis, frænum iniecit plus satis incitatis ad illius usurpationem, ante oculos posita ejusdem actionis varietate: *Medicamentorum*, inquit, *purgantium res non ita se habet, quemadmodum vulgo putatur. Eodem enim medicamento purgantur, & non purgantur. Quandoque vero alia purgat, quam quæ purgare solet, aliquando nimium purgat, aliquando ea, quæ debet, facit. Quare fieri non potest, ut quis medicamentis confusus ea temere exhibeat.* Hac sola Senis admonitione doceris, quam sobrie, & caute adhibenda sint purgantia, quam dubiam administrationem incerta eorum actio efficiat. Non tamen inficias eo, utilitatem purgationis apertiore esse, quam phlebotomiæ, & frequentiore administrandæ occasionem incurrere; meritoque creditum fuisse a Joanne Clerco^(a), ejus usum vetustiore esse, quam phlebotomi: quando acutiores sumus ad invenienda, quibus magis indigemus, adjuti naturali instructione. Si contingat, ut nimii cibi repletionem, vel

K k k aliam

(a) *Hist. Medic. Lib. 1. cap. 18.*

aliam sentiamus, alvo pro more non fluente, intelligimus voce naturæ excretionem requiri retenti excrementi, quo exonerati manifestum levamen percipimus. Majoribus nostris ratiocinio, vel casu tot rerum inventore opus fuit ad purgationis instrumenta reperienda, non ad dignoscendum beneficium, clara, & frequenti experientia demonstratum. Venæ incidendæ præceptor, ut credit Plinius, fuit Hippopotamus, purgationem nos nostra natura, non alterius animalis docuit, solita per alvum onus superfluum, & incommodum eliminare: quo experimento plerique ægrotantes longe paratiores sunt ad imperatam purgationem subeundam, quam sanguinis effusionem, ad cuius erumpentis aspectum multi percelluntur, aliqui etiam animo deficiunt. Et fane, si alterutro ex hisce duobus remediis privanda foret Medicina, meo iudicio longe gravior jactura impenderet ex ablatione purgationis, quam phlebotomiæ, qua etiamnum multæ regiones carent, aliæque per diu caruerunt. Quamquam autem perspicua est utilitas purgationis, crebriorque indigentia, quam hauriendi sanguinis, tamen non ita lucide celebrandæ opportunitas exhibetur, nec ita frequens, uti opinio manat in vulgum, docente Platone, uti notat Vallesius^(a), purgationem pharmacis peractam solum fructuosam esse, summa urgente necessitate. Qua sola consideratione liquet, fieri non posse, quin ex tot purgationibus, quæ hodie in morbis in usum vocantur, aliæ sint inutiles, aliæ perniciosæ; cum summa necessitas, uti cetera summa, raro eveniat. Si tam varia est, uti vidimus ex Hippocrate, actio cathartorum, & causæ varietatis ortæ ex continua mutatione nostrorum corporum, magnam partem imperscrutabiles sunt, quis non videat, ex facili peccari posse in usu pur-

(a) *Lib. 5. Mor. Popæ.*

purgantium, & tanto facilius, quanto usus frequentior est? Incerti medicaminis auspicata administratio exigit laboriosam meditationem, quam subire menti nostræ difficilius est, quam errare. Cum autem alia sint leviora purgantia, quæ lubricantia vocantur, alia mediocria, alia fortia, nec omnia æqualem circumspeditionem requirant, eam tamen requirunt, ut nunquam frustra, aut nocenter propinentur: qua cautione porrigentur ab eorum frequentatore, si tam felix sit, ut parem habeat frequentiam certæ rationis, contra quam incidere consuevit. Ubi cognovero aliquo exotico humore corpus premi, scio illum vacuandum esse, sed antequam vacuationem exequar, opus est, ut explorem, an sit paratus ad evacuationem hanc peculiarem, viresque validæ ad ferendam: & hinc multiplex errandi occasio existit propter inditia ambiguae significationis. Verum ut hæc tractatio lucidius, utiliusque procedat, neque solummodo per generalia vagetur, purgationem expendam in duplici morborum genere, eorum, qui proprie vocantur acuti, & diuturnorum, initio ducto ab acutis. Nomine morbi proprie acuti intelligo primario febres celeris motus, in quibus curandis ex confesso valde fortia purgantia, neque raro, neque crebro sunt porrigenda: frequens tamen est usus eorum, quæ Græci ecoprotica vocant, qualia sunt Cassia, clyster ventriculi appellata, electuar. lenit. idque genus alia: sed hæc ipsa qui rarius in acutis usurpat, quiete sæpius utilior est. Laxant enim ventriculum, debilitantque, qui magnam partem impetus morbidi sustinet, afflictusque trahit in consensum reliquum corpus. Si Hippocratis suis operibus, scriptisque divini famam promeriti colimus doctrinam, auctoritate ducimur, cur in curatione acutarum febrium frequentatione purgationis tam longo intervallo ab ejus

praxi recedimus? qui in omnibus ægrotis descriptis lib. 1, & 3 Epidemiorum, solum in tribus narrat se usum esse clysteribus, iisque non repetitis, in quinque balano, licet hisce dejectis nullum securius iterari posse videatur. Haud me latet scomma illud Asclepiadis in veteres Medicos, quorum princeps Hippocrates, eorum medicinam esse commentationem, & studium mortis; similiter ac si Veteres non alia de causa ægrotis assiderent, nisi ut otiosi observarent, quemadmodum, & quibus accidentibus ad interitum traherentur. Verumtamen fama, & gloria Hippocratis semper clara florensque eum ab omni cavillo liberavit, repulitque cavilla in cavillatores, utcunque cunctator, parcusque remediorum fuerit. Quod autem attinet ad purgationem in febribus, vel per medicamenta intus assumpta, vel per infusa, etiam Celsus multo posterior Hippocrate, nullique sectæ devotus id generatim animadvertit^(a) de curatione febrium, harum materiam sponte dissipari, nisi nova suppeditetur ex cibo imperite præstito, & istum optime præstitum optimum esse remedium; commendatque Asclepiadem etiam clysteribus parce utentem. Quis autem in præsentia exemplo Hippocratis, & hortatione aliorum Priscorum adeo temperans est, ut intra spatium quatuordecim dierum febris acutæ unico clystere contentus sit? Quis flores cassiæ pluries non repetit? Qua tamen, Dii boni, utilitate! Natura principalis effectrix est curationis febrium acutarum, subigens separansque extranea immista sanguini, debiliorque opus urget crebris irritamentis perturbata, & fatigata. At enim, inquires, levia cum sint ea pharmaca, nec primam regionem prætergrediantur, tuto exhibentur ad educenda in dies genita excrementa, quæque ad cavitates

pri-

(a) *Lib. 2. Cap. 12.*

primæ regionis , quasi ad sentinam totius corporis demittuntur . Esto , si placet , non prætergrediantur illa primam regionem . At perturbatio ventriculi , & conjunctorum viscerum cum toto communicantium , nonne cito , lateque quoquo versus propagabitur , agitabitque humores ex febris fervore mobiliore redditos ? Jacchinus^(a) testatur , se vidisse mollientia , cujusmodi est Cassia , febricitantibus delicatis , nec purgari consuetis oppido nocuisse , & iccirco ad purganda intestina , venasque meseraicas sola mulsa , vel oximelite utitur ; istaque propinans magis imitatur Hippocratem , quam præbitores cassiæ , & similia . Non solis porro delicatis usitata laxantia non leve incommodum important , sed interdum ceteris : vidique nuper ab sex drachmis cassiæ in viro quadraginta annorum circiter , nec delicato , stigmatica febre vexato multas turbas excitatas fuisse . Addo dubitari posse , utrum cassia , similiaque lubricantia solam primam regionem tentent , an ultro permeent , dubitationem ingerente coloratiore urina inde reddita , quæ creditur a sanguine circumrapto abjungi . Ceterum , si dicta pharmaca totam suam actionem impendunt duntaxat excernendis impuritatibus primarum viarum , inde magis eorum frequentatio redarguitur , quod per eadem nihil humoris noxii fusi per universum sanguinem , qui solet esse causa febris continuæ , educitur , & frustra exercetur ægrotus . Hac consideratione fomitis febrilis , qui continuis in febribus non in alvo , sed in venis continetur interjectus sanguini , Prosper Martianus^(b) congruentius decernit , si purgandum est , eligendum esse catharticum humorem e venis eliciturum . Aliud incommodum impendet ex usu frequenti cassiæ , quod porrecta infra justam quantitatem ob morbi acutiem , viresque

inva-

(a) *De meth. curand. feb. cap. 14.* (b) *In Com. de Loc. in Homine Hip.*

invalidas, non raro commover excrementa, nec evacuat, infertque indigentiam eodem die imponendi clysteris, aucturi afflictionem afflicti. Non una est via, per quam natura excernit materiam febrilem, & commodior est, quæ patet per invisibilia foramina, opposita meatibus, per quos alvus exoneratur: quo monemur, ut caveamus, ne per repetita purgantia quantumvis levia divertatur utilior excretio. Enimvero Archibaldus Pitcarnius^(a) tam bene sentit de pharmacis lenientibus, solasque vias primas abstergentibus, ut credat, per illa duntaxat promoveri perspirationem intestinorum cuticulari similem, asserens poris intestinorum apertis, majorem erumpere molem perspirationis, quam ex æquali portione extimæ superficiei corporis. Unde tamen hæc constant Pitcarnio? Sunt Cassia, idque genus alia lenientia insuetudine, & laxatione fibrarum stomacho molesta, item sæpe incommoda excretionem imparati a natura succi, aut retinendi; unde febrientes præsertim acute iteratis clysteribus, nedum laxantibus intus acceptis fatigantur, delassanturque cum detrimento expirationis, observante Sanctorio^(b) a quolibet dolore, seu labore corporis, & virium debilitate illam imminui. Neque vero frequentatoribus cassiæ patrocinatur Sanctorius, affirmans ejus pauxillum non divertere perspirationem, nec vires lædere, sed tantum e corpore auferre inutile pondus. Quippe non loquitur de acute febricitantibus, neque de drachmis circiter quinque solitis porrigi, repetique ex brevibus intervallis: quæ repetitione majorem vim in viscera facientes, imminutionem insensilis effluvii, aliaque invehunt detrimenta, considerata a Martino Listero^(c) in commentario ejusdem Sanctorii. Si æger, loquendo de divitibus, uno, vel altero die

(a) *De curat. Feb. per evacu.* (b) *De Pond.* (c) *De Pond. Apho. 47.*

die nihil excernit , postridie imponitur clyster , vel por-
rigitur cassia , aut electuarius lenitivum , & fere nullus
dies exit , quin aliquo vacuante vires exerceantur , alvo
sponte non soluta . Qua curandi ratione augetur molestia
ægritudinis , turbatur retardaturque coctio , & consequen-
tia coctionem , videlicet separatio , & expulsio materiæ
febrilis , & inde secutura salus , quæ aliquando etiam in
discrimen adducitur . Est coctio motus intestinus humo-
rum tendens ad secretionem exotici , naturalem mistionem
sanguinis pervertentis , quo secreto , eliminatoque resti-
tuitur pristina mistio , cessatque febris . An non igitur ca-
venda est agitatio humorum , & spirituum crebris irrita-
mentis facta , debilitans , & perturbans motum illum
naturalem reducturum pristinam mistionem sanguinis , &
salutem ? Adde ex frequentatis laxantibus humores fero-
fos tanquam paratiores excerni , minuique , uti notat Hip-
pocrates, ^(a) præsidium adversus calorem febrilem in eo ge-
nere humorum positum . Et sane in ægrotis , quorum o-
pulentia non allicit ostentationem artis , & copię Medi-
camentosæ , ut non semel observavi , tutior jucundior-
que curatio instituitur ; magisque prodest negligentia me-
dentis , quam opulentis quæstuosa , & assentatrix diligen-
tia . Æquali redundantia divitibus per sanitatem mensa
extruitur , atque in ægrotatione medicatio paratur ; & o-
pes , quæ incitamento fuerunt ad evertendam intempe-
rantia salutem , impedimento sunt ad recuperandam sine
superfluitatibus , & fucis . Dii Deæque ! Quæ monstra a-
liquando vidi in curationibus Magnatum lethaliter labo-
rantium ! Veruntamen dicunt Medici operosi , ut supra
innui , esse amandanda inquinamenta quotidie in acutis
genita , quæque ab venis ad intestina tanquam ad senti-
nam

(a) *Lib. 4. de Mor.*

nam transmittuntur. Separatim utramque rationem ponderabo. Falso in primis assumunt, servata victus ratione, quæ requiritur in acutis, posse in primis viis generari copiam excrementorum postulantem tam frequens incitamentum evacuationis; & adjungo inditia producti excrementi dubia esse, uti liquet ex nimio plus sollicitis de alvo movenda, qui, si serio advertant, & veritatem fateri velint, sæpe nihil ejectum vident per repetitos clysteres, aut laxantia interna, quod sit justum pretium illatæ molestiæ. Profecto decubitus pigriorem alvum reddit, exigentemque certis temporibus irritamentum: tamen ea tempora ex solo numero dierum alvi siccae metienda non sunt, sed ex signis traditis ad cognoscenda purgamina ventriculi, & intestinorum, in quibus considerandis cavendum est, ne decipiamur ab symptomatis febrilibus, & imputemus quantitati impuritatum, quod qualitati debetur, potius emendationem, quam excretionem poscenti. Identidem sane in tota accessione febrili amarum, vel alium asperum ingratumque saporem percipit æger, unde videntur indicari sordes ventriculi, sed una cum febre cessat afflictio palati absque ulla dejectione, aut vomitione. Quod attinet ad alteram rationem assignatam pro frequenti indigentia purgationis ad exturbandam materiam, in febribus solitam quotidie detrudi ad primam regionem, tanquam ad locum destinatum, peto ab ipsis, unde hoc sciant. Si enim natura prius coquit, postea secernit, secretaque depellit, depulsio fieri deberet finita coctione, ideoque circa finem status: quo respectu, summi Præceptoris monitu, expedit, ut in statu cessemus ab irritamentis, quo minus fatigemus, & agitemus naturam, si speramus, fore victricem, intentam excernendis noxiis per commodiorem viam nobis fa-

tis non declaratam. Interdum quidem, ut animadvertit Galenus, & supra adnotavi agendo de regimine purgationis, febrilis humor totus non reservatur ad statum semel, & universim ejiciendus, sed paulatim coquitur, separatur, expelliturque: sed hæc lenta curatio a natura facta acutarum febrium propria non videtur, in quibus solet materiæ præparatæ evacuatio ad statum differri. Hunc esse morem naturæ, inde conjicio, quod Antiqui temperantiores ab irritamentis, & evacuationibus naturæ œconomiam pervertentibus, frequenter in statu acutarum febrium veras crises aspexerunt. Sin autem in acutis aliquando partitim fieret subactio fomitis febrilis, & explosio, inde tamen tuta non redderetur crebra administratio molliter purgantium, nisi cognoscendo naturam per alvum ejectionem molituram esse, & istam adjumento indigere, quorum ut plurimum perspicua notitia deest. Ipse porro humor, cum in acutis sit tenuis, calidus, & valde mobilis, postquam sejunctus est, impulsu naturali facile per vias commodiores excernitur, auferitque sollicitudinem de frequentandis impulsibus ad alvum. Enim vero frequentatores deicientium in acutis fortasse trahent in suæ praxeos commendationem naturæ inclinationem ad febrilem fomitem per alvum ejiciendum, uti visum est Joanni Freind, & antea Fernelio (a) pronuntianti, febrem continuam una spontanea alvi solutione tuto, ac perfecte judicari, minime, aut sudore, aut sanguinis profluvio, aut abscessu. Ceterum ex ægris ab Hippocrate descriptis lib. 1, & 3 Epid. id non apparet, in quorum tribus alvi fluxu expulsa febris est, undecim sudore. Verum enim vero concessio quoque, quod placet Fernelio, inde non adprobatur in acutis frequentia pur-

L I I

gan-

(a) *Lib. 2. Meth.*

gantium vel debiliū; eodem auctore animadvertente, materiam, perfectā jam concoctione, apparatus a natura excludi; quam tamen coctionem, uti dictum est, crebra deicientia perturbant. Sive igitur meditemur naturæ modum agendi, & providentiam, sive humoris conditionem ad exitum paratī sine stimulis adventitiis, sive obscuras notas indigentiae dejectionis, deputabimus esse in auxilio acute febricitantis rariorem per pharmaca solutionem alvi. Eadem animadversio magis valet adversus purgantia, quæ vera electivaque vocantur; si pari frequentia in usum venirent; qua tamen venire non solent, & solum permittuntur ab Hippocrate, turgente materia, vel concocta, nisi natura suis viribus, quantum satis est, exterminet, & suppleat artis vices. Quinimo, licet Hippocrates suadeat purgationem in principio morbi turgentis materiæ causa, non difficilis in ea celebranda lapsus est, nondum consentientibus Medicis, quid sit intelligendum nomine turgentis humoris, & quibus inditiis dignoscatur. Cum Galeno multi definiunt turgentem materiam ex ejus huc illucque motione, modo in partes superiores, modo inferiores, qualis est vagus motus animalium ad coitum concitatorum. Ab hoc sensu recedit Prosper Martianus^(a), hucque inclinat, ut credat humorem turgentem dici, qui & nulli parti affixus est, & in aliqua de se significationem præbet, excitato in ea sensu, quasi repleretur, & tumeret; unde moti ægrotantes sponte medicamentum purgans a Medico expostulant. Id sane assentirer Martiano, si dixisset percipi tumorem, & repletionem ventris, quod non determinavit, sed tantummodo alicui parti inferri sensum inflationis; ex quo non apparet, cur æger catharticum exposcat, nec ambigat de causa inflationis, quam
sibi

(a) *In Com. Aphor. Hip. sect. 1.*

sibi videtur percipere, nec videt habere. Ipse quoque Hippocrates dubitationem conflat^(a) de purganda materia turgente; ex cuius decreto non omnis turgens evacuanda est, sed tantum temporis excursu coctionem non receptura: *Impetus*, inquit, *humorum ducendus est, quo repit per regiones convenientes, exceptis iis, quorum concoctio fit tempore.* Quamquam igitur cum impetu movetur humor, unde turgens dicitur, si tempore concoqui potest, purgationi eximitur. At quibus inditiis initio febris cognoscam futuram coctionem? Videtur Martianus, ea desumere ex urinæ cruditate, quæ tamen fallacia sunt: siquidem interdum urina cruda aspicitur principio febris, & nihilominus facta mutatione morbi in lethalem, ut aliquando contingit, constat, materiam non potuisse coqui, nec quidpiam certi urinæ cruditatem obtendisse. Ergo pro diligentia nostro muneri adhibenda, etiam purgatio turgentis materiæ cognitu difficilis requirit oppido attentam meditationem; quæ tamen in præsentia paucos sollicitos habet, plerisque inchoantibus curationem febrium a purgatione, quam minuentem vocant, nulla facta exploratione, utrum materia turgeat, an minus: de qua consuetudine consule Prosperum Martianum^(b) eam accurate perpendentem. Nec enim ad me attinet in præsens cum hisce purgatoribus negotium habere, qui duntaxat exagitandam sumpsi peccantem frequentiam medicamentorum, illustrandamque partem praxeos, quam Vallesius in quiete ponit, & principalem existimat. Utinam, quem animo concepì, hisce meis animadversionibus, qualescunque sint, impetrare possem cautio-rem, & temperatior-rem usum remediorum: impetrato sane non diffiderem, me magis profuturum esse ægrotis, quam tot editis famo-

LII. 2

fis

(a) *Lib. de Humor.* (b) *In Com. sect. 1. Apho. 22.*

sis novitatibus a praxi remotis. Nequeo sane, quin vehementer commovear, quotiescunque accipio, laborantem febre acuta incidisse in manus Medici operosi, qui animo composito potissimum ad quæstum, & ad suam famam tuendam, atque iccirco attento servandæ naviter assuetudini vulgatæ, fere nunquam eum convenit, quin præscribat aliquid novi, aut palato ingratum, aut infestum viribus, & quieti ægrotantis, identidem sanguinem eliciendo, aut vena grandi pertusa, aut exilibus scarificatis, aut hirudinibus appositis; præterea crebro interjectis alvum sollicitantibus, & novissime, si nihil aliud super sit addendum, affixis vesicantibus, inhibentibus, quominus æger sua membra secure moveat, mutetque innocehter decubitus, unicum, quod supererat inter angores ægrotationis, solamen. Quod si tot oppugnationibus resistere valeat natura morbo profligato, eas vulgus, & aliqui etiam Medici interpretantur, necessarias fuisse recuperandæ salutis; sine quibus tamen natura, ut etiam per sanitatem paucis contenta est, tutius, & jucundius curationem absolvisset. Reputent, oro, qui continui sunt in adhibendis remediis curationes febrium acutarum a Medicorum maximo obitas, & plane noscent, quanto majus negotium exhibeatur naturæ a morbo, & remediis, quam a solo morbo; deferentque, si sapere velint, vacuationes temere repetitas, & quicquid vires aut deterit, aut distrahit.

Quam sit suspecta de errore in febribus acutis crebritas purgantium, sat exposui; eademque in longis superat expendenda. Longæ in quibus solent iterari purgantia tum debiliū, tum mediocriū viriū, sunt, quæ vocantur putridæ, quarum aliæ intermittentes sunt, aliæ continuæ, & in utrisque apud me offendit frequentatio pur-

purgantium : Exordior ab intermittentibus ex sententia doctissimi Fernelii, & plurium quoque Recentiorum, sedem habentibus in prima regione, partibusque conterminis : qui locus propius actioni purgantium expositus sua opportunitate deberet reddere efficaciorum purgationem ad febris radices extirpandas : tamen ante inventum corticem peruvianum plurimæ febres in longum protrahebantur, nihil proficiente repetito pluribus, & conjunctis diebus sirupo de cichorio cum rheubarbaro, similibusque purgantibus, quibus identidem corpus extenuabatur, parum febris. Demonstravit cortex peruvianus, purgationem non esse summam curationis intermittantium, nec eam pertinaciter iterandam esse, uti a multis iterari solebat, non alio argumento, nisi ob febris perseverantiam. Quis nesciat constantiam, & diuturnitatem quartanæ frequentibus etiam catharticiis invictam ? Forſan idem infortunium accideret etiam in tertianis intermittentibus, nisi naturalis morbi cursus ex majore tenuitate humoris brevior foret. Et sane vidi ipsum corticem peruvianum in Magistro Epistolarum Episcopi Patavini vi sua spoliatum usu frequenti purgantium. Mense Decembris anni 1731 recidivam tertianam patiens, suasu amici sumſit drachmas duas corticis cum una aloes quatuor vicibus, quatuor diebus continuis; sed ex brevi intervallo reversa febris, eandem quantitatem pharmaci eodem numero dierum accepit, & præterea aliis duobus proximis diebus dimidiam. Itaque brevi tempore sumſit uncias duas, & dimidiam corticis, unciam unam, & drachmas duas aloes, quibus copiosissime purgatus est; sed per ipsam purgationem quinquinnæ facultate detrita, extincta febris non est; quam postea aliquot dierum imperata quiete, & alvum deinde nimis adstrictam drachmis duabus tartari solutilis laxando,

cor-

cortice peruviano cum nitro defæcato prælitto fugavi. Non inficias eo, in intermittentibus fructuosam esse posse purgationem, eamque non semel aliquando renovatam, sed hujus indigentiam non ex sola febris constantia colligendam esse censeo, sed aliis ex inditiis non ita procliviter dignoscendis, ut Medici credunt, quibus magistra est vulgaris consuetudo. Accedit etiam illud impedimentum, quo minus recte instituatur purgatio in intermittentibus, quod destituimur solita purgandi regula innixa coctioni, declarata colore, habitu, & urinæ contentis; si cum Fernelio, aliisque multis materia febrilis extra venas collocetur. Vulgata sententia est, per urinam tantummodo denunciari conditionem humoris fusi per sanguinem, videlicet coctionem, aut cruditatem, non humoris in prima regione insidentis; qui, uti Prisci docent, præparationi, non veræ coctioni subjicitur. Revera Fernelius in pura simplicique intermittente animadvertit, urinas plerumque toto morbi decursu laudabiles esse colore, substantia, sedimentoque; scilicet nihil bilis e præcordiis in venas irrumpente. Nonnunquam vero ejus portione invasionis impetu in venas impulsæ, sub ejus finem urinæ crassæ redduntur, atque flavæ, iis longe dissimiles, quæ paulo ante accessionem fuerant. Porro facilius evitabis occasionem perperam iterandæ purgationis in intermittentibus, nisi tam cito, ut multi solent, eam imperabis, sed differes post aliquot accessiones, exemplo Hippocratis^(a), qui in tertiana solum post quartam accessionem cathartica porrigit; dummodo tamen principio impuritatum copia non appareat. Ipse equidem curans intermittentes, quantum in me fuit, distuli purgationem ad tempus, non tam a lege Majorum, quam ratione destinatum,

(a) *Lib. 2. de Mor. sec.*

tum, & semper vidi dilationem aliquam melius vertisse festinatione, & multo longiorem in quartanis intermittentibus. Et sane, cum statim in principio nondum sit attenuatus humor, nondum ex suis latibulis tentet exitum, catharticum nihil, aut parum noxii succi educit, plus utilis, mollioris humidiorisque: quo imminuto, qui remanet infestus arctius adhæret partibus, sicque protrahitur curatio. Inchoantibus morbis, inquit Hippocrates, si quid videtur movendum, move; sed hunc monitum cum Prospero Martiano^(a) contraho ad morbos acutos, in omnes valere non judico. Ceterum admonendum est, ab Hippocrate non ita anguste, ut a multis creditur, accipi principium universale febris, sed, uti notat Prosper Martianus^(b) protendi ad vigorem usque; adeo ut in acutis non admodum celeriter motis aliquando dies sextus non sit extra principium, & opportunitatem purgationis; idque Martianus considerandum Medicis properis expurgandi proponit.

De frequentia purgationis in febribus intermittentibus fugienda non est, quare longius disseram, quam celebratus usus corticis peruviani apud plerosque correxit. Disseram de longis putridis continuis, quæ ex confesso accenduntur ab extraneo succo sanguini intermixto, neque tam facile, & secure indico cortice superantur. Si mente concipimus in hisce febribus primas curationis partes naturæ deberi, ut etiam dictum est de acutis, coquenti, separantique, quicquid præter ejus leges interjectum est sanguini, non difficulter percipiemus, quod inde sequitur, nimirum crebritate purgantium non esse naturalem operam turbandam, & debilitandam. In longis profecto febribus continuisque non semel tantum incidere potest purgatio.

(a) *In Com. Hip. Lib. lib. 2. de Mor.*

(b) *Sect. 1. Aph. 22.*

vices obire eadem, vel alia via posse, non posse tam facile obstare detrimento ab intempestiva purgatione illato. Catharticum qualitate offendit viscera, actione turbat humores, neque noxios imparatos, & commotos exigit; ex quo potest cadere, ut ad ventrem deducti, nec inde ejecti ibi corrumpantur in novum fomitem febrilem, vel aliter molestum. Sed audiamus Glissonium de facultate excretrice ventriculi, & intestinorum, ni fallor, producentem novum argumentum purgandi in febribus lentis, in quibus ait, fructuose præberi cathartica etiam ante concoctionem materiæ ad excitandam ignaviam fermentationis. Solum igitur, Glissoni, vis concitare ignavam fermentationem, non evacuare crudum humorem, quem in eodem capite asseruisti, iccirco purgante tentandum non esse, quod natura nullum organum ad eum secernendum comparaverit. Verum, si animus est fermentationem promovere depressam a crassis succis, cur attenuantia non exhibes prætermisissis purgantibus, quibus nequeuntibus crudam noxiamque materiam excernere, quicquid sani fluere paratius est, educetur. An hoc expediat, Tu iudex esto. Nisi mihi alia rationum momenta ad purgandum offerantur, malo fidere naturæ industriæ, quam imaginationi fallacia suggerenti. Equidem non semel observavi, modicam dejectionem in febribus sponte factam magis profuisse, quam repletum lasanum opera deicientis; immo per hanc copiosam vacuationem intentam fuisse febrem, iactatis magis, perturbatisque humoribus. Cur autem hæc perturbatio infesta sit febricitanti, declarat sententia Hippocratis, febrem non oriri, nisi facta dissolutione temperationis, sive misturæ diversarum sanguinis partium, ejusque fieri curationem restitutione pristinae temperationis. Hanc vero ars adjuvare potest, sola natura efficere; &

promptius efficit, nisi humores externo impulsu incusso a purgante agitentur, reparationi pristinae missionis adverso per quietem faciendæ. His ipsis vestigiis inhærens Galenus decrevit^(a), purgationes esse contrarias coctioni, postquam naturalis mistio restituitur, expulso, vel subactō, quod eam perturbabat. Hinc aperte sequitur, copiam purgantium inseparabilem ab commotione humorum etiam in febribus diuturnis fere intutam esse, fugiendamque. Memini, me in quadam febre longa continua habente tamen incrementa, & decrementa mulieris annor. circiter 65 cum successu frequenter usurpasse post multos dies mitissimum laxans, nimirum serum lactis cum drachmis duabus tartari crudi, sed eo ducebar, quod videbam, tam levi pharmaco impetrari cum levamine non exiguam vacuationem, & inde docebar, naturam sanguinis impura detrudere ad intestina, detrusaque levi accedente impulsione dejici: sed hæc occasiones raræ sunt, soloque effectu manifestæ. Neque vero in re medica constitui potest certa regula omnium singularium communis, omnique limitationi exempta: scienterque visum est Galeno^(b), tot esse methodos medendi, quot sunt morborum ideæ: quæ methodi, partim ex præceptis generalibus, partim ex observatis in ægroto eruendæ sunt. Quocirca propositis commodis, incommodisque sequentibus usum remediorum, dirigat opus oportet prudentia Medici exercitati, methodoque instructi, varietatem occasionum nullo certo numero comprehensibilium dispicientis. Multa in certo rerum concursu cognoscimus, quæ aliis tradere, qualia sensu percepimus, & cum omnibus circumstantiis nequimus, vel propterea quod istas adamussim explicare perarduum est, vel quia cito aliquæ mente elabuntur, postquam

(a) *Lib. 4. de rat. vic. acut.*(b) *Lib. 4. Meth.*

ab agro sensuum contentionem amovimus, e quibus, simul cum aliis hausimus, arripuimusque occasionem remedii. Tument tot medica volumina laudibus remediorum, quæ repetitis experimentis prædicantur utilissima ad varios morbos fugandos; sed in eodem affectionis genere usurpata identidem decantato effectu fraudantur, admonentque, ne fide tanta usurpentur, ut nihil de successu dubitetur. Tot autem difficilia, & salebrosa, quibus in remediis tempestive administrandis circumvenimur, non alia ratione melius superare possumus, quam illustriores conjecturas, fortemque duntaxat assensionem trahentes sectando: quibus duntaxat attentis, paucæ quia occurrunt, parci quoque erimus remediorum; quæ non tantum morbis opponuntur, sed naturæ quoque, aut virium extenuatione, aut humorum perturbatione, aut exotica, infestaque qualitate, aut hisce universis. Si etiamnum persistis in proposito, Medice ad purgandum in febribus summo opere proclivis, nec incipis tuam proclivitatem suspectam ducere, dic quæso, unde petas certas regulas ad errata declinanda. Admonet Joannes Freind^(a), rationem curandi febres per purgantia multis indigere cautionibus, sed nullas satis accuratas ab auctoribus traditas fuisse, neque tradi posse, nisi plurimum laboris, & judicii accesserit. Addo ego id plurimum accedere non posse. Si enim fertilissima Priscorum ingenia, & diligentissima curandarum febrium, firmas, certasque regulas minime sancire valuerunt, id sane vertendum est insuperabili rei difficultati, & obscuritati, non præceptoribus, qui nec satis laboris, nec judicii in hoc contulerint. Si fecus est, exoptare tempus oportet, quo leges purgandi in febribus industrius tradantur; & interea rarius incidere in periculum errandi

(a) Comment. 7. de purg.

di abstinencia frequentationis purgantium, & sæpius naturæ viribus confidere: siquidem aliorum quoque fortium irritantium, perque alios claudus evacuantium opportunitates identidem involutæ sunt, perinde ac purgationis, fortasse magis.

C A P I T U L U M VIII.

Expenditur frequentatio expurgationis in morbis longis.

EXamine præmissio de crebra repetitione purgantium, cum debiliū, tum mediocriū in febribus putridis, aliquid attingendum, est etiam de forti expurgatione in quibusdam morbis frequenter iterata propter difficultatem expugnationis. Non ibo tamen per singulos hosce morbos, sed instar omnium mihi erit hydrops aquosus, sive utricularis, quem Græci Ascitem vocant; ideoque considerandum sumo, quia pariter osores purgationis inferioris, inter quos Cælius Aurelianus, hydropem excipiunt, validisque deicientibus adoriuntur. Hisce hercle morbis non militat ratio favens curationi febrium, in qua vidimus primas partes esse naturæ coquentis secermentisque excrementa; adeo ut credat Sydenhamus, febrem esse instrumentum naturæ ad separandas impuritates, quod de omnibus concedi nequit, potest de aliquibus, iisque, in quibus purum quantitatē superat impuram, prævaletque. Contra verò morborum, de quibus nunc est sermo, profligandorum tota, vel propemodum tota spes a multis ponitur in valida crebraque expurgatione: unde tot fortia cathartica in honorem venerunt propter domitam morbidam pertinaciam. Fateor & ipse, in qui-

bus-

busdam contumacibus morbis requiri fortem repetitamque dejectionem ; sed hujus indicationem sæpe dubiam esse sentio , meæque opinionis momenta eo scopo producam , quo eandem ambiguitatem in febribus proposui , videlicet ad augendam Medentis circumspeditionem , temperandamque concitationem ad agendum. Ergo quod attinet ad Hydropem aquosum , mihi propositum pro exemplo subigendarum difficilium ægrotationum , Sydenhamus affirmat , hunc affectum postulare fortem , celeremque , non debilem , atque ex intervallis factam purgationem , qualis salutariter in aliis multis longis arduisque morbis instituitur. Hanc praxim ante Sydenhamum executioni mandavit Riverius^(a) in quodam Pistore Monspeliensi annor. 35 Ascite impedito , tumentibus insigniter ventre , cruribus , & scroto. Auspicatus est curationem ægroti post duos menses a morbo , die vigesimo septimo mensis Novembris cathartico , quo mediocriter purgatus est : die 28 detraxit e brachio dextro sanguinis uncias octo , detractusque apparuit multo sero perfusus . Proximo die exhibuit bolum ex granis 24 Calomelanos , & uno scrupulo pulveris Jalappæ , eundemque iteravit die trigesimo ejusdem mensis , addito dimidio scrupulo Jalappæ , quo copiosius excrevit . Primo , & secundo die Decembris repetitum est idem pharmacum ; tertio impositus clyster ex drachma una , & dimidia Colocynthis cum decoctione furfuris in vino albo , adjuncta uncia olei communis ; idemque clyster die quarto injectus est ; nullaque facta intermissione , die quinto præstitus fuit pulvis compositus ex Senna , Turpeto gummoso , Hermodactilis , seminibus Ebuli , Jalappa , Mechoacanana , Gutta gummi , & cremore tartari , largeque vacua-

vit

(a) *Centur. 3. Observat. 23.*

vit materiam nigram, qualis etiam per clystereseducta fuerat: idem pulvis die octavo, & undecimo repetitus est, atque interpositis diebus porrecta potio diuretica; congruentique mandata victus ratione, & pro potu infusione chalybis in vino albo, finis curationi, morboque impositus est. Quam maximos potuit, edidit Medicina conatus in hac curatione; nec majori crebritate poterat fortia purgantia usurpare. Quam pauci tamen hujusmodi successus occurrunt! Quam isti paucitate inefficaces sunt ad eam rationem curationis hortandam in Ascite! Id generatim edixit Sydenhamus^(a), ab eo hydrope præ ceteris morbis quibuscumque catharsim, & quidem valentissimam postulari, & maxime velocem. Si tamen advertisset varias contrariasque ejusdem morbi curationes ab aliis celebratas, profecto hæssisset, neque tam ample deliberasset. Egregie profunt in Medicina exempla victarum ægrotationum; sed hæc ipsa facile in errorem inducunt, nisi victoria ad suas veras causas referatur: & similia probe noscantur, quod perdifficile est, ideoque dubius, & fallax exemplorum ductus, ignorata vera ratione prægressi eventus. Quem lateat, sæpe uni non prodesse, imo etiam officere, quod alteri saluberrimum fuisse in eadem specie morbi accepimus? Confide igitur, si potes, exemplis, & potissimum raris in tanta hominum varietate, ratione temperamenti, sexus, ætatis, consuetudinis, vitæ institutionis, aliorumque accidentium, aut clam, aut palam alterantium. Hæc inde nata varietas efficit, ut in eadem specie morbi variant causæ, diversa requirantur, difficulter inveniantur, non suppetentibus testatis indiciis ejus varietatis. Patavii anno 1729 Medicus clari nominis mulieri temperaturæ calidæ humidæ-

(a) Pag. 562.

. (b)

dæque, annorum plus minus sexaginta hydrope impeditæ, rurique degenti misit pulverem catharticum in viginti quatuor partes divisum, totidem continuis diebus sumendas, spoponditque ab acceptis salutem. Enim vero quatuor sine intervallo sumptæ ita vires fregerunt, ut non solum spem salutis, sed vitæ protrahendæ ademerint, si reliquæ acceptæ fuissent. Ergo sub initium veris ægra Patavium advecta est, mihi que commissa. Totus venter valde intumescebat, coxæque cum cruribus, pedibusque. Magna insuper premebatur difficultate spirandi, & solum sedenti extra lectum concedente somnum, inchoata ante tumorem ventris, & reliquarum partium. Urina pauca, atque ex rubro fusca. Principium curationis duxi ex agarico cum therebintina ter alternis diebus iterato. Mediocriter purgata est, postque ultimam acceptam dosim perseveravit tres dies excretio copiosior naturali, & inde remisit aliquantum respirationis difficultas, aliique boni successus apparuerunt. Tamen cessavi a purgante dies octo, nihil præbendo medicamento, si præter potum ordinarium, aptum ad promovendam urinam; post quos propinavi agaricum cum diagridio, & tartaro vitriolato, quo multa liquida dejecit; idemque pharmacum factò decem dierum intervallo iteravi. Id tempus purgandi mihi præfinivi, quod permittebat ægræ tolerantia, habito quoque respectu urinæ, quæ post excretiones petitas crassior coloratiorque reddebatur. Quamquam autem ex longis spatiis, post primos sex dies contra mentem Sydenhami instauratum est catharticum, & istuc non valde forte ob paucam quantitatem diagridii, intra mensem circiter magnam partem evanuit ventris tumor, omnino femorum, & crurum; expeditæque fuerunt viæ respirationis, ut in lecto jacere posset, jacens.

cenſque placide dormire. Aliquot diebus poſt ūrina hābitum propemodum naturalem, coloremque adepta eſt, ut integram ſalutem ſperare liceret, ſi foemina & in urbe permanſiſſet, & in parcitate cibi, delectuque qualitatis; ſed ruſus reverſa, neglectaque victus ratione, poſt plures menſes ex recidivo morbo ſato conceſſit. Id notabile animadverti in hac foemina, quod diebus circiter duodecim poſtquam curabatur, ſic dejectus eſt appetitus, ut ſemel tantum in die comederet, & parum, quæ bis ſolebat, & plenius cibari; quo moderamine autumo maxime adjutam eſſe, & fortasſe magis, quam medicatione. Sat de exemplis: conſulamur rationem. Cūr, Sydenhamē, medicis univerſe in hydrope celebrandam eſſe maxime feſtinatam, fortemque purgationem? An hic morbus unam, eandemque in omnibus corporibus cauſſam habet? An habet in omnibus eadem adjuncta? Te non hercule latet, illum identidem initium capere vel ab jecoris obſtructione, vel lienis, & meſenterii, vel ſaltem cum ea conjungi. Inſuper tritum eſt, quod docet Hippocrates ^(a) de præparandis corporibus ad purgationem deſtinatis: *Corpora cum quis purgare voluerit, oportet fluida facere.* Præparatio vero præmittenda purgationi duplex eſt, altera pertinens ad humores, altera ad corporis meatus transmittentes ſuccos evacuandos, qui, ſi clauſi ſunt, obſtructique, procul dubio reſerandi ſunt, dilatandique. Pone nunc occaſionem hydropis aquoſi fuiſſe eorum viſcerum obſtructionem. Profecto ſi vehementiora cathartica exporrigas, recta opponeris præcepto Hippocratis, & communi praxi curandarum obſtructionum, declinanti purgatorii vehementiam, qua comoti humores, nec expedite trajecti augerent obſtructionem.

(a) Sect. 2. Apho. 10.

nem, aliaque incommoda importarent. Alias percurramus causas hydropis. Credit doctissimus Fernellius ^(a), non raro in proVectis hydropem produci ex jecoris membrana fissa, & hanc findi ab usu liberaliore vini meracioris, aliisque causis calefacientibus, & siccantibus, quibus arefactum jecur, ejusque membrana rimas contrahit, instar terræ præ siccitate dehiscens. Facta rima sero sanguinis liberum aditum permittens in capacitatem abdominis, occasio est, cur istud eo repletum instar utris intumescat; unde hic hydrops nomine utricularis designatus fuit. Quis autem ex fortibus acribusque purgatoriis crebro porrectis speret, ex ea causa hydropicum factum levatum iri? Imo caliditas, & acrimonia purgantium validiorum serum evacuantium, magis hepate desiccato novas efficient membranæ fissiones, morbique incrementum. Quiddam simile mihi videtur metuendum ab eadem ratione purgandi in eodem hydrope genito, uti placet Recentioribus, ab vasis lacteis, vel lymphaticis ruptis aquosum humorem in cavum abdominis effundentibus. Impetum primum faciunt vehementia cathartica, quæ Manardus lacerantia vocat, in ventrem inferiorem, tantoque majorem faciunt, quanto frequentius repetuntur, ideoque valida ad novas rupturas vasorum moliendas, morbumque adaugendum. Provoco ad Vvillisium ^(b), qui Ascitem ut plurimum incurabilem pro certo tenet, si generetur vel abs tumoribus circa viscera, vel a vasis lacteis, aut lymphaticis diruptis. Sunt etiam aliæ causæ Ascitæ ratione primarum qualitatum contrariæ, uti placet Avicennæ ^(c), aliisque, dividunt eam speciem hydropis in frigidam, calidamque, quam divisionem compro-

Nnn bat

(a) *Lib. 6. de Port. mor. & sympt. cap. 6.* (b) *De Ascite sect. 2. cap. 3.*

(c) *Lib. 3. Fen. 14. Tract. 4. Cap. 13.*

bat curationis oppositio. Extant exempla plura de curatione calefacientibus peracta, & aliqua refrigerantibus, inter quæ reticendum non est insigne, quod narrat Riverius in observationibus sibi communicatis. Quanta sit efficacia salis prunellæ ad refrigerandum, præclarum est ex usu communi ejusdem in inflammationibus, urentibusque febribus. Eodem igitur per integrum mensem sumpto a quodam hydropico, totum abdomen exoneratum est stagnante humore, restitutaque salus; ostenditque sanatio, ut jure concludit auctor, causæ morbidæ caliditatem. Quis igitur, si attente perpendat, quæ de variis causis Ascitæ, & curationibus circumferuntur, faciat cum Sydenhamo, intrepidusque consentiat, illi præ reliquis morbo deberi vim magnam cathartorum, celeriterque renovatam? Imo est, cur mirer, de hoc ipso nil dubitasse Sydenhamum, convenienter ad suum placitum de causa hydropis, conjecta in sanguinis imbecillitatem; cui promovendæ genus illud purgantium, crebroque præstitum aptum est, illius compagem attenuando, dissolvendo, spiritusque absumendo. Quocirca non defunt multi, atque inter istos Hollerius, Petrus Forestus, qui contrariam Sydenhamicæ rationem educendi aquas hydropicorum per purgantia commendant, videlicet lentam, & paulatim factam evacuationem, causati ab acervatim facta depletione dejici vires, & viscera refrigerari. Quid quod Vvillius^(a) observat, Ascitem sæpe exasperari catharticis, & si eisdem diutius insistitur, incurabilem reddi? narratque historiam de juvene foemina uxore Mercatoris Ascitem patiente, quæ ab omni purgatione semper deterius habuit. Quod pariter observatum esse a Majoribus comperio, hortante Celso^(b), initio cujuscunque speciei hydro.

(a) *De Remed. ad Ascitem* sec. 2. cap. 5.(b) *Lib. 3. cap. 21.*

dropis, ut ventris excretio cibo potius, quam medicamento incitetur, firmioremque spem curationis, antequam morbus invalescat, magis collocante in quiete laborantis, siti, & inedia, quam medicamentis: & nos supra vidimus, quantum profuerit in descripta foemina parsimonia cibi consecuta ad spontaneam dejectionem appetentiæ. Quid quod idem Celsus, tametsi in morbis ortis ab atra bile, & aliis quibusdam non abhorret a fortibus dejicientibus, tamen in curatione cujuscunque Hydropis nullum ex hisce proponit? Movet sudorem, urinam, conatur resolutionem aquæ conclusæ in specu abdominis admotis discutientibus, nullum de dejicientibus verbum fecit. Ipse etiam foeminam annorum circiter quinquaginta tempore æstivo post tertianam Hydrope aquoso coeptam implicari, absque ullo purgante liberavi decoctione radice personatæ per vesicam materiam tumentis ventris exigente. Quomodo denique curabit Sydenhamus Ascitem morbis acutis succedentem, de cujus vehementi periculo ab Hippocrate^(a) docemur? Hisce laborantibus timerem, ne festinata, fortisque purgatio perinde ac morbus ipse pernicioosa foret. Satis hæc causa pertractata est, nec plura adjiciam ad ostendendum, dubiam esse in Ascite frequentiam fortium cathartorum, magnamque felicitatem requiri ad eam salutariter exequendam, fortunæ favore obtrudente Medico ægrotum ex peculiaribus causis in eum morbum lapsum, præditum robusta sanguinis compage, visceribusque idoneis ex facili sustinendis crebris ictibus purgantium, qualis fuit Pistor obtrusus Riverio, ejusque animosa medicatione redemptus. Itaque si tibi fortuna adeo prona est, favensque, suscipe universim more Sydenhamico curationem ejus hydropis: sin cautior minus

Nnn 2

eidem

(a) In Progn.

eidem fidis, nitere ad dignoscendam conditionem ægroti, & affectionis, ejusque originis, & sollerti animadversione ingredi curationem, ut exploratum effectum ducem habeas ad eandem proseguendam, cognoscendaque sine illo occulta.

Consideratione Hydropis aquosi, in quo demonstratum est, frequentem iterationem vehementium purgantium pluries periculo non carere; atque propter diversitatem causarum, & ægrotantium difficulter conjectabilem, magno conitare, certam viam curationis inire, facile apparebit, si diligenter attenditur, similia impedimenta in aliis morbis offendi, eandem difficultatem recte magnis auxiliis utendi, idemque errandi periculum. Vallesium ^(a) appello definientem, nullum esse morbum, qui unicam certamque habeat curationem, neque qui pro ratione causæ, & naturæ hominis, ac denique singularium animadversionum, non possit accipere contrarias. Attamen, quo præcunte lumine nobis innotescet in eadem specie morbi varietas tanta, ut quandoque contrariam curationem requirat? Identidem nullum præest; ideoque præcipit Hippocrates, semper variare oportere modum non sanantem; qui sane mutandus non foret, si præcederet certa morbi cognitio, parem quoque medicationem sufficiens. Quocunque se vertat Medicus, quamcumque artis suæ sectam profiteatur, scopulos non evitabit, paratos lapsus inveniet, inopinata contingere dolebit. Sequatur Empiricos, si velit, sequatur Rationales. Istis, uti monet Hippocrates ^(b), perarduum est vias ratiocinando cognoscere; illos similitudines ex facili in errorem trahunt. Hæc porro non inculco, ut medentem velim otiosum, & grandibus remediis diffidentem, sed

exci-

(a) Lib. 7. Epid. Hippo. in com. (b) Lib. 6. Epid.

excitem ad sollertius scrutandam eorum legitimam occasionem , atque si se rationalem ostentat , ad probabiliorē rationem semper amplexandam : qua prælucēte neque raritate , neque frequentia delinquet , postpositis levibus momentis , quibus sæpe vidi magnis auxiliis manum admoventi . Accipienda vero est frequentia purgantium , de qua hactenus verba feci , non abstracta , sed comparata , & accommodata singularibus ægrotis , affectibusque , itemque consideranda qualitas purgationis . In aliis enim morbis , & circumstantiis intra dies , puta , decem ter instituta mediocris purgatio frequens non erit , in aliis oppido frequens : neque pariter frequentem purgationem voco in plures vices divisam , quæ semel faciēda fuisset , si vires , & alia permisissent . Definiri nequit generatim frequentia adprobanda , vel rejicienda ; & utraqueprehendenda est , facta collatione cum natura ægrotantis , morbo , ejusque causa , effectu prius usurpati remedii , aliisque accidentibus , sed potissimum prægresso effectu , cujus interrupta prosperitate favente , certum est , aliquot morbos contumaces valde frequenter exhibitis purgantibus repetitioni appositis subactos fuisse , subigique posse . Observatum pariter fuit , quandoque mulieres , præsertim cœlibes , virginesque , pene incredibili frequentia educto sanguine , quadantenus adjutas fuisse ; quæ sicut interdum patiuntur raros , admirandosque morbos , item æque rara , & admirabili medicatione , vires ex earum imaginatione pluries adepta , curantur . Hæc tamen raritate sua extra constantem ordinem naturæ posita , & continuatam rerum seriem parum habent momenti ad præfiniendum moderamen universale remedii . Huc adde mulieres , quas Hippocrates viris calidiores judicat , naturaque comparavit ad menstruum sanguinis dispendium , & copiosius in emissionem

sione foetuum, etiam repetitam phlebotomiam viris minore negotio perferre solere.

Haftenus disputatum est de difficultate recte citraque periculum frequentandæ phlebotomiæ, & purgationis, disputataque valent etiam in alia remedia, quæ vel aliqua vacuatione, vel infesta qualitate, vel insuetudine vim inferunt naturæ, neque sine molestia, viriurnque jactura in usum adduci possunt. Ergo Medentes plus satis proclives ad actionem, securique secum ipsi reputent, precor, quam multiplex sit, obscuraque diversitas causarum morbi in eandem speciem rejecti, quam difficilis ad inveniendum justa quantitas remediorum; quam varii instabilesque sint eorumdem effectus pro dissimilibus ægrotantium temperaturis, atque pro magna mobilitate humorum, & affectionum inde pendentium; quam pauca præclara occurrant, atque necessaria assensione prosequenda. Reputent secum ipsi, gravius peccari actione lædendo ægrotum, quam cessatione non juvando, lapsumque manu sua urgendo, quam permittendo, nisi suppetit certa, aut saltem valde probabilis ratio eum inhibendi. Donec spes superest non vana in viribus naturæ, adestque non inanis timor offensæ ab adhibendo medicamento, plus habet artis, & prudentiæ cessare, quam aleam jacere. Neque vero contendo oppugnare decantatum effatum Celsi, fatius esse, anceps remedium experiri, quam nullum, imo concedo, in magnis angustiis, & gravissima occasione licere, periclitari valde dubium, & periculosum remedium; quæle, exem. gr. proponitur a doctissimo Vallesio (a). Expurgatio materiæ crudæ in febre acuta evacuationis causa, non revulsione, sententia Vallesii, est vehementer ambiguum, & periculosum experimentum; quod testatur, se non esse

(a) *Lib. Apho. Hipp. 22.*

obituro, nisi aliunde certa mors sibi objecta videretur. Propterea mihi visum est, oblata non inani spe in viribus naturæ, & metu offensionis a medicamento, providentius esse, naturæ favorem opperiri, quam fortunæ; naturæ, inquam, favorem, quem in pauperibus integrum auctorem salutis pluries admirari est etiam contra paupertatis impedimenta. Subdo recentissima. Puella triginta circiter mensium cœpta vexari febris continua cum alvi fluxu die quinto penitus voce privata est, cum tanta oculorum obscuritate, ut cœca plane videretur. Hoc tempore casu ad eam accitus deprehendi, laborare duplici tertiana continua. Oblata promte sumebat, sæpe caput, sed sine violentia volutabat, membraque cetera libere movebat. Alvus frequenter soluta, excretaque varia erant, & primis ægrotationis diebus quinque vermibus permixta. Post diem 13 oculi clarescere incœperunt, & post 15 pristina luce perfusi sunt. Hoc tempore de voce nihil melius, quæ solum circa 20 diem valde remissa febris expedita fuit. Hæc puella cœca visum recuperavit, muta vocem, febricitans integram salutem. Ad istam quam parum contulit ars, quam multum natura, suis viribus integris usa, licet in tam tenella ætate multo sit imbecillior, quam in adulta! Non hirudines alicui capitis parti, uti optabant domestici, non vesicans occipiti apponi jussi, nec alia molitus sum, sine quibus salus æque sperari non posset. Divitiæ per sanitatem bellum intendunt naturæ copia ciborum, in morbis copia medicaminum. Revertor in viam. Cognitio certa futuræ mortis a Vallesio habita pro conditione usurpandi admodum ancipitis remedii, & periculosi difficiliter impetrari potest; si, ut ait Poeta,

Vivere sæpe solet, qui moriturus erat.

& Hippocratis testimonio, acutorum morborum incertæ sunt

sunt prænunciationes salutis, aut mortis. Quanto plura de ratione medendi æqua lance penduntur, tanto plura dubia obversantur in usurpatione remediorum; de quibus dubitandi ratio aperta, nec subtiliter excogitata est, quod multo frequentius expectationem fallunt, quam explent. Quid mirum igitur, si cordatiores Medici iis affectibus aliquando impediti, quos in aliis quotidie curant, tam sobrie parceque redundante medicamentosa supellectile utuntur, sæpe soli victus rationis acquiescunt? Non desunt tamen Medici sua experientia non satis edocti, qui remediis in suæ, aliorumque valetudinis detrimentum affluunt, deceptique suæ deceptionis ipsi pœnam luunt, tractatique ægrotantes. Ante tempus non multum in urbe celeberrima contigit, ut Medicus operosus senexque gravi morbo detentus propemodum omnes patriæ Medicos consuluerit, variaque remedia frequentaverit: quibus, & morbo tandem cessit; de cuius morte hoc vulgatum est Epigramma:

Mortuus est Medicus medicinis pluribus usus;

Et medicis. Fuit hæc copia causa necis.

De medio plures fato tolluntur eodem.

Ast miror Medicum sic periisse senem.

Si nocuit large præbendo pharmaca, pœnam

Ipse tulit, periit qui miser arte sua.

Ægris multa dedit medicamina, multaque sumsit;

Estque in peccato mortuus ille suo.

In eadem urbe paucis mensibus ante memoratam mortem Medicus alter remediorum parcus ægrotavit, & quemadmodum convaluerit, sic alteri Medico amico suo describit:

Solibus alternis, prægresso algore, reversas

Quinque tuli febres; compescuit indica cortex;

Sumpta tribus vicibus: pondus fuit uncia semis

Cum mistis drachmis nitri sine fece duabus.

Hæc

Hæc tamen ante, vias deterfit Cassia primas.
 Successit febris ventris restrictio tanta,
 Ut fuerit solum denis bis, & octo diebus
 Ter laxata, semel natura, bisque medelæ
 Adjectis stimulis. Herebant viscera visco,
 Glutine siue alio quasi tota aspersa fuissent.
 Atque licet pessum febris transacta dedisset
 Vires, & stomachus pauxillum admitteret escæ,
 Non sum diffusus, statuique obstare ferendo,
 Atque quiete moras tardæ superare salutis,
 Nec crebris, juxta morem, laxantibus uti.
 Consilio natura arrisit. Crescere sensim
 Cæperunt vires, nullo medicamine languor
 Imminui stomachi, mensæque redire voluptas,
 Sincerusque sapor vini, nota magna salutis.
 Sentio jamque meos majori ex parte lacertos
 Confirmatos, cor letum, mentemque serenam.
 Ars mea me iuvit, tamen hanc patientia vicit,
 Humanæ vitæ rectorix, domitrixque malorum.
 Est, Maro ait^(a), fortuna omnis superanda ferendo.
 Si bene perpendas, monitus complectitur iste
 De vi virtutis, quæ scripsit dogmata Zeno.
 Quod majus virtutis opus, quam pectore firmo
 Adversi Casus patienter spicula ferre?

Non aliter sentit Seneca^(b) adhortans Lucilium ad patientiam, qua inquit, vitam e gravibus morbis in tutum educatam fuisse. Patientia porro æque prodest ægrotantibus ad recipiendam salutem, atque sæpe Medentibus ad conferendam: abs quibus cupidioribus agendi postremo animadverti velim, non solum identidem esse dubia, obscuraque phlebotomiæ, & purgationis indicantia, sed earumdem

O o o

quo-

(a) Lib. 5. Ænei.

(b) In Epist.

quoque utilitatem ab omni suspitione, & litigio assertam non esse. Habuit utrumque præsidium plures clarosque oppugnatores Chrysippum, Erasistratum, Asclepiadem, aliosque ejusdem familiæ; quorum quidem placita a multis confutata, a plurimis derelicta fuerunt; tamen extra probabilitatem ita projecta non sunt, ut plane contemni debeant, careantque in præsens propugnatoribus. Quinimo mihi exhibitis paribus momentis pro phlebotomia usurpanda, vel omit-tenda (idem intelligo de purgatione) animadversio de natura remedii apud multos controversa non nihil ponderis haberet ad amplectendam omissionem, inde pariter commendatam, quod proclivius natura morbo concussa proster nitur importunis, quam opportunis sustinetur, & confirmatur, aut prostrata erigitur. Experimur quotidie, quam levibus impulsionebus humana compages dissolvatur, præsertim morbo aggrediente dissolutionem; cujus causa, si peccetur, gravior & testatior est in commissis, quibus peccati vis inest, nulla omissis. Vacuitas operis in ambiguis nisi pro natura est, contra esse non potest; atque utinam opus identidem contra non esset. Impatiens moræ, & continuis administrandis ægroto remediis nequit fieri, quin minus singula meditetur; adeatque sæpius periculum nocendi, quam capiat tempestivitatē auxiliandi, ut in omnibus ferme rebus frequentiores sunt mali occasiones, quam boni, & maxime in medicinalibus mortalitatem nostram agitantibus. Ceterum mentis nostræ infirmitas, artisque compar obstat, quo minus omnes errores caveri possint, quæcunque diligentia, & industria adhibeatur. Sequitur igitur, ut divini Medici sit, nunquam errare, magni raro errare, optimi omnes lapsus cavere, quibus æger in vitæ discrimen levi spe adducitur. Si vel magni, vel optimi animum induxisti, neutrum asseque-
ris

ris sine paritate remediorum respondente raritati præclariorum occasionum: quarum paucitate Hippocrates^(a) permotus suspicit, egregieque commendat Medicum, qui parum delinquit: *Certitudinem enim*, inquit, *exactam raro videre contingit*; sine qua quicquid molimur, non æqualiter quidem, sed omne ab errore intutum est. Hinc autem concipiendus non est præter rationem timor remediorum, testis, monitu Hippocratis^(b), artis impotentiae. Fuge quod redargui, itemque vitium contrarium; quod quidem altero minus est perniciosum, sed utrumque tui officii labes. Esto animatus, sed magis præparatus ad actionem; & necessariam instructionem conquirens, quæ sæpe desideratur, si rarius ages, etiam rarius opus frustraberis, aut depravabis. Neque vero habita disputatione alio animum intendi, nisi ut medicarum actionum regimen suaderem, quod vir sapiens in suæ vitæ ratione observat; qui quamvis instructus paratusque sit de rebus omnibus dubitare, hinc tamen non deterretur ab actione, sequendo, ut ait Tullius^(c), habentia insignem visum quemdam, & illustrem.

F I N I S.

Ooo 2

IN-

(a) *De veteri Medicina.* (b) *In Lege.* (c) *Lib. 1. de Nat. Deor.*

I N D E X

In quatuor Dissertationes de Regimine
Magnorum Auxiliorum.

A

- A**ccidentia quædam copulata cum delirio purgationem inhibent. *Pag.* 180
Ægroti faciem in acutis morbis meditari oportet, non cœli. 64
Ægroti regimen post phlebotomiam. 65
Ægrotus a magno vite discrimine ob hydrargyrum auri foliis redemptus. 310
Ægroti regimen sub finem salivationis, & post ipsam. 314
Aeris caliditas, siccitasque cum aliis adjunctis impedimentum est phlebotomiæ. 63
Aere impense calido, vel frigido tutum non est sudorem movere. 229
Ætatis consideratio pro deliberando sudore. 226
Aetii in mensium suppressione venam tali, & brachii incidentis requisita conditio. 69
Anasarca sub conditionibus a Galeno expressis phlebotomiæ non repugnat. 80
Andreæ Rosetti de usu hydrargyri epistola. 327
Antiquorum diligentia præparandi corpora ad expurgationem. 129
Auctoris ratio, cur scripserit de medica praxi. 4
Auctoris sententia de sanguine mittendo in febribus pestilentibus. 80
Auctoris praxis in exanthematum eruptione in febre maligna. 84
Auctoris ratio administrandi hydrargyri. 270

B

- B**alneum opportunum est alvi fluori genito a rheumatismo, 242
Bayle experimento rejicientis conarum ventriculi in vomitu respondetur. 187
Botalli, & Fabricii Hildani narratæ curationes infantium opera hydrargyri pensitantur. 283, & seq.
Bubone apparente in febre pestilenti non semper relinquenda est phlebotomia. 81, & seq.

C

- C**acochymia definitio. 24
Cacochymia non petit phlebotomiam ut evacuantem. 28
Cacochymia venarum non impedit phlebotomiam ut revellentem. 140
Caliditas siccitasque totius corporis non prohibent purgationem. 140
Calor æstivus, sudoresque vitandi sunt in usu hydrargyri ad salivandum. 287
Capitis effectus geniti a materia crassa non opponitur usui hydrargyri. 296
Coitu prægresso periculosa est venæ sectio in morbis acutis. 75
Concocta in febribus vomitu purganda non sunt. 194
Copia sanguinis petens imminutionem per phlebotomiam. 14
Copia mali succi duobus modis vires infirmat. 49

Cru-

Eruditas materiæ recusans purgationem explicatur . 152
 Curatio foeminæ ad extremum redactæ hydrargyro facta . 265, & seq.

D

Debilitatis inditia secundum diversos gradus . 46
 Debilitatis differentiæ ex Hippocrate . 50
 Delirii, & vigiliarum effectus considerantur respectu tundendæ venæ . 111
 Descensus intestinorum in scrotum purgationi adversatur . 178
 Differentia inter revulsionem, & derivationem . 38
 Dirimitur controversia, utrum liceat perdere foetum ad tuendam Matrem . 145
 Dolore sæviante purgandum non est . 184
 Dolore pleuritidis descendente non est omittenda phlebotomia . 160
 Dubitatio de morbis a Bellostio curatis hydrargyro dejiciente . 321

E

Epilepsiam aliquando hydrargyrum intulit, aliquando depulit . 276
 Erysipelas faciei repetitis purgantibus a Freind curatum . 170, & seq.
 Erysipelate frequenter tentati minus apti sunt ad salivationem per hydrargyrum . 299
 Ettmullerus vetans purgationem in erysipelate faciei rejicitur . 169
 Excretorum neque color, neque materiæ modus probat inter evacuationem, & evacuata similitudinem . 127
 Exanthemata in febribus malignis

apparentia critica non sunt . 83
 Exanthematis erumpentibus in febribus malignis non semper abstinendum est a phlebotomia . 85

F

Fabricii Hyldani curatio uteri prolapsus occasione partus . 178
 Febris a gallica colluvie progenita hypochautum permittit . 237
 Foramina invisibilia ab Antiquis posita non sunt figmenta . 213
 Fracastorius large concedens vinum salivantibus magis indulgit musæ, quam veritati . 309

G

Galeni historia de muliere defecta mensibus, & repetitione phlebotomiæ curata expenditur . 107
 Galeni praxis initio phlegmonarum ventriculi, & intestinorum abstinens a purgantibus tutior est . 175
 Galeni praxis in syncope vomitum cientis adprobatur . 206
 Glissonii experimentum de vaporibus facilius liquore penetrantibus membranas . 212
 Graviditas non obstat sudori idoneis remediis ducendo . 228

H

Habitus corporis momentum ad indicandum usum phlebotomiæ . 51
 Habitus corporis vomitioni incommodus assignatur . 198
 Habitus corporis indicat proclivitatem ad sudorem, vel repugnantiam . 226
 Hæsticos ab immunda venere licet cura.

curare hydrargyro . 298
 Heredia redarguens præceptum Fer-
 nelii redarguitur . 102
 Hippocratis præcepti generalis de
 venæ incidenda utilitas . 34
 Hippocrates post purgationem nun-
 quam præcepit phlebotomiam .
 138
 Hippocrates agens de purgatione
 gravidarum indicavit, quod tutius
 est , non quod unicam fieri po-
 test . 143
 Hippocrates solum permittit purga-
 tionem materiæ perfectæ coctæ ,
 aut turgentis . 155
 Hippocratis præcepto de purgatio-
 ne tres exceptiones adduntur . 157
 Hydrargyri primi administratores .
 248
 Hydrargyrum non resolvit tumores
 per intrusam humiditatem . 250
 Hydrargyrum ingenta mobilita-
 te est occasio calidorum morbo-
 rum . 255
 Hydrargyrum sæpe movet utiliter
 salivam , & alvum . 260 , & seq.
 Hydrargyri ad salivandum variæ
 doses . 267
 Hydrargyrum periculosius est in
 temperaturis calidis , siccisque ,
 quam pituitosis . 282
 Hydrargyri usus in pregnantibus
 non est expers periculi abortio-
 nis . 285 , & seq.
 Hydrargyri fumus non differt ab
 ejus substantia . 295
 Hydrargyri nimium impetum fa-
 cientis remedia . 307
 Hydrargyri genuinus modus agen-
 di . 320
 Hydrargyrum præstat admiscere le-
 vibus purgantibus , quam forti-
 bus . 324
 Hydrargyrum ad salivandum dul-
 ce , ad purgandum crudeum por-
 rigendum est . 226

I

Indicans generale hydrargyri ad
 educendam salivam . 277 , & seq.
 Insuetudo non deerret ab venæ se-
 ctione . 59
 Judicium de secunda vena in Va-
 riolis . 87

L

Lapidis bezoartici virtus valde
 dubia est . 218
 Lemerii similitudo ad probandam
 actionem hydrargyri in acidos
 humores nihil evincit . 259
 Leonardi Botalli , & Hildani narratio-
 nes de infantibus mercurio cura-
 tis expenduntur . 263 , & seq.
 Liene indurato purgantia Hippo-
 crates vetat . 177
 Lienosi memorati ab Hippocrate
 salivationem per hydrargyrum
 non ferunt . 299
 Litigium de vomitu ciendo in u-
 teri prolapsu dirimitur . 207

M

Magnitudo morbi exigit venæ
 sectionem vel sine redundan-
 tia mali succi . 132
 Martiani ratio contra phlebotomiam
 tali ad educenda menstrua exa-
 gitatur . 70 , & seq.
 Materia , quæ cruda non erat ante
 febrem , hac oborta cruda eva-
 det . 155
 Materia coquitur , aut tota simul ,
 aut partite . 156
 Menstrua fluentia mediocri vom-
 itorio non interdiciunt . 200
 Menstrua purgatio , vel imminens ,
 vel præsens obstat salivationi . 289
 Morbi hydrargyro curati enume-
 ran.

rantur. 274
 Morbi tutius curabiles per Hydrargyrum dejiciens recensentur. 321
 Motus humoris ad cutem non opponitur eductioni salivæ per hydrargyrum. 291
 Multitudo succorum, si magna est, prohibet sudationem. 232

N

Naturæ agendi modus ex Hippocrate. 262
 Naturæ opera elucet in salivatione facta in variolis confluentibus. 262
 Neoterici purgantes per inferiora tempore verno recedunt ab Hippocratis praxi. 197

O

Obstructio paulatim facta, & vetus plus habet momenti ad dissuadendam phlebotomiam, quam suadendam. 104
 Opiniones oppositæ de curanda lenteria examinantur. 84
 Os, faucesque ab aere externo refrigeratæ aptiores sunt hydrargyri propensione. 256

P

Palmarii argumenta pro evincenda frigidity hydrargyri. 251
 Partes diversæ sanguinis ex aperta vena promiscue manant. 33
 Phlegmonis incipientibus cruda materia non repugnat revellenti purgationi. 161
 Phthisis usu hydrargyri in viro melancholico genita. 297
 Plenitudinis multiplex est differentia. 15, & seq.
 Plenitudo vasorum non est causa proxima febris. 25

Plenitudinis ad vires variæ sunt explicationes Antiquorum, sed nulla clara. 17

Plenitudinis ad vires nova explicatio. 19

Pleuritidis curandæ ratio quorundam Recentiorum rejicitur. 234, & seq.

Poterii argumento sanguinem copia nocere non posse respondetur. 11

Puerorum copiosus perspiratus magis obstat phlebotomiæ, quam purgationi. 141

Pueri ad vomitum Senibus parationes sunt. 199

Purgantia sæpius non invadere vitales succos, quam excrementa contra Helmontium probatur. 123

Purgantium non attrahentium similia in diversis morbis habendus est delectus. 130

Purgatio non est certum impedimentum fluentium lochiorum. 146

Purgatio obita in statu febris stigmaticæ cum sudore. 167

Purgantia opportuna febricitantibus tempore æstivo. 147

Purgantia temere non adhibentur menstruis fluentibus. 150

Purgationis in dysenteria utilitas. 176

Q

Qualitas peccantis humoris expurgandi declaratur. 251, & seq.

R

Ratio, cur sudor aliquando paralyticis noceat, aliquando prodest. 238

Refrigeratio non est primarius, & perpetuus effectus venæ sectionis. 12

Re.

Revulsionis definitio, ejusdemque
phlebotomia faciendæ indicans. 36

S

Salivatio quatuor percurrit genera
ralia tempera, ut aliæ fluxiones.
311, & seq.

Sanguinis effusio usque ad animi deliquium permittitur, non purgatio. 136

Senecæ sententia de retractandis ab aliis tractatis. 1

Senectutis consideratio in usu phlebotomiæ. 58

Splessii experimentum de aqua in glaciem densata opera hydrargyri. 251

Situs expellendi humoris sudorem movendum indicat. 223

Sudore manante licet aliquando sanguinem emittere. 117

Sudori movendo imbecillitas partium principalium opponitur. 233

Sudorem inter aliasque naturales vacuationes discrimen. 214

Sudoris indicans assignatur. 220

Sudoris aquosæ materiæ aliæ particulæ admiscuntur. 210

Sudoris ducendi ratio in febribus ab Celso indicata efficacior est quibusdam usitatis remediis. 235

Sudoris materia proxima, & remota. 244

Sydenhami securitas in infantibus venam aperientis nimia est. 55, & seq.

Sydenhami sententia de ratione ducendæ salivæ expenditur. 290

Sydenhamus, & Joannis Freind diversa praxis in curando erysipellate faciei. 89

T

Temperamenta minus apta ad phlebotomiam pensitantur. 51

Tenuitas sola humorem turgentem non reddit. 166

Tremor nervorum sudationem non admittit. 240

Tullius neglexit libros Philosophorum vacuos accurata ratione scribendi. 2

V

Vallesii ratio de mittendo sanguine in morbo magno Hippocratis doctrina infirmatur. 43

Vallesii, & Prosperi Martiani oppositæ sententiæ de vomitu in morbis capitis explicantur. 203

Vallesii observatio de pituita crassa per poros cutiseducta. 222

Venæ sectio habet vires ingenas, & acquisitas. 7

Venæ sectionis examen adhibendæ in conjunctione febris hæcticæ, putridæque. 98

Venæ solvendæ in febribus cum alvi fluxu multiplex consideratio. 114

Venæ sectio tali repetita in enixis consideratur. 72, & seq.

Venæ causa de plenitudine a frigore constringente vasa rejicitur. 20

Venæ sententia de mittendo sanguine in hæctica febre, multa habet spinosa. 199

Venæ sententiæ non favet historia Hippocratis, de viro in Oeniadis. 101

Venæ sententiæ de tundenda vena in febribus mesentericis impedimenta ostenduntur. 113

Verum vero contradicere nequit, itemque ratio experientiæ. 57

Ulcus malignum linguæ hydrargyro
curatum. 273
Ulceribus in ambitu corporis citius
justo siccatis salivatio supernis
partibus infestior est. 304
Ulrichi Hutten lues venerea guaja-
co curata. 269, & seq.
Vomitio in tabidis suspecta est. 204
Vomitio generalis est evacuatio. 190
Vomitionis dotes a Glissonio assi-

gnatæ considerantur. 201
Vomitorium quadam peculiari dote
ad os ventriculi dirigitur. 189
Vomitorium tantum forte in præ-
gnantibus metuendum est. 199
Vvillisii opinio de curandis magnis
morbis per vomitum admodum
dubio nititur fundamento. 196
Vvillisius sali alchali vim eliciendi
sudoris arbitrario tribuit. 216

INDEX IN DISSERTATIONEM De Medico Operoso.

A

Agilitas mentis humanæ occasio
est, cur incidat in multos er-
rores. 335
Alteratio cita, & continua corpo-
rum mutare apta est medicami-
num effectum in contrarium. 364
Alvi fluxus utilis esse potest pleu-
ritico, antequam tabidus fiat. 428
Anaxagoræ sophisma de nigro co-
lore aquæ. 334
Antiqui ultra diem tertium sangui-
nem pleuritico non detraxerunt. 428
Apoplexiæ exemplo ostenditur, plu-
res differentias morborum, &
causarum esse inutilem ostenta-
tionem artis. 347, & seq.
Archibaldi Pitcarnii nimium favo-
rabilis sententia de laxantibus. 445
Aromatarum dolore lateris laborantis
historia. 432
Ars maxime conjecturalis redditur
ex cujusque remedii quantitate. 377
Ascitæ causa assignata ab Syden-
hamo parum congruit curationis

methodo ab eo tradita. 466
Ascitæ causæ multæ opponuntur
vehementibus purgantibus. 465,
& seq.
Asclepiadis scomma in veteres Me-
dicos. 444
Auctor describit, quemadmodum
se ipsum curaverit, & filium suum
natum majorem. 410, & seq.
Auctor gratiam multitudinis non
quæsiuit. 413

B

Bilis consideratione ostenditur
difficultas examinandi differen-
tias humorum a Sanctorio produ-
ctas. 360

C

CArmen Medici remediorum
parci de sui curatione. 472
Gelsi methodus de curando hydro-
pe. 467
Gleonactidis historia probat, posse
congeri in ventriculo biliosa, re-
dundante in corpore humore pi-
tuitoso. 351
Coctione materiæ partitim facta pur-
ga

gationis inditia obscura sunt . 456
 Coctionis materiæ febrilis descrip-
 tio . 447
 Cognitio certa futuræ mortis sine
 usu ambigui remedii difficulter
 impetrari potest . 471
 Collatio inter Medicum parvum
 phlebotomiæ in febribus , & ef-
 fusum . 405
 Colori rejectorum fidendum non est .
 353
 Colorum , & saporum differentiæ
 incerto denotant mutationes hu-
 morum . 366
 Consuetudo popularis medendi in-
 ducta est consentiente vulgo cum
 falsis Medicorum iuditiis . 369
 Cortex peruvianus usu frequenti
 purgantium vi sua spoliatus ali-
 quando est . 453

D

DEmocritus ne finitæ quidem vi-
 tæ certa esse signa iudicavit . 345
 Dolor capitis ab sanguinis missione
 impense adauctus . 440

E

EPicuri error tolerabilior , quam
 Arcesilæ . 333
 Epigramma de morte Medici ope-
 rosi . 472
 Exemplorum ductus fallax est igno-
 rata vera causa prægressi even-
 tus . 462
 Exercitationis labore spiritus inha-
 bilis redditur studiis acrioribus .
 378

F

Febbris in eadem specie constitutæ
 humor diversus a periodo non
 patet . 356

Febrem inter , & phlebotomiam cer-
 ta contrarietas non versatur . 386
 Febricitantes parciorem sanguinis
 effusionem passi citius reconva-
 lescent . 404
 Febricitantis acute in manus Medi-
 ci operosi lapsi commiseratio . 452
 Febrilis materiæ evacuatio solet in
 acutis a natura differri ad statum .
 449
 Febris circuitus a quolibet humore
 produci potest . 357
 Febris sine inflammatione Hippo-
 crati fuit impedimentum venæ
 incisionis . 409
 Febris vehementia ex Hippocrate
 notat separationem humorum .
 409
 Febrium eventus certo non probat
 utilitatem phlebotomiæ . 390
 Francisci Vallesii gravissima senten-
 tia de usu remediorum . 331
 Frequentator medicaminum sæpius
 ab scopo aberrat , quam appro-
 pinquat . 383
 Frequentia medicaminum adproban-
 da , vel rejicienda nequit gene-
 ratim definiri . 469

G

GAleni sententia tot sunt metho-
 di medendi , quot ideæ mor-
 borum . 458
 Glissonii ratio pro purgationibus in
 febribus lentis confutatur . 457
 Gravitas corporis in febribus non
 est certum argumentum ducendi
 sanguinis . 327

H

Hippocratis imitator esse nequit
 Medicus destitutus Philoso-
 phiæ moralis præceptis . 378
 Hippocrates dotem primam sapien-
 tiæ ,

- tia, & Medicinæ argenti contem-
ptum constituit. 384
Hippocrates non elicit Anaxioni
sanguinem sexto die ob delirium
superadditum. 478
Hippocratis dilatio expurgationis in
febris intermittentibus. 454,
& seq.
Historia Pistoris Monspeliensis hy-
dropici a Riverio curati. 461
Hollerii animadversio de diversa ra-
tione curandæ pleuritidis pro di-
versitate regionum. 432

I

- I**nditia producta ab Sanctorio pro
cognitione quantitatis, hanc sin-
gularem non designant. 370
Inflammationum principium diver-
sas habet partes, non tamen ma-
nifesta signa diversitatis. 424
Joannis Freind admonitio de ratio-
ne curandarum febrium per pur-
gantia. 459
Juvantium, & lædentium indicatio
indiget multiplici animadversione.
368

L

- L**axantium frequens usus in fe-
bribus continuis incommoda.
445, & seq.

M

- M**atæriæ turgentis variæ sunt
interpretationes, signaque
incerta. 490
Medentibus nimium proclivibus ad
agendum summam consideran-
da proponuntur. 470
Medentium fatum a Plinio indica-
tum, & Senecæ præceptum eis-
dem salutare. 382
Medicamentorum nimia fiducia i-

- dentidem peccatur. 393
Medico servandum est regimen sua-
rum actionum, quale servat vir
sapiens suæ vitæ rationis. 475
Medico neque convenit perplexitas
academica, neque vulgaris procli-
vitas ad agendum. 361
Medici assidenti graviter ægrotanti
conveniens mentis status. 376
Medicorum error in curando Octa-
vio Cæsare Augusto demonstrat
infirmiorem signorum. 346
Mens a sensuum noxa tuta non est.
377

- Methodus curandæ pleuritidis, si ab
eventu scienda est, nulla sanciri
potest. 437
Methodicorum secta magis aliis con-
venit cum Physica Epicuri. 340
Morbus nullus habet unicam cer-
tamque curationem. 468
Mos obtinuit, ut pene nihil negli-
gentius agatur negotio reparandæ
salutis. 381
Motus laboriosus corporis febrem
antecedens non indicat uberiores
sanguinis effusionem. 393
Mulieris hydropicæ curatio. 465
Mulieres venæ sectionem minore ne-
gotio, quam viri perferre solent.
470
Multa in certo rerum concursa co-
gnita aliis tradi nequeunt, qua-
lia sensu percepta sunt. 450
Multiplices patent viæ ejectioni su-
perflui, unica reparationi deper-
diti. 402

N

- N**aturæ imitatio difficillima est.
415
Nobilis Patavini pleuritide laboran-
tis historia. 434
Novitatum conquisitio vitæ spatium
contrahit, producit artis. 343
Oc-

O

Occasio domina est eorum, quæ
fato, & fortunæ tribuuntur.
374

P

Patientia æque benefica est ægro-
tis, atque Medicis. 437
Philosophiæ ex Seneca prima pro-
missio. 336
Platonis sententia de purgatione. 442
Phlebotomiæ usurpandæ paribus
momentis exhibitis, vel omitten-
dæ, omissio anteferenda est. 474
Plenitudo ad vires nullum exhibet
argumentum phlebotomiæ in fe-
bribus. 395
Plenitudinem a solidi causâ geni-
tam Antiqui agnovere. 399
Plethora apparens Vernæ non est
causâ febris, sed effectus. 398
Pleuritica novies intra septem dies
detracto sanguine octavo perit.
431
Pleuritides magnæ abeunt in apo-
stema. 430
Posteritas de causis statim circuitus
febrilis nihil attulit anteponendum
Galenî silentio. 345
Principii pleuritidis notitia nequit
obtineri ante incrementum, neque
incrementi ante statum. 406
Prudentiæ lex in obscuris servanda.
439
Purgatio in febribus intermittenti-
bus destituitur regula innixa co-
ctioni. 454
Purgationis usus vetustior est, quam
phlebotomiæ. 441

Q

Qualitates multæ copulantur
cum crassitudine, & tenuitate
humorum non conjectabiles
ex motu. 357
Quatuor conjunctiones signorum af-
signatæ a Freind nihil evidenter
concludunt. 414, & seq.
Quies est pars præstabilior medicæ
praxeos, quam actio. 386

R

Ratio unica vitandorum erro-
rum in medendo est ductus
conjecturæ fortem assensum tra-
hentis. 459
Remedia multo frequentius expecta-
tionem fallunt, quam explent. 472

S

Sanguinis effusio solum directo
opponitur redundantia. 389
Sanguinis effusio vere peracta præ-
servationis gratia aliquando ve-
hementer nocuit. 403
Sanguinis ducendi in febribus unica
tantum est indubitata ratio, re-
liquæ ambigæ. 406
Sanguinis effluvii spontanei in qua-
tuor ægrotis expensis a Freind
non fuit primarius nîsus naturæ
ad salutem. 472
Sanguinis effusi colores ejusdem qua-
litates incerto denuntiant. 354
Sanctorii loci signorum sumti ex
antecedentibus, necessariis, &
consequentibus. 359
Sapientius est quadam nescire, quam
scire. 342
Saporum inefficacia ad detegendam
qualitatem dominantis humoris.
350

Servientes quæstui amplectuntur
præcepta sedulitatem non exigen-
tia . 379

Similitudo ventriculi diversitate ci-
borum fatigati cum mente . 339

Socratis oratio in qua sibi contra-
dicit . 335

Sudor omnibus morbis conveniens
est evacuatio . 422

Sydenhami methodus curandæ pleu-
ritidis . 429

Sydenhami ratio pro copiosa san-
guinis extractione in pleuritide
exagitur . 436

Sydenhami præceptum de iteranda
fidenter phlebotomia in pleuriti-
de periculosum est . 435

Sydenhami præceptum generale de
curatione ascitæ redarguitur . 464,
& seq.

T

Transacto tempore revulsionis,
& derivationis in pleuritide

naturæ robori fidendum est, non
phlebotomiæ . 427

V

Varietatem effectuum ab eadem
caussa corporum diversitas
parit . 359

Vena intempestive resignata plus
affert detrimenti, quam levami-
nis tempestive . 400

Venæ sectio non habet requisitam
contrarietatem cum causa pro-
xima febris . 390

Venæ sectio est idonea præparare
sanguinem ad naturam bilis . 392

Venæ sectio multum habet fortuiti,
& rarius expectatione facit ad se-
dandas febres . 408

Venæ ratio pro secunda vena in
febris refellitur . 396

Vitium maximum est in studiis du-
bitandi impatientia . 380

Una natura rerum unam tantum
subjicere potest veritatem . 337

Finis Indicis .

ERRATORUM CORRECTIO.

<i>Pag.</i> 5	<i>lin.</i> 29	principem	<i>lege</i>	princeps .
<i>Pag.</i> 45	<i>lin.</i> 6	Ponte	<i>lege</i>	Ponce.
<i>Pag.</i> 110	<i>lin.</i> 9	violentia	<i>lege</i>	virulentia .
<i>Pag.</i> 155	<i>lin.</i> 14	argumento	<i>lege</i>	augmento .
<i>Pag.</i> 221	<i>lin.</i> 23	Armenum	<i>lege</i>	Armenium .
<i>Pag.</i> 223	<i>lin.</i> 28	alvum	<i>lege</i>	solum .
<i>Pag.</i> 235	<i>lin.</i> 1	perniciosorem	<i>adde</i>	generatim conceptam .
<i>Pag.</i> 263	<i>lin.</i> 27	gravedens	<i>lege</i>	gravcolens .
<i>Pag.</i> 279	<i>lin.</i> 26	ablutionem	<i>lege</i>	ablationem .
<i>Pag.</i> 388	<i>lin.</i> 32	ex accidenti	<i>lege</i>	ut privativa .
<i>Pag.</i> 407	<i>lin.</i> 26	paret	<i>lege</i>	pareat .

Alia patientia benevoli Lectoris corrigenda relinquo.

COLLECTIO MUSEI HISTORICO-NATURALIS

1. <i>Canis familiaris</i> L.	1. <i>Canis familiaris</i> L.
2. <i>Felis domestica</i> L.	2. <i>Felis domestica</i> L.
3. <i>Lynx baileyi</i> L.	3. <i>Lynx baileyi</i> L.
4. <i>Uncia uncia</i> L.	4. <i>Uncia uncia</i> L.
5. <i>Nimrodus metaxus</i> L.	5. <i>Nimrodus metaxus</i> L.
6. <i>Homotherium</i> L.	6. <i>Homotherium</i> L.
7. <i>Ameloblastus</i> L.	7. <i>Ameloblastus</i> L.
8. <i>Stegodon</i> L.	8. <i>Stegodon</i> L.
9. <i>Elephas</i> L.	9. <i>Elephas</i> L.
10. <i>Mastodon</i> L.	10. <i>Mastodon</i> L.
11. <i>Megatherium</i> L.	11. <i>Megatherium</i> L.
12. <i>Archaeotherium</i> L.	12. <i>Archaeotherium</i> L.
13. <i>Platygonus</i> L.	13. <i>Platygonus</i> L.
14. <i>Protherium</i> L.	14. <i>Protherium</i> L.
15. <i>Macropus</i> L.	15. <i>Macropus</i> L.
16. <i>Peromyscus</i> L.	16. <i>Peromyscus</i> L.
17. <i>Sciurus</i> L.	17. <i>Sciurus</i> L.
18. <i>Castor</i> L.	18. <i>Castor</i> L.
19. <i>Fiber</i> L.	19. <i>Fiber</i> L.
20. <i>Citellus</i> L.	20. <i>Citellus</i> L.

Specimens of the above animals are deposited in the Museum of the University of Cambridge, and are open to the inspection of all persons desiring to examine them.

The following are the names of the persons who have contributed to the collection of the above animals:

1. *Canis familiaris* L. - Mr. J. S. ...

2. *Felis domestica* L. - Mr. J. S. ...

3. *Lynx baileyi* L. - Mr. J. S. ...

4. *Uncia uncia* L. - Mr. J. S. ...

5. *Nimrodus metaxus* L. - Mr. J. S. ...

6. *Homotherium* L. - Mr. J. S. ...

7. *Ameloblastus* L. - Mr. J. S. ...

8. *Stegodon* L. - Mr. J. S. ...

9. *Elephas* L. - Mr. J. S. ...

10. *Mastodon* L. - Mr. J. S. ...

11. *Megatherium* L. - Mr. J. S. ...

12. *Archaeotherium* L. - Mr. J. S. ...

13. *Platygonus* L. - Mr. J. S. ...

14. *Protherium* L. - Mr. J. S. ...

15. *Macropus* L. - Mr. J. S. ...

16. *Peromyscus* L. - Mr. J. S. ...

17. *Sciurus* L. - Mr. J. S. ...

18. *Castor* L. - Mr. J. S. ...

19. *Fiber* L. - Mr. J. S. ...

20. *Citellus* L. - Mr. J. S. ...

~~Ps~~
Medic.

~~g.~~ 120 v

